



115-5
37

Theological Seminary.

PRINCETON, N. J.

Part of the
ADDISON ALEXANDER LIBRARY
which was presented by
MESSRS. R. L. AND A. STUART.

Case, Division

Shelf, Section

Book, No.

500
3112

Rec.

Rev. J. A. Alexander

Rev. J. B. Allen
New York

SERMONS:

DOCTRINAL AND PRACTICAL,

BY

SEVERAL AUTHORS.

W A Z :

TALÍM O HIDÁYAT KE LIYE,

KAI EK MUSANNIFON KE.

J. Warren, editor

ALLAHABAD:

PRESBYTERIAN MISSION PRESS.

1846.

As principal Editor of this volume of Sermons, it is proper to say, that some of the authors gave me permission to curtail, or otherwise alter their performances; and I have, to a small extent, availed myself of this permission. Others gave me no discretionary power, and their Sermons are given as sent.

The delay in publishing the work has arisen partly from the promised sermons, in some cases, not having been sent promptly, and partly from the fact that the work could only be carried on in the intervals of other engagements.

My best thanks are due, and offered, to those who have so kindly contributed to the work.

JOS. WARREN.

Allahabad, 2 March, 1846.

ERRATUM.

The initial of the Christian name of the Rev. Mr. Hoernle is by mistake printed P. It should be T.

FIHRIST.



Safha.

I. Khudá kí khássiyaṭ aur sifaṭon ká bayán,	1
II. Khudá kí sifaṭon men,	10
III. Taslis ke bayán men,	21
IV. Khudá ke sáth insán kí nisbat,	29
V. Insán kí buráí,	34
VI. Masíh ká kafára karná,.. .. .	38
VII. Masíh kí sadáqat gunáh kí muáfí kí bunyád,	43
VIII. Masíh kí mahabbat ká bayán,	51
IX. Ímán kí bábat,	57
X. Lút kí jorú ká ahwál—Pahlá Hissa,	64
XI. Lút kí jorú ká ahwál—Dúsrá Hissa,	69
XII. Sar i nau paidá hone men,	74
XIII. Taqaddus kí bábat,	84
XIV. Ashá i Rabbání, yá fasah i Masíhí,	90
XV. Masíhion kí jawábdihí,	101
XVI. Masíh hamárí rástí, pákízagí aur khalásí,	108
XVII. Adálat ká dín,	114
XVIII. Roza i haqíqí kí kaifiyat,	119
XIX. Khudá kí mahabbat,	128
XX. Musibaton men tasallí,	138
XXI. Khudá apne logon kí já i panáh,	144
XXII. Rúhání bázár kí bábat,	148
XXIII. Rúhání laráí kí bábat,	152
XXIV. Itwár, yá sabat kí hifázat,	155
XXV. Qináqat kí bábat,	164
XXVI. Masíh ká júá muláim,	172
XXVII. Rúhání daur daurne kí bábat,	181
XXVIII. Chaurásiwān Zabúr,	189
XXIX. Rúhání gam kí mubárakbádí,.. .. .	196

XXX. Isá Masíh ká iqrár i wájib karná,	199
XXXI. Rúhání zindagí,	202
XXXII. Shari'at ká k̄hulása,	205
XXXIII. Sabab ki jin se dunyá Masíhí mazhab se dushmaní rakhtí hai,	208
XXXIV. Masíh kí bheṛeṇ kaun haiṇ ?	216
XXXV. Imán kí zurúrat,	220
XXXVI. Dil kí pákízagí kis tarah hásil ho saktí hai ?	223
XXXVII. Isá Masíh apní ummat ká bachánewálá hai,	226
XXXVIII. Pahlá Zabúr,	229

MASÍH KE MANSAB.

Masíh kí Miyánjigarí kí k̄hássiyat,	241
Masíh kí Nabúwat ká pahlá hissa—K̄hudá kí marzí ko zahir karná,	246
Masíh kí Nabúwat ká dúsrá hissa—Aql ko raushan karná,	249
Masíh kí Kahánat kí qism aur zurúrat,	253
Hamáre Sardár Káhin kí qurbání kí k̄húbí—Us kí Kahánat ká pahlá hissa,	257
Masíh kí sífárish karní—Us kí Kahánat ká dúsrá hissa,	261
Masíh ká hamáre liye badlá dená—Us kí Kahánat ká pahlá hásil,	265
Mírás Masíh kí qurbání se k̄harídí húí—Us kí Kahánat ká dúsrá hásil,	269
Masíh ká Bádsháhí mansab—Us ká rúhání asr insán ke dil par,	274
Masíh ká Bádsháhí mansab—Us ká intizám o parwardigárí bar- guzídoṇ ke wáste,	279

I.

KHUDÁ KI KĦASSIYAT AUR SIFATON KÁ BAYÁN.

REV. J. WILSON KI TASNÍF.

Kyá tú talásh karne se KĦudá ko daryáft kar saktá ? yá Al Qádir ko kullí daryáft karne ke qábil hai ? Wuh ásmánon se únchá hai ; tú kyá kar saktá ? pátál se bhí néchá hai ; tú kyá pahcháan saktá hai ?—
Aiyúb, 11 : 7, 8.

Jo ádmí ki kisí bádsháh, yá sardár, yá áqá kí kĦidmat qabúl kare, jis ke háthon meñ us kí zindagí aur kĦairiyat haiñ, agar áqil aur shuúrwár ho, albatta apne áqá ke mizáj aur marzí, aur ádaton ke daryáft karne meñ barí koshish karegá. Yún us ke ihsán aur razámandí ke hásil karne ká wasila háth átá hai. Aur isí tarah kĦádím ko ma-lúm ho játá hai, ki kaun kaun kám us ke áqá ko kĦush áte haiñ, aur wuh kin kámon se bezár hotá hai. Aur jo kĦádím ki in báton kí daryáft karne men gáfil ho, nádán aur qusúrwár tĦahre ; aur mud-dat na guzre jab tak us ká áqá us se bezár hokar use tádib aur sazá degá.

Wuhí bát sachchí aur sábit hai baní ádam aur un ke KĦáliq ke darmiyán. Wuh hamará Málik aur Áqá hai, aur ham us ke bande. To ham par farz hai, ki hattal maqdúr Málik kí marzí aur sifaton ko daryáft karen. Kyúnki jo jo in se náwáqif rahe, albatta bahut bár jab samajhtá, ki apne KĦáliq kí marzí bajá látá hai, bajáe us ke wuh us kí behukmí kartá howe ; aur sawáb aur razá ke badle ázáb aur sarzanish us se páwegá.

Lekin insán, jo kotáh nazar aur qásir ul áql hai, kis tarah se apne KĦáliq ko daryáft kare ? Wuh RuĦ hai, wuh “Mubáarak, Qádir i wáhid, bádsháhon ká Éádsháh, aur kĦudáwandon ká KĦudáwand hai : baqá faqat usí ko hai ; wuh us núr meñ rahtá, jis tak koí pahunch nahíñ saktá ; aur use kisí insán ne na dekhá hai, na dekh saktá.” 1 Tim. 6 : 16. To bashar kyá hai, ki apní áql i qásir se us kí zát aur sifát kí tahqíqát aur máhiyat ko daryáft kare ! Is amr meñ ek hí bát hamáre iĦhtiyár meñ hai ; yañe jahán tak KĦudá ne apní zát aur sifát ká izhár kiyá hai, wuhán tak khojte khojte daryáft kar sakte haiñ. Alláh kí marzí na hotí, ki apná izhár kare, to baní ádam qiyámat tak táríkí aur maut ke sáye meñ rahá karte. Áql ká maqdúr to hai, ki kĦilqat par nazar karne se bazí báten us ke haqq meñ darváft kare. Kyúnki “Aflák KĦudá ká jalál bayán karte haiñ, aur ásmán us kí dastkárí díkháte haiñ. Ek dín dústre dín se báten kartá hai, aur rát rát ko ma-

rifat baḡhshtí hai. Un ká qaul nahín, un kí báten nahín, un kí áwáz nahín, kí suní jáwe. Sári zamín meñ un kí raftár záhír hotí hai, aur dunyá ke kináron tak un ká kalám pahunchtá hai.” Zab. 19 : 1—4. Aur “Ḳhudá ká gazab ásmán se ádmíon kí sári bedíni aur badkárí par záhír hotá hai, kí we sachcháí ko badkárí meñ band karte haiñ. Kyúñki Ḳhudá ká hál jo kuchh maḡlúm ho saktá hai, un par záhír hai, kí Ḳhudá ne un par use záhír kiyá hai. Kyúñki us kí jo sifateñ ná-dídaní haiñ, yañe us kí azalí qudrat, aur Ḳhudái, áfrínish i álam se us ke kámon meñ aísí dikhláí játi haiñ, kí we beuzr haiñ.” Yañe Ḳhudá ne ásmán aur zamín ke banáne meñ apní qudrat, aur hikmat, aur mihr ke ásár yahán tak záhír kiye, kí jo koí áñkheñ aur aql rakhtá hai, beuzr hogá, agar Iláhí qudrat, aur hikmat, aur mihr ke ásár un meñ na dekhe. Pas, jo jo guroheñ, kí “Ḳhudá kí sachcháí ko jhúṭh se badal dálkar Ḳháliq ke badle maḡhlúq kí parastish aur bandagi” karte haiñ, apní áñkhon aur aql par jabr karte haiñ ; aur Ḳhudá wájiban un ko ruswái kí ḡhwáhishon aur náqábil aql meñ chhoṛtá hai, kí we náláiq kámon meñ raheñ. Yún, har ek guroh aur har ek shaḡhs, jo Ḳhudá apne Ḳháliq ko chhoṛ aur kisé chíz kí parastish kare, qiyámat aur ádálát meñ beuzr aur mujrim ṭhahregá ; kyúñki unhon ne apne maqdúr tak us ko nahín ḡhúñḡhá, aur jáñ bújhke maḡhlúq ke píchhe paṛe.

Ḳhudá kí pák zát rúhání aur nádídaní hokar wuh insán kí pah-chán aur shináḡht se báhar hai. Aur bagair ilhám i Iláhí kí kumak ke, us kí sifát insán kí tahqíq aur daryáft se baíd haiñ. Aql i qásir aur mahdúd ká kyá maqdúr, kí wajúd i bepáyáñ ko mápe, aur hudúd us ke liye ṭhahráwe ? Isí sabab se hai, kí jahán kahín baní ádam meñ se kisé ne apní aql aur fahm se Ḳhudá kí ḡhássiyat aur sifát ká bayán karne cháhá, aur jis tarah kí ḡhidmat aur parastish se razá i Iláhí há-sil howe, us kí ṭalím aur tadbír meñ saho aur galatíáñ milí húi haiñ.

Ḳhudá ne aiyám i qadím meñ waqt ba waqt apní marzí aur ahkám baní ádam par ízhár kiyá. Us meñ se kam o besh hadís aur riwáyaton ke wasíle se sári qaumon aur qabílon ke taríqon meñ daḡhl payá hai. Yún aksar har ek mulk aur mazhab kí kitábon meñ bazí báteñ haiñ, jo sachchí aur durust haiñ ; lekin sáth un ke bahut saho aur galatíáñ milí húi haiñ. Hindúon ke Shástaron aur Puránon ke mutábíq Ḳhudá Taḡlá bhalí burí sifaton se mausúf hai. Wuh bhalá aur burá bhí kartá hai. Wuh gunáh kartá, aur auron se bhí karwátá hai. Wuh gunáh se nirálá aur gunáhon meñ milá húa hai. Wuh ek makán meñ gunáh aur badí se nafrat rakhtá, aur us kí sazá bhí detá hai : dúsre makán meñ us se ḡhush hotá, aur us ke karnewále ko dilásá detá hai. Wuh ek makán meñ jhúṭh aur daghá se ḡhin rakhtá hai : dúsre makán meñ wuh áp hí jhúṭhá, aur farebí, aur daghábáz ṭhahartá hai. Ek makán meñ wuh lálach, aur shahwat, aur jhagṛe kí mamánaḡt kartá hai : aur kaí ek makánon meñ wuh áp hí lálchí, aur shahwatí, aur jhagṛalú ṭhahartá hai. Qatā nazar baní ádam ke darmiyán kisí tarah kí galat aur kám i karíh maujúd nahín hai, kí jis meñ Ḳhudá Taḡlá áp mubtalá na húa hai, agar Hindúon kí díní kitábeñ má-ní jáeñ. Aur is ká sabab yih hai, kí un ke shaḡir aur kabíton ne apne aṭkal par daṛke Ilhám i Iláhí kí hidáyat na páí. Yún ek ek ne jo

kuchh ki us ki samajh mein munásib thá, yá us ke matlab baham pahuncháne ko kám áwe, so likhá.

Qurán mein chándní sí roshní Tauret Injíl ki taraf se chamaktí hai. Mahammad Yahúd aur Nasráníon ke darmiyán jitá thá. Us ki qaum bhí hazrat Ibráhím ko apná báp jánkar us nisbat mein tafákhur karte the. Us ki jorú i auwal, aur ghar ke rishtadár, Tauret Injíl ko parhte the. Ba sabab is ke Qurán mein Iláhí khássiyyat aur sífat Hindúon ki kitábon se niháyat khássa, aur bartar, aur bahál nazar áte hai. Taubhí Mahammad ne apne aṭkal par takiyá karke, aur apne maqsad ko pahunchne ke liye Iláhí sifaton mein khalal áne diyá. Us ne Alláh ki bazi sifaton ká bayán nahín kiya, aur bazon mein ikhtiláf zahir kiya. Apne pairaon ki jamíyat ke bagháne aur kasír karne ki khátir, un se qaul kiya, ki Alláh un sabhon se yahán tak rázī hai, ki albatta *unhen* bihisht mein qabúl karegá; aur wuhán un ke wáste nafs pálnewálí khushían kasrat se árásta karegá. Yúñ us ki sachcháí aur páki ke úpar parda phailáyá játa, aur bhale bure ká imtiyáz dafa kiya játa hai. Aur Alláh ki sifaton ki roshní mánind sūraj ki kiran ki, jab abr i siyáh us par phaile, sáf nazar nahín áti hai.

Lekin Tauret Injil mein, jahán sachche nabíon ne ilhám i Iláhí ki hidáyat se likhá, aur khud garazí ká daḡhl un ke kám mein na húa, Alláh ki sifaton mein aur muwáfiqat ke sáth tajallí kartí hai. Un se maḡlúm aur sábit hai, ki Khudá wuh Rúh hai, jis ká wajúd be páyán hai, aur *hikmat*, aur *qudrat*, aur *páki*, aur *adl*, aur *míhr*, aur *sachchaí* mein wuh be páyán; aur azal se abad tak be tabaddul hai. In sab achchhí achchhí sifaton mein muwáfiqat i kámil hai. Un mein burí sífat ká daḡhl hargiz nahín hai. Un ke darmiyán koí ek dúsrí se muqábil nahín, aur na use us ke dawá i haqq se zara bhí rokti hai.

Dunyá mein baze hai, jo kahte, ki Dunyá makrī ká jálá sá hai. Ki jis tarah makrá us sámán se, jo us ke andar hai, apná jálá phailáta hai, aur apní khushí par use báz láta, aur apne andar phir jamá kartá hai; usí tarah Khudá us sámán se, jo apne andar rakhtá hai, dunyá ko us sab samet, jo us mein hai, phailáta, aur jab us ki marzī ho, phir apne hí andar sab kuchh jamá karegá. Lekin yih mansúba faqat ek jálá hai, jo insán ke aṭkal ne phailáyá hai, aur jab Kalám Ulláh ki roshní mein láya játa, jhaṭ zái hotá hai. Aur misl us ki thík nahín. Kyúñki makrá apne jále ko phir apne andar lá nahín saktá. Jálá jab banáyá jáe, ek muddat tak rah játa, phir zái ho játa, lekin makre ke peṭ mein phir nahín samátá. Lekin Khudá ne biná sámán, aur biná hathiyár, faqat ek bát kahne se sab kuchh khalq kiya.

Aur baze sikhláte hai, ki insán Khudá ká azo yá ans hai, aur jab us ká kám dunyá mein tamám howe, wuh Khudá hí mein phir nigalá jáegá. Yih khíyál i karih Alláh ki pák zát ko insán ki zát i nápák ke barábar kartá, aur use baní ádam ke sáre gande aur makrúh kámon mein mubtalá kartá hai. Us ke mutábíq nápákí, aur badí, aur khará-bí, jo dunyá mein hai, sab Alláh hí se nikle hai, aur sab ke sab us hí mein phir mil jáenge. Nekí aur badí, bhalá aur burá, sach aur jhúṭh, sab barábar hai, sab Alláh hí ke pák zát se paidá hue, aur Alláh ki pák zát hí mein phir shámil honge.

Lekin insán ki aisi wáhiyát aur makrúhát se phirke ham Khudá hí

ke kalām par mutawajjih hon, tā maḷūm karen, ki us hī ne apnī sifaton kā kyā izhār kiya hai.

I. Us kī *Pāki* ke bāb meṃ yūn likhā hai, ki firishṭe, jo gunāh aur badī se nirāle haiṃ, us ke huzūr meṃ sanā khwānī karke kahte, “Terā nām azīm hai, aur hairatafzā, aur Khudāwand Khudā zābit ul kuḷl; terī rāheṃ rāst aur durust haiṃ, ai muqaddason ke Bādshāh. Ai Khudāwand, kaun tujh se na ḍaregā, aur tere nām kī taqdīs na karegā? kyūnki tū tanhā Quddūs hai; ki sārī qaumeṃ āwengī, aur tere āge sijdā karengī, ki terī aḍālaten āshkārā hūi haiṃ.” Mush. 15: 3, 4. Aur “Ek dūsre se pukār kahte haiṃ, Quddūs, quddūs, quddūs hai Rabb ul ālāmīn; sārī zamīn us ke jalāl se mamūr hai.” Yas. 6: 3. Aur “Tū quddūs hai, jo Isrāīl kī madh meṃ sukūnat karnewālā hai.” Zab. 22: 3. Aur Khudā Taālā khud farmātā hai, ki “Tum pāk hoo, is liye ki main quddūs hūn.” Aur “agar tum us ko, jo har ek ke kām ke muwāfiq, tashaḥhus par nazar nahīn karke insāf kartā hai, Bāp kaho, to apne ālam i musāfarat meṃ ḍarte hūe auqāt kāto.” 1 Pat. 1: 16, 17. Aur “ānkheṃ terī pāk haiṃ, ki tū badī ko dekh nahīn saktā, aur tū sharārat par nazar kar nahīn saktā hai.” Hab. 1: 13. Aur “Dekh, wuh apne qudsīon par bharosā nahīn rakhtā hai; us kī ānkheṃ meṃ āsmān bhī pāk nahīn hai; to ghinaune aur bigre ādmī kā kyā zikr, jo badī ko pānī kī mānind pītā hai?” “Phir, insān Khudā ke āge kyūnkar sādīq hogā, yā aṛatzadā kyūnkar pāk sáf ṭhahregā? Dekh māhtāb tak—wuh roshan nahīn, aur sitāre us kī nazar meṃ pāk nahīn; to kitnā kam insān, jo kīrā hai, yā ādamzād jo kirm hai!” Aiyūb, 15: 15, aur 25: 5, 6. Yūn sachche nabī hamāwāz hokar sābit karte haiṃ, ki Khudā apnī sārī rāheṃ meṃ rāst, aur apne sāre kām meṃ sādīq hai. Ki wuh har tarah ke gunāh, aur nāpāki ke har ek darje ke nām o nishān se nirālā aur mubarra hai. Aur kisī tarah kī badkārī binā badlā liye hargiz maḥzūr na jānegā. Sūraj ke liye apne kiran ko apne se judā karnā, aur roshnī ke badle tārīkī ko chamkānā, us se āsāntar hotā, ki Khudā kī pāk zāt meṃ gunāh yā badī milī hūi howe. Sūraj kī māhiyat roshnī hai, aur us kī zāt se khilāf hai, ki tārīkī se mel rakhe. Allāh kī zāt pākī hai, aur us se khilāf hai, ki nāpāki se mel rakhe. Tis par bhī banī ādam aksar in bāton se gāfil rahte haiṃ, aur ek ek apnī hī hālat meṃ kuchh na kuchh pahchāntā hai, ki jo gunāh kī badī ko dafā kartā, yā uzr kā bāis hotā hai. Aur ek ek apne wāste kḥiyāl kartā hai, ki Khudā kī ānkheṃ aisi pāk sáf nahīn haiṃ, ki us kī badkārī maḥzūr na jāne. Ilān, bahutere apne kām meṃ fiḥlon se, aur bāze apnī apnī zubān se bhī yih kahte haiṃ, ki “Khudā kyā jāntā hai? aur Taālā ke pās kyā pahchān hai?” Yih ilāhī zāt kī ek sifāt hai, jo banī ādam kī hālat aur kḥwāhish meṃ imtiyāz kartī hai. Jo jo ki us ke kalām aur fazl se naupaidā hūe haiṃ, Allāh kī pākī se kḥush o kḥurram hote haiṃ, aur us ke muwāfiq hone kī baṛī ārzū rakhte haiṃ. Jo jo ki apnī zātī nāpāki meṃ rahte haiṃ, so Allāh kī pākī se nākḥush hote, aur us se ḍarte, aur tā maqdūr us sifāt ke dafā karne yā chhipāne meṃ koshish karte haiṃ; aur apnī chāl se yih kahte, “Kāsh ki Khudā hamārī mānind hotā, ki ham binā dehshat yā rok ṭok apne jī kī chāl par chalne pāte.”

II. Phir, *Hikmat* i be páyān *Khudā* kí wuh sifat hai, kí jis se wuh azal se sab kuchh jántá hai, aur apná ijál aur khalq kí bhalái ke baṛhāne ke wáste sab chizon ko intizám detá hai. Is sifat ke ásár us ke háthoñ kí kárigarí meñ sab kahín záhir hote haiñ. Ambíyá ne us sifat ko yún saráhá : “ *Ai Khudáwand*, terí sanāṭeñ kyá hí bahut haiñ ! Tú ne un sabhoñ ko hikmat se banáyá ; zamín tere mál se pur hai.” Zab. 104 : 24. “ *Khudáwand* ne hikmat se zamín kí bunyád kí, aur khirad se ásmán sábit kie. Us ke ilm se gahráíñ phút niklín, aur badlíoñ se shabnam kí búndeñ ṭapkín.” Amsál, 3 : 19, 20. “ *Us* ne zamín ko apní qudrat se banáyá hai, aur qura i zamín apní hikmat se qáim kiyá, aur ásmán ko apní aql se phailáyá. Jab wuh apní áwáz detá hai, pánioñ ká hangáma ásmán meñ hotá hai ; aur wuh bádalooñ ko zamín kí sarhaddoñ se uṭhátá hai ; wuh bijháñ pání ke sáth kartá hai, aur hawá apne maḥzanzoñ se nikáltá hai.” Yaram. 51 : 15, 16. Yún ásmán aur zamín ke banáne aur phailáne meñ, ek ek chíz us ke kháss kám ke liye árásta karne meñ, mausimooñ kí gardish meñ, ásmán se bārish aur shabnam ke intizám meñ, insán aur haiwán kí paidáish aur guzrán kí áráish aur un kí har hálát meñ, Iláhí hikmat ke ásár nazar áte haiñ, aur insán se mutálaba haiñ, kí apne *Khálíq* aur *Parwardígár* kí hikmat ká shukrána aur saná khwání kare.

Lekin us tadbír meñ, kí jis se ásí insán kí naját hásil hotí, Iláhí hikmat kí aur bhí ájab tarah kí numáish hai. Us tadbír ká ek *Hawárá* ne rúh i ilhám se yún bayán kiyá : “ *Aur* sab par yih bát roshan karún, kí us ráz meñ shirkat kyúnkar hotí hai, jo azal se *Khudá* meñ nihán thí, jis ne sárí chízeñ *Isá Masih* kí wasálat se paidá kiyáñ ; táki ab kalisiyá ke wasíle se *Khudá* kí gúnágún hikmat arbáb i hukm, aur asháb i qudrat par, jo ásmán ke maqámoñ meñ haiñ, záhir howe.” Afasí, 3 : 9, 10. Yih hikmat kí aisí numáish hai, kí firishte bhí us ká khoj karne cháhte, lekin un ke fahm aur daryáft se báhar hai. Pahlí áfrínish meñ *Khudá* ne insán aur haiwán ke taíq, jo maujúd nahín the, zinda kiyá, aur us kí zindagí, aur khush guzrán kí sab zarúriyát ko árásta kiyá. Lekin is dúsrí áfrínish meñ, yāne insán kí naját kí tadbír, jo *Masíh* kí maut se hásil húi, *Khudá* ne un ko, jo áge khataoñ aur gunáhoñ meñ murda the, sar i nau jiláke unheñ haiyát i abadí aur jalál ke wáris aur ummaidwár kiyá hai. Yih mumkin nahín, kí koí sáhib i shuúr us tadbír par soche, aur láiq samajh páwe, aur mustaid na ho-we, kí *Púlús* ke sáth pukáre, “ *O Khudá* kí hikmat aur khirad kí be páyání ! us kí tadbíreñ kaisí hí daryáft se báhar, aur us kí ráheñ pahcháñne se dúr !” Rúmí, 11 : 33. *Aur Dáúd* ke sáth, “ *We*, jo terá nám jánte haiñ, terá bharosá rakhte haiñ ; kí tú ne, ai *Khudá*, un ko, jo terí talásh meñ haiñ, tark nahín kiyá.” Zab. 9 : 10.

Hindú Shástaroñ aur Puráñoñ ke mutábíq, we, jin kí pújá baní ádam karte haiñ, hamadán nahín. Bahuterí báton meñ we nádán haiñ ; aur jo karná munásib hai, so nahín jánte. Aur isí liye saikaroñ aur hazároñ muqámalooñ meñ saho aur galatíñ kí haiñ. Haqíqt i hál yih hai, kí we aksar *ádmí* the, jo wahshí aur ummí qaumoñ meñ rah-te the, aur bad un kí maut ke jáhilon ne unheñ deote kar máná hai. Lekin sachche kalám Ulláh meñ *Khudá* kí hikmat, aur hamadání aur tarah kí haiñ. “ *Khudá* ko ibtidá i álam se us ke sab kám malúm

haiñ.” “Aur koí maḵhlúq us se chhipá nahín ; balki jis se ham ko kám hai, us kí nazar meñ sab kuchh nangá aur khulá hai.”

III. *Phir, Quadrat i mutlaq ek sifat hai, jis se Kḥudá akelá mausúf hai.* Apne kalám meñ us ne is sifat ká bahut bár izhár aur ishtihár kiyá hai. Un meñ se bāze ye haiñ : yāne, “Aflák Kḥudá ká jalál bayán karte haiñ, aur ásmán us kí dastkárí dikhlátá hai.” “Sári zamín Kḥudáwand se ḍartí rahe, aur jahán kí sári ábádí us ká ḵhauf máne ; ki us ne *kahá*, aur ho gayá ; us ne farmáyá, aur barpá húa. Kḥudáwand qaumon kí mashwaraton ko náchíz kartá hai ; wuh logon kí tad-bíron ko bátíl kar detá hai. Kḥudáwand ke mansúbe abad tak sábit rahenge ; us ke dil ke muhásaba sári naslon meñ rahenge.” Zab. 19 : 1, aur 33 : 9—11. “Wuh dil meñ aqlmand, aur zor meñ pahlawán hai ; kaun us ke muqábala meñ uṭhá aur bachá ? Wuh paharon ko ṭáltá hai, aur we nahín jánte ; wuh gazab se unheñ ulaṭ detá hai. Wuh zamín ko uskí jagah se larzátá hai, aur us ke sutún thartharáte haiñ. Wuh áftáb ko farmátá hai, aur wuh tulú nahín hotá ; aur wuh táron par muhr karke band kartá hai. Wuh akelá hí ásmán ko bádal se chhátá, aur samundar kí lahron par chaltá hai. Wuh ajáib kartá hai beqiyás, aur garáib beshumár.” Aiyúb, 9 : 4—10. “Ai Kḥudáwand, ásmán tere ajáib kámon kí sitáish karen ; muqaddas logon kí jamáat terí wafádárá kí bhí. Ki ásmán par Kḥudáwand ká nazír kaun ? baní jabbáron meñ Kḥudáwand kí mánind kaun hai ? Kḥudá muqaddas logon ke majma meñ niháyat muhib hai, aur un sab ká, jo us ke gird haiñ, ihtirám ke láiq hai. Ai Kḥudáwand, lashkron ke Kḥudá, tujh sá kaun hai ? Tú, ai Yahowáh, qawí hai, aur tere áspás terí sachái. Tú daryá kí josh o ḵharosh par farmán-rawá hai ; tú us kí maujon ko, jis waqt ki we uṭhtí haiñ, sukúnat baḵshítá hai. Tú ne apne zor i bázú se apne dushmanon ko paráganda kiyá. Ásmán tere, aur zamín bhí terí, jahán aur us kí ábádí tú ne banái. Uttar aur dakkhín ká ijád karnewálá tú hai ; Tábur aur Harmún tere nám se ḵhushwaqt haiñ. Terá bázú qawí, terá háth zabardast, terá dahiná háth buland hai. Tere aurang kí bunyád aḍálat aur sadáqat hai ; fazl aur wafá tere peshrau haiñ. Mubáarak wuh guroh, jo tere shukr kí ḵhush áwází kí shinásá hai ; ai Kḥudáwand, we tere chihre ke jalwa meñ ḵhirámán honge.” Zab. 89 : 6—15. “Kis ne páníon ko apne háth ke chullí se nápá, aur ásmán ko bálisht se paimáish kiyá, aur zamín kí gard ko paimáne meñ bhará, aur paharon ko palron meñ wazn kiyá, aur ṭilon ko tarázú meñ taulá ? Kis ne Kḥudáwand kí Rúh ko tarbíyat kiyá hai, aur us ká mushír hoke use sikhlayá ? Us ne kis se mashwarat lí hai, aur kis ne us kí hidáyat kí, aur aḍálat kí ráh dikhlái, aur use dánish sikhlaí, aur hikmat kí ráh use batlaí ? Dekh, qaumeñ ḍol kí ek búnd kí mánind haiñ, aur tarázú ke dhúl kí mánind gíní játín ; dekh, wuh jazíron ko ek zará kí mánind uṭhá letá hai. Sári qaumeñ us ke áge kuchh chíz nahín, balki we us ke nazdik batálat aur nachíz se bhí hisáb meñ kamtar haiñ.” Yas. 40 : 12—17.

Us kí qudrat i mutlaq ká izhár aur ishtihár, jo Tauret Injíl meñ hai, so badkároñ ke ḍaráne aur pher áne ke liye, aur nekon ke sambhálne aur dilásá dene ko hai. Ki nek aur dindár, jis qadr mazlúm aur maj-

búr hon, aur dunyá se satáe jáweṅ, un ko maḷúm hai, ki Haqq Taʿlá un ká hámí aur madadgár hai, aur ákhir ko, jab un ká sabr aur ímán-darí khúb táe aur ázmáe jáeṅ, wuh unheṅ har áfat se riháí baḵshe-gá. Aur sharír aur zálím ko bhí maḷúm howe, ki jitná hí we Khudá ke logon par gálib hon, aur apne matlab ko pahunchne qaríb maḷúm howen, taubhi Haqq Taʿlá un ká dushman aur muḵhálif hai; aur jis waqt us ko achchhá lage, wuh un ke sáre mashwaron aur mansúbon ko nest nábud karegá.

Bahut log qudrat i Iláhí ke báb meṅ saho karte haiṅ. Yih kaháwat yá qáida, jo aksaron ki zubán meṅ hai, ki “Khudá málik hai, jo cháhtá so kar saktá hai,” sach hai, aur tahqíq, jo achchhí tarah samjhá jáe. Lekin jáhilon ke háth meṅ wuh mugálata kí bát ho játí. Aksaron ko us qáide se maḷúm hotá, ki jo kuchh un ke hál meṅ wáqi ho, so Khudá hí ká kiyá hai; aur harchand, ki we har tarah kí badkárí meṅ apne auqát basrí karen, taubhi agar Khudá cháhe, wuh un kí sab badkáríon par darguzar kare, aur apní pákí aur sacháí ko náchíz jánkar unheṅ bihisht kí mirás meṅ pahuncháegá. We is bát par gáfil haiṅ, ki Khudá jhúṭh nahín kah saktá hai; aur apní kisí sifat ká inkár yá dafiya kar nahín saktá hai. Khudá jhúṭh ko nahín kah saktá, aur nápákí se khush ho nahín saktá hai. Yih to qudrat kí kamí yá kotáhí ke sabab se nahín, balki *ikhtiláf i zát* se hai. Is bát ke na bújhne se bahut log dhokhe meṅ daurte, aur samajhte haiṅ, ki agar Khudá cháhe, to un ko un ke lálach, aur mastí, aur bad khwáhishon samet apní bád-sháhat ke wáris baná saktá hai.

IV. Phir, *Adl* Iláhí sifaton meṅ wuh sifat hai, ki jis se Khudá badkárí ká intiqám letá, aur maḵhlúqon meṅ har ek ko us ká haqq pahunchátá hai. Intiqám lene, aur badle dene meṅ wuh apní hikmat i Iláhí aur be páyání kí ráh par chaltá hai. Ek se jald intiqám letá, aur ek ke báb bahut muddat tak dar guzartá; ek ko ek taur par, dústre ko dústre par us ká haqq pahunchátá hai. Aur har ek sazá o jazá jo detá hai, apní hukúmat i azlí aur abadí ke anjám i nek se aur sáre maḵhlúqon kí bihtarí se nisbat rakhtá hai. Bāze auqát wuh mazlúm aur majbúr kí faryád sunne aur zálím se intiqám lene meṅ der kartá, yahán tak ki bazon kí samajh meṅ wuh insán kí chál par tawajjih hone se báz rahá hai. Lekin jis waqt us kí hikmat i Iláhí ko achchhá lage, wuh donon jahán ko záhir aur sábit karegá, ki us ne ek zará bhí farámosh nahín kiyá, aur us ke maḵhlúqon ke darmiyán bagair us kí tawajjuh ke ek bál bhí zamín par girne na páyá. Aur jis waqt aur jis hálát meṅ kull jamá kí bihtarí ho, wuh faisal karke apná insáf ko záhir kartá hai. Insán apní kotáh bíní ke sabab se Iláhí hukúmat ká faqat ek thorá sá hissa daryáft kar saktá hai, aur is sabab se us ke qiyás aur tajwíz bahut bár galatí haiṅ. Lekin Khudá tamám dáíra ke auqát aur hálát kámilan dekhtá aur jántá hai; aur har ek faisale meṅ tamám maḵhlúqon kí ákhirí aur bartar bihtarí par tawajjuh kartá hai. Aur jis qadr wuh zálím aur ahl i badmaṣh par sabr kare, yaqínan intiqám lene se na dar guzregá. Us ne apne kalám meṅ aur intizám i dunyá meṅ bhí apní ádálát ke ásár aur daláíl záhir kie haiṅ. Kalám meṅ is tarah kí khabar hai, ki “Khudá ká gazab ásmán se ádmíon kí sárí

bedíní aur badkárí par zâhir hotá hai, jo sacháí ko badkárí men band karte haiñ.” Róm. 1 : 18. “Tere aurang kí bunyád *adâlat* aur *sadâ-qat* hai; fazl aur wafâ tere peshrau haiñ.” Zab. 89 : 14. “Khudâ-wand abad tak takht nashín hai, wuh apní *adâlat* ke liye masnad taiyâr kartá hai; wuh sadâqat se jahân ká insáf karegá, aur rástí se khalq kí *adâlat*. Khudâ mazlúmon ke liye panáh hai, aur musibat ke waqt men himáyat. We, jo tere nám jánte haiñ, terá bharosá rakhte haiñ; ki tú ne, ai Khudâwand, un ko, jo terí talásh men haiñ, tark nahín kiyá. Zabúr, 9 : 4—10. Khudâ kí is sifât se bhí, jaisá salúk kalám Ulláh men zâhir kí gai, dindáron ke liye aman o chain aur khátirjamái hásil hotí haiñ, par sharír aur badmash ke liye dahshat aur khatra. Kyúнки wuh rástí se insáf karegá, aur har ek ko us ke *kiye ke muwáfíq* degá.

Hindúon ke maíbúdon ke darmiyán koí nahín, jis ko sachchí *adâlat* yá haqq guzárí kí khwáhish yá maqdúr hai. We khud zâlim, aur badmash the, aur un kí sárí ráheñ haqq guzárí se baíd. To mazlúm aur majbúr dindáron ko un se kyá ummaid yá tasallí ho saktí hai ?

Aur Mahammad ká kahá sábit ho, to Alláh apne *qdl* aur *haqq guzárí* ko farámosh karke apní sárí qudrat ko muslimín hí ke nawázne men sarf karegá. Lekin sahíh kalám Ulláh us parde ko uthátá hai, aur sábit kartá, ki wuh har kisé ká, khwáh *musalmán*, khwáh aur koí ho, us ke *kiye ke muwáfíq* rástí aur sachchái se *adâlat* karegá.

V. *Míhr* bhí Khudá kí ek sifât hai, jo us ke kámon men zâhir, aur us ke kalám men sábit hai. Wuh zât hí se nek hai, aur nekí karne men khush hotá hai. Tauret Injíl men us ká izhár is taur par hai, ki “Khudá us ke áge (Músá ke) guzrá, aur manádi kí, ki Yahowáh, Khudá, *rahím* aur *karím* aur niháyat *halím*, aur nekí aur rástí men wafúr; hazáron par rahm rakhnewálá, gunáh, aur jurm aur badí ká bakhshnewálá, aur jo hargiz gunahgáron ko maazúr na jánegá.” Khur. 34 : 6, 7. “Khudâwand bhalá aur sídhá hai; wuh is liye gunahgáron ko ráh kí bát síkhlátá hai. Wuh halímon ko *adâlat* kí ráh batátá hai, aur miskínon ko apní ráh díkhátá hai. Khudâwand kí sárí ráheñ un ke liye, jo us ke áhd o paimán ko yád rakhte haiñ, *rahmat* aur *sadâqat* haiñ.” Zab. 25 : 8—10. “O kyá hí barí terí khúbí, jo tú ne apne dānewálon ke liye chhipá rakhí hai; hán, un ke liye, jin ká tawakkul baní ádam ke áge tujh par hai ! Tú hí unheñ ádmíon ke mansúbon se apní himáyat ke parde men chhipátá hai; tú hí unheñ zabánon ke jhagre se apne khíme ke andar poshída kartá hai.” Zab. 31 : 19, 20. “Kí ibtidá i álam se kisé ne na suná, na kánon se pahcháná, aur na ánkhoñ se, siwá tere, ai Khudá, jo kuchh kí apne mutawakkilon ke liye taiyâr kiyá hai.” Yas. 64 : 4.

VI. Aur *Ráhmat*, aur *Sachchái* Iláhí sifaten haiñ, jo nekkár aur dindáron kí taskín aur khátirjamái ke liye kalám men izhár kí gaiñ. We azalí, aur abadí, óhadd, aur bepáyán haiñ. “Khudâwand kí sá-*rí* ráheñ un ke liye, jo us ke áhd o paimán ko yád rakhte haiñ, *rahmat* aur *sadâqat* haiñ.” “Kí Khudâwand bhalá hai, us kí *rahmat* abadí hai, aur us kí sachchái pusht dar pusht.” Zab. 25; 10, aur 100:

5. *Khudá* kí rahmat us ke sáre kámon par hai, aur us kí sachcháí un sabhon men zábir hotí hai. “Us ke háthon ke kám rástí aur sachcháí hai, aur us ke ahkám mustahqím. We abad ul-ábád qáim hí rahenge, ki sachcháí aur sadáqat se kie játe hai.” Zab. 111 : 7.

Pas, *Khudá* kí pák zát men har ek achchhí sifat milí hai. *Pákí*, aur *Qudrat*, aur *Hikmat*, aur *Mihr*, aur *Rahmat*, aur *Sachcháí*. We sab us kí zát men kamál o tamán, aur azalí aur abadí hai, we be tabaddul aur be páyán hai. We sab muttafiq aur hamáwáz hai. Un ke darmiyán khalal yá námuwáfiqat hargiz ráh nahín pátí. We sab ke sab bhale logon ke sambháline aur dilásá dene, aur ásmání bádsháhat kí ráh men pahuncháne ke liye, aur badkár aur gumráhon ke daráne, aur ghabráne, aur phiráne ke liye muttafiq hai. Badkár, jo Tauret aur Injíl se *Khudá* kí khashsiyat aur sifaton kí haqíqat daryáft kare, aur un ke láiq samajh páwe, albatta apne hál se ghabráegá, aur ánewálí sazú se thartharáke apne dil men kahegá, Kásh ki main us kí náfarmání na kartá! Kásh ki main us kí sídhí ráh par chaltá, aur us ke gazab ko apne úpar nahín kamátá! Aur nekkár aur ímándár jis qadr un kí láiq samajh páwe, us qadr tasallí aur bharosá hásil karégá, aur itminán i khatir se apne sir buland karke jánegá, ki Merí mukhlási ká din nazdik chalá áta hai.

Pas, ai baní ádam, jo koí hon, ki in báton ko muláhaza karte ho, wuh kaisá *Khudá* hai, ki jis se tumhen kám hai! Wuh sab kahín, aur har hálát men tumháre ás pás hai, aur har ek bát ko suntá hai, har ek kám ko dekhtá, aur har ek khiyál ko jánchtá hai. Wuh tumhári ráh aur khwábgháh ko gherhtá, aur tumhári sári rawishon ko pahchántá hai. Us kí Rúh se tum kidhar jáoge? yá us kí huzúri se kahán bhágoe? Agar ásmán ke úpar charh jáo, to wuh wahán hai; agar pátál men bichháo, wahán bhí wuh hai. Agar urke tum súraj kí jot bano, yá daryá ke muntahá men já raho, to wahán bhí us ká háth tumhárá surág páwegá, aur us ká dahná háth tumhen pakregá. Agar kaho, ki Main andhere men chhip jáúngá, to rát tumháre ás pás roshní ho jáégí; tárikí us se chhipá nahín saktí, ki rát din us ke nazdik donon barábar hai.

Kyá tumháre wáste yih ek amr i ahamm nahín, ki us kí khashsiyat aur sifaton kí láiq samajh páo, aur wuh khidmat, jo us ko khush áwe, aur jis se us kí razá hásil howe, jáno? To us kí Tauret aur Injíl men dhúndho, ki unhín men tumháre liye haiyát i abadí hai; we hí hai, jo *Khudá* Taálá kí khashsiyat aur sifaton ká izhár karte hai. Unhín men *Khudá* ne apní marzí aur sifaton ká, jis qadr ki baní ádam ko darkár hai, bayán kiya hai. Jahán kahín baní ádam men koí apní aql ke zor se, yá riwáyaton kí madad se us kí sifaton ká bayán karne lagá, wuh saho aur galaton men pará hai. Unhon ne bad ko nek, aur nek ko bad thahráyá, aur roshní kí jagah tárikí, aur tárikí kí jagah roshní kí, aur mitháí ke badle karwái, aur karwái ke badle mitháí rakhí hai. “We apne ko dáná samajhkar nádán ho gae, aur *Khudá* i gairfání ke jalál ko fání insán, aur parindon, aur charindon, aur kire makoron kí súrat badal dálá.” Aur *Khudá* i mubáarak kí sifaton ká aisá bayán kiya, jaisá ki wuh bhalí burí sifaton se barábar

mausúf hotá ; aur goyá ki us kí zát i pák men bhalí burí, pákí nápákí milí húi hotí. Tauret Injíl men waisá nahín hai. Un ke likhnewálon ne ilhám i Iláhí kí madad aur hidáyat se likhá, aur Iláhí sifaton ká bayán kiyá. Un ke mutábíq Iláhí sifaton men khalal yá ikhtiláf nahín hotá, balki kamál muwáfiqat un men záhir hotí hai. *Rahmat adl* be dawé ko bátíl nahín kartí, aur *qudrat mihir* par jabr nahín kartí ; aur burí sifaton ká nám o nishán un men hargiz daḡhl nahín pátá. Har ek khúbí aur kamáliyat wafúr i be páyán ke sáth us kí khássiyaat men miltí hai. Aur we sab bhale logon ke sambhálne, aur un ke maqsad ko pahuncháne men muttafiq hotí hai.

Pas, Tauret Injíl men ilm aur irfán ke khazáne hai, Iláhí ilm aur irfán ke. Us khazáne ká khoj karo. Din rát us par taammul karo. Ki we sab, jo Kḡudá kí shariát aur shahádaton men masrúr hote hai, ilm i Iláhí, aur apne Kḡháliq kí razá ke husúl men apne sikhlanewálon se dánátar ho jáenge.

II.

KHUDA KI SIFATON MEN.

LUDHIYA'NE KE BA'BU' GOLAKNA'TH KI TASNI'F.

Main Kḡudá hún, aur mujh sá koí nahín.—Yas. 46 : 9.

KḡUDA', ki jis kí kamáliyat bayán karne ká irádá main rakhtá hún, haqíqat men gairmafhúm hai. Firishton men se, jo ki sardár hai, aur hamesha us ke huzúr men rahte hai, aur us ke sab ahkám o inti-zám se baḡhúbí wáqif hone kí táqat o liyáqat rakhte hai, nahín jánte aur na ma'lúm kar sakte hai, ki wuh kaisá álá o afzal, bará o buzurg Kḡudá hai. Ham log, jo ki un se kitne hí darje chhoṭe, aur aql o dánái men niháyat kam hai, aur phir gunáh ke sabab Kḡudá se dúr ho gae hai, kahán tak us kí khúbíon kí talásh kar sakte hai ? Par Kḡudá ne ham ko is bát men bilkull nádán nahín chhoṛá ; us ne apní pák kitábon men apne sáre ausáfon ká bayán kiyá, táki ham unhen parhke apní hyáqat ke muwáfiq samjhen, aur un ke mutábíq chalen. Albatta baze masle, jin ke jánne se hamen is zindagí men kuchh fáida nahín hotá, un ká zikr isháratan kiyá gayá hai ; lekin aur ausáf, jin par kḡhabardár hone se hamáre dilon men Kḡudá ká kḡhauf o mahabbat paidá hotí hai, ímán mazbúti aur ummaid taraqqí pátí hai, Kḡudá kí buzurgí o izzat barhtí hai, aise sáf o mufassal likhe gae hai, ki anparhe o kund zihn bhí ásání se samajh lewen.

Ab main yih púchhtá hún, ki ham gunáhgár o láchár, aur adne bandon par Kḡudá ke is qadr mutawajjih hone ká báis kyá hai ? Haqíqat men Kḡudá hamáre kísi bát ká íhsánmand nahín thá ; us ne sirf apní mihrbání se ham sabhon par apne taín záhir kiyá. Us ne apní hikmat i kámil se ma'lúm kiyá, ki insán kí aql aisí náqis hai, ki we

bagair sikhláne ke Khudá ko pahchán nahín sakte ; balki apne ná-ma'qúl khíyálon se námúnásib sifateñ us kí zát o khássiyat par mansúb kareñge. Aur is wáste kí dín kí bunyád Khudá hai, aur us ke farzon ká adá karná, aur 'nek chál chalná bagair us kí kamáliya't se wáqif hone ke nahín ho saktá hai, to zarúr húa, kí ham us kí khássiyat se ba'khúbí wáqif howeñ. Khudá ne farmáyá, kí “Tum pák ho, kyúñkí main pák hún.” Phir Khudáwand Ísá Masíh ne bhí us bát ko qáim karke farmáyá, kí “Tum kámil bano, jaisá tumhárá Báp, jo ásmán par hai, kámil hai.” Ab agar ham Khudá kí pákízagí se wáqif na hoñ, to kis tarah pák banne ká qasd kar sakeñ? Khudá kí kamáliya't us kí sab a'khláqí khúbíon ká majmu'á hai ; aur jo kóí kámil baná cháhe, use munásib hai, kí Khudá kí sárí a'khláqí khúbíon par nazar rakhe, aur unheñ apní chál ká namúná banáwe ; unheñ mízán thahráke apní niya't o tabiya't ko wazn kare. Yih sabab sab se bará hai. Khudá ne isí wáste ham garibon par mutawajjih hoke apne ausáfon ko izhár kiyá, táki jis qadr ham us kí kamáliya't se wáqif hote jáweñ, usí qadr apní chál o chalan sudhárite jáweñ, aur ba'd marne ke us kí pák suhbat ke láiq banen. Har ek mazhab meñ ek yá bahut ma'búdon ká zikr kiyá gayá hai ; aur un sab mazhab wálon ne, apní apní aql se, Khudá kí khássiyat daryáft karke, apní ibádat ká dastúr o rasm muqarrar kiyá hai, aur apní chál o chalan ko sudhárite haiñ ; isí wáste yih naql mashhúr húa, kí jaisá ma'búd, waisihí bandon kí chalan. Koí sha'khs apne Khudá se kisé bát meñ bihtar nahín ho saktá hai ; par Khudá kí kamáliya't ke nishán us ke har ábid meñ zarúr páe jáwenge. In sab báton se sáf yih natíja nikaltá hai, kí Khudá kí kamáliya't se wáqif horá insán ko niháyat zarúr hai.

Agarchi dunyá ke log bahut ma'búdon ko pújte hain, taubhí Khudá ek hai. Us kí wahdáníya't ká ilm agle zamáne kí har qaum meñ bahaqq járí rahá ; par dín ba dín, jis qadr log Núh ke zamáne se dúr hote gæe, usí qadr Khudá ko farámosh karte gæe. “Unhon ne Khudá shinási ko apne dilon meñ jagah dene ko na cháhá.” “Unhon ne bahut hí nau íjád kiyá.” “Khudá kí sachcháí ko jhúth se bada'l dála, aur kháliq se ziyáda ma'kh'lúq kí parastish aur bandagí kí ; jo abad tak mu'báarak hai.”

Us áyat meñ, jis ko main ne pahle parhá, yih likhá hai, kí “Main Khudá hún, aur mujh sá koí nahín.” Pas, ab cháhiye, kí usí kí kamáliya't ká bayán karún ; par is liye kí us kí kamáliya't kí khúbíán ziyáda áshkára hoñ, main ne yih iráda kiyá, kí Hindúon ke Devton kí bázi khássiyaton ko, jo shástrom meñ bayán kí gai haiñ, sachche Khudá kí kamáliya't ke sáth zará sá muqábala karún ; táki Yahowáh kí buzurgí ziyáda záhir ho. Is tadbír se tumháre díł ká yih shubha, kí Hindúon ká but bhí Khudá hai, sáf ur jáegá ; aur yaqín karoge, kí dunyá meñ we be'khúda aur be ummed auqát basar karte haiñ : par tumhare liye Yahowáh hai : wuh sachchá aur zinda Khudá hai : us kí pairawí karne se abadí zindagání hásil hotí.

Kitáb i muqaddas meñ Yahowáh ko sachchá aur jítá Khudá kahke bayán kiyá, jo kí kamáliya't meñ behadd, niháyat pák rúh, nádída, be jism, bejuz aur bebadal, bepáyán, azalí o abadí, gair mafhúm, qádir i mutlaq, bahut áqil o pák, khudmu'khtár, bará habib, karím, rahím,

mutahammil, nek, sachchá, aur bará gaffár hai; wuh nekon ko ajr detá hai, aur badon ko, ádil munsif hokar, sazá dene men khaufnák hai; wuh sab gunáh se nafrat kartá hai, aur ádálát ke din taqsírwáron ko kisi tarah muáf na karegá. Wuhí áp sab chízon ká kháliq hai; sári chízen usí se, aur usí ke sabab, aur usí ke liye paidá hún; un ke haqq men wuh jo cháhtá hai so kartá hai. Us se koí chíz chhipí nahín, aur us kí dánish bepáyán aur sahíh hai. Us ke iráde, aur kám aur hukm bahut pák hain. In sifaton ke sabút men, kaí ek áyaten be betartíbí se nikálke tumhen sunátá hún: chunánchi, “Yahowáh hamará Khudá akelá Khudá hai.” “Tum buton se Khudá kí taraf phiro, ki jíte aur sachche Khudá kí bandagí karo.” “Kyá tú Alláh ká hál daryáft kartá hai? yá alqádir ke kamál ko pahunchtá hai? wuh ásmán se únchá hai; tú kyá kar saktá? pátál se nichá hai; tú kyá jántá? us ká náp zamín se lambá, aur samundar se chaurá hai.” “Khudá rúh hai, aur us ke bandagí karnewálon ko cháhiye, ki rúh aur sachcháí se us kí bandagí karen.” “Zamánon ke bádsháh ko, jo gairfání, nádídání, wáhid Khudá hai, izzat aur jalál zamánon tak howe.” “Tum áp se bahut khabardár raho; kyúнки jis din Khudá-wand ne, Horeb ke darmiyán, ág men se tumháre sáth báten kín, tum ne koí shakl nahín dekhí.” “Núron ká Báp, jis ke nazdík kuchh gardish nahín, balki zawál ká sáyá bhí nahín.” “Kyá main Khudá i nazdík, aur Khudá i baíd nahín?” “Peshtar us se ki pahár paidá hue, aur zamín aur dunyá baní, azal se abad tak tú hí Khudá hai.” “Khudá-wand buzurg hai, aur wuh niháyat sitáish ke láiq hai; aur us kí buzurgí tahqíq karne se báhar hai.” “Main Khudá hún; main badaltá nahín.” “Main qádir Khudá hún; tú mere huzúr men chal.” “Aur ek ne dúsre ko pukará aur kahá, Quddús, quddús, quddús, Rabb ul afwáj hai, sári zamín us ke jalál se mamúr hai.” “Khudá apní marzí ke muwáfíq sab kuchh kartá hai.” “Khudá-wand ne sári chízen apne liye banái hain.” “Us se, aur us ke wasíle aur us ke liye sab kuchh hai.” “Jis men piyár nahín, so Khudá ko nahín jántá; ki Khudá mahabbat hai.” “Yahowáh, Yahowáh Khudá, rahmán aur hannán, zú ul túl aur Rabb ul fazl o wafá, hazár pushton ke liye fazl rakhnewálá, gunáh aur taqsír aur khatá ká baqshshnewálá; lekin wuh har hál muáf na karegá, balki bápon ke gunáh un ke farzandon se, aur farzandon ke farzandon se, tísrí aur chauthí pusht tak, mutálaba karegá.” “We, jo murakh hain, terí ánkhon ke sámne khare nahín rah sakte; tú badkirdár se ádáwat rakhtá hai. Tú un ko, jo jhúth bolte hain, nábúd karegá; Yahowáh khúní aur dagábáz se nafrat kartá hai.” “Khudá-wand gaiyúr Khudá hai; Khudá-wand apne dushmanon se intiqám letá hai, aur apne dushmanon ke liye qahr ko rakh chhoṛtá hai.” In ke siwá aur bhí bahut áyaten chunke sunátá; lekin cháhtá hún, ki sab koí apne áp kalám i muqaddas men dekh lewen. To main jo kuchh ki Yasaiyáh nabí ne Khudá kí wahdáníyat o fauqíyat, kámálíyat o saltanat bayán kiyá hai, kalí sunátá hún. Us ne cháhá, ki Khudá kí sifaton ká khyál ádmíon ke dilon men dunyáwí chízon ke wasíle se paidá kare. Aur isí wáste us ne aisí misálen Khudá ke haqq men istíamál kín, ki Khudá ke haqq men koí námunásib tasauwar na karen. Dunyá kí sári chízon par nazar karo,

aur dhiyán karke dekho, kí un men se kaun sá bará hai : albatta baron men samundar bará hai ; us ke gahráo kí tháh áj tak kisi ne na pái, aur na kisi ne hikmat se us ká bhed málúm kiyá ; lekin nabí kahtá hai, kí wuh amíq samundar Khudá kí nazar men niháyat adní chíz hai : “ Us ne us ke páníon ko apne háth ke chullú se nápá.” Súra, chánd o sitáre, jo kí daur í ásmán men phirte hai, aur apní roshní se ham logon ko manauwar karte hai, un kí tásir se dunyá men rut badaltí rahtí hai, aur jándár chízon ko zindagí miltí, par Khudá ke sámhne we aise adne hai, kí us ne unhen “bálish t se paimáish kiyá.” Is dunyá men kitne hí jazíre, kitne hí pahár, kitne hí jangal, kitní hí naddiá, kitní hí zamín, kitne hí admí baste hai ! par Yahowáh kí nazar men we sab muṭṭhí bhar hai : “ zamín ke gard ko paimáne men bhará, paháron ko palron men wazn kiyá, aur ṭilon ko tarázú men taulá ;” “ us ke sámhne zamín kí qaumen dol kí ek búnd kí mánind hai, aur tarázú kí ek dhúl kí mánind gini játín ; wuh jaziron ko ek zarre kí mánind uṭhá letá hai : pas tum Khudá ko kis se tashbíh deoge, aur kaun sí chíz us kí misl ṭhahráoge ?”

Hindú o Mahammadí bhí Khudá se munkir nahín hai. We iqrár karte hai, kí Khudá hai. Mahammadí to kháss karke ek sachche aur bare Khudá ke qáil hai ; lekin us kí zát o sifát men Yahowáh se bará farq hai. Hindúon ke khiyál bhí is bát ke haqq men bahut hí mukhtalíf hai. Un ke baze shástaron men ek barí rúh aur khud-maujúd, behadd, nádida, bejism, bejuz, bebadal, azalí o abadí, aur gairmafhum Khudá ká zikr kiyá gayá hai ; lekin jitní kí akhláqí khúbíá hai, maslan aql, hikmat, dánái o qudrat, adl, sachcháí, bhalái, rahmat, nekí, pákízagí, aur parhezgári, in sab ko us Khudá kí sifaton men nahín ginte ; wuh in sab ausáfon se alag hai ; aur agar koí miláyá cháhe, to Hindúon ke gyáuon ke sámhne nipaṭ agyáni ṭhahregá. Lekin siwáe is barí Rúh ke, un ke bích men aur deote bhí hai, jin par ye sab sifateṃ mamsúb ho saktí hai, balki un deoton kí taríf men ye sab sifateṃ bayán karte hai ; par un ká kahná bilkull abas hai. Un deoton kí chalan shástaron ke mukhálif hai. Is kahne se kyá fáida hogá, kí merá Khudá áqil hai, agar wuh Khudá nádán kí mánind kám kare ? Agar wuh nápák kámon se khush howe, pák kahne se kyá hotá hai ? Pas, na to Púran Brahm, jis ká faṭhr Hindú bahut hí karte hai, Yahowáh kí mánind hai, aur na us ke autár, jin ko Hindú log aksar karke mánte, aur pújte hai, Khudá ho sakte hai. Is mazmún ká khulása tab baṭhúbí málúm hogá, jab main ek ek sifát ká bayán judá judá karke muqábila karúngá.

I. Hindúon ke shástaron men ek Púran Brahm ke siwá aur tentís karor deote hai, aur we apní apní jagah men ulúhiyat ká dawá rakhte hai. Ye hí deote log zamín o ásmán ká bandobast kiyá karte hai. Insán ko inhin se ziyáda kám partá hai. Púran Brahm kisi kí kuchh khabar nahín liyá kartá. Lekin Yahowáh kahtá hai, “ Main Khudá hún ; mujh sá koí nahín.” “ Tum mere gawáh ho, Khudá-wand farmátá hai, aur merá banda, jise main ne barguzída kiyá, táki tum jáno, aur mujh par ímán láo, aur samjho, kí main wuhí hún. Mujh se áge koí Khudá na baná, aur mere baḍ bhí koí na hogá.

Main, main hí K̄hudāwand hūṅ ; mere siwá koí bachānewálá nahīṅ.”
 “Ibtidá se main hí hūṅ ; aur main jo kām karūṅ, to roknewálá kaun hai ?”

II. Quḍrat o jalāl kí taraf rujú hoke dekho, ki Púran Brahm Yahowáh kí mánind hai, ki nahīṅ ? Púran Brahm kí zát meṅ quḍrat ká ittiláq nahīṅ diyá játá. Quḍrat jo hai, so máyá ká zuhúr hai, aur Brahm ká nabí. Wuh apní auqát apne hí soch meṅ, nínḍ kí hálát par, guzártá hai. Wuh na to paidá kartá, aur ná paidáish ke kām meṅ kuchh bhí dakhl detá hai. Sansár ke pālne se bhí us ko kuchh garaz nahīṅ, aur na álam ká intizám us ke qábú meṅ hai. Wuh insán ke kām o káj par bilkull k̄hiyál nahīṅ rakhtá ; kyúṅki wuh un ká insáf nahīṅ kartá. Wuh apní auqát bekárí kí hálát meṅ káṭne se k̄hush hotá hai. Hindú log deoton ko quḍrat o jalāl wále kahte haiṅ. Un ke darmiyán paidá karnewálá K̄hudá Brahmá, pālnewálá Vishnú, insáf karnewálá Yam, aur mārnewálá Shiṅw hai. Intizám ke liye koí nahīṅ muqarrar húa, is liye ki dunyá apní taqḍír yá bhág par chaltí hai. Ye deote agar dánái, aql, o hikmat meṅ Yahowáh ke barábar hote, yá unkí bhalái, sachcháí, neki, aḍl, o rahm kámil hotá, to albatta muqábala ke liye jagah hotí ; lekin un ke kámon meṅ un sifaton ke nishán páná to kináre rahá, balki aksar un ke baraks záhir hote haiṅ. Maslan, paidáish kí bábat, Ved meṅ Púran Brahm ke haqq meṅ likhá hai, ki wuh áp sárí chízon ká mádda baná, yáne apní rúhání zát ko jis-mání chízon ke banáne ke liye tabḍíl kar ḍálá ; aur ák̄hir ke din sáre álam usí kí jot meṅ samá jáwenge ; kyúṅki we sab usí se the. Phir Brahmá ke haqq meṅ likhá hai, ki wuh jis waqt dunyá paidá karne ká qasd karne lagá, to us waqt us kām kí mushkilát par gaur karke bahut se ánsú baháe ; is liye ki us ne samjhá, ki aisá bará aur mushkil kām mujh se honá muhál hai. Tab us ne Shiṅw kí madad mángí ; aur jab Shiṅw se bhí wuh kām saranjám na ho saká, tab Brahmá ne phir us kām par kamar bándhí. In ahwál se maḷúm hotá hai, ki we deote quḍrat o jalāl, dánái aur hikmat meṅ niháyat kam the ; aur jab ki ye sifaton un meṅ kamál na ṭhaharíṅ, tab we K̄hudá kis tarah kahlá sakte haiṅ ? Sach hai, ki Yahowáh K̄hudá hai, jis ne apní quḍrat o hikmat, aql aur dánái, is dunyá kí paidáish, aur is ke intizám ke kámon meṅ záhir kí hai.

Us ke haqq meṅ Yasaiyáh ne jo kuchh kahá, so main ne áge hí kah sunáyá. Ásmán o zamín Yahowáh kí nazar meṅ náchíz hai. Dunyá o ásmán ká paidá karnewálá bhí wuhí hai. “Ibtidá meṅ K̄hudá ne ásmán o zamín ko paidá kiyá.” “Us ne kahá, aur ho gayá ; us ne farmáyá, aur barpá húa.” “K̄hudāwand, Isráíl ká Quḍḍús, aur us ká k̄hálíq, yún farmátá hai, main ne zamín banái, aur insán us ke sath par k̄halq kiyá ; main ne apne hí háth se ásmán táne, aur un ke sab lashkaron par main ne hukm kiyá.” “Us ne apní quḍrat se dunyá ko banáyá hai ; us ne apní hikmat se jahán ko qáim kiyá hai, aur apní aql se ásmánon ko phailáyá hai.” Yahowáh ne sárí chízen nábúḍagi meṅ se búd kíṅ. Un ká pālnewálá bhí wuhí hai. “K̄hudá ádmí aur haiwán ká parwardigár hai.” “K̄hudāwand un sab ko, jo girte haiṅ, thámtá hai ; aur un sab ko, jo nihur gae haiṅ, uṭhá khará kartá

hai. Sab kí ánkheñ tujh par lagí haiñ ; tú unheñ waqt par rozí detá hai. Tú apní muṭṭhí kholtá hai, aur har ek jándár ká peṭ bhartá hai.” Un ke intizám ká iḡhtiyár bhí usí ko hai. “Ḳhudáwand ázím Ḳhudá hai; wuh Sháhansháh bádsháh sab deoton par.” “Us kí bádsháhat abadí bádsháhat hai, aur us kí hukúmat sáre álam par abadí hai.” Ákhir ádmíon ká insáf bhí wuhí karegá. “Ḳhudá har ek fíal ko, aur har ek maḡhfí kám ko, kyá bhalá kyá burá, ádálát meñ láwegá.” “Har burí bát, jo ádmí bolte haiñ, un ke wáste un ko ádálát ke din hisáb dená paregá.” “Us ne ek din ṭaharáyá hai, jis meñ wuh sadáqat se dunyá kí ádálát karegá, ek mard ke wasíle se, jise us ne muḡhtár kiyá.”

III. Agar tum pákízagí, aur gunáh se nafrat, Púran Brahm ke sifa-ton meñ, ḡhúñdho, to nahín páoge; aisí aisí sifaton Brahm kí zát meñ mansúb nahín ho saktíñ. Pákízagí sárí aḡhláqí ḡhúbíon ká maj-múá hai : is wáste Púran Brahm kí zát meñ zeb nahín detí hai. Gunáh aur nekí se us ko kuchh garaz nahín hai : wuh na to gunáh se nafrat rakhtá, aur na nekí se rází hotá hai. Pas, báqí rahe deote, jin kí pákízagí aur parhezgárí bahuton par áyán hai. We gunáh ke rahbar hoke us se nafrat kis tarah karenge? Brahm kisí kí ibádat talab nahín kartá; lekin deote sab se karte haiñ. We nahín cháhte haiñ, ki un kí ibádat rúh aur rástí se ho; balki wuh ibádat talab karte haiñ, jo bilkull jismání hai, aur jismání shahwaton se adá hotí hai. Brahmá kí pákízagí aur parhezgárí, aur us kí gunáh se nafrat Purán ke parñnewálon ko maḡlúm hogí; wuh shahwat ká banda thá. Vishnú ká luchpan, ṭhagí, aur chorí sab Hindúon par baḡhúbí záhir hai; aur Shiw ká kaifipan aur nápák shahwat ká bayán kis ne nahín suná, ki main bayán karúñ? Un kí bábat shástaron meñ aisí aisí báteñ likhí haiñ, ki parñnewálon ko maḡlúm hogá, ki we bewaḡf, kamzor, haḡír, magrúr, kínakash, jhagrebáz, zinákár, jhuṭhe, bemunsif, berahm, bedard, aur parái bhalái meñ náḡhush, aur apní bihtari ke liye sargarm haiñ. Pas, Yahowáh Ḳhudá ke siwá aur sab jhuṭhe haiñ. Yahowáh kí pákízagí, aur gunáh se nafrat, aur us kí rúhání ibádat, jo wuh apne ábidon se talab kartá hai, niche kí áyaton se sáf záhir hogá. “Ḳhudáwand apní sárí ráhon meñ sádiq hai; apne sab kámon meñ pák hai.” “Maḡbúdon meñ, Ḳhudáwand, tujh sá kaun hai jalál wálá? pákí meñ kaun hai tujh sá bará?” “Ánkheñ terí pák haiñ, ki tú badí ko dekh nahín saktá; tú sharárat par nazar kar nahín saktá hai.” “Ḳhudáwand ne farmáyá, ki main apní muḡarrabon ke darmiyán apní taḡdís karúngá, aur main sárí jamáat ke áge apná jalál záhir karúngá.” “Ḳhudá muḡaddas logon ke bare majma meñ niháyat muḡíb hai; aur un sab ká, jo us ke gird haiñ, ihtirám ke láiq hai.” “Ḳhudá rúh hai, aur us kí bandagí karnewálon ko cháhiye, ki rúh aur sachcháí se us kí bandagí karen.” In báton se tum sab daryáft kar sakoge, ki Yahowáh Ḳhudá hai, aur us kí mánind koí nahín hai; balki wuhí akelá sachchá Ḳhudá hai; aur sab jhuṭh haiñ. Ulúhiyat kí kamáliyat sirf us hí meñ bharpúr hai. “Haḡíqat meñ Yahowáh maḡbúdon ká Ḳhudá, aur málikon ká Ḳhudáwand, aur logon ká kashsháf hai.”

FA'IDA.

Khiyál karo, ki is viláyat men, Yahowáh kí jagah, kitne hí maḃúḃ púje játe haiṇ. Hindúon kí aql men ásmán ke sitáre aur zamín kí sab chízeṇ, kyá jar, kyá haiwán, pújne ke láiq haiṇ. We haqíqat men unhen har roz pújte haiṇ ; aur jo tazím, kí inálik o kḥáliq ko dená cháhiye, maḥhlúq ko dete haiṇ. Yih táríkí un logon ke dilon men kahán se chhá gaí hai ? Yih un kí gumráhí kí sazá hai. “Jaisá unhon ne Kḥudá ká ilm rakhná qabúl na kiyá, waisáhi Kḥudá ne bhí un ko námaqúl aql men chhorá, kí nálaiq kám karen.” Par ab Kḥudá apne kalám ke wasíle se cháhtá hai, kí us ilm ko phir un ke dilon men paidá kare : isí liye wuh farmátá hai, “kí Aj agar tum us kí áwáz ko suno, aur apne dilon ko saḥt na karo,” aur wáhid, sachche aur zinda Yahowáh ko pújo, to tumhári dunyá o áqibat bhalí hogí.

Yahowáh ká azal se abad tak betabdíl honá insánon ke dilon men bahut hí muassir hai. Gunahgár o sharir, jab apne dilon men khiyál karte haiṇ, kí Kḥudá azal se hai aur abad tak rahegá, aur wuh betabdíl hai, tab un ke dilon men kḥauf aur náummedí á játí. We sazá se bachne kí ummed kabhí nahín kar sakte. Agar Kḥudá gunáh ká muḥhálif hai, aur us ne gunahgáron ko sazá dene kí dhamkí kí hai, to zarúr wuh hamesha waisáhi rahegá, aur kabhí nahín badalegá. We Kḥudá ke azáb ke din kis tarah tḥahrenge ? Wuh un par apná qahr, aur azáb, aur gazab dálegá. Wuh kisí ko bhí nahín bhúlegá.

Nek logon ke liye Kḥudá kí ye sifaten tawakkul paidá karnewálián haiṇ. Kḥudá agar pákízagí ko dost rakhtá hai, to wuh hamesha use waisáhi manzúr rakhegá ; aur pák logon ko barkat degá ; aur kabhí nahín badalegá. “! s ke nazdík kuchh gardish nahín ; balki zawál ká sāya bhí nahín.” Us ke waḃe sab betabdíl haiṇ. Wuh jo kuchh kahtá hai, so púra kartá hai ; isí wáste nek log us kí bát par iatimád i kullí rakhte haiṇ. Un kí ummed unhen mahrúm nahín karegí. “Wuh Yahowáh badaltá nahín ; us kí sachcháí baṛe pahār kí mánind qáim, aur us ke waḃe hamesha púre honge.” Aj agar us ne kisí ko piyár kiyá, aur us kí duá suní ho, to kal us se nafrat nahín karegá, aur na us ke iltimás ko radd karegá. Pas, un ke imán kí bunyád ek bhári chaṭṭán par rakhí hai ; wuh kabhí nahín ukharegí.

Yahowáh házir názir, o álim ul gáib hai. Wuh kahtá hai, kí “Kyá main nazdík ká Kḥudá hún, aur baíd ká nahín ? kyá koí poshída jagahon men apne taín chhipá saktá hai, jis se main na dekhún ? kyá ásmán aur zamín mujh se maḃúr nahín ?” Is masle ke mutábiq Yahowáh ham ko farmátá hai, kí us kí parastish ham har jagah kiyá karen ; kyúнки wuh har jagah maujúd hai. Wuh hamen jántá hai, dekhtá hai, aur hamári nigahbání kartá hai, aur hamári hájaten rafá kartá hai, aur hamári ibádaton qabúl kartá hai.

Kḥudá ko házir názir jánke gunahgáron ko ḃarná cháhiye ; kyúнки wuh un ke har gunáh ke karte waqt wahán maujúd hai. Jab un ke dilon men sarkashí, kufr, náshukrí, magrúrí, aḃáwat, chhal, beinsáfi, aur berahmí paidá hotí hai ; jab we Kḥudá ke pák qánún ke muḥhálif chalte haiṇ, aur nápák o berahmí kámon par kamar bándhte haiṇ, aur us ke Beṭe kí behurmatí karte haiṇ, aur Rúh Quds ko gangín karte haiṇ, us ke sabt ko toṛte haiṇ, us kí ibádatgáh se gair házir

rahte haiñ, aur us kí kalísyá kí rasmon ko náchíz o haqír jánte haiñ, tab bhí K̤hudá házir o názir hai, aur ták rakhtá hai, kí hashar ke roz un ká badlá dewe. “Us kí ánkhen ág ke shuāla kí mánind hai. Us kí nazar se kaun ch̤hip saktá hai?” K̤hudá ke lepálakon ko bhí chāhiye, kí yih bát yád rakhen, kí un ká ásmání Báp hamesha un ke kámon ko dekhtá rahtá hai. We agar chāhen, to apne dilon men āp ko haqír, náchíz, garíb o jáhil jáneñ. We apní ibádaton par nazar karke unhen aísí ná kámil o gunáh álúda samjhen, kí K̤hudá ke qabúl karne ke láiq nahín haiñ; aur apne gunáhoñ ko aísá burá o badtar jáneñ, kí apne tañ bilkull dozaḥhí samjhen, aur dil se yún kahen, “Ham kíre haiñ, aur ádmí nahín;” lekin báwajúd is ḍar o shakk ke, Yahowáh kí yád se we farámosh na honge. “We K̤hudá ke honge, jis roz wuh apne ḡháss guroh ko jamā karegá.” Ánsú, jo unhoñ ne apne gunáhoñ ke liye baháe; duāñ, jo unhoñ ne guzráñ; do kauṛí, jo unhoñ ne K̤hudá ke nám par garíboñ ko bántíñ; pání ká piyála, jo unhoñ ne Masíh ke nám se us ke shágird ko piláyá, K̤hudá un ko nahín bhúlegá, aur na un ke ajr dene meḡ kuchh der karegá. K̤hudá un ke sab kámon ko dekhtá hai, aur apní yád kí kitáb men likh chhortá hai.

K̤hudá qádir i mutlaq aur ḡhudmuḡhtár hai. “Zamín ke sáre báshinde náchíz kí mánind mahsúb hote haiñ; aur wuh ásmán ke lashkaron aur zamín ke báshindoñ ke sáth apní mashíyat ke muwáfíq kám kartá hai, aur koí nahín, jo us ke háth ko roke, aur us se kahe, kí tú kyá kartá hai?” “Us ká mansúba qáim rahegá, aur wuh apní sárí marzí ko púrá karegá.” Jaisá kí us ne álam ko paidá kiyá, aur use páltá hai, waisáhi us ká intizám kartá rahegá. Qádir i mutlaq ke barḡhiláf chalná kyá hí ḡhaufnák aur bahut burá hai! Wuh apne dushmanon se intiqám legá; aur jo us se kíná rakhte haiñ, unhen sazá degá; aur us ká háth koí nahín rok saktá hai. Tum, jo is nasíhat ko sunte ho, apne dil se púchho, kí K̤hudá ko piyár karte ho, kí nahín? Us ko ḡhush kiyá chāhte ho, kí nahín? Us ke hukm ke tábidár rahte ho, kí nahín? Us kí rasmon par garíbí aur ímán se chalte ho, kí nahín? Wuh kahtá hai, kí “Main un par áshiq hún, jo mujh par áshiq haiñ; táki main un ko, jo mujhe piyár karte haiñ, achchhe mál ke wáris karún.” Sháyad kí tum, agle aur ab ke zamáne ke sharíron ke sáth milke, apne dil men K̤hudá ko kahte ho, kí “Mujh se dúr ho; main terí ráhoñ ke ilm kí parwá nahín kartá; Qádir i mutlaq kaun hai, kí main us kí bandagí karún? aur us se duá mángne se mujhe kyá fáida hogá?” Agar tum aise ḡhiyál karte ho, to tum par afsos hai. Main tum se kahtá hún, kí us ke háth se chhurá ná kísí bashar ká kám nahín hai. “Dunyá yá ásmán men, K̤hudá kí mánind, bázu kaun rakhtá hai? aur us kí áwáz sá kaun garaj saktá hai?” Us kí ánkhen sab chízen dekhtí haiñ; aur us ke háth sab jagah men pahunchte haiñ. Gunahgár us ke gazab se kahán bhág sakte haiñ? “Terí Rúh se main kidhar jáúñ? aur tere huzír se main kidhar bhágún? Agar main ásmán ke úpar chaḡh jáúñ, to tú wahán hai; aur agar main pátál men bichháúñ, to tú wahán bhí hai; agar main urke súrañ kí jot banún, yá daryá ke muntahá men já baiṭh-ún, to wahán bhí terá háth merí súrág páegá, aur terá dahíná háth mujhe pakar legá.” Yih bát yád rakho, kí K̤hudá kí qudrat se tum

jíte ho, chalte phirte ho, nigahbání kie játe ho, bipat se bacháe játe ho; tum áp sarásar nátawá o kamzor ho. “Ham usí se jíte, aur chalte phirte, aur maujúd hain.” Wuh nekokáron ká kaisá bará dost hai! Us kí qudrat kí kuchh hadd nahín! Wuh sab de saktá hai, aur hamáre liye sab kuchh kar saktá hai.

Dánái kí jar bhí Yahowáh hai. Ásmán ke firishte us ke sámhne sijda karke kahte rahte hain, ki “Barakat, aur jalál, o dánái, aur shukruguzarí, aur izzat, aur qudrat, aur qúwat, hamáre KHUDA ko abad se abad tak howe; ámin.” Ásmán ke saiyáre, zamín ke har aqsám kí chízen, nabátát, mađaniyát, o haiwánát kí banáwat kí tarkíb men KHUDA kí dánái záhir hotí hai; aur agar insán ke badan ká imtihán kar sako, to tajjub se kahoge, ki sach much KHUDA bará Hakím o Alím hai. Dekho, ki in sab chízon men kaisí mutábíqat, fáida, bandobast o mel páyá játa hai; goyá kí KHUDA ne har chíz ko ek dúsrí kí muhtáj banáya hai. Har mausim apne apne waqt i muáiyán par maujúd hotá hai. Mausim ká phal bhí kabhi nahín ru tá. Siwá KHUDA ke aisá kaun hai, ki ek dil íjád karke use jism se ámezish de, táki un se kalám o kھیال sádir ho? “Ai KHUDAWAND, kaise kaise beshumár tere kám hain! tú ne dánái se unhen paidá kiyá.” Duniyá kí paidáish ke siwá, gunahgáron ko bacháne men KHUDA kí dánái ziyáda matlúb hai. Us ne dánái se Masih ko duniyá men bhejá, táki wuh gunahgáron ke badle men maslúb howe; jis se us kí ádl o rahm, bhalái aur sachcháí, faizázi aur mahabbat be khalál áshkárá ho. Masih ke haqq men Púlús kahtá hai, ki wuh “KHUDA kí hikmat, aur pákízagi, aur ázádagí hai.” Phir Afsión ko likhtá hai, ki “Masih kí beqiyás daulat kí khushkhabari dúj, aur sab par roshan karúj, ki us bhed kí hikmat kis qadr hai, jo azal se sab ke banánewále KHUDA men poshída thá.” Injíl bhí KHUDA kí hikmat kahlátí hai. Yahowáh kaisá bará aur buzurg KHUDA hai! us kí mánind aur kaun ho saktá hai! kyá Hindúon aur Mahammadion ke maíbúd Yahowáh kí mánind honge? nahín: we sab jhúthe hain. “Yahowáh ke áge maláik log apne munh par parda dálte hain, aur tájon ko us ke qadam tale dálke rát o din pukárte rahte hain, ki Quds, quds, quds! KHUDAWAND KHUDA, qádir i mutlaq, jo thá, aur hai, aur hamesha rahegá.” Agar insán kí tabíat firishton kí mánind ho, aur un ká kamál iráda sirf Yahowáh hí ke khush karne, aur usí se khushí hásil karne ká ho, to ásmán aur zamín men, ek hí áwáz se, hamd o taríf aur saná Báp, Bete aur Rúh Quds ke liye hamesha húá karegá.

Ihsán, o piyár, o rahm, aur bhalái Yahowáh kí kháss sifaten, aur áin zát hai. KHUDA apní zát men kámil hai, aur is bát men, ki kisi ke piyár yá bhalá karne se kuchh hásil kare, muhtáj nahín. Lekin wuh apne maḡhlúqon ko piyár kartá hai, aur un ká bhalá kartá hai; is wáste ki is men us ká jalál barhtá hai, aur maḡhlúq kí bihtarí hotí hai. KHUDA cháhtá hai, ki us ke bande us ke piyár, aur us kí bhalái ko apne úpar dekhke gunáh se tauba karen, aur KHUDA ko izzat aur buzurgí dewen, barái karen, aur dil se us ke tábidár bane rahen. KHUDA ká piyár aur bhalái, is duniyá ke logon par, har jagah men, záhir hai. Púlús kahtá hai, ki KHUDA ne “bhalá karke ásmán se bar-waqt barsát aur phal lánewáli mausim deke, aur tumháre dilon ko

ásúdagí aur k̄hushí se bharke, apne ko begawáh na chhorá hai.” Kitne hí árám o aish kí chízen K̄hudá ne insán ke liye is dunyá men paidá kí haiṅ. Agar tandurustí rahe, to hamáří k̄hurák o poshák har roz ham ko k̄hushí detí hai. Bahár apne mausim par phúl nazar men, aur áwáz kánon men, balki sárí chízen apní apní jagahon men k̄hushí baḡhshtí haiṅ. Ankhoṅ se dekhke, kánon se sunke, zubán se bolke, nák se súnghke maza hásil karte haiṅ. Hamáří k̄hushíon ká bayán is muḡhtasar men ho nahíṅ saktá. Ham ko munásib hai, kí Dáúd ke sáth muttafiq hoke kahen, “Ai ádmío, K̄hudá kí bhaláí ke liye us kí ṭaríf karo; us ke ajáib kámon ke liye, jo us ne baní ádam ke liye kie haiṅ.” K̄hudá apní barakat sirf nekoṅ hí par nahíṅ, balki badon par bhí ináyat kartá hai. “Wuh apne súraj ko badon aur nekoṅ par charhátá hai, aur sharíron aur rástbázon par menḡ barsátá hai.” Nekoṅ ke sáth har koí bhalá kartá hai; magar badon se nekí karná bará kám hai. Chunan̄chi K̄hudá ne apní ihsán ham logon ko us waqt dikháya, jab kí ham us ke muḡhálif aur nipaṭ dushman the. Jab ham us se lar̄te the, tab us ne hamen bacháne cháhá, aur is ke liye tadbír kí. “Us ne dunyá ko aisá piyár kiya, kí apne ekloute beṭe ko baḡhshá.”

K̄hudá ká rahm bhí us ke piyár o bhaláí, sabr o wafádáří se alag nahíṅ hai. Un ke nám jude haiṅ, lekin kám men sab ek hí hai. “K̄hudáwand rahím aur hannán hai, zú ul túl aur Rabb ul faẓl haiṅ: us ká jhúnjhláná dáimá nahíṅ; wuh apne gusse ko abad tab nahíṅ rakh chhoregá.” Rahm is tarah maḡlúm detá hai, kí wuh hamesha un logon par hotá hai, jo kí ádl ke rú se sazá ke láiq hai: maslan baní ádam, gunáh ke sabab, az rú i ádl ke, dozaḡhí haiṅ, lekin K̄hudá ne un par rahm kiya; un kí bahut bardásht kí. “Us ne hamáre gunáhon ke muwáfiq ham se sulúk nahíṅ kiya, aur hamáří k̄hatáon ke mutábiq sazá nahíṅ dí.” Balki K̄hudáwand Ísá Masih ko bhej diya, táki wuh hamen gunáhon se chhuráwe, dozaḡh se bacháwe, aur ák̄hir ham ko bihisht men pahuncháwe. Jis tarah báp beṭon par tars khátá hai, usí tarah K̄hudáwand, jo us se ḡarte haiṅ, un par rahm kartá hai. K̄hudá kí sab sifaton se yih sifát insán ko niháyat piyáří maḡlúm detí hai; kvúnki we gunahḡár haiṅ, aur K̄hudá rahm baḡhshnewálá hai. Masíh ká autár lená aur mára jáná, Rúh Quds ká ináyat karná, sab rahm se húa hai. Ab ham logon ko munásib hai, kí apne bháíon ko waise hí piyár kiya karen; apne qarzdáron ko baḡhshá karen; jo kí bure aur ná shukrguzár haiṅ, un par mihrbání kiya karen; bhúkhe ko roṭí khiláwen, piyáse ko pání piláwen, nange ko kaprá pahináwen, aur yatim ko parwarish karen. Hamen cháhíye, kí apne dushmanon ko piyár karen; jo lanat bhejen, un ke liye barakat mángen; jo satáwen aur dukh dewen, un ke liye duá karen; sab se ziyáda, us rahm kí k̄habar, jo K̄hudá ne K̄hudáwand Ísá Masíh men záhir kiya hai, sab ko jáke kah sunáwen. Tab ham apne Báp ke, jo ásmán par hai, beṭe kahláwenge. Us ká piyár ham sabhon par hogá, aur sab koí, jo hamáre kámon ko dekhenge, hamáre ásmání Báp kí ṭaríf karenge. Par jitne log kí in kám o k̄hásiyat se bilkull mahrúm haiṅ, un ká kyá hál hogá? K̄hudá jis din rástí se dunyá kí ádálát karne ko áwegá, us din wuh sirf unhíṅ ko qabúl karegá, jo kí piyár,rahm o bhaláí men K̄hudá

ke mushábih haiñ ; aur jo un ke baraks ádaten istiámál karte haiñ, we Kḥudá ke gazab ke láiq honge. Kḥudá agarchi rahím hai, tau-bhí wuh apne ádl ko chhorke, gunahgáron par rahm nahín karegá.

Kḥudá ne apne kalám men apne taín sachchá Kḥudá kahke záhír kiyá hai. “Sachcháí Kḥudá kí hamesha qáim hai.” Bahut sí báten us ne kahín, jo haqíqat men waisíhí niklín : us kí peshkhabarián hamesha púrí hotí áín, aur áyande ko waisíhí púrí hotí jáengí. Maslan Masíh kí paidáish aur zindagí, maut o jí uṭhná, aur ásmán par chaṛh jáná, Rúh Quds ko názil karná, aur Injíl ke phailne ke haqq men jitní báten áge kahí gaí thín, sab ke sab púrí haiñ. Yahúdíon aur Ísáíon ke haqq men bhí sab sach niklá. Kḥudá ne káí ek ádmíon se áhd o paimán kiyá thá, aur un iqráron ko barwaqt púra kiyá. Ye sab us kí sachcháí par gawáhí detí haiñ. Aur phir apne shara men bhí us ne maná kiyá, ki koí shaḵhs, kisí sabab se, jhuth na bolá kare : hán, us ne kahá, ki “Sab jhúṭhíon ká hissa us jhíl men hogá, jo ág aur gandhak se jaltí hai.” In báton se maḷúm hotá hai, Yahowáh wafádár o sachchá Kḥudá hai. Cháhiye kí us ke bandagí karnewále us ko rúh aur sachcháí se bandagí kiyá karen ; us kí sab báton par ímán láwen ; kyúнки bagair ímán ke koí Kḥudá ko kḥush nahín kar saktá hai. Jo koí Kḥudá kí bát par ímán nahín látá, wuh Kḥudá ko jhuthá ṭhahrátá hai. Jab kí us ne farmáyá, ki gunahgár dozaḵh men dále jáwenge, tab gunahgáron ko is bát par yaqín láke ḍarná cháhiye. Zarúr hai kí we gunáhon se tauba karen aur báz raheñ. Phir Kḥudá ne wāda kiyá, ki jo koí Masíh par ímán láwegá, aur baptismá páwegá, so bach jáegá. Pas cháhiye kí ímán láwen aur baptismá lewen. Kḥudá sachchá hai, aur mumkin nahín kí wuh jhúṭh bole. Isí tarah cháhiye, maut, hashar o qiyámat ke haqq men, jo kuchh likhá hai, sach máneñ.

Kḥudá ká ádl bhí us kí zát par niháyat zeb detá hai. “Wuh chaṭ-tán hai, aur us ká kám kámil hai ; us kí sab ráhen rást haiñ ; wuh wafádár Kḥudá hai, aur dagá se mubarrá hai ; wuh sádiq aur amín hai.” Is sifāt ke bedún Kḥudá izzat o piyár ke láiq nahín ho saktá thá. Wuh agar cháhtá, to apní qudrat se logon ko tábidár banátá, aur apne hukm ko manátá ; lekin is bát se us ká hukm bilkull zulm ke taur par insán ke dil men asar kartá. Koí bhí dil se kḥush hoke us kí tábidarí na uṭhátá, shauq se us kí kḥidmat koí bhí na kartá, balki gulám kí mánind us kí bandagí kartá aur us ke hukmon ko mántá. Ab us sifāt ke hone se Kḥudá ke log beinsáfi aur zulm se bachke amn men rahte haiñ. So sharíron ko cháhiye, kí Kḥudá ke beriyá ádl se niháyat kḥauf karen ; kyúнки us ká gazab jalánewálí ág hai. Agarchi wuh is dunyá men har gunáh kí sazá usí waqt nahín detá, aur nek o bad donon ko ekaṭṭhe rakhtá hai, lekin Kḥudá intiqám lenewálá hai. Ek din aisá hogá, kí wuh sabhon ká insáf karegá ; sharíron ko sazá degá, aur nekon ko un ke ámalon ká ajr degá. Jab kí us ne apne Beṭe ko de diyá, kí wuh gunáh ke wáste apní ján de, tab sharíron ko kahán ṭhikáná hai ? Un ko cháhiye kí apne dil se púchheñ, kí ham, jo umr bhar Kḥudá ke muḵhálif kám karte rahe, yāne us ke kalám ko nahín máná, aur us ke Beṭe ko nahín qabúlá, aur Rúh Quds ko gangín kiyá, is ke iwaz hamen kyá milegá ?

Upar kí báton se yaqín hogá, kí Yahowáh ke siwá aur koí Kḥudá

nahín hai. Wuh akelá aur lásání hai. Us kí sifaten aisi hai, jo kí Ulúhiyat men húa cháhiye. Wuh azím o jalál wálá,—wuh is sarkash gunahgár, beadab o náfarmánbardár dunyá ke bádsháh o hákim hone ke láiq hai. Is liye ádmíon ko har tarah se us kí bandagí aur farmánbardarí karní wájib hai; kyúнки wuh un se rúhání aur jismání ibádat hamesha talab kartá hai.

III.

TASLÍS KE BAYÁN MEN.

REV. C. G. PFANDER KÍ TASNÍF.

Khudáwand I'sá Masíh kí niqmat, aur Khudá kí mahabbat, aur Rúh ul Quds kí rifáqat tum sabhon ke sáth hamesha howe. Ámín.—2 Kar. 13 : 14.

YIH áyat barakat kí duá hai, Khudá ke, aur Masíh ke, aur Rúh i Quds ke nám men; aur is bát se, kí tino ká nám zikr húa, záhir o sabit hai, kí ímándár Khudá kí púrí barakat—na akele Khudá Báp se, na akele Beṭe se, aur na akele Rúh ul Quds se—balki majmú'a Báp, Beṭe, aur Rúh i Quds se—pátá hai; aur isí sabab se Masíhi ádmí, injíl ke mazmún ke muwáfíq, Khudá ko *tín-ek* mántá, aur us kí sitáish aur bandagí kartá hai; yáne wuh *Taslís* ká muṭtaqid hai; aur aise i'atíqád ko naját ke liye zarúr o lázim jántá hai. Magar *Wahdat* ko bhí mántá hai; kis wáste, kí muqaddas kitábon men sáf sáf bayán húa hai, kí Khudá ek aur wáhid hai; chunánchi Istisná, 6 : 4 men likhá hai, kí "Ai Isráíl, sun : hamará Khudáwand Khudá ek hai." Aur Yasaiyáh, 5 : 5 men zikr hai, kí "Main parwardigár hún; koí aur nahín; mere siwá koí Khudá nahín hai." Aur injíl men 1 Kar. 8 : 4 men likhá hai, kí "Ham jánte hai, kí jahán men but kuchh nahín, aur koí Khudá nahín magar ek." Aur Afs. 4 : 6 men bhí likhá hai, kí "Ek Khudá hai, jo sab ká Báp, kí sab ke úpar, aur sab ke darmiyán, aur tum sab men hai." Pas, Masíhi wahdat se kabhi inkár nahín kartá, balki dil o ján se us ká muṭtaqid hai; magar yihí kahtá, kí wahdat men taslís hai; aur taslís ká i'atíqád Khudá kí púrí barakat páne, aur naját hásil karne ke wáste zarúr o lázim hai.

Ab Taslís kí ṭalím *tín* bát men bayán karenge :

I. Is ṭalím ko kalám Iláhi se sábit karenge.

II. Us ke bayán kí bábat kuchh kuchh zikr karenge.

III. We barakaten bayán kí jáengí, jo is ṭalím se hásil hotí hai.

I. *Taslís kí subút men kalám Iláhi se.*—Jáná cháhiye, kí taslís sirf Khudá ke kalám se sábit ho saktá hai. Khudá kí zát aql kí daryáft

se báhar hai; aur is liye us kí kaifiyat ke wáste aql ke rú se bát karná beaqlí hai. Aur fázilón aur gyáníón ko ma'lúm o yaqín hai, kí ádmí K̤hudá kí zát se sirf itná jántá aur samajhtá hai, jitná K̤hudá ne apne kalám men bayán o ayan farmáyá hai; aur kutub i muqaddas men K̤hudá ne apní zát i wáhid ko taslís ke sáth bayán kiyá hai; yāne apne taín K̤hudá Báp, aur Beṭá, aur Rúh i Quds záhir kiyá hai.

Aur yih, kí Beṭá, jo murád Isá Masíh se hai, K̤hudá hai, kalám Ilá-hí kí áyatón se sáf sábit hai; jin se ham yahán sirf do ek mazkúr karenge. Yúh. 1 : 1—3 yún likhá hai, kí “Ibtidá men Kalima thá, aur Kalima K̤hudá ke sáth thá, aur Kalima K̤hudá thá. Yihí ibtidá men K̤hudá ke sáth thá. Sab chízen us se maujúd hún, aur maujúdát men bagair us ke koí chíz maujúd nahín húi.” Aur chauthí áyat men sáf bayán húa, kí wuh Kalima, jo in áyatón men K̤hudá kahá gayá, Isá Masíh hai; chunánchi mazkúr hai, kí “Kalima mujassam húa, aur wuh fazl aur rástí se bharpúr hoke hamáre darmiyán rahá, aur ham ne us ká aisá jalál dekhá, jaise Báp ke iklaute ká jalál.” Aur Kal. 1 : 13—17 likhá hai, kí K̤hudá ne ham ko táríkí ke qabze se chhuráyá, aur apne piyáre Beṭe kí bádsháhat men dákhil kiyá. Us men ham us ke lahú ke sabab se naját, yāne gunáhon kí muáfí, páte hain. Wuh andekhe K̤hudá kí súrat hai; aur wuh sárí khilqat men pahlautá hai; kyúнки us se sárí chízen, jo ásmán aur zamín par hain, dekhí aur andekhi, kyá taḡht, kyá kháwindián, kyá riyásat, kyá muḡhtárián, paidá kí gayín. Sárí chízen us se, aur us ke liye, paidá hún; aur wuh sab se bará hai; aur us se sárí chízen bahál rahtí hain.” Aur Róm. 9 : 5 men hai, kí “Jism ke rú se Masíh bhí un men se (yāne Yahúdión men se) niklá : wuhí sab se buzurg K̤hudá hai; abad tak mubáarak ho; ámín.” Phir 1 Tim. 3 : 16 mastúr hai, kí “Yaqínan saláhiyat ká bhed bará hai; kí K̤hudá jism men záhir húa, aur Rúh se tasdíq kiyá gayá.” Aur phir 1 Yúh. 5 : 20 likhá hai, kí “Ham to us men, jo sach hai, rahte hain, yāne Isá Masíh men, jo us ká Beṭá hai. K̤hudá i haqíqí aur hayát i abadí yih hai.” Pas, in áyatón men sáf kaná gayá, kí Masíh K̤hudá hai.

Aur Masíh ne khud bhí sífat i Iláhi apne sáth mansúb kí hain; jaisá Yúh. 5 : 17, 19 men farmáyá hai, kí “Merá Báp ab tak kám kartá hai, aur main bhí kám kartá hún. Jo kám kí wuh kartá hai, Beṭá bhí usí tarah wuhí kartá hai”—jis ká mazmún yih hai, kí jaisá Báp, yāne K̤hudá, qádir hai, main bhí qádir hún. Aur usí báb kí 21, 22, 23 men kahá, kí “Jaisá Báp murdoḡ ko zinda kartá, waisá Beṭá bhí murdoḡ ko jilátá hai.” Aur yih, kí roz i qiyámat ká hákim wuhí hogá; aur jaisá Báp kí, waise Beṭe kí sitáish karná cháhiye, phir Yúh. 1 : 3 Masíh ne farmáyá hai, kí “Main aur Báp ek hain;” aur 11 : 25 kahá, kí “Qiyámat aur hayát main hún.” Záhir hai, kí wuh, jo qiyámat, aur hayát, aur K̤hudá se ek hai, so K̤hudá hai. Pas, Masíh kí Ulúhiyat zikr kí húi áyatón se sáf sáf ayan aur bayán húi hai.

Aur Tauret men bhí Masíh kí Ulúhiyat ká zikr hai; chunánchi Yas. 9 : 6, 7 men mazkúr hai, kí “Ek Beṭá hamáre liye paidá húa, aur ek larhá ham ko baḡhshá gayá, jis ke kándhe par sardárí hogí; aur jis ke nám Ajíb, Mushír, Qádir K̤hudá, aur Abadí Báp, aur Salámat ká Sardár honge; aur us kí bádsháhat aur salámat kí afzáish kí intihá na

hogí." Aur phir Mikhá, 5 : 2 men likhá hai, ki " Ai Baitlaham Af-rátá, har chand ki tú Yahúdá ke hazáron (yañe shahron) men chhoṭá hai, par tujh se mere liye wuh áwegá, jo Isráil men bádsháhat karegá, jis ki barámad qadím, balki azal se thí." Záhir hai, ki yih áyat Ma-síh par marjú hai ; kis wáste, ki wuh Baitlaham men paidá húa ; aur Baní Isráil ká rúhání aur haqíqí bádsháh wuhí hai.

Ab yih bát báqí rahí, ki sábit karen, ki Rúh ul Quds bhí Kḥudá hai. Sifaton se mansúb húa, aur Kḥudá kahá gayá. Zab. 104 : 30 likhá hai, ki " Tú apní Rúh ko bhejtá hai ; we paidá hote hain ; aur tú rú i zamín ko táza kartá hai." Pas, is súrat men, ki is áyat ke mazmún ke muwáfiq álam kí paidáish Rúh ul Quds ke wasíle se bhí húi, to zá-hir hai, ki wuh bhí qádir hai ; jaisá ki wuh Ulúhiyat kí is sifat se, in-jíl, yañe 1 Kar. bárahwen báb men mausúf húi hai ; jis báb men un niámaton aur karámaton ká, jo hawáron aur pahle Masíhion ko pa-hunchín, zikr hokar 11 áyat likhá hai, ki " In sab ámalon ká báis wuhí ek Rúh (yañe Rúh ul Quds) hai, ki har kisí ko apne iráde ke muwáfiq bántti hai." Aur phir 1 Kar. 2 : 10 men álimiyat kí sifat bhí Rúh ul Quds se mansúb húi ; chunánchi likhá hai, ki " Kḥudá ne apní Rúh ke wasíle se ham par záhir kiyá ; kyúnci Rúh sab chízon ko, balki Kḥudá ke gahiráo ko bhí, tahqíq kartí hai." Aur is sifat ko Masíh ne bhí Rúh ul Quds se nisbat deke Yúh. 16 : 13 apne shágirdon se wáda kiyá, ki " Jab wuh, yañe Sachcháí kí Rúh, áwe, wuh tum ko sári sachcháí kí ráh dikhlawegí ; kyúnci wuh apní na kahegi, balki jo kuchh sunegi, so kahegi ; aur tum ko áyande kí khabar degí." Aur Afs. 1 : 17 men hikmat aur izhár kí Rúh kahí gai. Pas, dar hále ki Rúh ul Quds sab chízon ko tahqíq, aur Kḥudá kí zát kí gahráton ko daryáft kartí hai ; aur hawáron ko sab haqíqaton kí taraf rahnumái kí ; aur áyanda báton ká izhár un se kiyá hai, to sáf záhir hai, ki wuh álim, aur Ulúhiyat ke martabe men hai. Aur is liye injíl kí áyanda áyaton men Rúh ul Quds Kḥudá bhí kahláti hai ; jaisá ki Ámál, 5 : 3, 4 men likhá hai, ki Patras hawári ne Hanáníyás se, jis ne makr aur riyá kí ráh se use jhuthláyá thá, taqrír karke farmáyá, ki " Ai Hanáni-yás, Shaitán tere dil men kyún samá gayá hai ? ki tú ne Rúh ul Quds kí nisbat jhúth kahá hai ; tú ne ádmí se nahín, balki Kḥudá se jhúth kahá ;" yañe Rúh ul Quds, jise Hanáníyás ne jhuthláyá, ádmí nahín, balki Kḥudá hai. Phir 1 Kar. 3 : 16 men likhá hai, ki " Kyá tum-hen ma'lúm nahín, ki tum Kḥudá kí haikal ho, aur Kḥudá kí Rúh tum men rahtí hai?" Pas, haqíqí Isái is sabab se, ki Rúh ul Quds un ke dil men sákin rahtí hai, Kḥudá kí haikal kahláte hain ; to záhir o ásh-kár hai, ki Rúh ul Quds Ulúhiyat ke martabe men, Kḥudá hai. Pas, in áyaton se sáf záhir o sábit húa, ki Rúh i Quds bhí kutub i muqad-das men Kḥudái sifat se mausúf húa, aur Kḥudá kahá gayá hai.

Aur is ke siwá, injíl men waisí áyaten bhí hain, jin men Báp, aur Beṭá, aur Rúh ul Quds ek jagah mazkúr húi hai ; chunánchi is áyat men, jis ko ham ne is nasihat kí asl thahráyá, likhá hai, ki " Kḥudá-wand Isá Masíh kí niámat, aur Kḥudá kí mahabbat, aur Rúh i Quds kí rifáqat tum sab ke sáth hamesha howe ; ámin." Pas, is áyat men Báp, aur Beṭe, aur Rúh i Quds ká zikr hai ; aur tínon ko wuhí mar-taba mansúb karke áin hikmat o barakat kahá gayá, ki Kḥudái sifat-

on se hai. Aur jab Masíh ne Yúhanná nabí se istibág páyá, to jáisá kí Matí, 3 : 16, 17 men mazkúr hai, “ Ásmán ke darwáze khul gae, aur us ne K̤hudá kí Rúh ko kabútar kí mánind utarte, aur us par áte dekhá ; aur ekáek ásmán se ek áwáz áí, kí Yih merá piyára Betá hai, jis se main rází hún.” In áyaton men phir Báp, Beṭe aur Rúh i Quds ká zikr hai—Báp ásmán se boltá, aur Isá Masíh ko piyára Betá kahtá hai ; aur Rúh i Quds ásmán se Masíh par utartá hai. Aur I Yúh. 5 : 7 men yún bayán húa hai, kí “ Tín hai, jo ásmán par gawáhi deṭe hai, Báp, aur Kalima, (yaṇe Beṭá), aur Rúh i Quds ; aur ye tīnon ek hai.” K̤hulása, mazkúra áyaton se sáf bayán o áyán hai, kí injil ke mazmún ke muwáfíq Báp, aur Beṭá, aur Rúh i Quds ek hai ; aur ye tīnon, yaṇe Báp, Beṭá, aur Rúh i Quds, wuhí K̤hudá i wáhid aur haqíqí hai, jis ko abad ul ábád hamd o jalál ho ; ámin.

Magar Tauret men bhí taslís ká ishára húa hai ; chunánchi Gintí, 6 : 22—27 likhá hai, kí “ Phir K̤hudáwand ne Músá ko k̤hitáb karke farmáyá, kí Harún aur baní Harún ko farmá, aur unhen kah, kí Tumhen cháhiye, kí baní Isráil ke haqq men yún duá karo, aur unhen kaho : K̤hudáwand tujhe barakat baṭhshe, aur terá nigabhán rabe ; K̤hudáwand apne chihre ká jalwa tujhe dikháwe, aur tujh par rahm kare ; K̤hudáwand apne chihre ko tujh par mutawajji kare, aur tujhe salámatí baṭhshe. We merá nám leke baní Isráil ke liye duá karen, aur main unhen barakat baṭhshúngá.” In áyaton men K̤hudáwand lafz, jo K̤hudáe wáhid se garz hai, tīn bár zikr húa ; aur dúsre aur tísre dafá chihre ke lafz ke sáth ; aur chihra dil ko bayán kartá ; aur us ke bamújib K̤hudá kí zát ká káshf, yaṇe zát ke bayán karnewále se garz hai ; aur is wáste Beṭe, yaṇe Masíh par, aur Rúh i Quds par ishára kartá hai ; kyúнки K̤hudá kí mugaiyab zát Beṭe aur Rúh i Quds ke wasíle se bayán húi hai. Aur waisá hí tauret kí we áyaten bhí taslís par ishára kartí hai, jin men K̤hudá ká nám síga i jamá ke sáth mazkúr húa hai ; chunánchi Paid. 1 : 26 men yún likhá hai, kí “ K̤hudá ne káhá, kí Ham ádmí ko apná shabáha aur apní súrat banáwen.” Aur isí tarah we áyaten bhí taslís par dalálat kartí hai, jin men kahá gayá, kí K̤hudáwand ká firishta Abirahám, aur Músá, wagaira par názil húa ; aur phir wuhí firishta K̤hudá kahá gayá ; chunánchi Paid. 18 : 2 men likhá hai, kí tīn ádmí, yaṇe tīn firishte Abirahám ke pás áe ; aur 13, 17, o 20 áyaton men un firishton men se ek firishta K̤hudáwand, yaṇe K̤hudá kahá gayá. Aur K̤hur. 3 báb men likhá hai, kí “ K̤hudáwand ká firishta ek búte men ág ke shuqle men Músá par záhir húa ;” aur 4 o 6 áyaton men yún bayán hai, kí jab K̤hudáwand ne dekhá, kí wuh, yaṇe Músá dekhne ko ek taraf phirá, to K̤hudá ne use búte ke andar se pukará, aur kahá, kí “ Main tere báp ká K̤hudá, Abirahám ká K̤hudá, aur Izháq ká K̤hudá, aur Yaqúb ká K̤hudá hún.” Pas, záhir o áshkár hai, kí tauret men bhí taslís ká ishára o bayán hai. Ab agar tum púchho, kí taslís ká kyá maṇe hai, aur taslís K̤hudá i wáhid men kis tarah ho sake ? to is ke bayán men yahán chand kala-me zikr kareṅge ; tum kán dhar suno, aur dil se mutawajji ho.

II. Taslís ke maṇe yih nahín, kí goyá tīn K̤hudá hokar Báp, aur Beṭá, aur Rúh i Quds, har ek ek alag K̤hudá ho ; balki matlab yih

hai, kí zát kí *wahdat* aur yaktái men taslís hai. Aur agar koí kahe, kí Tín kis tarah ek ho sakte? to thík hai, kí tín chízen ek chíz nahín ho saktín; magar *Khudá* chíz yá *maḥlúq* nahín hai. Us kí zát i pák *maḥlúq* kí zát se niháyat pák aur álá hai; aur is sabab se us ko in kí zát ke sáth muqábil karná na cháhiye; aur gumán mat karná, kí us kí sifát in kí sifát se barábar ho. *Maḥlúqát* men jis bát ká honá muhál hai, us zát i pák mutlaq men mumkin hai; magar is súrat men kí *Khudá* kí zát aql kí daryáft se báhar hai, to us kí sifaten bhí samajh se báhar hai. Jo jo *Khudá* ne apní zát o sifát kí bábat apne kalám men bayán aur záhir kiyá hai, us ko máunná aur qabúl karná cháhiye, agarchi aql us ko daryáft na kar sake. Aur is-hálat men, kí taslís kí talím injil kí áyaton se sáf záhir aur sábit hai, to áqil aur imándár ko dil o ján se us ká muṭtaqid honá aur qabúl karná kuchh mushkil nahín.

Aur injil ke mazmún ke muwáfíq *Khudá* kí zát i pák ke is bare mushkil bhed kí bábat itná hí kah sakte hai, kí agarchi Báp, aur Beṭá, aur Rúh i Quds ek zát i pák yaktá hai, chunánchi tín nahín, balki haqíqát men sirf ek hí *Khudá* hai; phir Báp, aur Beṭe, aur Rúh i Quds ke darmiyán haqíqí farq hai: magar ek aisí tarah se kí wahdat bátíl nahín hotí, aur nuqsán nahín páti. Aur *Báp ká farz* mutlaq, aur mugaiyab zát se garaz hai; is liye Yúhanná ke 4 : 24 men *Khudá* ko Rúh, yāne Rúh i mutlaq kahá hai. Aur *Beṭe ke farz* se kalima, yāne kalima i mutlaq, aur ilm i azlí garaz hai, (jis men goyá *Khudá* apne taín musháhida kartá aur dikhátá hai), aur jis ke wasile se apní mugaiyab aur poshída zát ko záhir kartá hai; chunánchi Yúhanná ke 1 : 1 — 4 tak likhá hai, “Ibtidá men kalima thá, aur kalima *Khudá* ke sáth thá, aur kalima *Khudá* thá; yihí ibtidá men *Khudá* ke sáth thá; sab chízen us se maujúd hún, aur maujúdát men bagair us ke koí chíz maujúd nahín húi. Zindagí us men thí, aur wuh zindagí insán ká núr thí.” Aur Sulaimán ke Amsál kí kitáb ke 8 : 12, 22, 23, 24, 27, o 30 áyaten Masíh par ishára hokar aisá likhá hai, kí “Maig, jo hikmat hún, hoshyári ke sáth rahtí hún, aur dánish ke mashware hásil kartí hún. *Khudá*wand ne mujhe apní ráh kí auwala banáyá, apne kámon se peshtar qadím se. Main azal se muqarrar húi, zamín kí paidáish kí ibtidá se pahle. Main us waqt paidá húi, kí na gahráo the, aur na chashme, aur na páníon ke bare bare makán. Main us waqt thí, kí us ne ásmán banáe, aur samundar kí sath ihátá kiyá. Us waqt main us ke pás sána thí, aur main roz roz us kí *khushnúdí* thí, aur har waqt us ke huzúr shádi kartí thí.” Aur *Rúh i Quds* ká lafz núr i Iláhí, aur núrí hidáyat se garaz hai, jo Beṭe kí marifat Báp se záhir hotí hai, aur jis ke wasile se *Khudá* imándáron ko roshan kartá, aur apní mahabbat un ke dilon men detá, aur qáim kartá hai. Pas Masíhí log *Khudá* ko sab chízon ká bāis, aur sári nekíon aur saḍaton ká qásim jánke is mazmún se us kí ibádat aur bandagí karte hai, kí wuh sári niámateg aur nekíán, sirf Beṭe ke wasile se bandon par pahunchátá hai, aisá kí wuh faqat álamon ko us ke wasile se paidá karke un kí rakhwálí kartá hai; balki usí kí marifat se bandon ko gunáh se bhí chhuṭákar hamesha kí naját, aur haqíqí nekbakhtí un ko bakhshtá hai; aur Rúh i Quds kí marifat se un ko roshan karke, aur

haqíqí maʾrifat kí taraf hidáyat far-máke, Masíh par ímán láne aur ne-kí karne kí táqat baḡhshtá hai. Ḳhulása, Ḳhudá kí zát i pák ká wuh bayán, jis ko Masíhí taslís kahte haiṁ, aise umda o ʾalí mazmún par hai; aur agarchi ádmí aql kí rú se is iláqa ko, jo Báp, aur Beṭe, aur Rúh i Quds ke darmiyán wáqi hai, nahíṁ jántá; phir injil ke mazmún ke muwáfiq us kí nisbat itná hí kah saktá hai, kí Beṭe kí hastí aur wajúd Báp men chhipá aur poshída hai; jaisá ki ḡhud Masíh ne Yúh. 5 : 26 men farmáyá hai, kí “Jaisá Báp áp men zindagání rakhtá, Beṭe ko bhí dí hai, kí wuh áp men zindagání rakhe;” aur Yúh. 1 : 1 men Beṭe ko Ḳhudá ká kalima kahá; is tafsíl se, kí “Ubtidá men kalima thá, aur kalima Ḳhudá ke sáth thá, aur kalima Ḳhudá thá.” Pas in áyaton se maʾlúm hotá hai, kí Beṭe kí zát Báp kí pák zát men chhipí aur poshída hai; aur shibáhat aur azlí iláqa, kí Beṭá Báp ke sáth rakhtá, us iláqa aur mel kí mánind hai, jo kalima fikr ke sáth, aur fikr ádmí kí rúh ke sáth rakhtí hai; yaṇe jaise kí kalima fikr men, aur fikr ádmí kí rúh men poshída hai, aur isí se záhír hotí, par asl ke muwáfiq rúh ke sáth ek hai, yún hí Beṭá bhí Báp men hai, aur azal se usí se záhír aur mutawallid húa; lekin phir haqíqat men Báp ke sáth ek hai. Aur phir, jaisá kí ádmí kí rúh fikr aur kalima men apne ko súrat aur shakl men látí hai, aur is wasíle se apne taíṁ záhír aur bayán kartí, yún hí Ḳhudá i mutlaq ne bhí, jo daryáft men nahíṁ átá, áp ko Beṭe, yaṇe azlí kalima men taswír, aur taḡbír, aur záhír o bayán kiyá hai, kí is kalima ke wasíle má-siwá, yaṇe maḡhlúqát ko paidá karke, apne taíṁ khilqat i mahdúd par záhír o bayán kare; aur Beṭe ke wasíle se un kí samajh aur ḡhiyál men qarib o nazdík howe; aur is liye Masíh andekhe Ḳhudá ke jalál kí chamák aur us kí zát ká naqsh aur súrat kahá gayá. Aur injil men likhá hai, kí us men tamám Ulúhiyat qáim aur ṭhaharí rahtí, aur wuh tamám khilqat se pahle mutawallid húa, yaṇe zát pák i mutlaq se záhír húa; chunánchi yih matlaab Ibr. 1 : 3 men, aur Kal. 1 : 15, aur 2 : 9 men likhá hai; aur isí sabab se áp Masíh ne farmáyá hai, kí “Beṭe ke siwá Báp ko koí nahíṁ pahchántá, magar jis par Beṭá záhír kare; aur koí Báp ke pás bagair mere wasíle ke nahíṁ átá;” is wáste jo shakhs kí Beṭe ká munkir hai, so Báp ko, yaṇe Ḳhudá ko inkár kartá, aur nahíṁ pahchántá hai; jaisá kí ye báten Matí, 11 : 27 men, aur Yúh. 14 : 16 men, aur 1 Yúh 2 : 23 men likhí haiṁ. Lekin is liye kí log gumán na le jáwen, kí sháyad har ek Báp aur Beṭe se alag alag Ḳhudá ho, Masíh ne ḡhud farmáyá hai, kí “Main aur Báp ek hún. Jis shakhs ne mujhe dekhá, Báp ko dekhá hai. Aur ai Báp! jo merá, so terá hai, táki sab ádmí Beṭe kí izzat karen, jaisá kí Báp kí izzat karte haiṁ.” Chunánchi ye matlaab Yúh. 10 : 30 men, aur 14 : 9 men, aur 17 : 10 men, aur 5 : 23 men likhe haiṁ. Pas, in áyaton ke muwáfiq Ḳhudá kí chhipí aur poshída pák zat ká káshif, yaṇe záhír karnewálá, Beṭá hai; aur wuh Báp ke sabab se tamám qudrat, aur kamál, aur hikmat, aur jalál men Báp ke sáth ek aur barábar hai; aur Báp, aur Rúh i Quds ke sáth wuhí ek aur sachchá Ḳhudá hai, kí use hamesha tak shukr aur taʾríf hújiyo.

III. *Un barakaton ke bayán men, jo taslís kí taʾlím se hásil hotí haiṁ.*
—Aur we hamárá asl áyat ke muwáfiq tén haiṁ : *Ísá Masíh ká faʾzl,*

Khudá kí mahabbat, aur Rúh ul Quds kí rifáqat; aur in tin bát men we sab niámateñ jama haiñ, jo ádmí ko naját ke liye zarúr o lázim haiñ.

1. Masih ká fazl gunáh kí muáfí, aur Khudá kí razámandí, aur khush-núdí hai; aur yih pahlí bát hai, jo ádmí ko naját ke liye cháhiye, is súrat men kí ádmí gunahgár hai; to Khudá kí marzí aur khushnúdí us par kahán se ho? balki gunáh ke sabab us ke gazab aur qahr ke niche húa hai. Pas, cháhiye kí ádmí pah.e gunáh se pák ho, aur muáfí hásil kare, to us ke bad Khudá ká fazl aur razámandí us par hogí. Is wáste wasíla aur kafára lázim húa; magar gunahgáron ká wasíla aur gunáh ká kafára ádmí yá nabí nahín ho saktá; kis wáste, kí we sab bande haiñ, aur apní bandagí kí shart, jaisá kí cháhiye, púrí nahín kar sakte, to auron ke wáste kahán se bandagí, yá neki aur pun karen? balki ádmí sab ke sab pápí haiñ, jaisá kí Róm. 3: 12, 13 men likhá hai, kí “Koi nekokár nahíñ, ek bhí nahín; sabhon ne gunáh kiyá hai, aur Khudá ke jalál se qásir haiñ.” Aur záhir hai, kí pápí pápíon ke liye wasíla, o kafára, aur naját denewálá ho nahín saktá; aur shukr Khudá ká, kí us ne apní barí rahmat se láchár bandoñ ke liye ek chára paidá kiyá, aur khud autár liyá, yáñe apne Beṭe ko dunyá men bhej diyá, aur us ne ádmí kí súrat pakarke, aur gunahgáron ká zámín hokar, apní ján ko kafára men de diyá, tá us ke kafára, aur us kí neki, aur pun ke sabab se ímándár ká gunáh muáf, aur us ká dil gunáh ke mel se sáf ho; chunánchi Róm. 8: 3, 4 men mazkúr hai, kí “Jo shariát se jism kí kamzorí ke sabab na ho saká, so Khudá se húa, kí us ne apne Beṭe ko gunahgár jism kí súrat men gunáh ke sabab bhejkar gunáh par jism men sazá ká hukm diyá, táki ham men, jo jism ke taur par nahín, balki Rúh ke taur par chalte haiñ, shariát kí rástbází púrí ho;” aur 2 Kar. 5: 21 men likhá hai, kí “Us ne us ko, jo gunáh se wáqif na tha, hamáre oadle gunáh ṭaharáyá, táki ham us ke sabab rástbáz i Iláhí ṭahareñ.” Pas, Isá Masih ke sabab ímándár Masíhí muáfí pákar Khudá ke yahán rástbáz, aur nek aur kámil bantá hai; aur ye sab Masih kí niámateñ taslís kí pahlí barakat haiñ.

2. 1 Yúh. 4: 8 men likhá hai, kí “Khudá mahabbat hai.” Agar Khudá, jaisá bazon ne gumán kiyá, wahdat i mutlaq, yáñe ek aisá yaktá ho, jis men do nahíñ, to cháhiye, kí us men mahabbat, aur gun, aur sifat na ho; is liye kí jab us men mahabbat yá ek aur sifat milí, to khális ek na húa. Pas, agar ádmí taslís ko na máne, to cháhiye, kí Khudá kí mahabbat ko bhí inkár kare. Magar aisá Khudá, jo mahabbat, aur gun, aur sifat se khálí ho, ádmí ko kahán se piyár kare, aur ádmí kyúnkar us se mahabbat rakhe, aur us nekbakhti ko pahunché, jo Khudá kí mahabbat meñ hai? Magar Masíhí, jo dil o ján se taslís ká qáíl hai, us Khudá par ímán láyá, jo mahabbat hai; aur yaqín kiyá, kí Khudá habíb aur rahím hai; aur is súrat men, kí us ko Isá Masih kí niámat milí, yáñe Masíh ke wasíle se us ká sab gunáh muáf húa, aur Khudá ke yahán wuh pák, aur nek, aur kámil ṭahará, to aur kuchh rok nahíñ, kí Khudá kí púrí mahabbat us par aur us ke sáth na ho, aur wuh us barí nekbakhti meñ na pahunché, jo mahabbat i Iláhí men hai; aur is sabab se ímándár Masíhí log Kal. 3: 12 men Khudá ke barguzíde, aur muqaddas, aur mabbúb kahe gae haiñ; aur 1 Pat. 2: 9 men ímándáron kí nisbat yúñ likhá hai, kí “Tum khándán

i maqbúl, aur sháhí káhin, aur ummat i muqaddas, aur qaum i makhsús húe ;” aur 1 Yúh. 3 : 1 men mastúr hai, ki “ Dekho, kyá mahabbat Báp ne ham se kí, ki ham Kḥudá ke farzand kahláwen ; is wáste dunyá ham ko nahín jántí, ki us ne usí ko nahín jáná ;” aur Rúm. 8 : 16, 17 men likhá hai, ki “ Wuh Rúh, (yaṇe Kḥudá kí Rúh) hamárá rúh ke sáth hoke gawáhí detí hai, ki ham Kḥudá ke farzand haiṇ ; aur jab farzand húe, to wáris ṭhahare ; yaṇe Kḥudá ke wáris, aur mirás men Masíh ke sharík haiṇ.” Pas, taslís kí dúsri barakat yih húi, ki Masíh kí niāmat aur fazl ko pákar Kḥudá Báp kí mahabbat ham par hai, aisá ki ham us ke mahbúb aur barguzíde húe, aur wuh ham ko apní ásmání bádsháhat men apne abadí jalál aur nekbakhtí men mirás aur hissa degá. Aur is súrat men, ki Kḥudá ham gunahgáron ko Masíh men aisá piyár kartá hai, to us kí mahabbat hamáre dil men Rúh i Quds ke wasíle se ishḡ. i Iláhí ká shuāla roshan kaití hai.

3. Rúh i Quds kí madad aur rifāqat taslís kí tisri barakat hai.

Jaisá Báp aur Beṭe kí, waisáhí Rúh i Quds kí madad bhí ádmí ko naját ke liye zarúr hai. Báp ne azal se naját kí tadbír kí ; Beṭe ne apne autár lene, aur marne, aur ji uthne se naját ko taiyár aur púrá kíyá ; aur Rúh i Quds apní madad aur rifāqat se ádmí ko naját ke pás pahunchátá ; is sabab se Rúh i Quds Yúh. 14 : 26 men dilásá dene-wálá kahá gayá, aur Yúh. 16 : 13 men Rúh i Sidq, yaṇe sachái kí Rúh kahláyá hai, is wáste ki Rúh i Quds imándár ke dil ko roshan kartá, aur sab sachái us ko batlátá hai. Phir wuh jaisá ki usí báb kí 8 men mazkúr hai, jahán ko, yaṇe jahán ke logon ko gunáh se, aur rástí se, aur sazá se muzlim karegá, yaṇe ádmíon ko un ke gunáh batlāwegá, aur un ko tauba aur imán kí taraf khínchegá. Phir Rúh i Quds ke wasíle se Kḥudá kí mahabbat imándár ke dil men dālí jātí, aur qáim hotí hai, aur us ke dil men gawáhí detá hai, ki terá gunáh muāf, aur tú Kḥudá ká piyárá, aur ásmán ke jalál ká wáris húa ; aur us ko dil kí duā sikklátá, aur aisí aisí báton se imándár ko tasallí detá, us ko haqíqí khushí se khush kartá hai ; chunānchi ye sab bát Rúm. 8 : 14—27, aur 14 : 17 men bayán húi hai. Aur 1 Pat. 1 : 2 men Rúh i Quds taqaddus kí Rúh, yaṇe pákizagí kí Rúh kahá gayá hai ; is sabab se, ki Rúh i Quds imándár ko pák khwáhish bakhshtá hai, aur har nek kám ke wáste us ko uskátá, aur us ko qúwat o qudrat detá hai ; aur jaisá ki Gal. 5 : 22, 23 men likhá hai, ki “ Rúh ke phal ye haiṇ, mahabbat, aur sarúr, aur árám, aur sabr, aur muláimat, aur khushkḥoi, aur imán ;” dekho, ye sab bara ateḡ imándár Masíhí Rúh i Quds kí madad aur rifāqat se pátá hai.

Kḥulása sáf záhir aur ayan húa : ki taslís Injíl kí barí umda talím hai, jis ko naját ke wáste dil o ján se mánná cháhiye ; aur us ne, jo us ko nahín mántá, Kḥudá ko nahín páyá, aur nahín pahcháná, aur gunáh kí muāfi o naját use na milegí ; chunānchi 1 Yúh. 2 : 23 men mazkúr hai, ki “ Jo koí Beṭe ká inkár kartá hai, so Báp ká inkár kartá hai ;” aur 2 Yúh. 9 áyat men kahá hai, ki “ Jo koí Masíh kí talím men nahín rahtá hai, Kḥudá us ká nahín hai ;” aur phir Yúh. 3 : 36 men likhá hai, ki “ Jo ki Beṭe par imán látá hai, hayát i abadí us kí hai ; aur jo Beṭe par imán nahín látá, hayát ko na dekhegá, balki Kḥudá ká ga-

zab us par rahtá hai.” Magar wuh, jis ne púre iātiqād, aur dilí ajizí, aur farotání se Kḥudá kī zāt ke us bhed ko máná aur qabúl kiyá, to *Tríyak* Kḥudá kī púrí barakaten use milengí, aur Isá Masih ká fazl, aur Kḥudá kī mahabbat, aur Rúh i Quds kī rifāqat hamesha us ke sáth hogí. *Ámín.*

IV.

KHUDA KE SATH INSAN KI NISBAT.

REV. JOS. WARREN KÍ TASNÍF.

Kyúinki ham usí se jíte, aur chalte phirte, aur maujúd haiñ.—Ámál, 17 : 28.

JAB Pulús hawárí shahr i Atene men thá, tab us ne wahán ke álimon se ye báten kahíñ. Wuh dalíl kartá thá, ki Yahowáh Kḥudá ke siwá kisé kī pújá, aur buton kī tazím bhí na karná cháhiye. Aur us kī dalíl i kháss yih thí, ki “ham usí se jíte, aur chalte phirte, aur maujúd haiñ;” is wáste na cháhiye, ki ham Kḥudá ko kisé maḡhlúq kī mánind samajheñ; bahut munásib hai, ki ham usí kī parastish karen; aur us kī abadiyat, aur ruháníyat yád karke us kī bandagí men házir hon; na us kī bábat páláiq kḥiyál karen, na us ke iwaz men apne qiyás kī parastish karen.

Pulús ke matlab baham pahuncháne ke liye úpar kī dalíl bahut mufid thí; kyúinki wuh us nisbat se, jo Kḥudá se ham se hai, aur jis ko aql sábit kartí hai, dahl láyá. Aur isí dalíl se sirf butparastí ká gunáh sábit nahiñ hotá hai, balki yih bhí, ki hamen har tarah se Kḥudá kī kḥidmat men házir honá cháhiye.

To ham is waqt kī nasíhat do hisson men taqsím karte haiñ; yāne—

I. Us nisbat ko, jo Kḥudá se ham se hai, sochen.

II. Un farzon ká tasauwar karen, jo us nisbat se hote haiñ.

Aur ákḥir ko yih natíja láwen, ki

Jo kuchh ham karen, sab Kḥudá ke jalál ke liye karen.

I. To áo, ham wuh nisbat, jo Kḥudá se ham se hai, sochen.

1. So yih, ki wuh hamará *Kḥúliq* hai. Ham, usí se maujúd haiñ. Jaisá likhá hai, ki “Kḥudáwand Kḥudá ne zamín kī mittí se Ádam ko banáyá, aur us ke nathron men zindagí ká dam phúnká: so Ádam jítí ján húá.” “Usí ne ham ko banáyá, aur us ke ham haiñ.” Aql yih bát síkhátí hai, ki kisé ne ham ko banáyá. Agar koí kahe, ki ham apne má báp se paidá hue, aur we apne wálidain se, aur silsila se sab báp dáde bhí usí tarah se hote áe haiñ: to aql se yih qiyás jhaṭ se hotí hai, ki pahle má báp kis se paidá hue? kyúinki záhiran yih

sach hai, ki koí shai apne ko baná nahín saktí hai. To hamáre *aslí* má báp banáe gae. Aur aql yih bhí síkhátí hai, ki ham sab K̤hudá kí qudrat se paidá hote haiñ; kyúñki agarchi chízon ká silsila ho, aur ek se dúsrí paidá howe, taubhí sab chízon ko phal dene, aur apní apní qism barháne kí táqat K̤hudá detá hai; nahín, to us ke siwáe kaun denewálá hai? Aur agar koí kahen, ki yih tásir áp se áp hotí hai, to yih námumkin hai; kyúñki jab koí shai apne ko baná nahín saktí hai, to yih tásir kyúñkar áp se áp paidá howe? To maľúm hai, ki ham sab banáe gae. Us kí bábat, jo áp se áp sábit hotá hai, aur dalil na karná cháhiye.

Bāze kahte haiñ, ki dewton ne ádmí ko banáyá; k̤háss karke Brahman yih qiyás karte haiñ; lekin we hí apní is himáqat ká jawáb dete haiñ, jab kahte haiñ, ki ek hí K̤hudá Qádir i Mutlaq hai. Ham is bát ko yiháñ chhore dete haiñ; kyúñki is waqt K̤hudá kí wahdáníyat aur k̤hássiyat ke bayán karne ká iráda nahín hai; aur jaháñ us kí wahdáníyat aur k̤hássiyat sábit hon, to yih bhí sábit hogá, ki wuh K̤háliq hai.

2. Wuh hamará *háfiz* hai. Ham usí se jíte haiñ. Jo koí zará sá k̤hiyál kartá hai, yih iqrár kartá hai, ki agar K̤hudá na hotá, to aur kuchh maujúdát na ho saktí. Wuhí sárí zindagí kí bunyád hai. Wuhí sáre álam kí zindagí ká sotá hai, jis kí har taraf se dhāren bah nikaltí haiñ. Jab us ko K̤háliq samajhá, tab yih bát bhí sábit húi. Lekin wuh sirf paidá nahín kartá. Wuh paidá karke, aur har ek ko us ke daur par chalāne ká shurú karke nahín chhor detá. Maľúm hai, ki bahut log samajhte haiñ, ki K̤hudá beshakk paidá karnewálá hai, lekin háfiz nahín; yañe, un kí chál aur báton se maľúm hai, ki we áp apne ko háfiz samajhte haiñ; aur yád nahín rakhte haiñ, ki agar K̤hudá kí wuhí táqat, jis se we paidá hūe, har dam unhen na sambháltí, to un kí ján fauran nest ho játí. Ham us se faqat maujúd hí na hūe, balki usí se jíte bhí haiñ. Ham is wáste jíte haiñ, ki wuh jítá hai.

Upar kí sanad ká tarjuma is tarah se ho saktá hai, yañe, Ham usí *men* jíte, wagaira. Matlab nahín hai, ki K̤háliq k̤hilqat se judá nahín hai. Bāze Hindú failsúf kahte haiñ, ki K̤hudá faqat álam kí Rúh hai,—ham *men* boltá, kám kartá, bichár kartá hai. Beshakk K̤hudá har kahín maujúd hai, aur har chíz *men*; lekin na har chíz *men*. Na kisí chíz *men* aisá házir hai, ki wuh chíz us ká hissa ho; kyúñki agar yih hál ho, to K̤hudá aur k̤hilqat ek hí shai maľúm hote; aur agar K̤hudá aur k̤hilqat ek hí hote, to K̤hudá kí kuchh k̤hássiyat nahín hotí; aur jis kí kuchh k̤hásiyat nahín hai, wuhí chíz i nest hai. To jo kahte haiñ, ki sárí chízen K̤hudá ke hisse haiñ, so K̤hudá ko nest t̤habarāte haiñ.

Munásib hai, ki jab ham K̤hudá ká tasauwar karen, to us ko k̤háliq jānen;—na sirf maujúdát ká aisá asl, ki jaisá darakht ká bīj, jis ke ikhtiyár *men* barhná yá na barhná nahín hai. Us ko ek hast i jaláli, jis ke ikhtiyár *men* hai, ki k̤halq kare, yá na kare, samajhná cháhiye;—jo sáre maľhlúq se nirálá hai;—jo jaisá ká taisá hotá, k̤hwáh k̤hilqat ho, k̤hwáh na ho. Pas, aisá K̤háliq apní k̤hilqat ká háfiz hogá; aur wuh paidáish aur intizám kartá rahegá, jaisá kí k̤halq kí hifázat ke liye darkár ho.

3. Wuh hamárá *Parwardigár* hai. Ham usí se chalte phirte haiñ. Hameñ kuchh táqat nahíñ hai, jo usí ne nahíñ dí. Ab is bát meñ bhúlná na cháhiye. Jo koí *Khudá* kí hastí yaqín kartá hai, so use *Parwardigár* bhí jántá hai; lekin bahut logon ke dil par yih ímán kuchh asar nahíñ kartá hai. Jab kí we aql se sachchí dalílen, is muqaddame meñ, karte haiñ, tab hí apne dil kí magrúrí aur gaflat se bhúl chúk meñ par játe haiñ; aur aisí chál chalte haiñ, kí goyá zihn aur jism kí táqat, zindagí kí hálát aur fursat, ham jins kí suhbat, mál aur daulat, sukh aur áram ke liye kisú ke shákir na honá cháhiye;—go kí we áp apní *parwardigárí* karte—apní *khairiyat* o *salámatí* qáim karte—aur apne liye har hálát meñ áp káfi hote. Is tarah dil áp ko fareb de saktá hai; aur jab aql durust hai, to ádmí apne gumráh dil kí *khatar* na leke samajh saktá hai, kí main durust hún, aur us ká dil shekhí aur gaflat se bilkull bhará, aur Pák *Parwardigár* se niháyat dúr ho. To use *Parwardigár* kahná káfi nahíñ hai; dil meñ mánná cháhiye, kí wuhí akelá hameñ sab kuchh detá hai. Munásib hai, kí hamárá aql, aur dilí mahabbat o *khwáhish*, bataur rasm ke, us kí *parwardigárí* har hálát meñ har dam yád rakheñ. “Us kí ánkheñ har já haiñ, aur bhale bure ko dekhtíñ haiñ.” “Wuh apná háth khol detá, aur har jándár ko rasad pahunchá detá hai.” Wuh ádmí-on kí buráí se apne khojón ká fáida nikáltá hai. Wuh har tarah se hamárá *khabar* letá hai; aur peshbíní se tadbír kartá hai; aur hamáre liye dunyá ke sáre kárkhána chalátá hai.

II. Ab un farzon ká tasauwar karen, jo us nisbat se hote haiñ.

1. To, pahlá, záhír hai, kí agar *Khudá* hamárá *kháliq* hai, to *ham us ke mál* haiñ. “Usí ne ham ko banáyá, aur us ke ham haiñ.” Jab koí ádmí ek chíz banátá hai, aur apne mál se use árásta kartá hai, to wuh usí kí hai. Ham isí tarah se *Khudá* ke mál *thaharte* haiñ. Aur koí aisí qiyás nahíñ kar saktá hai, kí ádmí ke banáne meñ *Khudá* ká koí iráda yá matlab na thá. Us ne beshakk ádmí ko apní koí murád purí karne ke liye banáyá. To us kí kaun sí murád húi hogí? Agar kitáb ul quds meñ is kí *khabar* na hotí, to aql is ká jawáb de saktí. Jo use pahchán sakte haiñ, us kí *khidmat* karne ke liye banáe gae. Us ke mál hoke unheñ munásib hai, kí us ke háth se bhalá aur burá, jazá o sazá, nasíhat o tambíh adab se páwen; áp ko apná na samajheñ; aur apní hálát se qanaat karen; kyúinki us ká haqq hai, kí apne mál ko us hálát meñ rakheñ, jo us kí samajh meñ bihtar ho.

2. Phir, jab wuh hamárá *kháliq* *thahará*, to *Báp* bhí *thahará*. Hamárá asl usí se hai. Kitáb ul quds se maqlúm hotá hai, kí us ne Ádam ko apní súrat par paidá kiyá, yane use aql aur sadáqat o pákízagí dí; aur us ne apní mihir se ham ko bahut báton meñ haiwánon se farq o fazílat baqshí. Farz kiyá, kí ham ne gunáh se sadáqat aur pákízagí kho dí, aur aql meñ bhí beshakk nuqsán páyá hai; lekin *Khudá* kí súrat kuchh ham meñ báqí hai; kyúinki ham use pahchán sakte, aur piyár kar sakte haiñ, aur aql bhí rakhte haiñ. Ádmí ujri pujri imárat kí mánind hai, jo agarchi wíran húi, taubhí jhomprí se kitní álá hai. Ham to *Khudá* ke bhed ko samajh nahíñ sakte haiñ; aur itná faqhr nahíñ karte haiñ, kí samjheñ, kí ham *Khudá* se niháyat dúr nahíñ

haiṁ ; taubhí ham Kḥudá kī mánind haiṁ ; yaṇe, hamárá aql us kī aql ke muwáfíq hai—darje aur qudrat meṁ nahíṁ, par qism meṁ. Is se sábit hai, kī us ne ham ko apne farzand ká sá darja diyá. To thorásá us kī mánind hone se hamen cháhíye, kī use apní asl samajhke us kī aisí izzat karen, jaisí báp kī. Is ke siwáe us ne apní mihr se hamen apne ko Báp kahne diyá hai, jaise kī pák nawishton kī kaí jagah se maḷúm hotá hai. Is wáste us ko piyár karná, us kī tazím karná us ke nám kī taríf záhir karná, aur jo kuchh beṭe par báp ke huqúq haiṁ, we hi ham par farz haiṁ.

3. Isí tarah se Kḥudá ke *bádsháhí huqúq* sábit hote haiṁ ; aur ye huqúq kámil haiṁ. Koí na samajhe, kī ádmí par kuchh farz nahíṁ hai, jab tak kī wuh áp qabúl na kare. Agar ham kisí mulk meṁ jáke waháṁ ke bádsháh ká amal qabúl karen, to us ke haqq ham par chalte haiṁ ; aur jab tak kī ham na jáen, tab tak us ke haqq kuchh nahíṁ haiṁ. Lekin hamárá hálát Kḥudá kī bábat aisí nahíṁ hai. Ham us ke amal meṁ paidá hote haiṁ ; aisí jagah nahíṁ hai, jaháu us ká hukm mánná zarúr nahíṁ hai. Shaitán ko bhí cháhíye, kī us ká mahkúm ho ; aur agarchi mahrúm hai, taubhí us ká har ek gunáh aisá hí bhárá hai, jaisá pahlá gunáh thá, jis ke sabab se wuh mahrúm aur malaún húa. Aur jab ham apni taqsiroṁ ko chhorne meṁ derí karte. to ham ján bújhke sarkashí meṁ rahte. Bahut aise Ísáí haiṁ, kī samajhte haiṁ, kī jinhon ne ásha i Rabbání meṁ sharík hone se pák zindagí basar karne ká waḍa kiyá hai, unhen bahut parhezgárá ke sáth chalná cháhíye ; aur jinhon ne aisá waḍa nahíṁ kiyá, unhen apní marzí par chalne kī ijázat hai ;—lekin yih baṛí kḥatarnák bhúl hai. Kḥudá sabhon ká sultán hai ; aur dindáron par koí aisá hukm nahíṁ hai, jo bedíon par bhí farz nahíṁ. Ai bháí, main tujh se puchhtá hún, Kyá tú Kḥudá ko apná bádsháh jántá hai ? Kyá tere dil ke iráda aur mansúba us ke mahkúm haiṁ ? Agar yih hál ho, to tú mubáarak hai ;—na ho, to terí kyá hí badbakhtí ! Kḥudá terá, aur tú us ká dushman hai !

4. Kḥudá taqlá hamárá *parwarish* kartá hai ; aur is se munásib hai, kī us ke dāwa sochen ; aur shukrguzárá ke sáth farz adá karen. Is liye use piyár bhí karná cháhíye. Roz roz kī niāmaten sochne se bahut fáida hai. Hamen maḷúm na hogá, kī Kḥudá kī parwardigárá se hamen kaisí aur kitní barakaten miltí haiṁ, jab tak kī ham un ká shumár aur qadr samajhne kī koshish na karen. Is hisáb meṁ náte-dáron, aur ján pahchánon ko, aur mál asbáb, aur badan kī durustí, fursat, ázádagí, ilm, sab kuchh láná cháhíye.

Aur kḥáss karke Masíhíon ko zarúr hai, kī un barakaton ko, jo injil se miltí haiṁ, sochen. Agar ham apní hálát un kī hálát se, jo injil ko nahíṁ jánte, muqábala karen, to maḷúm hogá, kī hamen shukr karne, aur Kḥudá ko piyár karne ká sabab beniháyat hai. Kḥudá kī pahchán rakhne se insán ko aise fáida hásil hote haiṁ, kī un ká koí ádmí bayán kar nahíṁ saktá hai. Usí se aisá hilm, aur burdbárá, aur bardásht, aur sabr, aur wafádárá, aur tamíz, aur imtiyáz, aur sachái, aur har tarah kī nekí, kī aur mazhab wálon meṁ kabhí nahíṁ páí jáengí, paidá hote haiṁ. Usí se hazáron dastúr aur rasm, jin ke sabab se zindagí kḥushí se kaṭtí hai, hote haiṁ ;—háṁ, ye rasúm yaháṁ tak járá haiṁ, kī un kī kḥo kḥaslat par asar karte haiṁ, jo injil ke sachche

mu'ataqidd nahín haiñ ;—is wáste Farangíon meñ jhúth, aur aur kai gunáh niháyat púchh aur ghinaune haiñ, agarchi we dindár na hon.

Aur jab ham in báton ko chhorke un ká, jo in kí nisbat se bahut barí haiñ, tasauwar kareñ, to ádmi kí zubán se un kí jalálat aur khúbí ká kyúnkar bayán ho sake ? Jab ham yád kareñ, kí Khudá ne injíl kí khushkhabarí hamáre kánon tak pahuncháí hai, aur apní parwardigárá se us kí hifázat kartá hai, aur us ke wasíla ham ko beshumár wa'da detá hai, aur us kí ummaid i shírin se hamen dilásá bakhshatá hai, tab cháhiye kí ham dil se us ke shákir hoke us kí mahabbat sab chízon se ziyáda cháheñ, aur us kí khidmat kull jánfíshání se kareñ.

Ek gumán i kháss yih hai ; yane, Khudá in sab barakaton ko hamen detá hai, jab kí ham har waqt us kí taq síren kiyá karte haiñ. Paidáish aur parwarish dene se us ká haqq i kámil yih hai, kí ham us kí khidmat meñ, ba dil o ján, har waqt, har hálát meñ, kamáliyat ke sáth, házir rahen ; aur ham ne us kí khidmat is tarah se na kí, balki ham us se phir gae, apní marzí par chale, aur bárhá us kí náshukrí kí ;—taubhí wuh hamári bardásht karke diyá kartá hai ;—aur jab ham apne ko us ke gazab ke láiq kar chuke, tab bhí wuh mihr kartá hai. To hamen sharmáná cháhiye, kí ham aisi mihrbání ká aisá badlá dete haiñ. Afsos, afsos ! ádmi kí kaisi saht-dili hai, kí koí aise Málik kí náshukrí kar saktá !

Ek zará sá sochná cháhiye, kí in barakaton ká kyá sabab hai. Kis sabab se Khudáe ádil gunahgáron par aisi rahmaten kartá hai ? Suno, ai asmáno, aur kán lagá, aí zamín ! kyúnki wuh, jo daulatmand thá, hamáre liye muflis húa, kí ham us kí muflisi se daulatmand ho jáweñ. Masih Isá ne áp ko kháli kiyá, banda kí súrat pakrí, aur maut tak farmánbardár húa, kí hamáre liye in niámaton ko apne beshqímat lahu se mol lewe ! Ab kaun us ká náshukr ho saktá hai ! Ai bhái, agar tú aisá ho, to terí kharábí kí ziyáda isbat kí kyá zarúrat hai ?

Ab natíja is ká yih hai :—Hamen munásib hai, kí ham apne sab kám kareñ, aur apní sab zindagí káten, aur apne sáre iráda aur mansúba rujú kareñ, kí Khudá ká jalál ham se záhir howe, aur hamáre sabab se us kí taríf kí jáwe ;—yá jaisá kí yih bát injíl meñ mundarj hai, “ Pas tum kháte, píte, sab kuchh karte húe, sab kuchh Khudá ke jalál ke liye karo.”

Jo kuchh main ne is nasihat meñ kahá hai, so sab ke sab dalíl ke taur par kahá, isí bát kí isbat meñ, kí hamen Khudá ke jalál ke liye sab kuchh karná cháhiye. Agar wuh hamára Kháliq, aur Báp, aur Bádsháh, aur Parwardigár, aur Naját-dhinda hai, to kyá báqí hai ? Kyá kisú tarah se us ká haqq aur mazbút aur kámltar ho saktá hai ?

To un kí kyá hálát hai, jo Khudá ko farámosh karte haiñ ? Sháyad we koí bará gunáh záhíran nahín karte ; is wáste nahín samajhte, kí ham gunahgár haiñ. Lekin jo koí apne sáre dil se, aur apní sári táqat se Khudá ko piyár nahín karte,—aur jin ká iráda i kámil nahín hai, kí us kí marzí par chalen,—aur jo dil meñ dunyáwí, jismání, nafsání, aur khud-garazí haiñ,—ye sab Khudá ká jalál záhir nahín karte,—ye sarkashí meñ garq ho gae, aur Khudá ke dushman haiñ ! Koí áp ko fareb na dewe ! Khudá un sab báton ko, jo ham apne ham.

saeon se, hān. āp se, chhipāte haiṁ, dekhtā hai. Shāyad koī kahe, Main ṭhag nahīn, main zinākār nahīn, maiṁ jhūṭh nahīn boltā ; mujhe kyūnkar barā qusūrwar kah sakte ho ? to jawāb yih hai, ki Tū apne Kḥāliq, aur Bāp, aur Bādshāh, aur Parwardigār, aur Najāt-dihinda ke haqq adā nahīṁ kartā ; tū use farāmosh kartā ; tū apnī marzī par chaltā ; terī garaz terī hī kḥushī hai,—us kā jalāl nahīn ; tū us kā dushman hai ! Tū aisā ek gunāh kiyā kartā hai, jis kī nisbat se kḥún-rezī aur zinākārī chhoṭe gunāh haiṁ ! Tū Kḥudā kī mihrbānī haqīr jāntā, aur Masīh ke laḥú ko páemāl kartā hai !

Ab tū pák nawishton se aise hī gunāhgároṁ kī, jaisā tū hai, sazā kā hukm suniyo : “ Gunahgār jahannam meṁ ḍale jāenge, aur sārī qau-meṁ, jo Kḥudā ko faramosh kartī haiṁ.” Aur Kḥudā tujhe faẓl de, ki jaisā likhā hai, (50 Zabúr kī 22 āyat), “ tū, Kḥudā ke farāmosh kar-newāle, soche ; na ho ki wuh tujhe pára pára kare, aur koī chhurāne-wálā na ho !”

V.

INSAN KI BURAI.

REV. A. STERNBERG KÍ TASNÍF.

Aur Kḥudāwand ne dekhá, ki zamīn par ádmīon kī badī bahut barḥ gai, aur un ke dil ke tasauwar aur kḥiyāl roz ba roz sirf badhī hote haiṁ.
—Paidāish, 6 : 5.

IBTIDA' meṁ jab ádmí paidá huá thá, tab nek aur pák thá ; chunānchi wuh Kḥudā kī súrat par banáyá gayá thá. Lekin jab se Kḥudā ke hukm ko ṭāl diyá, tab se us kī aslī neki aur pákízagí jātí rahí ; aur is ke badle badí aur nāpákí us meṁ dākḥil hui. Is bāt kī kuchh kuchh kḥabar sab koī rakhte haiṁ ; lekin jo us ko ṭhík daryáft kiyá, aur yih bāt jāná cháhtá hai, ki ádmí kī burái kis qadr kī hai, so Kḥudā ke kalām ko dekhná hai. Jaisā ki likhā hai, (Yar. 17 : 9, 10), ki “ Dil sab chízon se farebí hai, aur wuh fásid hai ; use kaun jān saktá hai ?” “ Main Kḥudāwand, dil ko jānchtá hūṁ, aur gurdon ko ázmátá hūṁ.” So is waqt Kḥudā ke kalām se aise maqámon ko níkálte haiṁ, jin se daryáft hotá hai, ki *Ádmí kī burái kaisí aur kis qadr hai.*

I. Kḥudā ke kalām se sábit hotá hai, ki *sab ádmí bad aur gunahgār haiṁ.*

Dekho Zabúr 14 : 2, 3, “ Kḥudāwand ne ásmán par se baní Ádam par nigáh kī, tá deshe, ki un meṁ koī dānishwálá hai, jo Kḥudā kā talib hai, yá nahīṁ ; we sab beráh ho gae ; koī nekokār nahīṁ, ek bhí nahīṁ.” Phir Zab. 130 : 3, “ Ai Kḥudā, agar tū gunāh kā muwá-kḥaza kare, to kaun ṭhahar saktá hai ?” aur Zab. 143 : 2, “ Kyūnki

koí jándár tere huzúr begunáh nahín þahar saktá hai.” Aur Kḥudá-wand, Matí 19 : 17, kahtá hai, ki “ Achchhá to koí nahín, magar ek, yaṇe Kḥudá.”

Ai sunnewálo, yihán tum ne suná hai, ki tum bhí bure aur gunah-gár ho ; chunánchi tum bhí ádmí aur baní Ádam meṇ se ho ; aur agarchi tum paigambar aur rasúl hote, taubhí tumheṇ Dáúid ke sáth yih iqrár karná hotá, ki Ai Kḥudáwand, apne banda se hisáb mat le ; kyúnki maiṇ bhí tere huzúr begunah nahín þahar saktá hún.

Lekin agar tum apne taiṇ gunahgár þaharáte ho, to tum tauba ke muhtáj ho. So maiṇ tum se púchhtá hún, ki tum tauba karte ho, yá nahín ? Jab Yúhanná istibáḡ denewálá áyá, aur tauba ká istibáḡ dene lagá, tab bahut log us ke pás áke aur apne apne gunáhoṇ ká iqár karke istibáḡ mángte the ; lekin un dinon meṇ aise bhí bahut the, jo us ká istibáḡ qabúl nahín karte—kis wáste ? ki we apne taiṇ gunahgár nahín samajhte the, balki apne dil meṇ yih kahte the, ki Ham to Abirahám ke farzand haiṇ ; hameṇ tauba karne kí hájat kahán hai ? Magar Yúhanná un se kyá kahtá thá ? “ Ai sampoliṇ ke bachcho, kis ne tumheṇ ánewále gazab se bhágne ko batláyá hai ? ” We apne taiṇ bhale aur nek jánte the ; lekin Yúhanná un ko sámpon ke bachcha kahtá thá—jaisá ki wuh kahtá, ki agar tum Abirahám ke farzand hote, to tum apne taiṇ gunahgár aur tauba ke muhtáj jánte ; lekin jab ki tum apne taiṇ begunáh jánte, to tum jhúṭhe, aur us sámṇ ke bachche ho, jo ibtidá se jhúṭh bolá, yaṇe Shaitán.

II. Age Kḥudá ke kalám se jáná játá hai, ki ádmí kí burái aur ná-pákí *us kí paidáish ke wasíle se us meṇ maujúd hai*. Chunánchi Dáúid, Zab. 50 : 5, kahtá hai, ki “ Maiṇ ne burái meṇ súrat pakrí, aur gunáh ke sáth merí má ne mujhe peṭ meṇ liyá.” Aur Masih, Yúh. 3 : 5, kahtá hai, ki “ Jo jism se paidá húa hai, so jism hai.” Aur Púlús, Afas. 2 : 3, “ Ham sab, dúson kí mánind, tabiyat se gazab ke farzand the.” In maqámon se do báteṇ nikaltí haiṇ.

1. Pahlí yih, ki jab ham log tabiyat aur janam se bure haiṇ, to hamenṇ bhalái aur neki mutlaḡ báqí nahín rahí. Kyúnki paidáish to jar hai ; so jar bigrí, to sárí dálián bigríṇ, aur achchhe phal láne ke qábil nahín. Lekin bahut log kahte haiṇ, ki Hamenṇ káhe ko neki nahín ? ham to kḥairát, roza, ibádat karte haiṇ ; kyá yih sab nek kám nahín haiṇ ? Nahín ; kyún, ki jo kuchh kí ádmí apní tabiyat aur apní paidáish kí táqat se kartá hai, so sab burá hai, aur Kḥudá ko pasand nahín ; hálánki ádmí kí tabiyat paidáish se burá hai. Pas, ham log bure hoke achchhá kám kahán se kar sakenge ? Burá daraḡht achchhá phal nahín lá saktá hai.

2. Dúsrí yih, ki jab ki ham log paidáish ke wasíle se bure haiṇ, to siwá náí paidáish ke wasíle se, aur kisí tadbír se achchhe nahín ban sakte haiṇ. Bahut log yih samajhte haiṇ, ki we ek yá do bad faíl chhoṛne se nek aur pák ho jáenge. Lekin yih galat hai ; kyúnki babúl ke daraḡht ke ek yá do káñte torne se wuh anjír to nahín ho jáegá ; yá sher ke do ek dánt nikálne se wuh to bakrí nahín banegá ? Jab tak zát ká subháó nahín badal játá hai bhítar se, tab tak báhar ke sudhárne se burá ádmí achchhá nahín ho játá hai.

Nikúdímus nám ek bhalá ádmí thá ; wuh na butparastí, na zulm, na zinákárí, na koí aise bad fail kartá thá, balki k̄hairát karne, aur namáz parhne aur roza rakhne men̄ bahut mashgúl thá. Taubhí jab Masíh ke pás áyá, Masíh ne us se yih kahá, ki agar tú sir i nau paidá na ho, to K̄hudá kí bádsháhat dekh nahín saktá. Is se jáná játá hai, ki agarchi ham bahut achchhe aur nek aur láiq ádmí hon, lekin ná paidáish nahín páí, to achchhe nahín húa.

Ab jo koí púchhtá hai, ki kyá karen ; dúsre bár to má ke pet men̄ kaise já sakte hain ? So jáná cháhiye, ki yih kám K̄hudá ká hai ; chunánchi K̄hudá ne iqrár kiyá hai, ki hamen̄ náí paidáish baḡhshegá. Dekho Yar. 31 : 33, “Main apní shariát ko un ke andar rakhúngá, aur un ke dil par likhúngá.” Is qaul i Iláhí dharke Dáúd ke sáth bintí karo K̄hudá kí, ki (Zab. 51 : 10), “Ai K̄hudá, mere andar ek pák dil paidá kar, aur ek mustaqím rúh mere batin men̄ phir dál ;” aur Yaramiyáh ke sáth, (31 : 18), ki “Tú mujhe pherá, to phiráyá jáúngá.”

Siwá bintí karne ke K̄hudá ká kalám, k̄háss karke pák injíl, suná cháhiye ; chunánchi K̄hudá apne kalám ke wasíle se ham ko nae sir se paidá kartá hai. Is sabab se us ká kalám hayát i abadí ká bíj kahlátá hai. Aur jaisá bíj se daraḡht paidá hotá hai, waisáhi K̄hudá ke kalám se nayá dil aur tabiyat paidá hotí hai. Kyúnki K̄hudá ká kalám ek k̄hálí yá sust bát nahín hai, balki K̄hudá kí qudrat hai, jo naját denewálí hai sabhon ko, jo us par ímán láte hain. Pas, K̄hudá ká kalám suno, aur apne apne dil men̄ rakho ; tab is kalám kí qudrat se tumbhare andar ek nayá dil aur tabiyat paidá hogí, jo áp se áp sári burái chhoregá, aur thík nekí karne lagegá.

III. Age dekhá cháhiye, ki jo burái hamen̄ paidáish se hai, *us ke kyá kyá phal hain* ; táki daraḡht phal se pahcháná jáwe.

Is bát men̄ K̄hudá kí shariát, yane das hukm kám áte hain ; kyúnki yih ek áina ke muwáfíq hain, jis men̄ hamáre dil ká chíhra nazar átá hai. Is áine men̄ pahile to butparastí nazar áti hai ; tab kufr aur makr ; tab K̄hudá ká roz aur kalám ki hiqárat karní ; má báp ke ná-farmánbardár honá ; k̄hún aur kína ; ziná aur harámkárí ; chorí aur zulm, aur dagábází ; jhúṭh bolna aur chuglí kháná ; lálach karná, wagaira—aise aise dág ham logon ke dil men̄ maujúd hain, aur das hukmon ke wasíle se nazar áte hain ; yihí us daraḡht ke phal hain, jo paidáish se ham sab men̄ lagáyá húa hai.

Báze ádmí to kahte honge, Hamen̄ aise aise dág nahín hain ; ham chorí, chandálí, wagaira se pák hain. Bhalá, bure fail se tum pák ho, to ho ; lekin bure k̄hiyál aur tasauwar se bhí pák honá cháhiye ; nahín, to kuchh nahín pák húa. Kyúnki is se kyá fáida, agar tú ne háth yá talwár se k̄hún nahín kiyá hai, lekin terá dil kína bugz se bhará húa hai ? Yá kyá fáida, agar tú kasbibázi se parhez kartá hai, lekin bure shahwat aur burí nazar se nahín ? Yá is se kyá fáida, agar tú chorí nahín kartá hai, lekin lálach men̄ phansá húa hai ? Is súrat par agar ham log apne apne dil ko jánch lenge, to maḡlúm hogá, ki dason hukm men̄ ek bhí nahín hai, jis se ham bequsúr ṭhaharte. Pas, K̄hudá kí shariát ke sámhne sab ká munh band ho játá ; aur sári dunyá gunah-

gār ṭahartí hai, yihán tak, ki ham sab meṇ kuchh faraq nahín, balki ham sab ṭhúní, ham sab chor, ham sab zinákár, ham sáḅ káfir, ham sab butparast; aur aise gunahgár ham sab janne hí se haiṇ, is se bhí peshtar, ki ham koí bure kám karne ke qábil the; chunánchi yih ham sab kí tabíyat hai. So is meṇ shubha nahín, ki ham log, auron kí mánind, paidáish se gazab ke farzand haiṇ.

Lekin yih ek dahshatnák hál insán ká hai, jis ko agar koí ek zara sá soche, to munkin nahín, ki phir befikr yá chain se rahe; kyúinki agar main apne taiṇ Ḳhudá ke huzúr ṭhúní, yá zinákár, yá chor ṭaharatá hún, yá Ḳhudá kí shariát se main ṭhúní aur chor janam hí se ṭahartá hún, to phir Ḳhudá ke gazab se main kyúinkar nahín ḍartá hún? Agar main ne dunyá kí kisi ámal-dári meṇ ṭhún kiyá, to mere giriftár aur qatl hone kí dahshat har waqt mere sáth rahtí hai, yahán tak ki kháne píne ho jí bhí nahín cháhtá hai. To kitná ziyáda ham sab ko ḍarná cháhiye Ḳhudá ke gazab se, hálánki ham sab us ke hisáb se sab hukmon ke udúl karnewále ṭaharte haiṇ! Lekin yih bhí ádmí kí burái ká ek nishán hai, ki ádmí aisá sikhṭ dil ho gayá, ki gunahgár aur badkár hoke Ḳhudá ke gazab se nahín ḍartá hai, balki ḍawá kartá hai, ki apne nek kám se Ḳhudá ko ṭhush karegá.

IV. Ek bát aur hai, jis se insán ke gunáh kí burái pahcháná játá hai, yaṇe *us kí sazá*; kyúinki sazá ká yih hál hai, ki jis qadr gunah hai, us qadr sazá hai. So agar kisi qasúr kí sazá maḷúm hai, to maḷúm bhí hai, ki qasúr kitná bará hai. Ab Ḳhudá ke kalím se sábit hai, ki gunáh kí sazá maut hai. Chunánchi Ḳhudá ne Ádam se kahá, ki (Paid. 2 : 17) “Jis din tú us daraḡht se kháegá, tú maregá.” So jis din Ádam ne kháyá, us din maut us meṇ dáḡhil húi, aur us ke wasíle se sáre baní Ádam meṇ phailí; is líye kí sab ne gunáh kiyá, Róm. 5 : 12.

Ab maut do tarah kí hai; ek badan kí, jab badan miṭṭí meṇ mil játá hai; dúsrí ján kí, jab ádmí Ḳhudá ke huzúr se mahrúm hotá, aur do-zaḡh ke ázáb meṇ qaid hotá hai.

Ab ḡhiyál kiyá jáe, kí gunáh Ḳhudá ke hisáb se kaisí burí bát aur bhári qasúr hai, kí us ke badle meṇ aisí haulnák sazá Ḳhudá kí taraf se muqarrar kí gaí hai, kí ádmí na ek laḡza bhar jíne, na Ḳhudá ke huzúr meṇ rahne ke láiq samjhá játá hai, balki hamesha ke ázáb ká wáris ṭaharáyá játá hai.

Isí wajh se, jab Ḳhudá ká Beṭá hamen naját dene áyá, us ko bhí marná thá; kyúinki siwá maut ke aur kisi tadbír se Ḳhudá ká gazab ṭhandá nahín hone ká. Jab Ḳhudá ne dunyá paidá karne cháhá, so sirf ek bát bolná zarúr thá, to sári ḡhilqat paidá húi. Lekin jab dunyá ko gunáh se bacháne cháhá, to apne eklaute Beṭe ko de dená aur salíb par qatl karáná thá.

Pas, agar koí apní burái ṭhík pahchánne cháhtá hai, so Masíh kí salíb par nigáh kare, aur us kí musíbaten dekh le, aur yih jáne, kí jis qadr Ḳhudá ke Beṭe kí musíbaten haiṇ, is qadr mere gunáh haiṇ; chunánchi Masíh “hamáre hí gunáhon ke líye ḡháyál kiyá gayá, aur hamáre hí badkáríon ke líye kuchlá gayá hai.” Masíh kí salíb sab se bihtar áina hai; jo is meṇ apne gunáh ko dekhtá hai, so sach much apní burái pahchánegá.

[Ai bháio, fareb na kháo : apne farebí dil se khabardár raho ! Apne dil men apní burái halkí mat thaharáo ; lekin apne ko mulzim samajhke Masih kí salib ke niche apne gunáh kí sazá ke dar se panáh leo. Phiro, aur wuh tum par rahm karegá. Us ká fazl tumháre sáth ho !] Ámín.

VI.

MASÍH KÁ KAFÁRA KARNA.

REV. TH. SCHORISCH KÍ TASNÍF.

HAR shaḡhs is bāt se ágáh hai, ki apní áqibat aur naját kí ummed náqis wasíle par rakhná barí jahálat aur himáqat hai, aur aql aur Kḡhudá ke kalám kí kasautí par sachche wasíle ko parakhná aur tahqíq karná har tarah se munásib hai.

I. Bahut ádmí is kḡhiyál men haiṅ, ki tauba ke zaríe se ham ko naját milegí. Lewin is bāt ko koí aqlmand pasand nahíṅ kar saktá hai. Tauba í haqíqí sazá ke kḡhauf se nahíṅ, balki gunáh kí sharm se kiyá játá hai. Phir ádmí ká dil ganáh kí sharm se is qadr shikasta ho, ki áyande gunáh se báz rahe, aur nahíṅ, to tauba karná aur na karná donoṅ barábar haiṅ. Pas yahán se daryáft karná cháhiye, ki aisá tau-bá kaun kar saktá hai ?

Aur bahut log aḡál í nek ko apní naját ká wasíla jánte haiṅ. We Kḡhudá ká nám lete, kḡhairát karte, namáz paṛhte, roza rakhte haiṅ, is ummed par, ki nek kám ham ko Kḡhudá ke pás bacháwenge. Lekin yih kḡhiyál bhí bátil hai, kís wáste, ki Kḡhudá sirf aise aḡál í nek se rází hai, jo kámil mahabbat se paidá hote haiṅ. Pahlá, Kḡhudá ká hukm yih hai, ki apne Kḡhudáwand Kḡhudá ko sáre dil o ján se, aur sárí qudrat se piyár karo ; aur dúsrá hukm, jo us kí mánind hai, ki apne paṛosí ko apní mánind piyár karo. Ab aisí kámil mahabbat ham gunahgáron se kyúnkar ho saktí hai ? Likhá gayá hai, ki sabhon ke dil ká kḡhiyál larḡáí se burá hai. Gen. 8 : 21.

Aur bāze Kḡhudá kí kḡhátir mihrbání ko apní naját ká zariá jánte, aur samajhte haiṅ, ki Kḡhudá ká nám gaḡúr o raḡim hai ; jis ko cháhtá hai, tis ko bachátá hai. Par sháyad yih nahíṅ jánte haiṅ, ki Kḡhudá ádil hai, aur apne taḡht ko ádálát ke liye taiyár kiyá hai. “Wuh rástí se jahán ká insáf, aur kharáí se kḡhalq kí ádálát karegá.” Zabúr 9 : 8, 9. Phir likhá gayá hai, ki “Har ek shaḡhs, jo un sab báton par, jo shariát men likhí gaí haiṅ, ámal karne men páedár nahíṅ rahtá

hai, malaṭun hai.” Gal. 3 : 10. Pas Ḳhudá apná ḁdl kyúnkar chhor degá, aur apná kalám jhúṭh kar degá ?

II. Phir, agar kḁí yih uzr kare, ki Ḳhudá gunáh ká sazá de karke naját degá, jaisá ki qaidíon ko, jab un kí miyádát guzrí, tab rihái hotí hai. Par, ai piyáro, aisí bát se gunahgáron ká dil kyúnkar bharegá ? Sazá kí jagah jahannam hai, ki jis kí ek lahze kí saḁṁṁtí dunyá ke tamám ranj o musibat se ziyáda hogá. Phir, Ḳhudá ke kalám se sáf maḁlúm hai, ki jahannam kí sazá lá intihá hai ; chunánchi likhá hai, ki “ Wahán kírá nahín martá, aur ág nahín bújhtí hai.” Mark. 9 : 48.

In súraton meṁ dúsrí naját kí ráh talásh karná zarúr hai, ki nahín ? Aur agar zarúr hai, to kaun ráh báqí hai ? Piyáro, agar Ḳhudá gunáh ko be sazá die muḁf na karegá, to koí ráh báqí nahín magar yih, ki koí shaḁhs gunahgáron ká iwazí ho jáe, aur un kí sazú apne úpar uṭhá le. Agar Ḳhudá us ká kafára qabúl kare, to bhalá, wuhí najat ká zariá hogá. Aur jo shaḁhs us kí marzí ke muwáfíq howe, yaqín hai, ki us ko naját milegí.

Par aise zariá ke wáste chand nishánín zarúr haiṁ, ki jin se wuh sábit ho, aur har shaḁhs i ḁqlmand us ko qabúl kare.

1. Zarúr hai, ki wuh insán ho ; kis wáste ki insán insán kí sazú uṭháne ke láiq hai. Jánwaron kí qurbáníon se insán ko chandán fáida nahín. Chunánchi likhá hai, “ Muhál hai, ki bailon aur bakron ká ḁhún gunáh ko miṭá de.” Ibrání 10 : 4. “ Shariát jis meṁ ánewáli achchhí chízon ká sáya, ná un kí haqíqí súrat hai, un qurbáníon se, jo we baras baras hameshe láte haiṁ, un ko, jo ibádat karte haiṁ, kabhí kámil nahín kar saktí hai.” Ibrání 10 : 1.

2. Phir, zarúr hai, ki wuh gunáh se pák ho. Agar wuh ḁhud apne hí gunáh kí sazú ke tale dabá ho, to auron ká bojh kyúnkar uṭhá sakegá ? Chunánchi likhá hai, “ Aur aisá sardár káhin hamáre láiq thá, jo pák, aur bebad, aur ná álúda, aur gunahgáron se judá, aur ásmánon se buland hai.” Ibrání 7 : 26.

3. Naját ke zariá ká nishán yih hai, ki us ko Ulúhiyat se bhí iláqa ho ; nahín, to sirf insán hoke ek shaḁhs sabhon ká gunáh kyúnkar uṭháwegá ? Is wáste likhá hai, ki “ Shariát kamzor ádmíon ko káhin ṭhahrátá hai, par qasam wálá kalám, jo shariát ke bád thá, aise ko, jo hamesha kámil hai, káhin ṭhahrátá hai.” Ibrání 7 : 28. Wuh shariát ke taur par nahín, balki hameshe kí zindagí kí qudrat ke taur par hogá. Ibrání 7 : 16.

Ab, agar insáf karo, to aisá zariá siwáe mazhab i Masíhí ke aur kisí mazhab meṁ nahín páyá játá ; kis wáste, ki Ḳhudáwánd Ísá Masíh meṁ insániyat aur Ulúhiyat donon pái játí haiṁ. Chunánchi likhá hai, ki “ Ibtidá meṁ kalám thá, aur kalám Ḳhudá ke sáth thá, aur wuh kalám Ḳhudá thá. Wuh kalám mujassam húá.” Yúh. 1 : 1. 14. Phir, Ísá Masíh ḁhwáh janam, ḁhwáh chál ke haqq meṁ har tarah se pák aur kámil ṭhaṁartá hai. Chunánchi likhá hai, ki “ Us ne ḁhatá na kí, aur us kí zubán meṁ fareb na thá.” 1 Patras 2 : 22. Pas, har gunáh se pák aur hamesha kí zindagí kí qudrat se bharpúr hoke Masíh gunahgáron ká iwazí hone ke qábil thá.

Ab, is meṁ bhí kuchh shakk nahín, ki Ísá Masíh ne niháyat taklíf

uṭhái, aur ákhir apní ján salíb par qurbání ke taur par dí hai. Bág i Jatsaman meṇ ham use aisí sankat meṇ paṛe húe dekhte haiṇ, kí us ká pasíná lahú kí mánind hokar girá, aur maut se kushtí karte meṇ us ne kahá, kí Ai báp, agar ho sake, to yih piyála mujh se guzre; lekin merí marzí nahíṇ, terí howe. Sardár káhin ke diwán kháne, aur hákim kí kachahrí meṇ wuh káfir aur qatl ke láiq ṭaharáyá gayá. Sarkár ke piyádon aur bargandázon ne us ke sir par kánṭon ká táj rakhá, us ke muṅh par thúká, us ke píṭh par koṛe náre, us ke kándhon par salíb diyá, aur khopṛion kí jagah ko use le gayá. Waháṇ pahunchke wuh do khúnion ke darmiyan meṇ chhah ghanṭe tak salíb par laṭká rahá. Us ke háth pánw kí se chhede gae, aur dukh kí shiddat se wuh pukárá, kí “Ai mere Kḥudá, ai mere Kḥudá, túne mujhe kýun chhorá hai?”

III. Aisí maut kí shiddat Masíh ne uṭhái. Cháron injilon us kí charchá se mamúr haiṇ. Lekin is wáste kí bahut aur ádmion ne bhí zahirí meṇ aisí aisí musibatēn uṭháíṇ, to cháhiye kí ham ab un qawí dalílon ko bhí pesh karen, jin se Masíh kí maut naját ká sabab sábit hotí hai.

1. Masíh kí maut par sab paigambaron ne yih gawáhi dí, kí wuh naját ká wasíla hogí. Chunánchi Yasaiyáh ne kahá, kí “Wuh hamáre gunáhon ke liye zakhmí húa, aur hamári badkárion ke liye kuchlá gayá. Hamári salámatí ke liye sazá us par parí, aur us ke már kháne se ham change húe.” Yasaiyáh 53 : 4, 5. “Ham sab bheron kí mánind bhaṭak gae, ham meṇ se harek apní apní ráh par mutawajjih húa, aur Kḥudáwand ne ham sabhon kí badkári us par ládí.” Yasaiyáh, 53 : 6. Aur Masíh ne kahá, “Kyá lázim na thá, kí Masíh yih ranj uṭháke apní hashmat meṇ dákhil ho? Aur us ne Músá aur sáre nabíon se shurú karke sári kitábon kí jo báten apne haqq meṇ thin un ke áge bayán kíṇ.” Luká, 24 : 26, 27.

2. Masíh kí maut kí taraf sári shariát ne hidáyat kí. Jinhon ne shariát ke wasíle se apní kharábi aur kamzori pahcháni, aur jahannam se tharthará kámpne lage, un ke wáste us naját ke siwá, jo Masíh kí maut ke wasíle se imándáron ko muft meṇ miltí hai, báqí kyá rahá? Chunánchi likhá hai, “To shariát kis kám kí hai? Wuh gunáhon ke sabab dí gai, jab tak kí wuh nasl, jis ke liye waḍá kiyá gayá, na áwe.” Gal. 3 : 19. Pás, “shariát hamará hádi ṭahará, kí ham ko Masíh tak pahuncháwe, taki ham imán se nek gine jáweṇ.” Gal. 3 : 24.

3. Masíh apne nám se, jo Kḥudá ke hukm se milá, aur apní sári karámát se naját kuninda ṭahartá hai. Likhá hai, kí firishta Jabráíl ne Yúsuf se kḥwáb meṇ kahá, kí “Ai Yúsuf ibn Dáúid, tú apní jorú Mariyam ko apne pás rakhne se mat ḍar, is liye kí us ká jo haml hai, so Rúh Quds se hai. Aur wuh beṭá janegi, aur tú us ká nám Ísá, [yaṇe naját denewálá.] rakhná, kí wuh apne logon ko un ke gunáhon se naját degá.” Mat. 1 : 20. Aur karámát ke haqq meṇ Masíh ne kḥud yih gawáhi dí—“Táki tum jáno, kí ibn Ádam ko zamín par gunáhon ko muáf karne kí qudrat hai, us ne us maflúj ko kahá, kí Uṭh, apná chárpáe uṭháke chalá já. Wuh uṭhkar apne ghar chalá

gayá." Mat. 9 : 6. Pas jo Masíh apne nám aur karámát se naját ká zariá ṭhahartá hai, to zarúr hai, ki us kí maut bhí naját ke liye húi.

4. Masíh kí ḵháss báton se nikaltá hai, ki us kí maut naját ke liye húi hai. Us ne sáf kahá, ki "Ádmí ká beṭá is liye nahín áyá, ki apní ḵhidmat karáwe, balki ki wuh ḵhidmat kare, aur bahuton ke liye apní ján fidá men de." Mat. 20 : 28. "Yihí merá lohú nae aḥdnáme ká lohú hai, jo bahuteron ke gunáhon kí baḵshish ke liye baháyá já-tá hai." Mat. 26 : 28. "Wuh jítí roṭí, jo asmán par se utrí, main hún. Agar koí is roṭí se ḵháwe, wuh hamesha jítá rahegá. Aur jo roṭí main dúngá merá sarír hai, jise main dunyá kí zindagí ke liye dúngá." Yúh. 6 : 51—53.

5. Masíh ke martaba se sábit hotá hai, ki us kí maut naját ká wasíla thí. Jis waqt Masíh salíb par ṭangá thá, "do pahar se leke tísre pahar tak us sárí zamín par andhiyará chhá gayá. Haikal ká pardá úpar se níche tak phaṭ gayá. Zamín kámpí, patthar tarak gae, qabren ḵhul gaín, aur bahut láshen pák logon kí, jo áram men the, uṭhín." Phir kaun jántá nahín, ki Masíh tén roz marne ke bád murdon men se jí uṭhá, aur jí uṭhne ke chálíswen roz apne shágirdon ke rúbarú ásmán par gayá? Aisá martaba Masíh ne páyá hai. Pas, agar Masíh ne dunyá ke wáste apní ján nahín dí hotí, aur us kí bát sach na hotí, ki yih merá lohú bahuteron kí baḵshish ke liye baháyá já-tá hai, to Ḵhudá ne us ko aisá martaba kyúnkar diyá hotá?

6. Masíh qurbání kahlátá hai. Likhá hai, ki "Jaisá Masíh ne ham ko piyár kiyá, aur ḵhushbú ke liye hamáre iwaz men apne taín Ḵhudá ke áge nazr aur qurbání kí hai, waisá hí tum mahabbat men chalo." Afasí, 5 : 2. "Dekho, yih Ḵhudá ká memná hai, jo dunyá ká gunáh le já-tá hai." Yúh. 1 : 29. Qurbání ká haqíqí matlab yih hai, ki gunahgár ke badle men koí begunáh ján kafára ho. Chunán-chí Masíh bhí begunáh hoke gunahgáron ke iwaz men Ḵhudá ke áge kafára húa. "Us ne salíb par hamáre gunáh apne badan par uṭhá liyá." 1 Pat. 2 : 24.

7. Masíh sardár káhin kahlátá hai. Likhá hai, ki "Masíh ánewálí ḵhúbíon ká sardár káhin hoke bakron aur bachhron ke lohú se nahín, balki apne hí lohú ke sáth hamesha kí ázádagí hásil karke páktar makán men ek bár dáḵhil húa." Ibrání, 9 : 11, 12. Puráne aḥd ke zamáne men yih Ḵhudá ká hukm thá, ki Yahúdíon ká sardár káhin har sál men ek bár sab Yahúdíon ká gunáh miṭáwe. Wuh ek bakre ko sáre mulk ke wáste qurbání men charháke us ke lohú ke sáth haikal ke páktar makán men gayá, aur use aḥdnáme ke sandúq kí taraf chhirakke, yih kahke phir niklá, ki Ab tumhárá gunáh muḡf hai. Isí tarah se Masíh bhí tamám ḵhalq ká gunáh apne úpar uṭháke bakron ke lohú se nahín, balki apne hí lohú ke sáth ásmán men Ḵhudá aur frishton ke huzúr men dáḵhil húa hai, aur maqbúl hoke ab tak gunáh kí baḵshish aur naját kí ḵhabar apní Rúh aur shágirdon ke wasíle se tamám dunyá men phailátá hai.

8. Masíh shafí kahlátá hai. Likhá hai, ki "Ai mere bachcho, main tumhen likhtá hún, táki tum gunáh na karo; aur agar koí gunáh kare, to Báp ke pás nek Isá Masíh hamára shafí hai. Wuh hamáre gunáhon ká kafára hai; aur faqat hamáre gunáhon ká nahín, balki tamám dunyá

ká.” 1 Yúh. 2 : 1, 2. Shafí ká kám yih hai, ki apní dānishmandí aur hoshiyárí se hákim ke rúbárú apne mawaqqalon kí shafáqat kare. Isí tarah se Masih K̄hudá ke huzúr meṇ gunahgáron kí shafáqat kartá hai. Wuh un ke liye kafára hoke aur un ká aib miṭáke ab sabhon ko, jo us ke wasíle se K̄hudá ke pás játe haiṇ, ákhir tak bacháne saktá hai.

Ai piyáro, kitne dalílon se sábit hotá hai, ki Masih kí maut naját ká zariá hai. Lekin is bát se sirf wáqif honá bas nahíṇ hai. Injil kí hidáyat se maḷúm hai, ki jo shaḵhs ímán láwegá, so hí naját páwegá ; aur jo ímán nahíṇ láwegá, so naját bhí nahíṇ páwegá. Mark. 16 : 16. Masih ne Nikudímús se kahá, “Main tujh se sach sach kahtá hún, agar ádmí pání aur Rúh se paidá na howe, to wuh K̄hudá kí bádsháhat meṇ dáḵhil ho nahíṇ saktá hai. Yúh. 3 : 8. Is wáste iltimás merí yih hai, ki K̄hudá se Masih ke wasíle se duá karo, ki tumhárá ímán Rúh i Quds kí tásír se durust aur mazbút ho jáe. Jis waqt K̄hudá apní Rúh se Masih ke maslúb hone ká ráz tum ko khol degá, usí waqt tumhári ánkhi ká parda giregá, tumhári saḵht dilí miṭegí, aur tumhárá ímán kámil aur nai paidáish ká zariá hogá.

Par agar tum ko yih bát yaqín se maḷúm húi, ki Masih ke lohú se hamára gunáh muáfi húa, balki is wáste ki tum se phir gunáh hue tum phir hairán pareshán hue, to main tumhári bintí kartá hún, ki apne gunáhon ká bojhi utháke phir Masih ke salíb ke sáye meṇ jáo. Ánkhi meṇ ánsú bhar láe hue rákh meṇ mat baiṭho. Tharthará, kámpte hue dúr mat khare ho. Masih ke zakhm tumháre agle aur picchhle sab gunáhon ke liye máre gae haiṇ. Us ká lahú sáre gunáhon se pák kartá hai. Ai piyáro, is khushkhabarí par ímán láke apná dil khátir jamá karo. Duá kí maṛífat se yih zindagí ká pání apne dil meṇ pí lo, aur tum ko maḷúm hogá, ki pahár játe rahenge, aur koh hil jáenge, par us kí mihrbání meṇ, jo tum par hai, kuchh faraq na paregá, aur us kí sulh ká ahd jumbish na karegá.

Baraks piyáro, mat kaho, Kyá ham gunáh karen, táki faiz ziyáda howe? Aisá na howe. Jitne jo aisá kahte haiṇ, is se zahir karte haiṇ, ki we us naját se ná wáqif haiṇ, jo Masih meṇ hai ; kyúñki we ab tak gunáh ke bas meṇ haiṇ. Jo log naját ke sharik hue, áge Rúh Quds kí hidáyat se amal karte haiṇ. Un ke dilon meṇ yih fikr hai, ki áge apne liye nahíṇ, balki us ke liye jíte rahen, jo un ke wáste mar gayá, aur phir zinda húa. So piyáro, tum bhí rúhání taur par amal karo. Agar tum jismání taur par guzrán karo, to zahir o batin bar tarah se maroge ; par agar tum Rúh kí madad se jismání kámon par gálib ho, to hamesha kí zindagí páoge. Kyúñki jo K̄hudá kí Rúh kí hidáyat se chalte haiṇ, we K̄hudá ke farzand haiṇ. Pas, jaisá ki Masih ne ham ko piyár kiya, aur apne taín hamáre iwaz meṇ K̄hudá ke áge qurbán kiya hai, waisá hí tum bhí mahabbat meṇ chalo, aur pasandídí o pák o zinda qurbání ke liye apne badanon ko nazr karo. Yihí tumhári munásib k̄hidmat hai. Róm. 12 : 1.

Par, sulh denewálá K̄hudá, jo hamesha ke ahdnáme ke khún se bheron ke charwáhá hamáre K̄hudáwand Ísá Masih ko murdon meṇ se phir láya, tumheṇ har nek kám meṇ kámil kare. Usí ko, Báp aur Rúh Quds ke sáth, hamesha buzurgí howe. Amín.

VII.

MASIH KI SADAQAT GUNÁH KI MUAFI KI BUNYAD.

REV. LEVI JANVIER KI TASNI'F.

Mubárák hai wuh, jis ká gunáh bakhshá gayá, aur khatá dhámpí gai.—
Zab. 32 : 1.

KHUDA' ke nazdík ek hí qism ke log mubárák haiñ. Yih bát us ke kalám se bakhúbí záhir hotí hai. Un logon ká zikr tarah tarah kí sífaton aur khitábon se Khudá ke kalám mein miltá hai; magar un sab shakhsan mein se har ek kí kshássiyaat mein we sári sífateñ shámil haiñ. Un kí saádatmandí ke kái ek sabab bayán kie gae haiñ, aur ye sáre sabab un sab logon se nisbat rakhte haiñ.

Mubárák logon ko aur tamám ádmíon se kitní ek báton mein bará faraq hai : khusúsan tén báton mein ; yañe 1. mizáj aur chalan mein ; 2. dil ke maqsad mein ; 3. un ke anjám mein.

1. Mubárák log pák haiñ : bilkull pák to nahíñ ; balki un kí pákízagí bahut náqis hai. Tau bhí kuchh pák haiñ : pákízagí ko dost rakhte haiñ : aur Khudá ko is liye piyár karte haiñ, ki wuh pák hai : bihisht mein, is liye ki pák jagah hai, we hissa hásil kiyá cháhte haiñ. Aur ádmí dil kí safái ko achchhí tarah se dost nahíñ rakhte : balki haqíqat mein nahíñ jánte, ki safái dil kí kyá chíz hai. Bahutere un mein se barí sharárat se khalí haiñ : chorí, mastí, harámkárí, zulm, kufr bakne, khún, aur aise aise bad kámon se parhez karte, balki un se bilkull nafrat rakhte haiñ : na un logon kí, jo aise kám karnewále haiñ, suhbat karne cháhte haiñ : un ádmíon se suhbat rakhte haiñ, ki jin ká záhírí chalan durust hai, aur khusúsan nek niyat aur sídhe dil wálon ko pasand karke, un kí barí izzat karte haiñ. Magar pákízagí kí zátí khúbí se aise bekhábar haiñ, jaise ki gunáh kí aslí kharábí se. Kalám í muqaddas kí gawáhí ke bamújib ye log sarásar pákí se khalí haiñ : aur un kí chalan har chand kí insán kí nazar mein har tarah se durust aur pasand ke láiq ho, tau bhí we taqsíron aur gunáhon mein murda haiñ.

2. Dil ke maqsad mein mubárák logon ko aur ádmíon se bará faraq hai. Un ke dil abadí zindagí se lagáe hue haiñ : aksar insán ká bharosá is dunyá par mauqúf hai. Ummaid to rakhte haiñ, ki maut ke píchhe ham bhí bihisht mein jagah páwenge : magar is bát mein ki un ke khiyál, un kí khwáhishen, un ke khauf, aur un kí koshishen, faqat is fání zindagí se iláqa rakhtí, koí nahíñ inkár kar saktá hai. Khudá ká kalám un ká yih nám rakhtá hai, “Dunyá ke log, jin ká bakhra isí zindagání mein hai.” Zab. 17 : 14. Ab un logon ká, jinhen Khudá ne mubárák kahá hai, bilkull aur hál hai. Har chand dunyá is bát

se taajjub kare, ki kisí shakhs ká dil un chízon par, jo andekhi hai, aur maut tak na dekhí jáengí, is tamáshagáh i dunyá kí sárí khúbíon se ziyáda máil howe, tis par bhí is dunyá men aise bahut log hai. Isráel ká bará bádsháh, us sárí shán o shaukat ko, jo us ke ás pás chamaktí thí, farámosh karke, yún bolá, “Par main jo hún, sadáqat men terá muh dekhúngá; aur jab main terí súrat par hoke jágúngá, to main ser húngá.” Zab. 17 : 15. Us ne samjhá, ki merá dil tab tak púra árám na páwegá, aur main apne kháss maqsad ko tab tak na pahunchúngá, jab tak ki ásmání haikal ká pháṭak nazar na áwe, aur jalál ke Bádsháh ke huzúr men dákhil na hoún. Bihisht ke tamám wáris aise hí hai. We to aur ádmíon ke muwáfíq kamzor, náqis, náláíq maḥlúq hai; aur afsos hai, ki bár bár aise kám karte hai, jo un kí buland ummaidon ke láíq nahín hai : tis par bhí un ke dil úpar kí taraf máil hai : un ká khazána wahán hai, un kí khwáhishen us taraf rujú hai : ján o dil se yáqín karte hai, ki sárí dunyáwí chízen aisi behúda aur ábas hai, ki insán kí rúh se bilkull námuwáfíq hai : balki un ke dil is ummaid se bhare húe hai, ki hamárí tamám árzúen ánewálí hashmat se púrí ho jáengí, aur us se ziyáda kí zubán bayán kare, yá kھیál men á sake, ham ko khushí hásil hogí.

3. Mubárák logon aur aur logon ke anjám men bará faraq hai. Mubárák un ko kahte hai, ki jin ko ákhir men Khudá apná dost ginégá. Lúsre ádmíon ko us din dushman ṭhahráwegá : balki ab bhí dushman jántá hai. Yih nahín ki Khudá kisí ke úpar sakhtí kartá hai ; kyúinki “Yahowáh sab ke liye bhalá hai, aur us kí latíf mihrbání us kí sárí khilqat par hai.” Zab. 145 : 9. “Wuh hamárí máhiyat ko pahchántá hai ; wuh yád raktá hai, ki ham miṭṭí hai.” Zab. 103 ; 14. Wuh rahím, aur mihrbán, aur halím hai ; us kí rahmat aur sachcháí kí kuchh hadd nahín. Tau bhí sach hai, us ne un sabhon ko, jo ímán láke us ke fazl ke áhd men sharik na húe, malaún kahá hai : aur apne kalám men sáf sáf yih bhí farmáyá, ki Agar we tauba karke aur apní bad ráh chhorke us kí taraf na phiren, to jahannam men dále jáenge : apná hissa us ág men, jo kabhí nahín bhujhegí, páwenge. Par apne logon ko yih tasallí kí bát sunátá hai, “Main ne tujhe hamesha ke piyár se piyár kiya : is liye main ne tujh ko rahmat ke sáth khainch liya.” Yar. 31 : 3. Aur phir kahtá hai, ki “Pahár játe rahenge, aur koh hil jáenge, par merí mihrbání men, jo tujh par hai, kuchh faraq na paregá, aur merí sulh ká áhd jumbish na karegá ; Yahowáh, jo terá rahm karnewálá hai, yún farmátá hai.” Yas. 54 : 10. Har kisí sochnewále par zarúr záhír hogá, ki Khudá ká maqbúl banná kisí aur bát se, balki aur sab báton se, munásib aur bhárí hai ; kyúinki Khudá Qádir i mutlaq aur Hákim ul hákimín hai. Jitne ádmíon ko wuh apne fazl ke fáidon men sharík banáwe, beshakk wuh aisi qudrat rakhtá hai, ki un ko kámil aur abadí khushí baḥshe ; aur we, jo us kí niámat haqír jánen, aur us ke hásil karne men gáfíl aur befíkr rahe, un ko sazá dewe ; jáisá ki us ne apne azlí kalám aur farmán men iqrár kiya hai, ki main aisé karúngá. Aur us talwár kí burrish aur haibat, jo kí gunáhgáron kí sazá ke liye chaláí jáegí, kaun bayán kar saktá hai ? Jo kírá, ki kabhí na maregá, aur wuh ág, jo kabhí nahín bujhegí, un ke dukh dardon ko kaun batáwe ? Lekin yih wuhí sazá hai, jis ko

bahutere páwenge ; sab ke sab isí ke sazawár hain, “ki sabhon ne gunáh kiyá hai, aur K̤hudá kí buzurgí zahir nahín kí,” Róm. 3 : 23 ; aur “gunáh kí mazdúrí maut hai.” Róm. 6 : 23. Zabúr ke likhnewále ne k̤húb kahá hai, “Mubáarak hai wuh, jis ká gunáh baḡhshá gayá, aur k̤hatá dhámpí gaí.”

Pas, gunáhon kí muafi kyúnkar hásil hogí ? Yih ek niháyat munásib sawál hai. Gire húe insán ke har ek farzand ko cháhiye, ki is sawál men apní sári aql k̤harch kare. Is bát se sab log iláqa rakhte hain : is bát men na sirf dil ká árám aur K̤hudá kí razá-mandí is dunyá kí zindagání tak shámil hai, balki abadí dukh se chhut-kára aur abadí sukh men sharákat bhí usí se hai. Hamáre Yahowáh ká nám mubáarak howe, ki us ne hamen is bhárikám men bekas aur bemadad nahín chhorá hai ; na gunáh kí baḡhshish hásil karne ke liye aisi ráh batáí hai, jo be fahm kí samajh se bhí báhar ho, na jis ko sab se kamzor aur náláiq gunáhgáron kí koshish na pahunch sake : balki aisi hai, ki har ek sachchá mutaláshí us ko samajh saktá hai, aur us ke fáida berok sabhon ke pesh kie gae hain, ki us kí lazzat páke hamesha kí k̤hushí ke wáris banen.

I. Pahile to main yih kahtá hún, ki gunáhon kí muafi agar ho sake, to zarúr aise taríqe se hogí, ki jis se K̤hudá kí ádalat qáim rahe. K̤hudá koí bhí aisé kám karne ká nahín hai, ki jis se us kí sifaton men se kisi sifát kí beizzatí howe. Bahutere is bát ko bhúl játe hain. Un ká yih gumán hai, ki jab kí K̤hudá Qádir i Mutlaq aur sári maujúdát ká Bádsháh hai, to use ikhtiyár hai, ki sabhon ke gunáh baḡhsh dewe, agarchi tauba ke siwá koí wasila na howe. Jo aisé hotá, to us ká insáf kahán rahtá ? Us kí sachái kahán ? Kyá ye sifaten sirf un wádon ko púra karne se, jo us ne sáf begunáh rúhon ke sáth kie hain, zahir hain ? Kyá dunyáwí hákimon ke haqq men aisé k̤hiyál karte hain, ki un par is ke siwá koí farz nahín, ki jitne wáde farmánbardáron se kie hon, so púre karen ; aur un kí parwá na rakhen, jo hukm udúl karen, aur ráj ke muk̤hálif zahir howen ; balki un ko aisi niámaton men hissadar banáwen, jaisí ki farmánbardáron ke liye muqarrar hain ? Is ke jawáb men sháyad koí kahe, ki aisi sakhtí aur parhezgári dunyáwí hákimon ko zarúr cháhiye ; lekin K̤hudá kí bukúmat men kuchh zarúr nahín. Yih bát siwá behúdagóí ke nahín hai ; aur yih behúdagóí, áqibat kí taiyári karne men, aur naját kí ráh khojne men, kyá hí bejá hai ! Aisé kahná K̤hudá ke kalám ke bar̤k̤hiláf bhí hai ; kyúnki us ne apne kalám men kitní jagah apne taín ádil aur insáf karne-wálá zahir kiyá hai. Ye gawáhián aisé sáf sáf likhí hain, ki agar koí unhen na samjhe, to beímaní aur dil kí táríkí beshakk us ke na samajhne ke báis hongí, aur wuh beuzr ṭhahregá. Kalám áp hí gawáhi detá hai : “Ai K̤hudá, terá taḡht abad ul ábád hai, terí saltanat ká ásá rástí ká ásá hai. Tú ne sidq se dostí, aur sharr se dushmaní kí hai.” Zab. 45 : 6, 7. Phir, “badlíán aur andhiyará us ke ás pás hain, sadáqat aur ádalat us ke taḡht ká makán : ek shuála us ke áge áge játá hai, aur us ke dushmanon ko har taraf jalátá hai.” Zab. 97 : 2, 3. Apní k̤háss ummat men se bhí, jitne náfarmánbardár húe the, un ke haqq men yih farmáyá, ki “Main ne apne gusse men qasam k̤háí, ki

we mere áram ke makán men dákhlil na honge." Zab. 95 : 11. Phir likhá hai, ki " Wuh zamín kí ádalát karne átá hai; wuh sadáqat se dunyá kí, aur insáf se logon kí ádalát karegá." Zab. 98 : 9. Agar Kḥudá, insáf ke dāwá se beparwá hoke, apní torí hūi shari'at ke liye badlá nahīn letá, balki mutlaq mu'afi baḥshatá, to in áyaton se kyá murád hotí? kyá ye bemāni na ṭhahartī? Wuh to ádil Kḥudá hai, agarchi bachánewálá hai; haqíqat men insānī aql kí yihí áwáz hai. Us se, jo maujúdát ká bará Kḥaliq o Málík hai, beshakk sári ḥilqat yih dāwá rakhtí hai, ki us ká insáf be'ib aur betarafdári howe; nahīn, to us se kyúnkar bharosá rakhen, kyúnkar daren? Agar Kḥudá is sifāt se ḥárij hotá, to ek aisá ḥiyá lí ma'búd bantá, jaisá ki andhe butparast pújte hai. Aur Kḥudá ká jalál us ke har kám men rástí par shámil hai. Us kí har ek harakat aur har ek iráde ko is sifāt se mausúf honá zarúr hai: aur agar us kí taraf se gunáhon kí mu'afi howe, to zarúr aise taríqe se hogí, jo ki us kí ádalát ke muwáfiq ho, balki us ko zāhir kare. Mubárák howe us ká pák nám, us ke sáth gunáhon kí mu'afi hotí hai: aur us ne hamáre sam-jháne ko, ki yih mu'afi kis ráh se muqarrar howe, hamen apná pák kálám baḥshá hai. Pas, insán Kḥudá ke nazdík kyúnkar rástbáz ṭhahare? Ki yih bát nae aḥdnáme kí sári barakaton kí ḥáss shart aur pahilá qadam ma'lúm hotí hai. Is ká ek hí jawáb nazar átá hai: yāne,

II. Kí Kḥudá kí ádalát men insán ke rástbáz ṭhaharne ke liye, ek rástbází, kí jis ko Kḥudá ke huzúr men guzránná zarúr hai, táki Kḥudá us guzránī hūi rástbází kí ḥatír gunahgár ko rástbáz ṭhahráke ap bhí rástbáz zāhir howe. Kálám i muqaddas se ham ko ḥabár hūi, kí dānāon ne qadímí zamānon men is zarúrat ko daryáft kiyá thá; aur bamújib is ke bará shauq rakhte the, kí Rúh Pák ke matlab se, jo is bát men hai, wáqif howen: is liye ki we bhí yih inām hásil kiyá cháhte the. Kyúnki un par zāhir húa thá, ki ham ap hí nekí se ḥalí hai; aur tis par bhí bagair nekí ke Kḥudá ke sámhne áne ke láiq na ṭhahar sakte hai. Chunánchi Aiyúb ke ek dost ne, jo us se kahá, "Agar tú Kḥudá ko dhúndhegá, aur Alláh Ta'álá se du'á mángegá; agar tú pák dil aur rástkár banegá, to wuh albatta tere liye jág uthegá, aur tere sádiq ghar ko phir bahál karegá." Us buzurg ne jawáb diyá, "Sach, maig jántá hū, kí yínhí hai; lekin insán Kḥudá ke áge kyúnkar sádiq ṭhahregá? Agar wuh us se bahs karne ko utre, to wuh us ko hazáron men ek ká jawáb na de sakegá." Aiy. 8 : 5 ; 9 : 3. Aur phir bolá, "Kásh kí maig jántá, maig use kahá páún, to us ke masnad tak játá; maig apná mu'amala us ke áge bayán kartá, aur apná muh dalílon se bhartá. Tab rástkár us ke sáth mubáhasa kartá, aur maig abad tak apne hákim se bach játá." Aiy. 23 : 3, 4, 7. Bildád Sukhí ne, jo us ká dúsrá dost thá, kahá, "Saltanat aur dahshat us pás hai; wuh apne báláḥhánon men sulh farmátá hai; kyá us ke lasbkaron ká kuchh shumár hai, aur us ká naiyir kis par tulú nahīn hotá hai? Phir insán Kḥudá ke áge kyúnkar sádiq hogá, yá aurat bachcha kyúnkar pák sáf ṭhaharegá? Dekh—máhtáb tak, wuh roshan nahīn, aur sitáre us kí nazar men pák nahīn: to kitná kam in-

sán, jo kírā hai, yā ādamzād, jo kírā hai!" Aiy. 25. Us hí barī bát kī Elihú ne bhí, us satar men, jo abadí vādgarī ke láiq hai, gawāhí dí, ki us shaḡhs kī tarāf ishāra kartí maḡlūm detí hai, jo ki waqt ke purá hone par zāhir honewálá thá; yañe baní ādam kā bachānewálá: us kā mazmún yih hai: "Agar us par ek firishta, ek tarjumán, ek un hazāron men se utar jáwe, ki insán ko us kī rástí batáwe, to wuh us par rahm kartá hai, aur kahtá hai, ki Gor men wárid hone se bachá rakh, ki mujhe kafāra milá hai: tab us kā badan phir jawání se tar o táza hotá hai, wuh apní bulúgat ke dinon men phir jáegá: wuh Ḳhudá se duḡ kartá hai, aur wuh us se rázī hotá hai, aur ḡhushí se us kā munḡ dekhtá hai, aur wuh insán ko us kā haqq phir detá hai." Aiy. 33: 23—26. Míkah nabí ke dinon men yih sawál karte the, "Main kyá leke Yahowáh ke huzúr men áun, aur Haqq Taālá ke áge kyúnkar sijda karún? Kyá chaḡhawon aur ek sál ke bachhron ko lekar us ke áge áungá? Kyá Yahowáh hazár menḡhe se, yá tel kī das hazár nahr se ḡhush hogá? Kyá main apne pahlaṡe ko apne gunáh ke iwaz, apne peṡ ke phal ko apní ján kī ḡhatiyat ke liye de ḡálungá? Mik. 6: 6, 7. Agar hál ke zamáne, balki ab kī ḡharí kī áwáz sunen, to yihí mazmún nikaltá hai. We sárí tadbíren, ki kam-baḡht butparast Ḳhudá ko rázī karne ke liye āmal men láyá karte hain, kyá hí bátíl, befáida, aur tars ke láiq hain: tau bhí ye is barí bát ke sábit karne men, ki insán apne taiṡ kisi chíz kā muhtáj jántá hai, ki jis se Ḳhudá ke huzúr men apní sitárish karwáe, madad kartí hain. Insán Ḳhudá ke ḡabúlne ke láiq nahín hai; aur us ke andar aisá kuchh hai, jo ki us ko yihí ḡhabar diyá kartá hai. Is liye sijda karke, tírth jáke, ashnán karke, ḡhairát deke, aur tarah tarah kī zá-hirí rít rasmon ko barí mihnát se adá karke, we rástbází baṡorá cháhte hain, ki jise Ḳhudá un ke hisáb men ḡinke unhen rástbáz ṡahrá-we: tis par bhí

III. Námumkin hai, ki insán apne kisi kám yá koshish se aisí rást-bází banáwe, jo Ḳhudá kī razámandí kā baṡis howe. Is kī subút kai ek báton par mushtamil hai.

1. Ḳhud is takrár kī jar par. Ḳháliq maḡhlúq se kámil farmánbardarí cháhtá hai. Us kī lanat us kī shariát kī sab se chhoṡí ḡhatá par mansúb kī gaí hai. Us ne kahá hai, "Wuh ján, jo gunáh kartí hai, soí mareḡí." Hiz. 18: 4. Yih nahín, ki jo shaḡhs bahut aur baṡe baṡe gunáh kare, usí ko marná hogá: kyúnki us ne sáf sáf farmáyá hai, ki "Har ek shaḡhs, jo un sab báton par, jo shariát men likhí hain, āmal karne men páedár nahín rahtá, maḡlún hai." Gal. 3: 10. Phir likhá hai, ki "Jo koí tamám shariát par āmal kare, aur ek bát men ḡhatá kare, to wuh sab bát men ḡhatá karnewálá hai." Yaḡ. 2: 10. Is se maḡlūm hotá hai, ki agar koí gunahḡar apne gunáh ko chhor saktá, aur bilkull pák banke kámil farmánbardarí adá kar saktá, tau bhí jaunsi rástbází ki is nekoḡarí se jamá howe, so us ke pichhle gunahon ko miṡá nahín saktí; balki is kám men bilkull bekár ṡahartí. Kí Ḳhudá na sirf purí farmánbardarí, balki sárí zin-dagí kī purí farmánbardarí cháhtá hai.

2. Qurbáníon ke hukm se sábit aur zāhir hotá hai, ki insán na ap-

ná kuchh rakhtá hai, na kuchh aisá hásil kar saktá, ki jis se us pák aur ádil K̲hudá ko razamand kare. “Muhál hai ki bailon aur bakron ká k̲hún gunáhon ko miṭá de.” Ibr. 10: 4. Taubhí K̲hudá ne un ká lahú baháne ká hukm diyá; is liye nahín, ki wuh jánwaron ke dukh aur maut sahne se k̲hushí pátá hai, magar is liye ki insán ko samjháwe, ki tú bilkull láchár hai, aur koí bhí aisá kám nahín kar saktá hai, ki jis se merí torí húi shariát kí izzat bahál kí jáwe; aur wuh maut bhí, ki jise begunáh jánwar tere badle sahtá hai, teráhi haqq hai. K̲husúsan we qurbánián us barí qurbáni ká namúna thín, jo kí áinde zamánon meñ záhir honewálí thí, aur gunáhon kí baḡhshish ibtidá i álam se us honewálí qurbáni par munhasir húi hai; jaisá ki Rúh Quds ne Púlús Rasúl kí maṛifat us k̲hatt meñ, jo kí us ne Ibráníon ko likhá, muḡassal bayán karwáyá hai. Chunánchi dasweñ báb kí pahilí ayat meñ yún likhá hai: “Shariát, ki jis meñ ánewálí achchhi chízon ká sáya, na un kí haqíqí súrat hai, un qurbánion se, jo we baras baras hamesha láte haiñ, un ko, jo ibádát karte haiñ, kabhi kámil nahín kar saktí.” Aur phir likhá hai, ki “Ísá ne ek bār qurbáni guzráne se unheñ, jo pák hone cháhte haiñ, hamesha kámil kiyá.” 10: 14.

3. Tisrí dalil is takráar meñ yih hai, ki K̲hudá ne apne pák kalám kí bahuterí jagahon meñ gawáhi dí hai, ki koí insán apní karníon se rástbázi nahín baṭor saktá hai. Chunánchi aisá likhá hai, “Koí ádmí shariát par ámal karne se K̲hudá ke huzúr nek ṭhahar nahín saktá, kyúнки shariát se gunáh kí pahchán hai.” Róm. 3: 20. “Main shariát ke wasile se shariát ke pás múá hún, táki K̲hudá ke áge zinda ho jáún.” Gal. 2: 19. “We sab, jo shariát par ámal karne ká bharosá rakhte haiñ, lānat meñ giriftár haiñ.” “Par koí K̲hudá ke nazdík shariát se nek nahín giná játá: yih is se záhir hai, ki nek ádmí ímán se jégá.” Gal. 3: 10, 11. Isí tarah K̲hudá ne rasta band kar diyá hai, ki insán apní bátíl koshishon ká, naját ke liye, bharosá na rakhe.

Hamáre kalám kí bunyád yih hai, ki gunahgáron ke mubáarak hone ká ek tariqa hai; yañe gunáhon kí baḡhshish hásil karne se: jaisá likhá hai, “Mubáarak hai wuh jis ká gunáh baḡhshá gayá, aur k̲hatá q̲hāmpí gaí.” Is bát par bunyád rakhe, main ne K̲hudá ke kalám ke bamujib bayán kiyá hai, 1. Zarúr hai ki gunáhon kí muāfi aisí tadbír se howe, jo K̲hudá ke insáf ke bark̲hiláf na ho: 2. ki insán ko ek rástbázi zarúr cháhiye, ki jise apne gunáh miṭáne ke liye K̲hudá ke huzúr guzráne: 3. ki insán áp hí aisí rástbázi nahín jamá kar saktá hai.

HA'SIL I KALÁ'M yih hai, ki K̲hudáwánd Ísá Masíh kí mahsúb rástbázi ke siwá aur koí tariqa nahín, ki jis se gunahgáron ko naját hásil howe. Jo kuchh ki ham se nahín ho saká, so us ne hamáre wáste kiyá. “Jism ke sabab se shariát kamzor hoke, jo kam na kar sake, K̲hudá ne apne Beṭe ko gunahgáron kí súrat meñ bhejkar gunáh ke liye, us ke jism par gunáh kí sazá deke, wuh kám kar liyá.” Róm. 8: 3. “Kí K̲hudá ne jahán ko aisá piyár kiyá, ki us ne apne eklaute Beṭe ko baḡhshá, táki jo koí us par ímán láwe, halák na howe, balki hamesha kí zindagi páwe.” Yúh. 3: 16. Wuh “dín ká bará ráz yih

hai, ki Kḥudá jism meṇ zāhir húa, Rúh se nek giná gayá, firishton ko nazar áyá, gair mulkíon meṇ us ká waz kiyá gayá, dunyá meṇ us par ímán láe, bihisht meṇ uṭháyá gayá.” 1 Tim. 3 : 16. Jitne ádmí us ke imándár haiṇ, un ke haqq meṇ we tinoṇ sharteṇ, ki jin ká zikr kiyá, púrí kí gaí haiṇ : kyúinki un kí naját meṇ (1) Kḥudá kí ádálát aur sachcháí, aur us kí sárí sifaton meṇ kuchh khalal ráh nahín pátá : balki us kí sifateṇ baḥhúbí zāhir aur bayán hotí haiṇ : kis liye ? ki un ko, (2) ek rástbāzī milí hai, ki jise Kḥudá ke pás le jáweṇ : aur wuh rástbāzī un kí sárí hájaton ke muwáfiq hai, kyúinki púrí aur bedágh hai : thík aisí hí rástbāzī hai, jaisí ki Kḥudá ne un se talab kí thí : aur wuh us ko bilkull kḥush átí hai : ki wuh rástbāzī tísrí bát ke bamujib, (3) us kí baṭorí húi nahín hai, balki Kḥudáwánd Ísá Masíh kí. Wuh zuljalál aur lámísál, shaḥhs, jo gunáhgáron ko bacháne ke láiq hai, so yihí hai. Us ká wada Kḥudá ne hamáre pahle má báp se yih kahke, ki “ Aurat kí nasl sámp ká sir kuchlegí,” kiyá thá, Paid. 3 : 15 ; aur un hí ke waqt se le, “ us ke haqq meṇ sab nabí gawáhi dete haiṇ, ki jo koí us par ímán láwegá, so us ke nám se gunáhon kí muáfi páwegá,” Ámál, 10 : 43 ; “ aur kisí dústre meṇ salámatí nahín, is liye ki ásmán ke tale aisá aur dúsrá nám logon ko nahín baḥhshá gayá, ki jis se naját pá sakeṇ.” Ámál, 4 : 12. Abirahám us ká din peshbíni se dekhkar kḥush húa. Aiyúb ne kahá, “ Main jántá hún, ki merá bachánewálá jítá hai, aur wuh pichhle dinon meṇ zamín par khará hogá.” Aiy. 19 : 25. Yasáiyáh ne kahá, “ Hamáre liye ek farzand paidá húa, aur ham ko ek Beṭá baḥhshá gayá, aur saltanat us ke kándhe par hai, aur us ke ye nám hongé, Ajab, Muslih, Kḥudá i Qádir, Ab i Abadiyat, Sháh i Salámat.” Yas. 9. 5. Isí tarah sab nabí peshingoí karte chale áe haiṇ : aur isí tarah bhí Kḥudá ke sáre bandon ne zamána ba zamána un wadon se, ki jin ká anjám Ísá Masíh hai, ummaid rakhí hai ; aur usí ke áne ke waqt se le áj tak sáre imándáron ne is chaṭṭán par apne bharose kí bunyád dālí hai.

Garaz Kḥudá ke sáre kalám ká anjám, siwáe Ísá Masíh ke aur us naját ke, jo ki usí se hai, aur kuchh nahín hai. Is ke bamújib Púlús rasúl ne kahá, “ Main ne muqarrar kiyá, ki Ísá Masíh ke aur us ke maslúb hone ke siwá aur kisí bát ko tum meṇ na jánúṇ.” 1 Kar. 2 : 2. Phir likhá hai, “ Har ek ímán lánewále kí nekí ke liye Masíh shariát ká saranjám hai.” Róm. 10 : 4. Kḥusúsan do báton meṇ Masíh shariát ká saranjám hai. 1. Us ne shariát ko, ki jise ham ne udúl kiyá thá, hamáre badle púrá kiyá. Kḥudá ke kalám meṇ yih likhá hai, “ Jis waqt tak kí ásmán aur zamín nest na hon, ek nuqtá yá ek shosha tau-ret se hargiz mansúkḥ na hogá, jab tak sab púrá na howe.” Matí 5 : 18. Achchhá, hamáre Kḥudáwánd Ísá Masíh meṇ yih bát púrí húi : ki us ne shariát ke sáre farzon ko adá kiyá : kuchh bhí báqí na chhorá. 2. Kḥudáwánd Ísá ne hamáre badle shariát kí sazá bhí uṭháí. Jo kuchh kí ham ko sahná wájib thá, so us ne áp hí sah liyá. Adl i Iláhi ne us ke sir par talwár méri. Gazab i Iláhi ká piyálá us ne sára pí liyá, aur dukh ke bhárí bojḥ ke niche jhukke chilláyá, “ Ai mere Kḥudá, ai mere Kḥudá, kyún tú ne mujhe chhor diyá hai ?” Matí 27 : 46. “ Us ke már kháne se ham ne shifá páí.” Yas. 53 : 5. Wuh “ Kḥudá ká barra, jo dunyá ká gunáh uṭhá le játá hai,” kahá gayá : Yúh. 1 :

29 : garaz hamáre wáste qurbán húa. K̄hudá ne kahá thá, “ Shariát ko púra kar, to tú jiegá.” Lúká 10 : 28. Masih ne us ke tañ hamá-rí k̄hatir púra karke, farmánbardári ke phal hamáre liye baṭore. K̄hudá ne farmáyá thá, ki “ Gunáh kí mazdúrí maüt hai.” Rúm. 6 : 23. Isá ne hamári jagah maut sahí. Isí tarah us ne kámil rástbázi hásil kí, ki jis se hamáre gunáh dhámpe jáweñ : rástbázi ká pairáhan hamáre wáste banáyá, ki jis ko pahinke ham rástbáz ṭhahareñ. Is ke bamújib Rúh Quds ne Púlús kí mañifat usí áyat ke mañe, ki jise main is waqt bayán kartá hún, khol die haiñ. Púlús ká kalám is taur par hai : “ Dáúd bhí us ádmí kí mubárákbádí ká bayán kartá hai, jise K̄hudá bagair kámon ke nek gintá hai : ki mubárák we haiñ, jin ke gunáh muáf kie gae, aur k̄hatá chhipái gai.” Rúm. 4 : 6, 7. Is se kyá murád hai, ki K̄hudá faláne faláne shaḥson ko bagair nek ká-mon ke nek gintá hai? Kyá K̄hudá sachái ke bamújib sab chízon ko nahín gintá? Be shakk o shubha sachái ke bamújib sab kuchh kartá hai : balki ímándár gunahgáron ko nek ginke rást kartá, is liye ki wuh apne piyáre Beṭe Masih kí rástbázi un ke hisáb meñ likhtá hai : aur we ímán ke wasíle se is rástbázi meñ hissadár bane haiñ ; chunán-chi likhá hai, “ Wuh, jo kám nahín kartá, balki us par, jo gunahgár ko nek ṭhaharatá hai, ímán látá hai, usí ká ímán neki ká wásta giná játá hai. Rúm. 4 : 5. “ Pas, jab ki ham ímán ke sabab rástbáz ṭhahare, to ham meñ aur K̄hudá meñ, hamáre K̄hudáwand Isá Masih ke wasí-le, mel húa : aur usí ke wasíle se ham us fazl meñ, jis par qáim haiñ, ímán láke dáḡhil hue, aur K̄hudá se jo buzurgí milegí, us kí ummaid par faḡhr karte haiñ.” Rúm. 5 : 1, 2.

Is kalám se kaí ek fáide hásil hote haiñ,

1. K̄hudá ne kyá hí k̄húb tadbír insán kí naját ke liye nikáli hai, ki jis se gunáh kí muáfí howe, aur bhí K̄hudá kí ádálát qáim rahe ! Is tarah us kí ádálát aur us kí mihrbání sári maujúdát par ba ifráṭ záhír húi hai. Us kí ai-í mihrbání hai, ki us ne apne piyáre Beṭe ko nihá-yat beizzatí, aur dukh, aur taklíf, balki salíbi maut bhí sahne ke liye saumpná bihtar jáná, banisbat is ke ki wájibi sazá baní ádam ko dewe. Aur us kí aisí ádálát hai, ki bagair is ke, ki Ulúhiyat insániyat ko qabúl-ke insán kí zámín bane, aur us ke badle shariát kí lanat aur sazá uṭhá-we, ek gunahgár bhí muáf nahín ho saktá thá.

2. Masih ne ádmí ká zámín bankar Shaitán par k̄húb fath páí. Shaitán ne hamáre pahle má báp ko wargalánkar samjhá hogá, ki ‘ ab main ne be shakk K̄hudá ká kám barbád kar diya hai : insán se gu-náh karwáyá, aur use gazab í Iláhi ká sazawár banwáyá : is ke siwá aur kuchh nahín sújhtá hai, ki wuh sári aulád samet dozaḡh meñ hissa páwe.’ Lekin Shaitán us kám meñ kámyáb na húa. Aurat kí nasl ne sámp ká sir kuchlá. Áhd ke firishte ne us shikár ko k̄húnkhwár ke panje se chhuṛá liyá : aur us puráne sámp ne apní hí sazá dasguni ziyáda bhári karwái.

3. Masih ne hamári k̄hatir aisí rástbázi kamáke ham par kyá hí ba-rá ilsán kiyá hai ! Hamen lázim hai, ki apne sáre dil se, aur apní sári ján se, aur apne sáre zor se, aise bachánewále ká shukr máneñ, us kí pairawí karen, us kí marzí par chaleñ, un sári chízon se, ki jin se us

ne manaṁ kiyá hai, parhez karen, aur nae sire se pák chalan men ko-shish karen. Chunánchi Púlús ne likhá hai, “Ham to kyá kahen? kyá ham gunáh kiyá karen, táki fazl ziyáda howe? aisá na howe; ham to gunáh ke haqq men múe haiṁ: phir kis tarah us men jienge? Kyá tum ne yih maḷúm nahīṁ kiyá, ki ham men se jis kisí ne Ísá Masíh ke nám par bápísmá páyá, us kí maut men bhí bápísmá páyá? Is wáste ham is bápísmá páne se us ke sáth maut men gáre gae, táki jis tarah Masíh Báp kí qudrat se marke jí uṭhá, waisá hi ham ko bhí naí tarah guzrán karní hogí. Jab ki ham us ke marne men sharík haiṁ, to ham us ke jí uṭhne men bhí sharík honge. Ki ham yih jánte haiṁ, ki hamáří aglí ḵho us ke sáth salíb par khainchí gaí, táki gunáh ká badan halák howe, aur ham gunáh kí bandagí aur na karen.” Róm. 6: 1—6. Aur pák banne meṁ Ḵhudá hamáří madad karegá, balki hamára kám ḵhud karwáegá. Ki us ne wáda kiyá hai, ki “Main tum par sáf pání chhiṛkúngá, aur tum pák sáf hoze; aur main tum-háří sáří nápakí aur tumháre sáre buton se tum ko pák karúngá.” Hizq. 36: 25. Is ke bamújib Masíh ne ap hí kahá, “Main apne Báp se darḵhwást karúngá, aur wuh tumhen dúsrá tasallí denewálá baḵshhegá, jo hamesha tumháre sáth rahegá:” “wuh tumhen sab kuchh siḵhláegá:” Yúh. 14: 16, 26. “Wuh tumhen sáří sachchí báteṁ batáwegá:” “jo kuchh merá hai, use leke tumhen ḵhabar degá.” Yúh. 16: 13, 14.

Ísí tarah Ḵhudá ne ham naláiq, palid, muflis gunahgáron ke liye ek aisá bandobast kiyá hai, ki jis se hamáre beshumár gunáh miṭ jáweṁ, hamáří nápak rúheṁ dhoí jáweṁ, aur ham gunáh kí palidí, aur dozaḵh ke ḵhatre se bachke hamesha kí zindagí ke wáris, aur bihisht kí ḵhushíon ke liye taiyár baneṁ. “Ḵhudá kí daulat i hikmat aur aql kí gahráí kaisí hai! Us ká fatwá talásh se, aur us kí ráheṁ milne se kyá hí báhar haiṁ! Usí se, aur usí ke sabab, aur usí ke liye sáří chízeṁ húí haiṁ: usí ko hamesha kí buzurgí howe.” Ámín. Róm. 11: 33, 36.

VIII.

MASÍH KÍ MAHABBAT KÁ BAYÁN.

REV. TH. SCHORISCH KÍ TASNÍF.

Ar azízo, agar koí shaḵhs Masíh kí rawaiya se ágáh ho, aur sádiq aur munsif mizáj bhí ho, to hargiz us kí mahabbat ká munkir nahīṁ ho sak-tá. Tahíq karnewále, harek dindár aur bedín, zarúr is bát ke gáíl aur gawáh honge, ki Masíh ne niháyat mahabbat se nekokáří aur auron kí ḵhidmat men apní umr guzrání hai. Injíl ke bamújib Masíh aksar

har tarah ke ranjidoṅ ko madad dene, aur bímáron ko changá karne meṅ mashgúl thá. Usí se andhoṅ ko ánkḥ, langroṅ ko pánw, bahroṅ ko kán, lúloṅ ko háth, gúngoṅ ko zubáneṅ milín. Usí se korhí pák, mirgí wále achchhe, lunje change, díwáne bhútoṅ ke háth se ázád, aur murde zinde húe. Aur siwáe sihat i jismání ke hazár hazár tarah kí barkát i rúhání ká bhí baḥshshnewálá thá. Náwáqifoṅ ko nasíhat, gumráhoṅ ko hidáyat, kamzoroṅ ko táqat, dilgíroṅ ko tasallí har waqt detá rahá, aur kisé tarah ḵhwáháṅ mazdúrí ká na thá. Ğaríbí aur nek niyatí se ibtidá se intihá tak us kí auqát guzrí. Lom-riṅ ko mándeṅ, aur chiríyoṅ ko basere the; lekin us ke liye ek jagah nahín, ki jis par apná sir dhare. Aur is qadr josh i mahabbat thí, ki dín ráť mihnat kartá, aur tarah tarah ke dushmanoṅ se muqábil hotá, tau bhí hargiz us ke mizáj meṅ mándagí ko daḵhl na thá, aur na kisé se ḍartá thá. Agarchi har tarah kí faráqat o árám us ko Ḷhudá kí taraf se hásil thá, lekin tau bhí saikaroṅ tarah ke ranj o musíbat apne úpar iḵhtiyár karke, wáste hidáyat gumráhoṅ ke, jagah ba jagah safar kartá, aur har ek kúch aur maqám meṅ ḵhalq Ulláh ke sáth apní mahabbat záhir kartá thá. Sach hai, ki aisá dost kaun hogá, jis ne hamáří mahabbat meṅ apní ján tak dareg na kí? jaisá ki kitáb i muqaddas se záhir hai; aur jis waqt kí gunahgároṅ kí naját ke wáste, siwáe apní maut ke, chára na dekhá, barí bahádurí karke Yaráshalam ko gayá, aur jis tarah se nabíyoṅ meṅ us kí maut kí peshḵhabarí thí, usí tarah se sbiddat sukarát kí uṭháí hai.

Pas, is meṅ shakk nahín hai, ki Masíh kí sárí rawaiya niháyat mahabbat se mamúr thí. Lekin us kí mahabbat kí aslí súrat, jo ímándároṅ kí nazar meṅ atí, aur Ḷhudá ke kalám se sábit hotí hai, is se niháyat afzal aur tuhfá, aur billaur kí mánind hai, jo áftáb kí roshní meṅ hazár hazár rang se chamaktá hai. Ḷhudá fazl kare, ki ham bhí Masíh kí mahabbat ko haqíqat kí roshní meṅ ímán kí ánkḥ se dekhen, aur pahcháneṅ. Maqsad hai, ki is risále meṅ Masíh kí niháyat mahabbat ḵháss karke do bátoṅ se sábit karen: *pahlí*, ki us ne sárí dunyá ke wáste naját aur barakat i rúhání taiyár kí; aur *dusrí*, ki us ne dunyá ke shurú se use ímándároṅ ke nazdík pahunchá diyá hai, aur dunyá kí áḵhir tak pahuncháwegá.

I. Masíh kí mahabbat is sabab se beniháyat hai, ki us ne naját aur tarah tarah kí barakat i rúhání sárí dunyá ke wáste taiyár kí hai. Agar Masíh sirf apne mulk, yá apne zamáne ke logoṅ ke wáste nasíhat aur rahnumái kartá, to kuchh barí bát na hotí; kyúнки aksar nabí aur hádí ek ek firqe ke rahnumá aur nasíhat-kuninde húe; lekin Ḷhudá ke kalám se sáfnikaltá hai, ki Masíh ne jo kuchh kiyá, so sárí dunyá ke wáste kiyá hai; aur is jihat se fard bashar aisá nahín, ki jis par us kí mahabbat ká sháyán na ho. Chunánchi Yasaiyáh nabí ke 49weṅ báb, 6wín áyat meṅ yih peshḵhabarí hai, ki Ḷhudá farmátá hai, Yih to kam hai, ki tú Yáqúb ke firqoṅ ke uṭháne, aur Isráíl ke bache húoṅ ke phirá láne ke liye merá banda ho, balki main tujh ko gair qaumoṅ ke liye bhí roshní baḥshshúngá, aur apní naját zamín kí áḵhir tak pahuncháúngá. Aur Masíh ne ḵhud Yúhanná, 8 : 12 ke bamújib apne haqq meṅ yih gawáhi dí, ki Dunyá kí roshní main hún.

Pas, in báton ke bamújib Masíh ne sárí dunyá ke wáste apná kám anjám kiyá hai. Sach to hai, ki us ne kḥáss karke Yahúdíyá mulk ke bímáron ko changá, aur us ke ranjdon ká ranj dafá kiyá hai; lekin us ne apní mihr un par aisí záhir kí hai, ki ab un ká hál daryáft karne se, har mulk aur har zamáne ke ímándáron ko yih himmat hotí hai, ki we bhí har ek áfat o musíbat men us ká dáman pakren, aur apní murád ko pahunchen. Har chand ki Masíh ne Yahúdíon ke darmiyán men apní kámil nekí záhir kí hai; lekin is se, ki har tarah se un ke darmiyán men gunáh se pák rahá, aur Kḥudá kí marzí par har imtihán men kámil ṭahará, wuh bhí sárí dunyá ke wáste rahnumá húa hai. Us kí pákizagí, farotaní, muláimat, burdbárí, mihr, aur dání kí roshní men ab har zamáne ke log ánkḥ kholke chal sakte hai.

Phir, yaqín hai, ki munsif is bát par bhí shakk na láwenge, ki Masíh ká kalám har zamáne ke logon ke láiq hai. Jitní Yahúdíyá mulk aur zamáne kí bhúl chúk thín, un se us ká kalám pák thá; aur naját ke wáste us ne aisí nasíhat dí, ki har zamáne aur har mulk ke fázilon kí aql us ke radd karne men láchár hotí hai; lekin ímándáron ká dil sachái aur tasallí se mamúr ho játá hai. Is men bhí shakk nahín hai, ki Masíh ne aksar apne zamáne ke ímándáron ko barakat dí, aur un ke liye duá kí hai. Chunánchi yih bát us duá se sábit hoti, jo Yúhanná ke 17wen báb men miltí hai, “Main un ke liye duá mángtá hún, ki jinhen tú ne mujhe dunyá se diyá hai. Main yih duá nahín mángtá, ki tú unhen dunyá men se uṭhá le; par yih, ki tú unhen badí se bachá le.” Lekin isí duá men Masíh har zamáne aur har mulk ke shá-girdon ká zikr bhí kartá hai. Bíswín áyat men wuh yih kahke barhtá hai, ki “Main sirf un ke liye nahín duá mángtá hún, balki un ke liye bhí, jo un kí bát se mujh par ímán láwenge, táki we sab ek howen, jaisé ki tú, ai Báp, mujh men, aur main tujh men, táki we bhí ham men ek hon.”

Pas, Masíh kí mahabbat zarúr beniháyat thí; nahín, to us ne sárí dunyá ke liye barakaten rúhání taiyár karne ko aisí mihnát aur mashaqqat nahín uṭháí hotí; lekin us kí beniháyat mahabbat kí muhr us kí maut húi hai. Chunánchi likhá hai, ki “Wuh hamáre gunáhon ká kafára húa hai, aur faqat hamáre gunáhon ká nahín, balki tamám dunyá ká.” Masíh Kḥudá ká eklautá farzand hoke sárí dunyá kí sazá se ágáh thá, aur aisí sazá se wuh bhí pareshán aur dilgir hoke cháhtá thá, ki yih piyálá guzre; lekin phir dekh karke, ki dunyá kí naját ke liye koí tadbír nahín magar yih, ki Main us kí sazá apne úpar uṭhá lún, us ne kahá, ki “Ai mere Báp, tú soḡhtaní qurbáníon se, aur gunáhon kí qurbáníon se rází na thá; mere liye badan ko taiyár kiyá hai. Dekh, main terí marzí par chalne ko átá hún; mere haqq men kitáb men yih likhá hai.” Yih kahke Masíh ne apne badan par sárí dunyá ká gunáh aur sazá chaḥhá lí, aur salíb par apní ján qurbání men dí hai.

Ai ázizo, is hál par gaur karke sach kaho, kyá koí Masíh kí mahabbat kí úncháí aur chaurái, lambái aur gahrái, daryáft aur bayán kar saktá hai? Adálat ká takht nishín jo hai, so gunahgáron ke shumár men giná játá; ásmán zamín ká parwardigár gunáh ke bojḥ ke tale kíre ke

muwáfíq pará rahtá ; jalál aur martaba ká málík lohú luhán lanat kí lakrí par tángá húá nazar átá ; aur qadím o qádir K̤hudá maut kí sukarát uṭhátá hai !

Kyá us ká is meṇ kuchh fáida thá, kí ham láchár gunahgáron ke liye itná dukh uṭháwe ? Us ká fáida kahán húá hogá ? K̤hudá kisé chíz ká muhtáj. aur us ko kisé fáide se garaz, nahín. Yá kyá kisé ne us ko kuchh diyá thá, kí aisí ráh se us ko phir diyá jae ? So bhí nahín. Ham sab ke sab gunahgár aur tabíat se sazá ke láiq the. Lekin fáida dunyá ko albatta húá hai. Is se kí K̤hudá ká farzand salíb par kafára húá, ham gunahgáron ke liye naját, yaṇe gunáh kí baḡshish, K̤hudá kí Rúh Pák, ek naí rúhání paidáish, K̤hudá ke nazdík lepálakpan, aur marne ke bad hameshe kí zindagí aur buzurgí taiyár húi hai. “K̤hudá ne dunyá ko aisá piyár kiyá hai, kí us ne apne ek-laute Beṭe ko bhejá, táki jo koí us par ímán láwe, halák na howe, balki hameshe kí zindagí páwe.” Phir is dunyá kí chízen, yaṇe k̤hurák, poshák, ghar bár, wagaira bhí faqat Masíh kí maut kí badaulat hásil hain ; kis wáste, kí agar wuh gunahgáron ká kafára na húá hotá, to K̤hudá is dunyá par burdbárá nahín kartá, balki us ko apní aḍálat se nest o nábud kar dáltá.

Ái azízo, Masíh kí beniháyat mahabbat is meṇ dekh karke, kí us ne sárá dunyá ke wáste naját aur tarah tarah kí barakaten taiyár kí hain, ham ab áge barheṇ, aur

II. *Dusre* muqaddama par bhí gaur karen, kí Masíh ne niháyat mahabbat se apní naját aur barakat dunyá ke shurú se ímándáron ke pás pahuncháí, aur dunyá kí ák̤hir tak pahuncháwegá.

Pahle, K̤hudá ke kalám se sábit hotá hai, kí Masíh baliház Ulúhiyat ke dunyá se pahle apne ásmání Báp ke nazdík házir thá, jaisá kí Míkah nabí ne, 5 báb, 2 áyat meṇ, yih peshk̤habarí kahí hai, kí “Ái Baitlaham Afráta, tujh meṇ se mere liye wuh shaḡhs niklegá, jo Isráíl meṇ hukúmat karegá, jis ká nikalná *qadím se, ayám ul azal se* hai.” Aur Yúhanná ke 1 báb, 1, 2, aur 14 áyat meṇ, Masíh ke haqq meṇ yih k̤habar miltí hai, kí “Ibtidá meṇ Kalima thá, aur Kalima K̤hudá ke sáth thá, aur Kalima K̤hudá thá. Sab kuchh usí se paidá húá. Wuh Kalima mujassam húá.” Pas, in áyaton se sábit hotá hai, kí Masíh banisbat Ulúhiyat ke hamesha K̤hudá ke nazdík thá, aur dunyá bhí usí se paidá húi hai.

Ab us ne dunyá ke shurú se kyá kiyá hai ? Ázízo, yihí us kí mahabbat ká kám thá, kí jis waqt se Ádam aur us kí aulád gunáh ke qábú meṇ pare, wuh shafáat karne, aur apní naját kí peshk̤habarí dilwáne par maujúd rahá. Sab paigambar usí ke bheje hue áe, zamán i hál aur istiqbál ke logon kí tasallí ke wáste ; aur usí kí Rúh kí hidáyat se ek ánewále naját-kuninda kí k̤hushk̤habarí phailáte rahe. Chunánchi likhá gayá hai, (2 Patthras, 1 báb, 20 áyat meṇ), “Aur yih jáno, kí nabúwat kí bát ádmí kí k̤hwáhish se kabhí nahín, balki K̤hudá ke pák log Rúh Quds kí tásír se bolte the :” (1 Patthras, 1 báb, 10, 11 áyat meṇ), “Masíh kí Rúh un meṇ thí.” Par koí aise wáde se k̤hush nahín húá hotá, agar apní láchárá aur muhtájí se pahle wáqif na hotá. So yih bhí Masíh kí mihr ká kám thá, kí Yahúdíon aur

gair mulkiyon donon ko apne áne kí taraf mutwajjih aur muntazir kare. Yahúdiyon ke darmiyán men us ne Músá ke wasíle se apní shari'at bhejí, aur majlison men sabton ko násihon se talím karwáyá, táki sab ke sab us ke wasíle se apní láchári aur kharábí pahcháne, aur ázurda khatir hoke wada kie hue naját-kuninda kí intizári karen, aur us par apná ásrá lagáwen. Chunánchi, (Gal. 3 : 24), likhá hai, "Par shari'at hamará hádí thaharí, ki ham ko Masih tak pahuncháwe, táki ham ímán se nek gine jáwen." Gair mulkiyon ko Masih ne un kí marzí men supurd kiyá, táki we is se pahcháne, ki gunáh ádmíyon kí halákat hai, aur na ilm, na fasáhat, na zor, na bahádurí, na bádsháhat, na daulat, na nám, kuchh kám átá hai. Yún we naját-kuninda ko qabúl karne ko taiyár hue. Is ke siwá Masih ne gair mulkiyon ke muqarrari waqton ko, aur rahne ke maqámon ko yún muayyan kiyá, ki us kí naját kí roshní ba'khúbi sári dunyá men phailne páwe, aur jaldí karke mulk mulk ke ímándáron tak pahunchne sake, (dekho Ámál, 17 : 26).

Yún apne áne kí taiyári karke Masih ne apne jalál ke takht ko chhor diyá hai, aur dunyá men á karke naját aur tarah tarah kí barakaten taiyár karne ko bahut mihnat kí, aur ákhir ko apní ján bhí qurbáni men dí hai. Par Masih kí mahabbat sirf us kí maut par mauqúf na thí; balki wuh murdon men se zinda hoke phir apne jalál ke takht par charh gayá hai. Chunánchi Ámál ke 1 báb 9 áyat men likhá hai, "Aur ye báten kahke, jab ki us ke shágird dekhte the, wuh úpar uthá-yá gayá, aur badlí ne use un kí nazar se áp men chhipá liyá." Par jis mahabbat se wuh ásmán se áyá, usí se wuh bhí ásmán par gayá, aur ab tak apní naját sári dunyá ke logon ke pás pahunchátá hai. Beniháyat mahabbat se wuh ab apne ásmání Báp ke huzúr men gunahgáron ká wakil hoke shafáat kartá hai, aur un ke liye K'hudá kí burdbári aur mihrbáni ká aslí sabab hai. Chunánchi likhá hai, ki "K'hudá ke maqbúlon par kaun dawá karegá? kyá K'hudá, jo unhen nek gintá hai? kaun sazá ká fatwá degá? kyá Masih, jo un ke liye mar gayá, balki jiyá, aur K'hudá kí dahiní taraf baithke hamári shafáat kartá hai?" (Róm. 8 : 32, 33). Phir, Masih beniháyat mahabbat se Rúh Quds ko gunahgáron ke dil men bhej karke unhen us kí tásir aur hidáyat se apní taraf pher látá hai; aur un men derá karke apní naját aur barakaten rúhání ba'khshtá hai. Jis tarah se ek hí áftáb hazár hazár taláo aur naddíon men apní súrat banátá hai, waisá hí Masih sab ímándáron ke dil men Rúh Pák kí tásir se muláqát aur derá kartá hai, aur unhen Rúh Quds kí dánái, nekí, rahm, aur sabr ináyat karke apne hamshakl banátá hai. Dekho Yúh. 14 : 21, 23. Musháhada, 3 : 20.

Akhir men, yih bhí Masih kí barí mahabbat kí subút hai, ki wuh apne shágirdon ke wasíle se sab mulkiyon ko apní bádsháhat ke sharík kartá hai; chunánchi us ne unhen yih hukm diyá hai, ki "Tum já karke sab mulkiyon ko mere shágird karo," (Mat. 28 : 18); aur khud yih wada kiyá hai, ki "Merí aur bhí bheren hain, jo is bher-kháne kí nahín; unhen bhí láná mujhe zarúr hai; aur we merí áwáz sunengí; aur galla ek aur charwáhá ek hogá." Masih kí naját kí khabar in dinon men ek sau saintís zubanon men sunái játí hai. It-

ne mulk में Masíh achchhe charwáhe kí mánind roz apní bheron kí hidáyat kartá hai. Jo bhúle bhaṭke hai, unhen wuh nasíhat kí ráh se apne pás bulátá hai ; jo imtihán में láchár aur mánde húe hai, unhen apní burdbáरी ke kándhon par uṭhátá hai ; dilgír aur ázurda khatír jo hai, unhen tasallí detá hai ; kamzoron ko wuh sambháltá aur táqat baḡhshtá hai ; diyánatdaron kí hifázat kartá hai ; aur jo marne tak wafádár ṭhaharte hai, unhen wuh apne ásmání jalál ke sharík banátá hai ; jaisá ki us ne kahá hai, ki “Ai mere Báp, main cháhtá hún, ki we bhí, jinhen tú ne mujhe diyá hai, jahán main hún, mere sáth howen ; táki we merí buzurgí, jo tú ne mujhe dí hai, de-ken ; kyúinki tú ne mujhe dunyá kí paidáish se áge piyár kiyá hai.” (Dekho Yúhanná, 17 : 24).

Ab ázizo, Masíh kí kḡushkhabarí tum tak bhí pahunchí hai. Is mulk में bhí Masíh kí niháyat mahabbat kí khabar phailtí, aur hazár hazár kitábon se záhir hotí hai. So mere kahne kí garaz yih hai, ki duá karo, táki tum par Masíh kí mahabbat záhir howe, aur tum bhí us kí pahchán se naját aur hamesha kí zindagí ke wáris bano. Lekin tum, piyáre bháío, ki jo Masíh kí mahabbat में jar paidá kar-ke, aur neo dálke sáre pák logon ke sáth Masíh kí mahabbat par nigáh karte, aur usí se himmat aur kḡushwaqtí hásil karte ho, mahab- bat में páedár aur chálák bano. Wájib hai, ki tum Kḡudá ko Ma- síh ke wasíle se sáre dil o ján se, aur sáरी qudrat se piyár karo ; kyún- ki us ne tum ko pahle piyár kiyá hai. “Tum ázíz farzandon kí tarah Kḡudá ke pairau ho. Aur jaisá Masíh ne hamen piyár kiyá, aur kḡushbú ke liye hamáre iwaz में apne taín Kḡudá ke áge nazr aur qurbán kiyá, waisá hí tum bhí mahabbat se chalo.” (Afsíon ká khatt, 5 : 2). Lekin agar koí kahe, ki Main Kḡudá ko piyár kartá hún, aur apne bhái se dushmani rakhe, to jhúṭhá hai ; ki agar wuh apne bhái ko, jise us ne dekhá hai, piyár nahín kartá, to Kḡudá ko, jise us ne nahín dekhá hai, kyúinkar piyár kar saktá hai ? So, ai piyáro, yih bhí zarúr hai, ki tum apne bháíon ko piyár karo. Jo koí unhen piyár kar- tá hai, so is se záhir kartá hai, ki wuh Masíh ká shágird hai ; chu- nánchi Masíh ne apne shágirdon ko yih nayá hukm diyá hai, ki “Tum ek दूसरे ko piyár karo, jaisá ki main ne tumhen piyár kiyá hai. Agar tum ek दूसरे ko piyár karoge, to is se sab log jánenge, ki tum mere shágird ho.” (Yúh. 13 : 34, 35).

Garaz, ai mere bháío, Kḡudáwánd se aur us kí quwat kí qudrat se zoráwar bano, aur har imtihán में Masíh kí niháyat mahabbat par nigáh karke diyánatdár aur qáim raho ; táki tum bhí misl Púlús ke yih faḡhr kar sako, ki “Ham sab mushkilát aur saḡhtíon में, us ke wasíle se, jis ne ham se mahabbat kí hai, gálib hai ; aur ham ko yaqín hai, ki na maut, na zindagí, na firishte, na sardár, na zoráwar rúhen, na hál ke, na áinde ke májare, na bulandí, na pastí, na aur koí chíz, ham ko Kḡudá kí us mahabbat se, jo hamáre Kḡudáwánd Ísá Masíh में hai, judá kar saktí hai.” Ámín.

IX.

IMÁN KÍ BABAT.

REV. J. L. SCOTT KÍ TASNÍ'F.

“*Aur bin ímán us kí (yañe Kḥudá kí) razámándí mumkin nahín.*—Ibr. 11 : 16.

SAB log iqrár karte haiñ, ki Kḥudá ko rázī karná ádmíon ko niháyat wájib o lázim hai. Lekin un ke hálát dekhne se záhír hai, ki bahut thore haiñ, jo apne dil se us kí razámándí cháhíte haiñ. Aksar ádmí aisí zindagí basar karte haiñ, ki goyá koí un ká paidá karnewálá, aur kisí tarah kí jawábdihí un ke zimme meñ nahín hai; aur na bihisht hai, na dozaḥ. Is hál meñ faqat aql se qabúl karná káfi nahín hai, balki cháhíye ki dil se bhí máneñ. Mumkin hai, ki ádmí apní aql se Kḥudá ká wajúd qabúle; aur samjhe, ki wuh rást o sádiq hai, aur har jagah házir o názir hoke nek o bad daryáft kartá hai; aur us ne ek din muqarrar kiyá hai, ki jis meñ wuh rástí aur sadáqat se dunyá kí aḍálat karegá, aur us waqt sab ádmí apne dilí hál ke mutábiq, yañe nekokár hayát i abadí, aur badkár maut i abadí, ajr páwenge: tis par bhí yih záhír hotá hai, ki ye bhárí matálib un ke dilon par, jaisá kí cháhíye, asar nahín karte haiñ.

Is bare taajjub ká sabab kyá hai? Sabab yih hai, ki un ká ímán nahín; aur “bin ímán Kḥudá kí razámándí mumkin nahín.”

Pas, jab ki ham Kḥudá kí razámándí cháhēñ, aur us kí razá ká ajr, jo hayát i abadí hai, hásil karen, zarúr se zarúr hai, ki hamáre dil meñ wuhí ímán ho, ki jis ká bayán aur zarúrat Injíl meñ mundarj hai. Lázim-bal-alzam hai, ki ham mutábiq hukm us rasúl ke, jis ke mak-túb meñ yih áyat hai, “ímán se chaleñ, aur bínái se nahín.”

Pas, yihí merá manshá hai, aur isí par hamárí naját mauqúf hai. Dhiyán karke, suno. Kḥudá madad de, ki jo main kahúñ, tum us se fáida uṭháó.

I. Ímán kyá shai hai?

II. Kis wáste zarúr hai? aur

III. Ham kis tarah us ko hásil karen, aur barháwen.

In báton ká bayán main ab kartá hún.

I. Injíl meñ bahut sí báteñ aisí haiñ, ki logon ko baḥhúbí mutahaqqiq aur maḷúm nahín. Un meñ se ek yih bát *ímán*, ki jis ká matlab tho-ṛá sá gaur karne, aur dil lagáne se khul játá hai; aur agar koí us se náuáqif rahe, to usí ká qusúr hai.

Imán ke aslí mañe *yaqín láná* haiñ. Maslan ham apne hawáss kí gawáhi par *ímán* rakhte haiñ ; yañe, ham un chízon kí haqíqat par, jo kí hamáre hawásson par asar kartí haiñ, yaqín láte haiñ. Phir, ham kisi tawárikh ke bayán par *ímán* rakhte haiñ ; yañe, ham ko yaqín hai, kí jin báton ká us meñ bayán hai, so sach haiñ. Maslan Yúnání tawárikhon se ham ko sábit hai, kí qaríb tín sau baras ke Isá Masíh se áge Sikandar bádsháh, baháduri ke sáth, tañht-nishín thá.

Lekin wuh *ímán*, jis kí zarúrat Injíl meñ bayán hai, na faqat yihí mañe, balki is se bahut ziyáda, rakhtá hai. Wuh sirf yaqín láná nahíñ, balki aisá yaqín láná, kí un báton ke haqq meñ, jo yaqíní haiñ, tamám chál chalan par asar kartá hai. Aur is asar ke bagair Khudá ke nazdík wuh *ímán* nahíñ kahlátá hai.

Dekho Injíl muqatabar hai, aur bahut log us ko muqatabar jánte haiñ. Apní samajh meñ we *ímándár* haiñ ; aur sach to hai, kí we aql o fahm ke taur par *ímán* rakhte haiñ. Jo bayán Injíl meñ hai, so sach jánte ; aur jo koí un se kahe, kí tum beímán ho, to niháyat gusse hote. We girja karne, aur Khudá kí ibádat bajá láne meñ shámil haiñ, aur nek-bañhtí ke sáth sabhon se achchhlá sulúk sháyad karte haiñ ; lekin Khudá ke nazdík un ká *ímán* durust nahíñ ; kis wáste, kí *khúbí* i *ímán* un kí chalan meñ dikháí nahíñ detí. Wuh betásír aur láhásil hai, aur un ke ámal se kuchh záhir nahíñ hotá hai.

Is betásír hone ká sabab áshkára hogá, jab kí ham thorá áge sachche *ímán* kí wajh tahqíq karenge ; yañe, wuh *ímán*, jis ke wasíle se injíl ke ahkám ke bamújib ham bachenge ; aur jo mazmún i muqaddame *ímán* ká Púlús rasúl ne Ibráníon ke *khatt* meñ likhá hai, so ham us se shurú karte haiñ. Wuh yún farmátá hai, kí “*Imán* yih hai, kí un báton par, jinká intizár kiyá játá hai, *íqamád* kiyá jáe, aur un chízon ká, jo dekhne meñ nahíñ átiñ, yaqín howe.” Us ká matlab yih hai, kí *ímán* ke zor se ham un májaron aur ámalon ko, jin ká bayán hai, agarchi ham ne áp nahíñ dekhá, lekin aise yaqíní samajh sakte haiñ, kí jaise ham ne apní ánkhoñ se dekhe hon ; aur un chízon ko, jin ká bharosá rakhte haiñ, aisí bilkull muqatabar aur yaqíní ján sakte haiñ, kí maslan we abhí hamáre báth áñ. Pas, *ímán* rúh ke nazdík aisá hai, jaise áñkh badan meñ. Jis tarah ham badan kí áñkh se maujudát ko dekhte haiñ, usí tarah ham rúh kí áñkh, yañe *ímán* se, rúhání chízon par nazar karte haiñ. Ham ne to un bañe muámalon ko, jin ká Injíl meñ bayán hai, yañe Isá Masíh ká tawallud, aur us ke muájazát, aur mar jáná, aur jí uñhná, aur ásmán par jáná, apní áñkhon se nahíñ dekhá, aur na us kí nasíhaton apne kánon se suníñ, aur ásmán kí *khúbíán*, aur dozakh kí haulnák chízen ham ko dikhlaí nahíñ detíñ ; lekin *ímán* kí táqat se, yañe rúh kí áñkh se, we hamárí nazar meñ áti haiñ, aur hamáre dil par asar kartí haiñ.

Pas, sabab záhir hai, kí kis wáste bahut Isáí apne *ímán* se kuchh fáida nahíñ hásil karte haiñ. Un ká *ímán* sahíh nahíñ hai. Asmání aur rúhání báton kí sáf nazar un ko nahíñ hai. We áqibat ko safáí se nahíñ dekhte haiñ, goyá kí wuh un se kuchh nisbat nahíñ rakhtí hai. Apní nápákí, aur Khudá kí rástí aur sadáqat un kí samajh meñ sáf nahíñ áti haiñ ; is liye hukm Injíl ká, kí us nápákí ko dúr karen, un ke dil meñ asar na kartá. Aur Isá Masíh, aur jo us ne ham logon

kí naját ke liye kiyá, un ko pasand nahín átá hai. Injíl ko, haqíqatan un ke zihn men, un se kuchh iláqa nahín. We samajhte haiñ, kí auron ke haqq men wuh achchhí hai, lekin hamen us kí kuchh hájat nahín. Aise log aksar yih k̄hiyál karte haiñ, kí agar ham apní chalan men beaib, aur k̄halíq, aur ádil, aur mihrbán hon, to hamará ákhirí hál albatta achchhá hogá. Pas, is unmaid par takiyá karke we apne ko árám dete haiñ.

Lekin batákíd jáno, kí wuh ímán, jo injíl kí haqíqaton par yaqín láná hai, bizzarúr ímándáron kí chál chalan men dikháí degá. Wuh un par beasar kabhí na hogá. Kyá wuh shaḡhs, jis kí ánkhen haiñ, un kí gawáhí na mánegá? Wuh beparwá kúe men já giregá? yá k̄handaq men apne taín girá degá? Kyá jis ke kán haiñ, wuh sher í babar ká garj sunke na bhágegá? Koí aisá bewaḡíf nahín hai, kí apne hawásson ke barḡhiláf kare. Alá-ház-al-qiyás kyá is se kuchh kam yaqín hai, kí wuh shaḡhs, jo jahannam ke azáb par ímán rakhtá hai, aur bihisht kí k̄húbíán báwar kartá hai, pahle se kyún na bháge, aur dústre ko hásil karne kí koshish kyún na kare? Kyá wuh apní rúhání ánkھ kí gawáhí na mánegá? Us ká ímán beasar rahegá? Kabhí nahín. Wuh to barí fikr aur koshish karegá, aur k̄hushí aur tamám dil se naját kí us tadbír ko, jise K̄hudá ne muqarrar kiyá, qabúl karegá.

Jo báten Injíl men bayán haiñ, aisí wajh kí haiñ, yāne hamāre ab kí aur ákhirí hál se aisí mutassil aur paiwasta haiñ, kí yih námumkin hai, kí koí un par ímán láke un se gair mutaassir rahe. Tawáriḡh kí báton men aisá albatta ho saktá hai. Maslan ham Yúnání tawáriḡhon ko parhke yaqín karte haiñ, kí ek shaḡhs Leonidas námí ne apne tén sau sipáhiyon ke sáth Tharmápile kí gháṭí men qáim hokar Fárs kí tamám fauj ká sámhná kiyá, aur dilerí se, apne mulk ke liye, apní ján dí. Lekin mujh ko kyá parwá hai, kí yih tawáriḡh sach ho, yá nahín? Us kí sacháí yá jhutháí mujh ko kuchh fáida yá nuqsán ká báis na hogí. Wuh mujh se kuchh iláqa nahín rakhtí hai. Lekin, ai Ísáío, agar yih tawáriḡh kí bát sach ho, kí Ísá Masíh ne, K̄hudá ke qahr aur ádmí ke gunáhon ke bích men qáim hoke, dunyá ke logon ko, K̄hudá ke qahr ke sailáb se bacháne ke liye apní ján dí; aur agar ye sab báten, jo us wáḡia kí bábat likhí haiñ, sach haiñ, aur ham un kí sacháí par ímán láte haiñ, to kyá yih kisi taur se mumkin hai, kí ham un se gair mutaassir raheñ? Kyá ham sirf aql kí ráh se us ko qabúl karke apní taraf se aláhida kar sakeñ, kí wuh aisí chíz hai, kí jis se ham ko kuchh kám nahín? Nahín, kabhí nahín. Aql o dánish síkhatí hai, kí aisá nahín ho saktá hai.

Pas, hásil kalám ká yih hai, kí jo báten muqaddas kitáb men likhí haiñ, so ham se niháyat iláqa rakhtí haiñ, aur ímán wuh amal í zihní hai, kí jis se na faqat un báton kí haqíqat maḡlúm hotí hai; balki jo iláqa un ko ham se hai, zihn ko sáf záhir hotá hai, aur basabab is ke we dil par asar kartí haiñ:—yāne, jo shaḡhs kí ímán látá hai, wuh bihisht aur dozaḡh kí haqíqaton ko samajhtá hai, kí we aisí haqíqaten haiñ, kí ham se nisbat rakhtí haiñ. Wuh yaqínan jántá hai, kí yih dunyá hamāre árám ká takiya nahín hai, balki ham us men tamásháí aur musáfir haiñ. Wuh apná k̄hiyál thorá áge daurátá hai, jab “yih

fání jáma i baqá ko pahinegá, aur yih marnewálá hayát i abadí ko.” Wuh apne taín gunahgár, aur K̤hudá kí ʔadálat ká mulzim jánke apne gunáhoṇ se tauba karegá, aur shádmání se yih injíl kí k̤hushk̤habarí, yaṇe kí gunáhoṇ se ek naját denewálá taiyár hai, sunegá; aur us ko apní ján kí zindagí samajhkar qabúl karegá. Tab Isá Masih us ko ʔazíz hogá. Wuh us kí buzurgí záhír karne kí k̤hwáhish karegá; aur maqdúr bhar auroṇ ko us ke pás láwegá, kí we bhí us kí sitáish karen. Wuh dil se cháhegá, aur koshish bhí karegá, kí sab ádmí naját kí un barí niʔamatoṇ aur barakatoṇ meṇ, jo us ko milí haiṇ, sharík howeṇ. Wuh K̤hudá kí buzurgí sab bátoṇ se ʔazím o ʔazíz samjhegá, aur is ko záhír karne ke liye, agar us kí marzí aisí ho, to apná watn, aur má báp ká ghar, aur dost áshná, aur jo kuchh us ko ʔazíz hai, chhoṛke dúr mulkoṇ meṇ jáegá, aur apne úpar saḳhtíáṇ uṭháke maut tak apne K̤hudáwand kí pairawí karegá. *Yih ímán láná hai.*

II. Aur dúsrí wajh, main púchtá hún, kí wuh kis liye aisá zarúr hai? Pahlá jawáb yih hai, kí K̤hudá ne farmáyá hai, kí “bin ímán koí mujh ko rází nahíṇ kar saktá hai;” aur ímándároṇ ko K̤hudá ká hukm albatta káfí hai. Aur ek dúsrá jawáb ʔql síkhátí hai, aur guzre húe bayán se wuh ab bhí tum ko maḷúm hogá; yaṇe, ímán wuh wasíla hai, kí jis se ham K̤hudá kí farmánbardarí karte haiṇ. Jo kuchh us ne ham ko farmáyá, aur hamárí naját ke liye kiyá hai, so ham ímán hí se mánte aur qabúl karte haiṇ. Biná ánkheṇ ádmí ṭhokar khátá, aur k̤handaq meṇ girtá hai. Pas, jaise badan meṇ ánkh zarúr hai, waisá hí rúh ko ímán; kyúinki wuh biná ímán K̤hudá ke ahkám ke mutábíq nahíṇ chal saktí hai. Ímán rúh kí ánkh hai, kí jis ke bagair ham K̤hudá ke hukmoṇ kí safáí, aur muwáfíq Injíl ke naját kí rahnumái, aur Isá Masih kí fazílat, aur gunáh kí badí, aur bihisht kí k̤húbíáṇ, aur dozaḳh kí k̤harábíáṇ nahíṇ dekh sakte haiṇ. Agar ye báteṇ beímánoṇ kí ʔql meṇ sháyad áweṇ, taubhí we apne dil meṇ un kí haqíqat nahíṇ mánte. Yih jahán un kí ánkhon ko áftáb kí mánind aisá roshan kartá hai, kí jahán íáyanda misl sitáre ke gaib rahtá hai. Lekin ímán se yih hál badal játá hai, kí jahán ánewálá misl áftáb, aur zamán i hál, yaṇe dunyá, muwáfíq sitáre ke kamtar ho játí hai. Pas, jab kí ímán se yih asar hai, to us kí zarúrat sáf záhír hai; kyúinki ʔql síkhátí hai, kí ádmí kí zindagí marne se munqata nahíṇ hotí, balki ákhir ko abad ul ábád rahegí. Pas, is hálát meṇ muqábala us ká, is dunyá se ham ko kyá kám? Agar yih sab sach hai, kí hameshaḡ K̤hudá ko aur ádmí ko hai; aur maujúd honá bihisht aur dozaḳh ká; aur hamará gunáhgar hoke dozaḳh ke láiq honá; aur agar injíl meṇ wuh tadbír zábír hai, kí jis se hamáre gunáh muʔf howeṇ, aur ham K̤hudá ke maqbúl howeṇ, to yaqínan wuh wasíla, yaṇe *ímán*, jis se ham un haqíqatoṇ ke hál ke mutábíq zindagí kar sakte haiṇ, niháyat lázim aur zarúr hai.

III. Tísrí wajh, jo wasíle ímán barháne ke haiṇ; we báqí haiṇ; so ham un ko bayán karte haiṇ. Aur is hál meṇ yád rakhá cháhiye, kí ímán hamújib i hukm Injíl ke “K̤hudá kí baḳshish hai.” Biná Rúh i Quds kí madad ke ham kuchh nahíṇ kar sakte haiṇ. Lekin us kí madad ham ko miltí hai, jis waqt ham sídq i dil se use mángte haiṇ.

Anjám i maqsad ko pahuncháná kám us ká hai, aur wasíle dhúndhná hamará. Jaisá dunyáwí báton meñ, waisá hí rúhání meñ hai. Misl is ke, jab kisan zamín ko jotke taiyár kartá hai, aur bñj boke pání se sínchtá hai, aur jo kuchh karná hai, so bhí kartá hai, tab Kḥudá anáj ko paidá kartá hai. Lekin agar wuh apne dil meñ kahe, ki Main bñj ko paidá nahín kar saktá hún, is wáste mujh ko kuchh karná na cháhiye, to kyá us ko fasl kátne ke waqt kuchh hásil hogá ? Isí tarah rúhání báton meñ ham ko wasíla dhúndhná cháhiye, aur baḍ is ke Kḥudá par bharosá rakhná.

Pas, wasíle ímán mazbút karne ke kyá haiñ ? Jab ki ímán meñ do báten haiñ, yañe aql se samajhná, aur dil se mánná, to wasíle bhí do tarah ke honge.

Pahle, we wasíle, ki jin ke hásil karne se ham muqaddas kitáb ko ziyáda báwar karen ; yañe, jo dalilen, ki muqaddas kitáb ká Kḥudá kí taraf se honá sábit karen, un se wáqif honá cháhiye. Par in dalílon ke ab bayán karne kí jagah nahín. Ham yihí bát ab sach mánte haiñ, ki *Baibal* muqaddas kitáb Kḥudá kí taraf se hai, kyúinki wuh apná muqaddas honá záhír kartí hai. Tahqíq karne ke waqt wuh sachchí ṭhaharegi, aur bahut aqlmandon ne tahqíq karke us ko sachchí páyá. Lekin hamará matlab ab yih hai, ki sab log, aur kḥáss karke Ísáíon ko, un dalílon se wáqif honá cháhiye, ki jin se us ká Kḥudá kí taraf se honá sábit ṭhahare. Faqat un dalílon ko aql se samajh lená, wáste naját ke, káfi nahín ; tis par bhí zarúr hai ; kyúinki agar aql kí roshní na howe, to dil kyúnkar máne ? Agar ham ko kuchh shakk ho, ki Baibal Kḥudá kí taraf se hai, yá nahín ; to us ke bhári matálib hamáre dílon par kuchh asar na karenge.

Pas, sabhon par lázim hai, ki dalílon se jitná ho sake wáqif howen. Ye dalílen bahut sí aur tarah tarah kí haiñ, aur un ko bilkull samajhne ke liye bahut sí kutub i tawárikh parhná zarúr hai ; aur yih parhná sab ko mumkin nahín hai ; lekin ek tarah kí dalíl hai, ki us ko sab samajh sakte haiñ ; yañe, we dalílen, ki jin se kitáb kí kḥúbíán nikaltí haiñ. Jo kuchh us meñ likhá hai, so nek, aur pák, aur Kḥudá ke láiq hai, aur bahut log faqat us ke parhne se ímán láe haiñ. Aur beshakk aql sík-hátí hai, ki jo kitáb Kḥudá kí taraf se hai, koí us par aib i haqíqí nahín lagá saktá. Aur aql yih bát bhí mántí hai, ki agar ye log, jinhon ne Baibal ko likhá hai, Kḥudá ke bheje húe na the, to bare dagabáz the ; kyúinki unhon ne yih dāwa kiyá, ki ham Kḥudá kí taraf se áe haiñ. Aur dalíl un ke dāwe kí yih hai, ki jo dagabáz, aur apní baráí dhúndhnewále haiñ, we kyúnkar achchhe aur ímándár ho sakte, yá achchhí kitáb likh sakte haiñ ? Isí bát par dhiyán karke cháhiye, ki ham muqaddas kitáb ko parhen ; aur agar ham dekhen, ki us kí báten achchhí nahín, aur ápas meñ nahín milti haiñ, aur Kḥudá ke láiq nahín haiñ, to us ko radd karen ; nahín, to yih hamáre wáste dalíl i káfi hai, aur cháhiye ki ham us ko qabúlen. Pas, hásil kalám ká yih hai, ki agar ham se ho sake, to sab dalílon ko daryáft karen ; aur jab ki yih sab ádmíon se nahín ho saktá hai, to cháhiye ki we kitáb hí ko parhen, aur us kí safái aur nekí ke muwáfíq ímán láwen ; aur na bhúlen, ki jab tak kitáb kí báten yaqíní ma'lúm na howen, tab tak hamará ímán mazbút nahín ho saktá hai. Pas, koí na samjhe, ki dalílon ko dekhna farz

nahin. Wuh sabhon par farz hai, balki kháss ímándáron ko; kyúinki agar un ko kuchh shakk na ho, tauhbí cháhiye ki we apne kamzor bháion ko mazbút karen.

Dúsré wasíle, ímán mazbút karne ke, dil se nisbát rakhte hain, yane we wasíle, ki jin se K̤hudá kí báton ká asar dil par gar jáwe. Yih barí bát hai. Is ke bagair aql kí roshní kuchh fáida na karegi. Wuh us per ke muwáfíq hai, jis ká kuchh phal nahin hai. Aur is liye, ki dil par asar howe :—

Pahlá wasíla *duá mánghá hai*. Jab ki ímán “K̤hudá kí baḥshish” hai, to us kí taraf nazar karná cháhiye; aur ham ko dilásá देने ke liye yih wāda hai, ki “Jo ham mánghen, to diyá jáegá; jo dhúndhen, to milegá.” Kaisí barí tasallí is men hai! Aur taajjub kí bát yih hai, ki kitáb kí báten itná thorá asar hamáre dilon par kartí hain, ki ham ásmání chízon ko aisá dhundlá dekhte hain. Hamará ímán kis wáste aisá kamzor rahtá hai, jab K̤hudá apne wāde ke muwáfíq hamáre mánghne par देने ko taiyár hai? To us se rujú karen, aur us ke sámahne ghuṭne ṭekke barí minnaton se mánghen, ki Ai K̤hudá, hamará ímán ziyáda kar! aur wuh bilá shakk sunegá, aur milrbaní se barhāwegá.

Dúsrí wajh, ímán kí báton par aksar gaur karne se ham apne ímán ko mazbút karen. Cháhiye ki ham apná dil un par lagāwen, aur un par bañut soch aur tasauwar karen; kyúinki jis chíz ko ham aksar aur nazdikí se dekhen, wuh dil par munaqqash hotí hai; aur jis ko kam aur dúr se dekhte hain, us kí yád nahin rahtí hai. Pas, jo ham ko karná hai, so yihí hai, ki rúhání chízon ko apne nazdik láwen, aur un par yún hí taammul karen; aur samjhen, ki ye chízen ham se iláqa rakhtí hain. Jo ham Ísá Masíh ko naját denewálá apná aur dúsron ká samjhen, to hamáre use kuchh bahut parwá nahin hogí, lekin jab ham us ko apná kháss naját-dihinda jánen, aur jo kuchh ki us ne hamáre khátir kiyá, yád karen, aur us ko ásmán men baithá húá wahán bhí ham apní hí naját hásil karne ke liye samjhen, tab us par tamám bharosá hogá, aur ham ímán kí mazbútí men, mánind Thomá kí, us ko apná “K̤hudáwand aur K̤hudá” kahne sakenge. Jab tak ham bihisht ko bahut baíd aur apne se gair mutaallíq samjhenge, tab tak us kí haqíqat ham par kuchh asar na karegi. Lekin jab ham us men k̤hiyál se dákhil hokar us kí sone kí sarakon par qadam máren, aur us ke báshindon ke sáth mutakallim hon, aur un ke sáth K̤hudá ká sijda karen, aur us ko apná hamesha ká maskan jánen, tab jahán i nádída ke ásar hamáre chál se záhir honge, aur úsí se afzáish i ímán hogí.

Tísre ek aur wasíla bhí ham batāwen, yane *muqaddas kitáb ká aksar parhná*. Is kitáb men we bháre báten, ki jin par ímán láná cháhiye, záhir kí gai hain, ki us ke parhne se we aql men samátin, aur dil par naqsh kí játí hain. Lekin cháhiye, ki yih parhná bagaur ho, aur jo báten us men hain, ham un ko istíamál karen; aur biná is ke kuchh fáida na hogá. Agar ham roz ba roz muqaddas kitáb ká koí hissa parhen, aur us par gaur karen, aur amal men láwen, to beshakk hamára ímán barhtá jáegá.

Main kah chuká hūn, ki ímán kyá chíz hai, aur us kí zarúrat kaisí

bahut, aur kis tarah ham us ko hásil karen. Ab do ek báten báqí rahín, ki ham un se bayán tamám karenge.

1. Sháyad koí samjhe, ki jab ímán aisí barí chíz hai, ki jis ke bagair naját nahín ho saktí, to sábit hogá, ki naját ká báis aur bunyád wuhí hai. Lekin Injíl ke rú se aisá samajhná durust nahín. Wuh faqat wasíla hai. K̤hudáwand Ísá Masíh ká kafára naját kí bunyád hai. “Us ne apne taín hamáre gunáhoṅ ke wáste diyá.” Gal. 1 : 4. “Wuh hamáre gunáhoṅ ke wáste múá.” 1 Kar. 15 : 3. “Wuh hamáre gunáh apne badan par uṭháke súlí par chaṛh gayá.” 1 Pat. 2 : 24. “Us ne apní bheroṅ (yaṇe pairauṅ) ke wáste apní ján dí.” Yúh. 10 : 15. “Us ke k̤hún ke sabab, jo salíb par bahá, us ne sulh kí hai,” yaṇe hamáre aur K̤hudá ke bích wásta húá. Kalas. 1 : 20. Isí tarah Injíl saikaroṅ jagah farmátí hai. Pas, yihí kám K̤hudáwand Ísá Masíh ká hamárí naját kí bunyád hai. Ham us ke marne se jíte hain. Aur ímán, is hál meṅ sirf wasíla hai, ki jis se ham us ká kafára honá báwar karte hain. Hál yihí hai, ki us ne hamáre wáste mál i beshqímat mol liyá hai, aur ímán háth hai, ki jis se ham us mál ko pakarte, aur apná kar lete hain.

2. Aur *du'srí* wajh meṅ záhir hai, ki ímán láne se kuchh ham ko liyáqat nahín hotí. Liyáqat sab Ísá Masíh kí hai. Jab kisí sáhib i faiyáz ne faqíroṅ ke wáste gehún baṭorá hai, aur we us ke pás játe, aur us se parwarish páte hain, to kyá un kí kuchh liyáqat hai ? Koí aisá na kahegá. Isí tarah Ísá Masíh ne ham láchár gunahgároṅ ke liye bará dher jamá kiyá hai, ki ímán ke háth se ham us meṅ se lekar kháweṅ, aur faqíroṅ kí mánind parwarish páweṅ. Pas, us ko sab liyáqat hai ; us ko sab sitáish ho.

3. Aur *tísrí* wajh meṅ, záhir hotá hai, ki jo ham ne ímán ká thík bayán kiyá hai, to ímán rú i zamín par bahut thoṛá hai ; balki *Ísáioṅ* meṅ bhí thoṛá hai. Aur jo ham apne apne dilon meṅ dekheṅ, to ḍar kí jagah hai, ki hamáre darmiyán bhí kam hai. Kyá ham rúhání bátoṅ kí yádgárí hamesha kiyá karte hain ? Aur ye báteṅ hamárí chál par hamesha asar kartí hain ? aur hamáre k̤hiyáloṅ meṅ hamesha rahtí hain ? Kyá ímán ham meṅ nae hiss i bátiní ke muwáfiq hai, ki ham us ke wasíle se, ásmání chízoṅ ko dekh sakte hain ? Kyá ímán kí táqat se ham K̤hudáwand Ísá Masíh ko pesh i nazar hamesha rakhte hain, ki us par bharosá karen, aur us ke muwáfiq zindagí basar karen ? Kyá ham us ko apní naját ká “bání aur tamám karne-wálá” samajhte hain ? Kyá ham K̤hudá ká maujúd honá hamesha yád karte hain, aur ki us kí jawábdihí hamáre zimme meṅ hai ? In sawáloṅ ká jawáb har ek apne liye dewe ; lekin dánáí sikhátí hai, ki díl-pasand jawáb filfaur dená cháhiye, kyúñki ímán hí par hamárí naját muqarrar hai. Biná ímán ke ham díndár nahín ho sakte, aur K̤hudá ko rází nahín kar sakte hain. Mumkin hai, ki ham Ísáioṅ meṅ gine jáweṅ, aur bazáhiri achchhe aur díndár howeṅ, aur dunyá ke logon ko díl-pasand howeṅ ; lekin agar ímán na howe, to naját ke liye yih sab kuchh kám na áwegá ; kyúñki ilhám hí se ham ko k̤habar hai, ki “Bagair ímán ke K̤hudá ko rází karná mumkin nahín.”

X.

LUT KÍ JORU KÁ AHWÁL.—PAHLA' HISSA.

REV. JAMES KENNEDY KÍ TASNÍF.

Lu't kí joru' ko yád karo.—Lúká, 17 : 32.

Jis waqt Isá ne is haulnák májare ká zikr apne shágirdon ko sunáyá, wuh máre jáne par thá. K̄hudá ne Yahúdion par niháyat mihrbání kí. Un ke darmiyán K̄hudá kí bandagí muqarrar húi thí. Un ke háth meñ K̄hudá ká kalám rakhá gayá. Unheñ samjháne aur K̄hudá kí ráh par chaláne ko waqt ba waqt nabí bheje gae, jinheñ ne K̄hudá ká paigám un pás pahuncháyá. Jaisá báp apne larke bálon ko cháhtá aur har sūrat se un kí parwarish aur tarbiyat kartá, waisá hi K̄hudá ne Yahúdion kí bihtari cháhi. Par we náláiq thahare. Unheñ se bedíní hotí chali játi thí. Ek waqt butparastí par, aur gairqaumon ke dastúr mánne par máil the. K̄hudá kí bandagí se nafrat rakhke gairqaumon kí rasm niháyat pasand karte the. Bábul kí asíri se apne des men phir áne ke bad we butparastí se ghin kháne lage, aur záhiri sachche K̄hudá kí bandagí men sargarm rahe. Tadbhí K̄hudá kí pák nazar meñ un ke dil durust nahí the. Báhirí kámon par un ká bharosá thá, aur dil pák karne ko kuchh mihnát na kí. Jaise un ke bápádáde saḡhtgardan aur bagí the, we waise hí nikle. We ḡáh, aur gazab, aur gurúr, aur dushmaní se bharke apne bápádádon se sabqat le gae. Bápádádon ne nabíon ko qatl kiyá, aur nabíon ke K̄hudáwand ke ḡhún ke liye un kí aulád ḡhát meñ baithí. Ánewálí báton se Isá ḡhúb wáqif thá. Us ne apne shágirdon ko batáyá, kí Yahúdí us kí badsulúki karenge, aur salíb par use khínchenge. Is bát se, kí Isá kí maut se K̄hudá ká irádá púra húa, aur ḡunáh ke liye kafára kiyá gayá, Yahúdion kí burái kuchh ḡhaṭ nahín játi. Un ke dilon meñ sirf bedíní aur dushmaní maujúd thín. Na Isá kí pák chál, na us kí pák nasihat kí bardásht kar sakte the, aur isí liye us kí ján ke khwáhán ho gae. Isá ne batáyá, kí ḡunahḡaron ke háth meñ pakarwáyá jáke un se maslúb húngá, par mere ḡhúní besazá na jáenge. Us ne peshḡhabarí dí, kí Rómion se Yarúsalam ḡarat kí jáegi, aur us ke báshindon par aisí áfaten parengí, kí jin ke sunne se kán jhanjhaná uṭhenge. In áfaten ke áne ke kai pate Isá ne batáe. Jis waqt ye nihsán dikhlái dewen, usí dam Masíh ke logon ko Yarúsalam se bhágá cháhiye. Nahín, to bedínon ke sáth halák ho jáenge. Sáf hukm milá, kí nishán dekhte hí kuchh derí na karen. Lekin ḡhatra thá, kí bāze shágird bhágne ká hukm na mánke halák ho jáwen. Shágird Yarúsalam ko bahut cháhte the. Wahán K̄hudá ke log pusht há pusht se us kí bandagí kar rahe the. Wahán us kí haikal thí, jahán us ká jalál záhír húa thá, aur we aur un ke bápádáde us kí ḡhid-

mat meṇ hāzīr rahā karte the. Yarúsalam meṇ Dáúd Sulaimán aur kitne bādsháh taḡht nishīn húa the. Bahut dinon se un ke des ká dārulsaltanat húa thá, aur jo sachche Yahúdí the, jahán kahīn játe the, Yarúsalam ko aḡzíz jānte the. Is sabab se shágirdon ko ḡhatra húa, ki Yarúsalam se jaldí bhāḡ na nikleṇ. Unheṇ hoshyār karne ko Īsá ne kahá, ki “Lút kí jorú ko yád karo.” Píchhe dekhne se wuh namak ká khambhá ho gai, aur derí karne se we waise hí halák ho jáenge. Shágirdon ne Īsá kí bāt mání. Rúmíon ne Yarúsalam ká muhásara kiyá. Usí waqt Yarúsalam meṇ Īsá ke shágird bahut the. Us kí báteṇ yád karne se unhoṇ ne daryáft kiyá, ki Yarúsalam ke gárat hone ká waqt á pahunchá. Wahán se bhāḡne cháhte the, par ráh na páí. Itne meṇ Rúmíon ká sardár apní fauj leke Yarúsalam se zará haṡ gayá, aur Īsá ke shágird fursat páke shahr se bhāḡ nikle, aur salámatí kí jagah meṇ pahunche. Jo bedín the, Yarúsalam meṇ rahke bahut dukh uṡháyá, aur máre pare. Ai bháío, ham, jo Īsáí kahláte, is ḡharáb dunyá kí taraf píṡh karke bihisht kí taraf qadm barháte. Dunyá Sadúm sí hai. Jo ham us se na bhāḡeṇ, to halák ho jáenge. Píchhe dekhne aur jáne se rúh ká nuḡsán hotá. Dil kí burái ke sabab se aur dunyá kí phusláhaṡ se ham ḡhatre meṇ haiṇ, ki dunyá meṇ phir shámil ho jaweṇ. Dará cháhiye. Īsá kahtá, “Lút kí jorú ko yád karo.” Ham chet karen. Īsá ke pahle shágird in báton kí yád karke Yarúsalam se bhāḡke bach gae. Ham waise hí chet karke Īsá se madad mángeṇ, aur is dunyá ke hamshakl phir kabhí na banen. Jis waqt ham in báton ko sochte, Rúh i Quds hāzīr howe, ki nasihat har dil par naqsh kare !

I. Lút kí jorú kí hálat yád karo, jis waqt Sadúm meṇ basí. Sadúm kí tarái bahut phaldár thí. Likhá hai, ki “Sári tarái ḡhudáwand ke bāḡ, aur Misr ke mulk kí mánind, ḡhúb seráb thí.” Paidáish, 13 : 10. Aisá ittifāḡ húa, ki Abirahám aur us ke bhatíje Lút ke charwáhoṇ meṇ jhagrá hone lagá. Un ke bheṡ bakrí, gáe bail bahut barh gae, aur un kí bahutáyat ke sabab se Abirahám aur Lút báham rah nahīn sakte the. Abirahám ne Lút se kahá, ki “Mere aur tere darmiyán, aur mere aur tere charwáhoṇ ke darmiyán jhagrá na howe, ki ham bhái haiṇ. Kyá tamám mulk tere sámhne nahīn ? Tú mujh se alag ho ! Agar tú báyeṇ taraf jáwe, to main dahní taraf jáúngá : aur agar to dahní jáwe, to main báyeṇ jáúngá.” Paidáish, 13 : 8, 9. Lút ne Sadúm kí tarái ko apne liye chun liyá, ki wahán já base. Us tarái ke báshindon par ḡhudá ne barí mihrbání kí. Sab kuchh jo un kí hájat ke láiq thá, so bahutái se miltá thá. Zamín ḡhúb seráb thí ; isí liye un logon ko mihnat kam partí thí, aur fasl bahut hotí thí. Kháne kí kuchh fikr na thí. Un logon ko dunyá ke kám ke sabab rukáo na thá. Jo cháhe, to dīn bhar ḡhudá kí yádgári meṇ rahe, aur us kí sifton se wáqif ho jáwe. Rúhání ilm hásil karne ko bahut fursat milí. Jis par bahut mihrbání hotí, use apne baḡhshinde ká shukr karná cháhiye. Wájibí hai, ki jaisá ihsán waisí hí shukrguzárái howe. To Sadúm ke báshindon ko kaisá lázim thá, kí ḡhudá kí yádgári karne se, aur us kí bandagí bajá láne se báz na áweṇ, balki roz roz us kí ibádat meṇ sargarm raheṇ. ḡhudá ne un ká piyálá barakaton se bhará ; aur yih barí bāt nahīn, ki un ke dil us ke piyár se bhar jáweṇ. Par unhoṇ ne ḡhudá kí bandagí ko iḡhtiyár

na kiyá. Un ke dil K̤hudá se phir gae, aur yahán tak bigre, ki K̤hudá ká đar aur ádmí kí sharm uṭháke gunáh kí kichar meṇ loṭne lage. K̤hudá kí mihrbání yahán tak bar̤h gai, ki sab kuchh un ko miltá thá, jis se un kí bihtarí howe, aur un kí bedíní yahán tak bar̤h gai, ki sarkashí aur bagáwat ke siwá kuchh aur páyá na játá thá. Jo un ke paṛosí the, we bhí k̤haráb the, aur butparastí meṇ phaṇse the; par un ke barábar aur log bure na the.

We K̤hudá ko bhúl gae, par wuh unheṇ na bhúlá. Us kí ánkheṇ ág ke shuāla kí aisí haiṇ. Us kí nazar se gunahgár na apne ko, na apne kámoṇ ko chhipá sakte. Us ko gunáh se nafrat hai. “Us kí ánkheṇ pák haiṇ, ki wuh badí ko dekh nahíṇ saktá, aur wuh sharárat par nazar kar nahíṇ saktá hai.” Habaqqúq, 1 : 13. K̤hudá sábir hoke gunahgároṇ kí bardásht kartá, aur apní taraf rujú hone kí fursat detá; par jo apne diloṇ ko saḡht karke phir áne ká inkár karte, halákat meṇ paṛenge. Sadúm aur Āmúraḥ ká bará shor húá, aur un ke gunáh bar̤h gae. K̤hudá ne ṭháná, ki unheṇ nest o nábúđ kare. Tíṇ firishte ádmí kí súrat par bheje gae, ki pahle Abirahám ko k̤habar deweṇ, aur bađ us ke Lút ko us ke gharáne samet Sadúm se nikáleṇ. Sadúm ke rahnewále unheṇ padesí jáṅke un se bejá kám kiyá cháhte the. Firishtoṇ ne unheṇ andhá kar diyá, aur subh hote hí Lút ká háth, aur us kí jorú ká háth, aur us kí do beṭíoṇ ká háth pakarke unheṇ shahr se nikálá. Tab K̤hudáwand ne Sadúm aur Āmúraḥ par gandhak aur ág ásmán se barsáíṇ; aur jahán áge baṛe shahr the, wahán ek bahr baná, jo áj tak maujúd hai, aur jis ká pání namak aur gandhak kí ziyádatí se niháyat k̤hará hai. Paidáish ke aṭháraḥweṇ aur unnísweṇ báboṇ ko dekh lo.

Ham dekh chuke, ki Sadúm, jis jagah meṇ Lút kí jorú rahí, niháyat burá shahr thá. K̤hudá ne us ke báshindoṇ par barí mihrbání kí. Unhoṇ ne dil o jáṅ se K̤hudá ke hukmoṇ ko toṛá. K̤hudá ne sazá kí ráh se unheṇ halák kar diyá. Sadúm se dunyá ko muwáfiqat hai. K̤hudá dunyá ke úpar barí mihrbání kartá. Ham kahán tak us kí rahmat ká bayán kareṇ. Wuhí sabhoṇ ká parwardigár hai. Us kí barakateṇ beshumár haiṇ. Sab kuchh, jis se hamárá bihtarí hotí, us ke bandobast se hai. Wuh súraj ko tulú kartá, ki ham logoṇ ko roshan kare. Us ne din rát ko ṭhahráýá, ki din ke waqt kám chale, aur rát ke waqt árám howe. Wuh pání ko barsátá, aur bíj ko ugátá, ki zamín phal láwe, aur sab, kyá insán, kyá haiwán, ásúda howeṇ. Us ne ádmí ko ilm aur hunar die, jin se ham kitne fáida uṭháte. Wuh tandurustí detá, aur mandurustí bhí detá hai, ki hamára sukh aur bhalá howe. Har barakat jo hai, kyá jismání, kyá rúhání, usí kí taraf se átí aur ham ko bahut munásib hai, ki apne ko us ke ihsánmand jáneṇ. Par log aisá nahíṇ karte. Sabhoṇ ne K̤hudá ko chhoṛ diyá. Yihí pahlá aur bará gunáh hai. Sab ke dil nápák hoke pák K̤hudá kí bandagí ko nápasand karte. Ádmí cháhte, ki K̤hudá kí yáđ un ke dil se bilkul mīṭ jáwe; aur mihnát bhí karte, ki apná maqsad púra kareṇ. Jo un ká k̤háliq aur parwardigár hai, aur jis kí sifateṇ sab piyár aur ṭaríf ke láiq haiṇ, we us se náwáqif ho gae, aur apne liye bahut mazhab banáe, jo un ke bure dil ko pasand áe. K̤hudá ko chhoṛke ádmí har tarah kí burái karne ko taiyár haiṇ. Jab ham tawáriḡh ko paṛhte,

aur dunyá kī hálát ko dekhte, to nazar meñ átá, kī beshumár buráíán ádmíon se hún. Log K̄hudá ke dushman haiñ. We apne bháíon ke dushman haiñ. We apne hī dushman haiñ. Dil, bol chál sab bigar gaín. Ai bháío, hañ taajjub meñ haiñ, kī K̄hudá is dnyá kī bardásht kartá, aur aise k̄hatákáron kī k̄habar letá. Ek din ke gunáh kitne honge. Hamáří gintí meñ nahín áte, tad bhí K̄hudá sab kuchh dekhe dunyá ko halák nahín kartá, balki us kī bihtarí cháh tá. Par K̄hudá hameshasabr nahín karegá. Dnyálanatíthaharí; aur K̄hudá ke munh se farmán niklá, kī dunyá halák ho jáegí. Wuh jaldí nahín kartá. Wuh tauba karne kī fursat detá, aur sabhon ko sáf jatátá, kī bach niklen; par wuh din ánewálá hai, jis meñ us ká qahr gunahgáron par bharkegá, aur unhen bhasam kar degá. Jo gunahgár bané rahe, aur K̄hudá ke kálám ko na máná, un kī hálát Sadúm kī hálát kī mánind, balki aur badtar hogí. ‘Gunahgár jahannam meñ dále jáenge, we sári qaumeñ, jo K̄hudá ko farámosh kartí haiñ.’ ‘K̄hudá sharíon par angáre, aur ág, aur gandhak barsáwegá, aur bád i samúm un ke piyále ká hissa hogá.’ ‘K̄hudáwand Ísá ásmán se apne zoráwar frishton ke sáth, lau kī ág meñ zahir hogá, aur un se, jo K̄hudá ko nahín pahchánte, aur hamáre K̄hudáwand Ísá Masíh kī k̄husk̄habarí ko nahín mánte haiñ, intiqám legá : we K̄hudá ke huzúr se aur us ke tez jalál se halákat i abadí kī sazá páwenge.’ ‘Shakkíon, aur harámkáron, aur jádúgaron, aur butparaston, aur sab jhúthon ká hissa us jhíl meñ hogá, jo ág aur gandhak se jaltí hai; yih dúsrí maut hai.’ Zabúr, 9 : 17. Zabúr, 11 : 6. 2 Tasalaníkí, 1 : 7, 8, 9. Musháhada, 21 : 8.

Ai bháío, tum jo Ísá ke shágírd ho, us hálát ko yád karo, jis meñ tum áge the. Tum is k̄haráb dunyá ke taur par chalte the, aur K̄hudá kī lanat ke tale pare the. Agar ham haqiqat meñ dunyá se bach niklen, to K̄hudá ke hazár shukr karen. Un logon kī hálát kaisí haulnák hai, jo ab tak dunyá meñ rahte, aur us kī ráh o rasm ko mánte. Ham unhen jatáwen, aur un kī k̄hatír K̄hudá se duá mángen, kī we narm dil hoke dunyá se bhí bach niklen.

II. Lút kī jorú ká Sadúm se nikalná yád karo. Jis waqt Lút ne frishton ke munh se suná, kī Sadúm gárat kiyá jáegá, apne dāmádon ke yahán jáke unhen samjháne lagá, kī barí áfat ánewálí hai, jis se bhág cháhíye. Jo báten frishton ne farmáin, Lút ne unhen sunáin; par unhon ne na máná. Sháyad yih samajhke kahne lage, kī ‘Ye log par-desíhaiñ. We gusse hoke hamko daráne ke liye, aur ham ko adab karáne ke liye apne ko frishte kahte, aur tum ahmaq hoke un ke phandon meñ á pare ho. Pardesíon kī bát sunne se ham kýún apne ghar aur apne logon ko chhorke bhág niklen? Ghandhak aur ág kahán se áwengí, jo ham ko bhasam karenge? Ánewálí áfaton ke koi nishán nahín haiñ. Jaisá áge húá, waisá hī abhí hotá; aur jaisá abhí hotá, waisá hī hogá. Áp bhágen, to bhágen. Ham aise págalpan meñ nahín phansenge. Ham nahín jáne ke.’ Lút ke dāmád use tháththon meñ uráne lage, aur ús kī betíán apne k̄hasamon kī sharík thín. Likhá hai, kī Lút ne derí kī. Us kī derí ká sabab bayán nahín kiyá já tá. Hamáří samajh meñ ek sabab yih húá, kī apne gharáne kī salámatí bahut cháh tá. Firishton kī bát sach jánke us ká dil ranjída húá, kī jo mere k̄hándán ke

log hain bhasam kie jáenge. Aísí haulnák áfat se unhen bacháne ke liye un se minnat karne lagá, ki bhág ke bach niklo. Jab we na mánte the, to un pás se jáná na cháhtá thá, balki ziyáda minnat se unhen jatátá rahá. Unhen samjháne men derí húi, aur halákat kí gharí nazdík áne se khatra húá, ki wuh áp bedínon ke sáth halák ho jáwe. Lekin K̤hudáwand mihrbán húá, aur firishte Lút ká háth, aur us kí jorú ká háth, aur us kí do anbyáhi beṭion ká háth pakar ke unhen shahr se báhar le gae. Isí tarah Lút kí jorú Sadúm se niklí.

Aksar karke dunyáwí log aise hain, jaise Lút ke dāmád the. Un ko k̤habar miltí, ki K̤hudá gunahgáron se bezár hai, aur sabhon ko jahannam men dālegá, jo apne gunáh se nahin phirenge. We samjháe játe, ki har dam K̤hudá unhen dekhtá aur jántá. Agar cháhen, to jíte jí K̤hudá kí taraf phiren, aur Isá ke wasile se naját páwen. Un se sáf kahá játá, ki har ek se K̤hudá hisáb legá, aur har ek ko us ke kám ke muwáfíq phal degá. Agar dunyá ko qabúl karen, aur us kí ráh par chalen, to K̤hudá sáf batátá, ki dunyá ke sáth halák ho jáenge. Lekin log nahin mánte. Is des men kitne hain, jo ye báten sunke apní burái se zarrá bhí nahin haṭte, na kuchh dahshat kháte. We kahte, ki yih aur wiláyat ká mazhab hai. Jo ham se ye báten sunáte, so pardesí hain, aur unhen mánná ham ko munásib nahin. Ham apne hí mazhab men rahenge, aur apne mulk kí rasm par challenge. Isí tarah apne kánon ko band karke log halákat kí ráh par barhte. Jo Isái kahláte, aur zubán se iqrár karte, ki jahannam gunahgáron ke liye taiyár hai, aksar karke man hí man men is bát par imán nahin láte, aur apne ko fareb deke burái se báz nahin áte. Lekin sab log gaffat men nahin sote. Tarah tarah kí báton se logon ke dilon men asar hotá hai. Bāze bímár parkar hoshyár hote. Un se dunyá gáib ho játi, aur us kí dhúm dhám sunne men nahin áti. Apní hálát ko sochne lagte, aur apne gunáhon ko dekhke hairán ho játe, aur K̤hudá kí rahmat kí duháí dete. Iráda karte, ki jo K̤hudá ham ko shifá baṭhshe, hamárá zindagí daráz kare, to jíte jí ham us kí bandagí men rahenge. Jab tandurust hote, tab iqrár karte, ki is waqt se leke hamesha tak K̤hudá wuhí hamára K̤hudá hogá, aur us kí ibádat se ham báz na áwenge. Kitne log apne mál ká nuqsán uṭháke taklíf páke dunyá ko náchíz jánte, aur dīndárá kí ráh par charhte. Kháss karke K̤hudá ká kalám sunne se log gunáh kí nīnd se jág uṭhte, aur Sadúm sí dunyá se bach nikalte. Jis waqt log sunte, ki un ke gunáh beshumár hain, aur K̤hudá kí nazar men gunáh niháyat burá hai, to bāze qáil hoke yaqín jánte, ki ham gunáh se lade hūe hain, aur apne beshumár gunáhon men se ek ke liye K̤hudá ko kuchh jawáb de nahin sakte. To gamgín hoke púchhne lagte, ki Ham kyá karen, ki hamára bojh utar jáwe ? We sunte, ki jahannam ká dukh aísá hai, jo insán kí zubán se bayán nahin ho saktá, na us kí samajh men áta ; to dar ke máre apne man hí man men sochte, ki is haulnák jagah se ham kyúnkar bhágen ? We jánte kí bihisht kí k̤húshí ke barábar is dunyá men k̤hushí nahin hai, aur us k̤hushí ke hásil karne ko jí bahut cháhtá. Log sunte, ki Isá ne, jo sabhon ká K̤hudáwand hai, ahli dunyá ko yahán tak piyár kiyá, ki un pás utrá, aur mujassam hoke ádmion ke háth se aur ádmion ke badle men niháyat dukh uṭháya, balki salib par khínchá gayá. We sunte hí narin

dil ho játe, aur apne ko Ísá ke supurd karte. Jo log rúhání báton ká kuchh asar páke is dunyá kí ráh o rasm se alag játe, aur K̲hudá kí jamáat men dákhil hote, aise haiṇ, jaise Lút aur us kí jorú, jis waqt Sadúm se nikle. Kyá haqíqat men sab dunyá ke piyár ko chhoṛte, jo iqrár karte, ki ham dunyá ke nahíṇ haiṇ ? Kyá sab díndarí kí ráh men páedár haiṇ, jo dekhne men us ráh par chaṛhte ? Jin logon ne bihisht ká safar iḡhtiyár kiyá, kyá sab bihisht men pahunchenge ? Hée, hée ! un men se, jo apne ko díndár samajhte, aur dekhne men K̲hudá ke bande haiṇ, kitne ṭhokar kháke dunyá kí taraf phir játe, aur halákat men paṛte, jaisá Lút kí jorú se húá !

XI.

LUT KÍ JORÚ KÁ AHWÁL.—DU'SRA' HISSA.

REV. JAMES KENNEDY KÍ TASNÍF.

Lút kí jorú ko yád karo.—Lúká, 17 : 32.

IN báton se ham ne áge batáyá, ki tum ko cháhiye ki I. Lút kí jorú kí hálát yád karo, jis waqt Sadúm men basí. II. Lút kí jorú ká Sadúm se nikalná yád karo. Ab ham yih kahte, ki

III. Lút kí jorú ká Sadúm kí taraf dekhná yád karo. Jis waqt Lút apne gharáne samet Sadúm se niklá, un ko sáf hukm milá, ki derí na karen, aur píchhe na dekhen. Lút aur us kí do beṭián tábidár thín, par us kí jorú sarkash thí. K̲hudá ká hukm toṛke Sadúm kí taraf nazar kí. Dar ke máre use chhoṛ diyá thá, aur shahr se bhágtí chali játi thí ; par us ká dil wahán rahá ; aur agar khatra na hotá, to jaldí laṭ játi. Píchhe dekhne se maḷúm húá, ki K̲hudá ke dushmanon ke darmiyán rahná Lút kí jorú ko pasand thá. Un kí burái men sharik hoke un kí sazá men sharik ho gaí.

Afsos kí bát hai, ki bahut se log Lút kí jorú ke qadam par chalte. We iqrár karte, ki Ísá wuhí bachánewálá hai, aur us kí ráh par ham sábit qadam rahenge. We báptismá páke K̲hudá kí jamáat men dákhil hote. Thore dinon tak un kí chál durust hai, aur un kí díndarí sargarm hai. Sirf apní díndarí kí fikr nahíṇ karte, balki mihnát bhí karte, ki aur logon ko K̲hudá kí ráh batáwen. Dekhne men we dunyá se bhágte, aur bihisht kí taraf sídhe chalte. Lekin ṭhokar kháte. Bár bár húá, ki jo záhirá díndarí kí ráh par daṛte the, dunyá men phir laṭ áe. Apne dil se beḡhabar hoke apne ko K̲hudá ke sachche

bande jánte, lekin haqíqat meñ díndárí ne un meñ jár nahín pakrí. Jaisá bíj jaldí ugtá, jo pathrailí zamín meñ boyá játá, aur jár na rakhe ke sabab jaldí súkh játá, waisá hí bazon kí dándárí jaldí dikháí detí; par K̤hudá ká kalám dil meñ na lāne ke sabab páedár nahín hai. Auroñ kí díndárí dekhne meñ jár pakartí—un ke dil meñ bará asar hai, aur K̤hudá ke kalám kí k̤húb pahchán hai; par jaisá bíj, jo káñton meñ boyá játá, un se dab játá, waisí hí in logon kí díndárí dunyá ke andeshe, aur daulat ke fareb se dabí játí. Kitne isí tarah bedín ho gae. Rafté rafté bedíní kí íáh par utarte. K̤hudá kí ibádat karne meñ we aise k̤hush dil nahín hain, jaise áge the. Jis waqt Ísá kí jamáat meñ dákhil húa the, K̤hudá kí bandagí bajá lāne se un kí k̤hátir jamáí hotí thí. Jab dunyáwí kám meñ mashgúl the, K̤hudá kí yád karte the, aur apná man us ke úpar lagáte the. Lekin tabdil húi. Díndárí ghañe ke waqt dunyá ke andeshe dil meñ paidá hote hain, aur un se dil yahán tak bhar játá, kí K̤hudá kí yád ke liye jagah nahín rahtí. Áge k̤hilwat meñ K̤hudá se duá mángte the, aur apní duá ke muwáfíq fazl páke mazbút ho játe the; lekin abhí k̤hilwat meñ duá mángne ko jí bahut nahín cháhtá. Ek hí martaba is achchhí rasm ko bilkull nahín chhorté. Pahle sust hoke us meñ aise sargarm nahín rahte, jaise áge the. Dunyáwí k̤hiyál dil meñ paidá hote, aur we un kí muk̤hálifat nahín karte. Bád us ke jab kuchh uzr miltá, is kám ko chhor dete. Kabhí k̤hilwat meñ duá mángne ko játe, kabhí nahín játe. Rafta rafta us se bilkull báz áte; aur jis waqt k̤hilwat kí duá chhor chuke, dil se dunyá meñ phir lauť chuke. Ai bháío, Ísá ke hukm ke muwáfíq darwázá band karke yá goshe meñ jáke K̤hudá se duá mángná, aur us ke sáth sharákat rakhná; yihí díndárí ká k̤háss patá hai; aur k̤hilwat kí duá se báz áná, aur use nápasand karná, yihí díndárí ke ghañe ká bará nishán hai. Agar ham k̤hilwat kí duá meñ sust hain, to apne ko bare k̤hatre meñ jánná cháhiye, aur jhať pať K̤hudá se fazl mángná cháhiye.

Jab duá nápasand áti, bedíní ke kaí nishán jaldí dikháí dete. Jo dunyá kí taraf játe, K̤hudá ke kalám ko soch ke sáth nahín parhte. Sháyad thore dinon tak dastúr mánne ko use kuchh parhte, lekin us kí báteñ samajh meñ nahín átiñ, na dil meñ gar játiñ. We log K̤hudá ke bandon ke sáth bahut muláqát nahín karte. Muláqát hote hí koshish karte, kí dunyáwí báton kí bábat guftagú howe, aur rúhání báteñ gáib rahen. Lekin jitná ho sake díndáron kí suhbat chhorté. We bedínon ke sáth ulfat karte. Bedínon ke sáth bát chít karná, aur un se milansár honá K̤hudá ke bandoñ ko maná nahín hai, balki farmáyá játá. K̤hudá ke log dunyá ke namak hain; par agar dunyá ke nazdik kabhí na jáen, we kyúnkar dunyá ko sar jáne se mahfúz rakhen? We dunyá kí roshní hain; par dunyá andhiyáre meñ rahegí, agar K̤hudá ke log alag jáke k̤hilwat meñ rahen. Hamará K̤hudáwand apní musáfirí ke waqt har tarah ke logon ke sáth guftagú kartá thá, aur unhen samjhátá rahá, lekin un ke sáth ulfat na kí. Us kí sári k̤hushí zamín ke muqaddas logon aur kámilon se thí. Zabúr, 16: 3. Us ke sachche shágird waisá hí chalne cháhte hain. Bedínon ko sikhlāne ke liye, aur un ke dilon ko K̤hudá kí taraf rujú karne ke liye we un ke yahán áte, aur har súrāt se un ko nasíhat dete; lekin un se

ulfat nahín karte, na un ke sáthí ho játe. Logon ke sáth bát chít karná aur bát hai, aur un ke sáth ulfat karná aur bát.

Jo dunyá kí taraf játe, apne liye uzr banáne ko hamesha taiyár haiñ. Unhon se sháyad bāhirí buráí nahín hūí—unhon ne chorí nahín kí, na zinákár, na matwále hūe; isí liye apne ko beqasúr jánte. We kah-te, ki Ham ázād haiñ, aur jo kām ham ne kie, koí unheñ bure ṭahrá nahín saktá. Bahut sí báteñ haiñ, jo bilkull burí nahín haiñ, tad bhí gairwājibí haiñ; aur jo nek níyat haiñ, sirf buráí se nahín, balki buráí ke dekhne se bhí báz áte. Jo gairwājibí kām karte, aur apní chál chalan durust batáne ko dalíleñ láte haiñ, un ko buráí meñ phaṅs jáne ká ḵatra bará hai. Jo mail ko chhúte, kyá we bedág rahenge? Jo ág se khelte, kyá jalne se bachenge? Jo bāṛh ko dekhke us se nahín bhágte, balki gáfil rahte, jab tak kí aur nazdík na áwe, kyá we dúo na jáenge? Waisá hí jo log gunáh se khelte, agar hosh meñ na áweñ, aur gaffat se na jágeñ, to us ke qabze meñ parenge. Ai bháío, jis waqt dil kí narmí jáne aur dunya ke piyár áne ká zarrá nishán má-lúm dewe, usí waqt ḍaro, aur biná derí us kí rahmat ká áśá pakaṛo. Wuhí tumhári sunegá, aur tumháre páon ko phisalne se bacháwegá. Jab ghar meñ ág lagtí, to use jaldí bujháná chāhiye. Pahle us ká asar bahut nahín, aur jaldí mihnāt karne se ghar bach jáwe. Par jab tamám ghar meñ phailtí, aur mál asbáb sab ko pakṛá, to use bujháná niháyat mushkíl hai. Waisá hí bedíní ko haṭáná, aur us ke úpar fath páná, jis waqt Ḳhudá ke bande meñ pahle dikhláí detí hai, aisá mushkíl nahín hai, jaisá píchhe hotá hai, jab bedíní ne baṛh jáne se bahut zor páyá. Afsos, afsos, kí log ásmání ziyáfat chhorke is ḵharáb dunyá ke chhilke kháen! Afsos, afsos, kí log jism kí ḵhu-shí ke liye jism aur rúh donon ká nuqsán uṭháweñ!

Un logon meñ se, jo dunyá kí taraf phirte bahut aise haiñ, jo jamáat ko chhorke dunyá se mil játe, aur har tarah kí buráí meñ phaṅs játe. Un kí bábat shakk ho nahín saktá. We sabhon ke sāmhnē Shaitán ke sachche bande ṭaharte. We log Sadúm kí taraf sirf apní nazar nahín lagáte, balki qadam uṭháke Sadúm meñ phir dáḵhil hote, aur us ke kámon meñ mashgúl ho játe. Aur log haiñ, jo jamáat ko nahín chhor-te, na Ísá ke nám ká inkár karte. Áge kí tarah Ísáí kahláte, aur Ísáí rasmon ko mán-te. Par un ke dil dunyá par lag játe, Ḳhudá par nahín; aur bahut báton meñ un kí chál bhí dunyáwí ho játí. We dunyá ke hamdam hoke dunyá ke sáth halák ho jáenge. Lút kí jorú Sadúm meñ phir dáḵhil na hūí, par us ká dil wahán thá, aur isí sabab se us ne sazá uṭháí. Jab dunyáwí báton par dil lag játá, to Ḳhudá kí jamáat meñ rahne se salámatí nahín hotí. Ḳhudá dil ko chāhtá hai, aur dil ke badle meñ wuh kuchh qabúl nahín karegá. Jo iqrár se Ḳhudá kí jamáat ke haiñ, par haqíqat meñ dunyá ke haiñ, Lút kí jorú kí mánind haiñ, jis ne Ḳhudá ká hukm torke píchhe dekhá.

IV. Aḵhirí bát yih hai, kí Lút kí jorú kí halákat yád karo. Us ne píchhe dekhá, aur kyá húa? Usí dam ján niklí, aur jahán us ne Ḳhudá ká hukm torá, wahán namak ká khambhá ho gaí. Píchhe dekhne ká phal yihí húa. Jo log is ḵharáb dunyá kí taraf phirte ha-

lák hone ke khatre men haiñ. In logon ká khatra Khudá ke kalám men bayán kiya jātá. Púlús rasúl kyá kahtá hai, ki Jo ek bár roshan húa, aur ásmání inám ke chakhnewále, aur Rúh i Quds men sharík, aur Khudá kí achchhí bát, aur honewále zamáne kí qudraton ke chakhnewále, tad bhí bigar jáen, to unhen phir nayá karná, aisá ki tauba karen, anhoná hai ; ki we apne liye Khudá ke Beṭe ke salíb denewále, aur ruswá karnewále húa. Ibráníon ke khatt ká chhaṭhwán báb dekh lo. Is muqám men likhá, ki unhen phir nayá karná, aisá ki tauba karen, anhoná hai. Is ká matlab kyá hai ? Khudá ke nazdík kuchh anhoná nahín. Jo cháhe wuhí kar saktá. Ádmí ke nazdík apne ko nayá karná har waqt anhoná hai. Áge parhne se matlab kuchh khultá, ki 'we apne liye Khudá ke Beṭe ke salíb denewále haiñ.' Ísá wuhí darmiyání hai. Salíb par khínche jáne se shariát purí húi, aur Khudá ke huzúr men ráh taiyár kí gai. Ísá ke siwá koí aur darmiyání Khudá men aur ádmíon men nahín hai, aur jo use haqír jánke us ke salíb denewálon ke sharík ho játe, un ko anhoná hai, ki Khudá ke huzúr men jagah páwen. Jab ham Ísá kí taraf apní píṭh karte, ham kyúnkar bach jáwen ? Us ke siwá kaun hai, jo ham ko Khudá ke huzúr men pahunchá saktá ? Ye áyaten bahut mushkil haiñ, par un se yih natíja sáf nikaltá, ki Jo apne Khudáwand ká inkár karke dunyá kí taraf játe, apní anmol rúh ke nuqsán uṭháne ke niháyat khatre men haiñ. Phir Patthras rasúl kahtá, ki Agar we, jo Khudáwand aur bachánewále Ísá Masíh kí pahchán ke sabab dunyá kí álaish se bhág nikle, us men phir phans jáwen, aur maglúb howen, to un ká pichhlá hál pahle se badtar ho chuká. Kí rástí kí ráh na jánni un ke liye us se bihtar thí, ki jánke us muqaddas hukm se, jo unhen sompá gayá, phir jáwen. Par yih sachchí masal un ke hál ke mutábíq hai, ki 'Kuttá apní qai par mutwajjih húa,' aur 'Dhoí húi súarní kíchar men phir loṭne lagi.' Dústre khatt ke dústre báb ko dekh lo.

In logon ká hál, jo Ísá ko chhorke dunyáwí phir ho játe, kaisá haulnák hai ! Dar bahut hai, ki kabhí tauba na karenge. Un ke dil patthar se aur sakht ho játe. Na shariát kí dhamkiág, na mahabbat kí minnat un par asar kuchh kartí. We sab kuchh sunte, aur jaise ke taisé rahte. We yahán tak bigar játe, ki apne dil ke changá hone ká iláj nahín cháhte. Aur agar Khudá kí taraf na phirenge, to jahannam ke azáb men parenge. Wuhí dukh kí jagah hai, lekin us ke báshindon ká dukh barábar nahín hai. Gunahgáron kí burái barábar nahín hai, aur un kí sazá barábar na hogí. Kaí haiñ, jo auron se bare khatákár haiñ, aur Khudá munsifí karke un ko ziyáda sazá degá. Kaun sab se bure haiñ ? Albatta un kí burái sab auron kí burái se barí hai, jinhon ne Ísá kí ráh ko aur us kí jamáat ko chhor diya, ki is kharáb dunyá ko hásil karen. We dunyá ko Ísá se bihtar jánte, aur Shaitán kí bandagí ko Ísá kí bandagí se aur pasand karte. Un logon kí sazá kaisí bhári hogí ? Ham jánte, ki dozaḥ men rúh aur badan donon dukhí haiñ, lekin rúh ká dukh badan ke dukh se ziyáda hogá. Jab we log sochenge, ki Ham ek waqt bihisht ke pháṭak tak pahunché the, aur us men dáḡhil hone kí ummed rakhte the, par dunyá kí taraf phir gae, aur us kí khushí ke liye bihisht ko kho diya, to un ko aisá ranj hogá, jo samajh se báhar hai. Apní burái aur ná-

dání kí yád yihí kírā hai, jo kabhí nahín maregá ; aur Kḥudá ká ga-zab, jo un par bharkegá, wuhí ág hai, jo kabhí nahín bujhegí. Ai bháío, jíte Kḥudá ke háthoṃ meṃ parná kyá hí haulnák hai ! We ha-qíqat meṃ Kḥudá ke háthoṃ meṃ parṭe, jo Isá ke shágird hone ká iqrár karte, phir us ke munkir ho játe, aur dunyá ká píchhá karte.

Is áyat se, jis par ham ne soch kiyá, bahut nasíhat nikaltí. Kḥudá ke sachche bandon ko Lút kí jorú yád karná cháhiye. Ai bháío, ham ne bihisht ká safar iḡhtiyár kiyá. Ham sabhoṃ ke áge iqrár kar-te, ki Isá hamará Kḥudáwand hai, aur cháhe dunyá burá máne, cháhe bhalá, ham Isá kí ráh par qáim rahenge. Ham ummedwár haiṃ, ki Kḥudá ke fazl páne se hamará maqsad púra hogá. Ham dunyá ká píchhá na karen. Lálach ke máre Lút Abirahám ko chhoṛke Sádúm meṃ gayá, aur wahán áne se us ne kaisá nuqsán uṭháya. Ham faro-tan rahen. Agar Kḥudá ham ko chhoṛe, ham jaldí ṭhokar kháenge. Kitne húe, jo hamáre barábar dekhne meṃ díndár the, balki ham se ziyáda díndár the, jin ke dil bigṛe, aur jo bilkull dunyáwí ho gae. Un ká hál sochné se hamen bará fáida hogá. Yih nasíhat miltí, cháhiye ki díndáří dil meṃ jar ḡhúb pakṛe. Díndáří báharí bát nahín hai ; dastúron aur rasmon kí bát nahín hai. Kḥudá apne kalám meṃ farmátá, ki Nayá janam páná cháhiye—ki nayá maḡhlúq honá cháhiye. Yihí sabab hai, ki bahut logon kí díndáří játí rahtí, ki us ne dil meṃ jar ḡhúb nahín pakṛí—ki we nae maḡhlúq nahín húe. Ham log báharí díndáří se kabhí rází na howen, balki dil ko jánchen, ki us ká hál kaisá hai, aur apná hál daryáft karke apne ko Isá ke supurd kar-en. Jo ham logon ká bharosá ṭhík us par ho, to tamám dunyá ham ko zarar pahunchá nahín saktí. Ham logon ko ubháṛne ke liye, aur bihisht kí taraf khínchne ke liye Kḥudá ne apne kalám meṃ waḍe die ; aur ham ko jatáne ke liye, aur jahannam se bacháne ke liye us ne bhí ham ko dhamkáya. Ham waḍe, dhamkián donon ko qabúl karen, aur un par soch karne se díndáří kí taraqqí páwen. Ham ṭhík jánte, jo Kḥudá ke sachche bande haiṃ, kabhí halák na honge. Isá ne kahá, ki Main unhen hayát i abadí detá hún, aur we hargiz halák na honge, aur koí unhen mere háth se chhín na legá. Ham kis ta-rah jánen, ki ham Kḥudá ke sachche bande haiṃ ? Kḥudá kí ráh par qáim hone se. Jaisá daraḡht apne phal se pahcháná játá, waisá hí ham log apní chál chalan se pahcháne játe. Agar ham Kḥudá kí ráh par chalte, ham Kḥudá ke haiṃ ; agar ham dunyá ke taur par chalte, ham dunyá ke haiṃ. Ham Kḥudá ká chhipá húa irádá nahín jánte, par díndáří ko jánchne ke liye Kḥudá kí taraf se ṭhík patá milá. “Wuh, jo Kḥudá se paidá húa, gunáh nahín kartá, ki us ká bíj us meṃ ṭhahartá hai : aur wuh gunáh nahín kar saktá, ki wuh Kḥudá hí se paidá húa hai.” 1 Yúh. 3 : 9. Ai bháío, jab dunyá tum ko phuslátí hai, jab Shaitán zor se átá, usí waqt ḍaro—Lút kí jorú ko yád karo, aur jaldí Isá kí panáh meṃ áo.

Tum ko, jo bihisht ká safar shurú karte ho, aur ímán meṃ kamzor ho, Lút kí jorú yád karná bahut zarúr hai. Apne ko mazbút mat jáno. Hamesha yád karo, ki tumháre dushman bahut haiṃ, aur sirf Isá ke fazl se tum un ke úpar fath pá sakoge. Isá kí bábat kahá gayá, ki Barron ko apní god meṃ uṭháke le chalegá. Jab us kí god

men ho, tab tumhári salámatí hai. Agar dunyá tum ko phusláwe, Lút kí jorú yád karke Ísá kí panáh men raho.

Tum log, jo K̤hudá kí taraf se phir gae, ham kyá kahen? K̤hudá ke kalám se sábit hotá, ki tumhárá k̤hatra bará hai. K̤hudá sab gunahgáron ko, jo tauba karte, aur Ísá par ímán láte, qabúl karne ko taiyár hai. Ísá Masíh ká lahú sab gunáh se pák kartá hai. Par bará k̤hatra hai, ki tum Ísá ke lahú par kabhí na áoge. Ai bháío, jágo, jágo. Lút kí jorú yád karo. Tum jahannam ke kařare par khare ho. Derí karo, to ummaid bilkull játí rahegí. Isí waqt Ísá kí panáh men bhágo, aur wuhí tum ko apní bádsháhat men jagah degá. ‘Agarchí tumháre gunáh qirmizí howen, par barf kí mánind sufed ho jáwenge; aur har chand we argawání howen, par ún kí tarah ujle hongé.’

Tum logon kí hálát kaisí burí hai, jo bilkull gáfil ho! Us halákat ko socho, jo Sadúm aur Amúrah par parí, aur us se síkho, ki K̤hudá ká gazab gunahgáron par bharkegá, aur unhen hamesha tak bhasam karegá. K̤hudá tum ko jatátá, aur salámatí kí jagah batátá. Us kí áwáz suno, aur us kí nasíhat máno. Ísá kí jamáat men tumháre liye jagah bahut hai, aur wahán sab kuchh miltá, jis se tumhári bihtarí howe. Derí mat karo, par isí waqt ánewále gazab se bhágke Ísá par bharosá rakho. Nahín, to tumháre liye bihtar thá, ki tum kabhí paidá na hote. K̤hudá aisá kare, ki ham sab is k̤haráb dunyá se bachkar bihisht men pahunchen, aur wahán hamesha tak K̤hudá kí taríf aur bandagí karte raheg! Ámín.

XII.

SAR I NAU PAIDA HONE MEN.

REV. J. C. RANKIN KÍ TASNÍF.

Ísá ne jawáb men use kahá, Main tujh se sach sach kahtá hun, ki agar koi phir paidá na howe, to wuh K̤hudá kí bádsháhat dekh nahín saktá.
—Yúh. 3: 3.

QAUl us ká, K̤hudá kí bádsháhat, bihisht se murád hai; yane, wuh pák jagah, ki jis men K̤hudá ke chune hue log marne ke bád dákhil hokar gunáh kí álúdagí aur mahabbat se kamál ázádagí páte hain; aur wahán rát din Alláh kí ibádat men mashgúl hokar k̤hush rahte

haiñ. Pas, is áyat men, jo úpar likhí gaí hai, hamáre K̤hudáwand Isá Masíh ne sáf farmáyá hai, ki Waháñ kisi ko daḡhl nahíñ, jab tak ki phir paidá na howe. Yihí k̤habar bhí K̤hudá ke pák kalám ke bahut maqámon se záhír o roshan hai, yañe ki naját ke wárison ko naí paidáish zarúr hai. Aur is kí zarúrat in do báton se baḡhúbí záhír hogí :—

Pahlí yih, ki insán, jo tabíat se gunahgár i mahz hai, usí gunáh álúda tabíat ke sabab bihisht men dáḡhil hone ke láiq nahíñ; kis wáste, ki us jagah Alláh Taalá, jo quddús i mutlaq hai, apná jalál apne ḡháss bandon par záhír kartá hai. So jis tarah ki is dunyá men baze apní badzátí ke báis nek ádmíon kí suhbat ke láiq nahíñ; isí tarah insán apní badzát, yañe nápák, tabíat ke sabab bihisht men jáne ke láiq nahíñ, jab tak ki yih tabíat tabdíl hokar naí na ho jáwe.

Aur dúsrá sabab is zarúrat ká yih hai, ki agar insán apní aslí ná-pákí kí hálát men kisi tarah K̤hudá kí bádsháhat men pahunch játá, tau bhí use waháñ kuchh ḡhushí o tasallí hásil na hotí; kis liye, ki waháñ ke kámon se, aur gunahgáron kí ádaton se kuchh mel nahíñ hai. Maslan, jis tarah machhlí ḡhushkí men jítí nahíñ, aur na ádmí machhlí kí tarah pání men zindagí kar saktá hai, isí tarah gunahgár bhí K̤hudá ke huzúr ḡhush na rahegá, is liye ki ba sabab apní nápák tabíat ke wuh sirf gunáh men ḡhush rahtá hai; hálánki K̤hudá kí bádsháhat men gunáh ke kámon ko daḡhl nahíñ. So agar mumkin hotá, ki gunahgár kisi taur se bihisht men pahunche, to us ko waháñ kyá kám, aur kyá ḡhushí hotí? Bark̤hiláf is ke gunahgár us ko dekhkar niháyat pashemán o sharminda hogá. Jaisá ki chor, yá jhúthá, yá dagábáz nekon ke rú ba rú, jo ki aise kámon ko niháyat burá o haqír jánte haiñ, sharminda ho, waisá hí nápák ádmí K̤hudá ke sámhne sharminda hogá. Hán, agar aisá shaḡhs us ke jalál o ká-mál par nazar kare, o yá firishton, yá rástbázon kí ḡhushí kí áwáz sune, tau bhí us se us shaḡhs ko na faqat sharmindagí hásil hogí, balki gam aur pashemání bhí; kyúñki use zarúr yád áwegá, ki agar merí aslí nápákí o badzátí mujhe na roktí, to main bhí pák o sáf hokar in ká sharík hotá. Afsos! merí hálát kyá hí tabáh hai! Main to ṡhík us mihmán kí mánind hún, jis ká zikr Matí ke 22 báb, 11 áyat men hai, ki jo bagair muqarrar húi poshák ke ziyáfat men gayá; aur jise bádsháh ne kahá, ki Ai miyáñ, tú shádí kí poshák se mulab-bas na hokar kyún yaháñ andar áyá? Aur jab us kí zubán band rahí, tab bádsháh ne ḡhádímon se kahá, ki Us ke háth páñw bándhke le jáo, aur báhar andhere men dál do; waháñ roná aur dánt písná hogá. Bas: is bayán se un kí gumráhí ḡhúb záhír húi, ki jo bihisht kí ḡhushíon ke muntazir haiñ, lekin un kí tabíat hargiz tabdíl na húi. Yih bhí záhír hai, ki ádmí ke wáste na faqat zahirí rasm aur badan kí pákízagí cháhiye, magar aisá mazhab i haqíqí zarúr hai, ki jis se ek nayá dil, jo ki K̤hudá kí pák o rúhání ḡhidmat men ḡhush rahe, paidá ho. Aur wuh mazhab, ki jis se yih tabíat paidá na ho, bilkull náláiq o náchíz hai. Wuh to ek khonṡe meḡhí rupae kí mánind hai, ki jo bázár men nahíñ chaltá. To yaqín hai, ki aise mazhab ke qabúl karnewále Alláh i bartar ke rú ba rú maqbúl na honge. Lekin afsos, hazár afsos hai, ki aksar qaumon ke log aise náqis mazhabon ko ra-

wá rakhkar apní beshqímat ján ko halák karte haiñ ; khusúsan Hunúd o ahl i Islám, jo ki apne rasmon o amalón par takiya karke dil kí pá-kízagi aur K̄hudá kí adálat se hargiz wáqif nahín. Par bar̄khiláf is ke, bihisht ko, ki ek maqám i rúhání hai, goyá shahwat k̄hána gumán karte haiñ, ki jis men̄ barí shán o shaukat ke sáth tamám shahwat parast apne bad iráde o bad ádaton̄ ke púrā karne ke sámán páwenge. Par yih sab ke sab is galatí se náummaid honge ; aur ákhir unhen̄ baḡhúbí maḡlúm hogá, ki K̄hudáwand Isá Masih ká yih kalám rást o durust hai, yāne ki sirf we log, ki jo phir paidá hokar dil kí tabdil se sar i nau pák húe haiñ, bihisht men̄ mirás páwenge.

Ab in̄ tín báton̄ par gaur kiyá cháhiye.

Pahlí yih, ki phir paidá honá kyá māne rakhtá hai ?

Dúsrí yih, ki ádmí kis tarah phir paidá ho saktá hai ?

Tísrí yih, kis tarah ham ko maḡlúm ho, ki ham phir paidá hu'e haiñ, yá nahín ? K̄hudá i mihrbán o rahím madad o roshni baḡhshe !

I. *Nae janam se kyá murád hai ?* Jawáb yih, ki ádmí kí rúh, jo ki asal se nápák hai, tabdil kí jáwe, yahán tak ki banisbat us kí pahlí hálat i nápákí ke wuh to goyá ek naí rúh hai, ki us kí haqíqí hálat naí hai ; maslan, gunahgár andhere men̄ paidá hokar us rúhání táríkí ke báis apne parwardigár ko, ki jis se us kí haqíqí bihtarí hai, pah-chántá nahín ; is liye K̄hudá ke kalám men̄ likhá hai, ki K̄hudáwand Isá Masih áyá, táki andhon̄ kí ánkhen̄ kholkar unhen̄ naí aur andekhí ráh par chaláwe. Phir, gunahgár Shaitán o gunáh ke gulám kahláte haiñ ; is liye injíl i muqaddas men̄ likhá hai, ki Isá ul Masih band-húon̄ ko zindán se nikáltá hai ; aur bhí agar Beṭá, yāne Masih, tum ko ázád kare, to albatta tum ázád hoge.

Aláwa is ke, gunahgár murde kahláte haiñ, yāne jaisá ki murda tamám dunyáwí wáqíat se náwáqif hokar un men̄ mashgúl hone kí táqat nahín rakhtá, aise hí gunahgár bhí nekíon̄ men̄ mashgúl nahín ho saktá ; kyúunki wuh murda hai. Pas, naí paidáish ke waqt yih táríkí, jo ki mazkúr hús, gum hokar rúh roshan kí játi hai, táki wuh K̄hudá kí pák sifateñ, aur wuh nek chál, ki ham sabhon̄ par farz hai, pasan-dída o dil chasp jáne. So is naí hálat men̄ Shaitán o gunáh kí gulá-mí se chhúṭkar, phir murde kí mánind nek chál se be k̄habar o be parwá nahín rahtá ; lekin wuh nek hone kí barí árzú rakhtá hai, aur us kí tahsíl ke liye bahut mihnāt bhí kartá hai.

Ab gaur kiyá cháhiye, ki naí paidáish men̄ na faqat rúh ká *aslí hál* tabdil kiyá játá, magar jo chízen, ki use áge bihtar nahín maḡlúm hotí thín, ab pasandída haiñ ; aur jo ki pahle pasandída thín, ab nafratí haiñ ; maslan, agle hál men̄ wuh sirf gunáh men̄, yāne khel, o tamá-sha, aur nafsání o jismání shahwaton̄ kí parastish men̄ k̄hush thá ; ab in̄ sab kámon̄ ko haqír jántá hai. Phir aglí hálat men̄ K̄hudá kí zát í pák o safát par gaur karná, aur apne farzon̄ ko adá karná, yih kám use pasandída na the ; lekin ab unhen̄ k̄hushí se bajá látá hai. Hán, wuh to zubán i Dáúð men̄ pukártá hai, Ai mere K̄hudá, main̄ terí razámandí bajá lāne par k̄hush hún ; terí shariát to mere dil ke bích hai. Ásmán par kaun hai, jo merá hai, magar tú ? aur zamín par koí nahín, jis ká main̄ mushtáq hún, magar tú. Aur merá jism,

aur merá dil ghaṭá játa hai, par Alláh mere dil ká búta, aur merá abadí hissa hai. Pas, itne hí men Ḳhudá ká yih kalám, jo dúse ḵhatt i Karantíon, ke 5 báb, 17 áyat men mastúr hai, ḵhúb roshan húá, ki Agar koí Masíh men hai, to wuh nayá maḵhlúq hai; purána guzar gayá; dekho, sab kuchh nayá ho gayá, alḵh. Ḳhudá i karím apne kamál fazl o mihrbání se aisá nayá dil tamám gunahgáron ko baḵsh de. Ai ázíz parhnewále, kyá yih tabdil tere dil par wáqa húí? Kyá tujhe gunáh kí pairawí se Alláh kí tábidárí men ziyáda ḵhushí hásil hotí hai, yá nahín? Ai bhái, tú in báton par ḵhúb gaur karke insáf kar; kis liye, ki chand roz ke bad tujh ko isí báb men Alláh kí ádólat ke sámhne hisáb dená hogá.

II. Ab dúsrí bát par gaur kiyá cháhiye; yāne, ki *Ádmí kis tarah do bára paidá ho saktá hai?* Bará afsos hai, ki aksar log is kí bábat bhúl karte hai; is liye áyande kí tén báton par ḵhiyál karke un tīnon kí tardíd karenge. Bad us ke Ḳhudá ke kalám se is ká wázih bayán likhenge, ki náí paidáish kis tarah hásil hotí hai.

1. Pahlí yih, Aksar ádmí gumán karte hai, ki bápísmáe jáne ke waqt zarúr dil kí tabdilí hotí hai. Par is ḵhiyál ko bargiz Ḳhudá ke kalám se sábit nahín kar sakte. Barkhiláf is ke Injíl i muqaddas men baẓon ká zikr hai, ki jinhon ne bápísmá páyá, lekin un ká dil na badlá; chunánchi Shamaún, ki jis ká zikr Ámál ke 8 báb men hai; aur Deotarfis, ki jis ká zikr Yúhanná ke 3 ḵhatt ke 1 báb, 9 áyat men hai. Aur phir Yahúdá ke 1 báb, 4 áyat men likha hai, ki Baze ádmí, jo áge se is taur par mulzim hone ko likhe gae, á ghuse; we bedín hai, aur hamáre Ḳhudá ke fazl ko ḵharábí men pherte hai, aur us Málík i wáhid aur hamáre Ḳhudáwand Isá Masíh ká inkár karte hai.

Bas, sáf záhir hai, ki bápísmáe jáne se dil nahín badaltá. So, ai parhnewálo, yih gumán mat karo, ki bápísmá páke ham zarúr bachenge. Bilá shakk bahut log hai, ki jinhon ne bápísmá páyá, lekin marne ke bad dozaḵh men dále gae; kis wáste, ki is rasm i záhiri par iktifá kiyá, aur un ká dil nahín badlá. So tujhe bhí hogá, jo tú un kí mánind in záhiri báton par takiya karegá.

2. Dúsrí yih, ki áshá i rabbání men sharík hone se yih barakat, yāne dil kí tabdilí hásil nahín hotí; kyúнки aksar ádmí, ki jo faqat nám men Masíhí hai, us men sharík hokar phir gunáh kí pairawí karte, aur áḵhir ko jahannam men dále játe hai. Lekin agar áshá i rabbání men aisi kuchh qudrat hotí, ki us kí tásír se dil nayá ho jáwe, to yih anjám hargiz na hotá, ki koi us men sharík hokar phir dozaḵh men dálá jáwe. So is par bhí ummaid rakhná munásib nahín. Magar púchhá jáegá, ki Agar bápísmá o áshá i rabbání kí tásír se dil nahín badaltá, to un se kyá fáida aur kyá matlab hai? Jawáb yih, Bápísmá se yih murád hai, ki Ḳhudáwand Isá Masíh par ímán lákar, aur gunáh ke kár o bár chhorkar apne iātiqád ko sabhon ke rú ba rú iqrár karen. Aur áshá i rabbání ká yih matlab hai, ki Ḳhudáwand Isá Masíh ká dukh, jo us ne hamáre badle salib par uṭháyá, táki ham apne gunáhon kí sazá se bach jáwen yád rakhen. Aur koí us men sharík hone ke láiq nahín, ki jis ká dil phir paidá na húá hai. Kyún-

ki 1 khatt i Karintion ke 11 bāb, 29 āyat men hai, ki Jo koī nāmū-nāsib taur se khātā aur pitā hai, so Kḥudāwand ke badan kā imtiyāz na karke apnī tambīh ko khātā aur pitā hai.

3. Aur tīsri bāt yih, ki koī ādmī apne kām yā apnī qudrat se dil ko nayā nahīn banā saktā. Kyā Habshi apne chamrē ko, yā chītā apnī chittion ko badal saktā hai? Tab tum bhī, jin ne burī ādat sīkhī hai, nekī kar sako; dekho Yarmiyāh ke 13 : 23. Algaraz zāhir hai, ki in tīnon bāton se dil nahīn badaltā, aur na un par takiya karnā lāzim hai. So is hālat men ek bhāri sawāl yih hai, ki dil kī tabdilī kis tarah ho saktī hai?

Yaqīnan yih kām faqat Rūh ul Quds kī tāsīr se hotā hai. Jaisā ki Tītus ke 3 bāb, 5 āyat men hai, ki Kḥudā ne ham ko rāstbāzī ke kām-on se nahīn, jo ham ne kie, balki apnī rahmat ke sabab, nae janam ke gusl, aur *Rūh ul Quds ke nae bandāne ke sabab*, bachāyā. Phir Yūhannā ke 3 bāb, 6, 7, 8 men Kḥudāwand yūn farmātā hai, Jo jism se paidā hūā, jism hai; aur jo rūh se paidā hūā, rūh hai. Taajjub a kar, ki main ne tujhe kahā, ki sar i nau paidā honā zarūr hai. Mawā jidhar chāhtī hai, chaltī, aur tū us kī āwāz suntā: par nahīn jāntā, ki kahān se ātī, aur kidhar ko jātī hai. Har ek, jo Rūh se paidā hūā, aisā hī hai. Aur phir Amāl ke 2 bāb men likhā hai, ki Pintikost ke din *Rūh ul Quds tamām shaukat o qadrat* se utrā, aur *usī roz tīn hazār ādmī us kī tāsīr se Masihī ban gae*. Siwā is ke Baibal i muqaddas ke aur bahut maqāmon se zāhir hai, ki nayā dil faqat *Kḥudā hī* se hai. Lekin *Rūh ul Quds Kḥudā hai, is liye ye āyaten us se bhī murād rakhtī hai*. Dekho Hizqiel, 11 bāb, 19, 20 āyat men hai, Aur main unhen ek dil baḥshshūngā, aur rūh i jadid tumhāre andar men ināyat karūngā, aur sangīn dil un ke gosht men se dūr karūngā, aur unhen ek goshtīn dil baḥshshūngā, tāki we mere haqqon par chalen, aur mere hukmon ko hifz karen, aur un par amal karen; aur we mere log honge, aur main un kā kḥudā hūngā. Phir Yarmiyāh ke 32 bāb, 39 āyat men hai, Aur main ek dil aur ek rāh un kī bhalāī ke liye, aur un ke bad un kī aulād kī bhalāī ke liye unhen dūngā, ki we mujh se hamesha daren. Pas sābit hūā, ki yih tabdil qudrat i Ilāhī se hai; aur jo koī ki bibisht men jāne kā irāda rakhtā ho, to Kḥudā kī taraf rujū ho; nahīn, to be madad i Ilāhī markar wuh jahannam men dālā jāegā.

Phir, naī paidāish ke izhār men, Banī Isrāel ke ahwāl par zarā gaur karen; ki jab we Misr men gulāmī karte the, kis tarah Kḥudā ne apnī ajīb qudrat o mihrbānī se un ko us burī hālat se nikālkar mulk i Kanān men dākhil kiya. Isī tarah insān bhī tabīqat se gunāh kī gulāmī men hai. Lekin Kḥudā i Qādir, jo ki mihrbān o rahīm hai, insān ko is haibatnāk hālat se bachākar apnī āsmānī bādshāhat kī mīrās ināyat kartā hai. Aur is liye, ki insān bibisht kī nek kḥushion ke wāste taiyār hon, Allāh unhen nayā dil detā hai, yāne apnī qudrat o fazl se un ke dilon ko badaltā hai, ki we badī se nafrat karke, nek kāmōn men kamāl kḥushī se mashgūl rahen.

Ab jānā chāhiye, ki yih tabdil aisi nahīn, ki bār bār ek hī shakhs par wāqā ho. Wuh to Rūh ul Quds kī tāsīr se jab ki wāqā hotī hai, to dūsri bār us kī zarūrat nahīn rahtī. Jis tarah ki

koí chíz jab ki paidá hotí hai; phir wuh chíz paidáish kí muhtáj nahín hotí, magar himáyat o parwarish kí, táki usí hál men sábit qadam rahé; usí tarah gunahgár bhí phir paidá hokar fazl i Iláhi o madad ká muhtáj hai, táki wuh nekí o rástí men afzáish kare. Is liye niháyat munásib hai, ki ham sab gurúr o k̄hud garazí chhorkar kamál k̄hushí se Alláh par bharosá rakhen; kyúnki Lúká ke 11 báb, 9—13 áyaton men yún likhá hai, Mángo, to tum ko diyá já-egá; dhúndho, to tum páoge; khatkhatáo, to tumháre liye kholá já-egá; kyúnki jo koí mángtá hai, letá hai; aur jo koí dhúndhtá hai, pátá hai; aur jo koí khatkhatátá hai, us ke wáste kholá játá hai. Aur agar tum men kisi báp se betá roṭí mánge, to kyá wuh us ko patthar degá? aur agar machhli mánge, to kyá machhli kí jagah use sámp degá? yá agar wuh andá mánge, to kyá wuh use bichchhú degá? Pas agar tum, jo bure ho, apne lagyon ko achchhá inám de jánte ho, to kitná ziyáda tumhárá ásmání Báp apná *Ru'h ul Quds* unhen, jo us se mángte hain, degá. Ai ázizo, in báton par gaur karo. Kyá hí k̄hushí o tasallí kí báten hain, ki K̄hudá i bartar ham ko goyá apná farzand samajhkar hamárá ihtiyáj ke muwáfíq, ham ko sab kuchh ináyat kartá hai. Ai hamáre Báp, terá hí shukr o taríf ho hamesha tak. Ámín.

Áge zâhir o sábit ho chuká, kí ádmí apná dil apne hí kámon se bádál nahín saktá, magar yih kám Rûh ul Quds kí tásír se hai. Tau bhí jáná cháhiye, ki Injíl i muqaddas ke mutábiq hamárá naját kí tadbíir aisí nahín, ki ham sustí o gaffat men baithhe rahen, yih gumán karke, ki hamáre kámon se kuchh bantá nahín; is liye áo, gunáh karen, aur apní jismání k̄hushían manáwen. Hargiz nahín. Magar kisi ne wájib tarah se kahá hai, ki Ham sabhon ko Alláh kí tábidárái men is qadr mihnat karní cháhiye, ki goyá apní naját apne hí kámon par mauqúf jánte hain; hálánki yih bhí yaqín jánte hain, ki basabab apní nápákí ke ham koí kám kar nahín sakte, ki jis se yih barakat i mazkúr, yane naját hásil ho. Aur yih bhí, ki ham par mihnat karná farz hai, agarchi us mihnat se naját hásil nahín hotí, kuchh taajjub ká muqám nahín, kyúnki aksar amúráṭ i dunyáwí aise hí hain, ki K̄hudá bawasile ádmí kí koshishon ke unhen saranjám kartá hai; par tau bhí bagair us kí barakat o fazl ke insán kí koshishon se kuchh fáida nahín hotá. Maslan, kisán baṛí mihnat karke bij botá, sínchtá, aur har tarah kí k̄habardárái kartá, goyá ki usí kí koshish se wuh bij ugtá, aur phal bhí látá; lekin us ke dil men yih bát muqarrar hai, ki phal dená Alláh hí kí mihrbání o qudrat par mauqúf hai. Aur phir bádsháh o umrá har ek sarzamín ke apne apne shahron ko chaukidár o pásbánon se hifá-zat karwáte hain. Par haqíqatan un ká nigahbán K̄hudá hai; kyúnki jab tak wuh nigahbání na kare, to chaukidár o pásbánon se kyá hogá? jaisá ki 127 Zabúr men likhá hai, “Jab ki K̄hudáwand ghar na baná-we, to un kí mihnat, jo use banáte hain, záya hai; agar K̄hudáwand hí shahr ká nigahbán na hotá, to pásbán kí hoshyárá ábas hai.” Isí tarah bhí banisbat i naját aur dil kí naí paidáish ke, yih kám bilkull K̄hudá kí mihrbání o qudrat se hai; tau bhí is amr men sust o gáfíl ho baithná mahz nádání o gumráhí hai: goyá kisán kahe, ki Main bij ko ugá nahín saktá; mujh men aisí qudrat nahín, ki phal ko paidá karún; to main bij na boungá, magar sáya men baithkar árám

karúngá ; Alláh cháhe, mujhe phal de, yá na de ; us ko iḡhtiyár hai. Yih kyá hí bewaqúfí hai ? Lekin, afsos, afsos, yih ṡhík un kí masal hai, jo kí basabab láchárí ke apne ko mazúr samajhkar gunáh kí hálát meṇ beparwá baiṡhe rahte haiṇ. Magar púchhá jáegá, kí insán apní naját ke liye kyá kar saktá hai ? Jawáb yih, kí Ḳhudá ke kalám ko parhe, aur apne gunáhoṇ par gaur kare, aur un se báz áke rát din duá mángtá rahe, kí Rúh ul Quds us par názil ho. Farz kiyá, kí jis tarah yih kám un se bajá láe játe haiṇ, kí jin par yih tabdíl wáqa húí, isí tarah us se, kí jis ká dil badlá na ho, na ho sakegá. Tau bhí yaqín hai, kí Alláh i mihrbán aise shikasta dil kí duáoṇ ko qabúl karke apne kamál faẓl o qudrat se use madad baḡhshegá. Baibél i muqaddas meṇ likhá hai, kí Wuh maidán kí ghás ko árasta kartá hai, aur bhí qism qism ke jánwar usí kí mihrbání o qudrat se kháte aur píte haiṇ ; to filhaqíqat aise garíb dil gunahgár kí, jo apní tabáhí o ḡharábí ke báis sharminda hokar Ḳhudá se panáh cháhtá hai, sunegá. Pas sábit húá, kí gunahgár basabab apní láchárí o ḡharábí ke apní naját ke muámale meṇ koshish o mihnat karne se mazúr nahíṇ. Kyá bímár yún guftagú kartá hai, kí Main apne taṡṡ changá nahíṇ kar saktá, is liye dawá na píúngá ? Hargiz nahíṇ. Aisí bátoṇ se na sirf apní bewaqúfí záhir karná, balki apní ján ko bhí ḡhatre meṇ dálná hai. Isí tarah gunahgár gáfil hokar apní ján halákat meṇ dáltá hai ; kyúñki wájib hai, kí aisá sang dil badzát Ḳhudá ke gazab meṇ pará rahe.

Ai parhnewále, agar terí hálát yih hai, to Alláh ká kalám sun : Ai sonewále, jág, aur murdoṇ meṇ se nikal, to Masíh tujh ko roshan karegá. So ai ázíz, uṡh ke Ḳhudáwand Isá Masíh kí taraf rujú ho ; kyúñki bachánewálá aur barhaqq wuhí hai ; aur tamám gunahgároṇ ko pukártá hai, (dekho Matí ke 11 báb, 28, 29, 30 áyatoṇ meṇ), Ai sab mihnati o zerbár logo, mere pás áo, kí main tum ko árám dúngá. Merá júá apne úpar le lo, aur mujh se síkho ; kyúñki main halím o dil se garíb húṇ : to tum apní jánoṇ ká árám páoge.

III. Ab tísrí bát par gaur karen, yañe *kis tarah ham ko maḡlúm ho-we, kí ham phír paidá hu'e haiṇ, yá nahíṇ ?* Dekho, Ḳhudáwand Isá Masíh ne Matí ke 16 báb, 24 áyat meṇ farmáyá hai, Agar koí mere píchhe áyá cháhtá hai, to apná inkár kare, aur apní salíb uṡháwe. Aur Lúqá ke 14 báb, 27 áyat meṇ hai, Jo koí apní salíb na uṡháwe, aur merí pairawí na kare, wuh merá shágird nahíṇ ho saktá hai. Pas, in áyatoṇ ke mutábíq nae janam ká ek nishán yih hai, kí ham apná inkár karen, aur apní salíb uṡákar Ḳhudáwand kí pairawí karen. Aur jo kí yún kartá hai, to us makkár se, jo kí faqat nám meṇ Masíhí hai, bahut tafáwat rakhtá hai ; kyúñki apne imán ká iqrár karke, jahán sharír log us par hanste, yá Ḳhudáwand ká nám haqír jánte haiṇ, wuh sharminda nahíṇ hotá ; magar apní jismání ḡhwáhishoṇ ko, kí jo use Ḳhudá kí rúhání ḡhidmat se roktí haiṇ, inkár karke apne ko, be riyákárí ke, Alláh ke supurd kartá hai ; balki is meṇ bhí baṡí mihnat kartá hai, kí ba madad i Iláhí apne tamám wájibát adá kare. Chunan-chi un imámdároṇ kí chál par nazar karo, jo kí ḡháss Ḳhudáwand ke waqt i zahúr meṇ imán láe ; kí jab Yahúdí Ḳhudáwand ko haqír jáñkar us ko satáte the, kyúñkar unhoṇ ne apná imán záhir karke apná

ghar bár, mál asbáb, yár dost, sab kuchh chhor diyá, aur barí khushi se Khudáwand kí khidmat ko ihtiyár kiyá; kis liye, ki we durust gumán karte the, ki aise badzátón ko chhorná, balki un kí hiqárat hásil karná us se bahut bihtar hai, ki ham khauf i Khuda ko tark karke us ke gazab men pareñ.

Phir yih bhí jáná cháhiye, ki jo koí Khudáwand par dil se ímán lákar phir paidá húa hai, aisá shaḡhs káfir o badzátón men apná ímán kuchh der tak na chhipá sakegá. Hargiz nahín. Jis tarah ki ham apne ázíz rishtadáron ko piyár karte, aur us piyár ke záhir karne men hargiz sharminde nahín hote, aise hí ímándár ádmí Khudáwand Isá Masíh ko goyá apná bháí samajhkar, aur niháyat piyará jánkar, hargiz us ke nám se sharminde na hogá. Barkhiláf is ke jis tarah ki koí hamáre bháí kí badgoí o beizzatí kare, to hamará dil is bát par garm hotá hai, waisá hí wuh ádmí, ki jis ká dil tabdíl ho, un ke bích men, jo ki Khudáwand ko haqír jñte, aur us kí badgoí karte haiñ, us kí mahabbat se garm dil hokar khámosh na rah sakegá. Hargiz nahín. Wuh to shád o khush hokar apná ímán aur us mahabbat ko jald záhir karegá; kis liye, ki us ko yaqín i kámil hai, ki Khudáwand hamáre wáste múá, aur mujhe is zindagí men us kí salíb se bahut tassallí o taskín hásil húi, aur ákhir hayát i abadí hásil hogí. Main us kí taríf o shukrguzárí men hargiz khámosh na rahkar, barí khushí o mahabbat se mashgúl rahúngá. Hán, agarchi mujhe, mere ímám ke sabab, má báp, aur ghar bár, sab kuchh, chhorná pare, balki un ke satáne aur ízá dene se mujh ko bahut taklíf ho, tau bhí khush rahúngá, Khudá ke pák khádímón, yane Púlús o Silás kí mánind, jo kí qaid men rát ko gít gáte, aur Alláh ká shukr bhí adá karte the; aur phir Yúhanná o Yáqúb kí mánind húngá, ki jinhon ne bahut nár kháke Khudá ká shukr kiyá, ki we Khudáwand ke nám ke wáste dukh uṡháne ke láiq gine játe the. Pas, ai ázíz parhnewále, baḡhúbí jáná cháhiye, ki sachche ímándáron ke dil par ímán kí tásír yún hí hai. Aur we log, jo kí sharm ke sabab se Masíh ká iqrár nahín karte, kisi tarah us kí bádsháhat men dáḡhil na honge; kyúinki Lúqá ke 9 báb, 26 áyat men likhá hai, Jo koí mujh se aur merí bátón se sharminde howe, us se ádmí ká beṡá bhí jab apne, aur báp, aur muqaddas firish-ton ke jalál ke sáth áwegá, sharminde hogá. So ai bháí, bhúl mat kar. Bahut log ba sabab ḡar aur sharm ke apná ímán poshida rakhte haiñ; lekin isí se sáf roshan hai, ki un ká ímán durust nahín. Jo durust hotá, to we hargiz sharminde na hote. Aur agar terá ímán tu-jhe itní himmat na de, ki tú ádmión ke ḡar ko tark karke Khudáwand ká shágird bane, to terá ímán durust nahín; kyúinki sachche ímán ká ek nishán i sachchá yihí hai, ki us ká lánewálá ádmión se sharminde nahín hotá. Par koí kahe, ki Main sharminde nahín hotá; to kyá is se sábit húa, ki merá dil badal gayá, aur merá ímán durust hai? Jawáb yih, ki jo wuh kisi lálach, yá garúr, yá aur kisi badkhwáhish se apná ímán záhir kare, to us záhir karne se us ko kuchh fáida na hogá, kyúinki Khudá i barhaqq, jo kí álim o daná hai, aise kám ko niháyat nafratí jántá hai, aur apne pák kalám men farmátá hai, ki tamám jhúṡhe o makkár sáre badkáron ke sáth apná hissa jahannam men páwenge. So jáno tum, ki faqat wuh shaḡhs, jo dil kí halímí o Khudá

ki mahabbat se ímán lákar usí ímán ko záhír kartá hai, Alláh ká pa-sandída hogá.

Dúsrí álamát naí paidáish kí yih hai, yáne Rúh ul Quds kí gawáhi ; jaisá ki Rúmíon ke 8 báb, 16 áyat men hai : Rúh ap hamárá rúh ke liye gawáhi detí hai, ki ham K̤hudá ke farzand hain. Pas is ke yih mane nahín, ki Rúh ul Quds buland áwáz se pukárke gawáhi de ; hargiz nahín. Magar us ká matlab yih hai, ki Rúh ul Quds un nek phalon ko, jo ki kalám i muqaddas men Rúh ke phal kahláte hain, ham men paidá kartá hai. Aur wuh phal yih hain, (dekho Galatíon ke 5 báb, 22, 23 áyat men,) mahabbat, k̤hushwaqtí, salámatí, burdbárá, mihrbání, nekí, ímándárá, muláimí, parhezgárá ; koi shariát aison ke bar-khiláf nahín. Pas, jis tarah ki ham aur logon ko un ke kámon se pahchánte hain, so usí tarah apne hí dil kí hálát ko us kí ádaton se daryáft kar sakte hain. Maslan, in áyaton men marqúm hai, ki Rúh ká ek phal mahabbat hai. Yane jis ká dil tabdíl húa, wuh zarúr K̤hudá se mahabbat rakhegá ; aur balki sab ádmíon ko bhí piyár karegá ; kyunki we gunahgár hoke naját ke muhtáj hain, aur K̤hudáwánd Ísá Masíh par ímán lâne ke bagair we hameshe ke ázáb men parenge. Yih ján kar wuh ádmí, ki jis ká dil tabdíl húa, us mahabbat ke báis un ko us burí hálát se bacháne ke liye sargarm hokar bahut mihnát o koshish karegá. Pas, jo sha-khs ki apní haqíqí hálát ko daryáft karná cháhe, to apne dil se yún sawál kare : Kyá yih mahabbat ham men páí játí hai, ki nahín ? Agar yih mahabbat kisi men maujúd ho, to zarúr is se záhír hogá, ki wuh sha-khs K̤hudá ká kalám, yane injíl ke parhne se ki jis men us kí sifaten k̤húb roshan hain, k̤hush o k̤hurram hogá. Aláwa is ke us ke dil men yih bará iráda bhí maujúd hogá, ki main Alláh i bartar kí mánind gunáhon se mubarra hokar kámil banún, jaisá ki Mat. ke 5 báb, 48 áyat men hukm hai, ki Tum kámil ho, jaisá ki tumhárá Báp, jo ásmán par hai, kámil hai. So cháhiye ki ham chashm i insáf se apne dil kí hálát par gaur karen ; to ásání se ma-lúm hogá, ki yih phal ham men páyá játá hai, yá nahín.

Phir Rúh ul Quds ká dúsrá phal salámatí hai, yane dil kí ásúdagí o tasallí, jo ki naí paidáish men hásil hotí hai. Naí paidáish se pesh-tar ádmí ko bahut sí ghabráhaten o dár ; par bad us ke árám o tasallí dil men maujúd hotí hai ; is liye cháhiye ki ham sab apne apne hál par k̤hiyál karen ; tab to ásání se ma-lúm hogá, ki yih barkat hamen hásil húi, yá nahín ; yane naí paidáish. So kyá hí munásib o bihtar hai, ki ham apní hálát par ap hí gaur karnewále hon ; kyunki we, jo befikr hain, bhúl men parke ap ko halák karte hain. Ai parhnewálo, kyá tum befikr o beparwá hokar halákat kí ráh par chalte ho ? Aísá na howe. Bihtar to yih hai, ki tum apne hál par be tarafdárá ke insáf se socho, táki apní karozoríon aur tabíyat kí buráíon se k̤habardár hokar tum apne ko madad i Iláhi ke muhtáj samjho, aur Alláh par bharosá rakho. Tab to is ummed se tumhen niháyat k̤hushí o tasallí hásil hogí, yane ki jis ne hamáre dil ko badal dálá, so hí hamáre badan ko goyá apne rahne ká ghar samajhkar ham men rahegá, aur zarúr waqt i ak̤hir ham ko apní bádsháhat i ásmání men dákhil karegá.

Bas, úpar ke bayán se yih tín natíje nikalte hain.

1. *Ruh ul Quds Khudá hai*; kyúнки gunahgáron ká dil phir paidá karná aisá mushkil hai, ki faqat qudrat i Iláhi se waqú men átá hai. So jab ki yih kám, yanę nai paidáish, Rúh ul Quds ke fazl se hotí hai, to us ke Khudá hone men shakk nahín. Aur jo log ki us se inkár karke us kí beizzati karte hai, so halák honge: jaisá ki Marqas ke 3 báb, 29 áyat men likhá hai, ki Jo koí Rúh ul Quds kí zidd men káfir thahare, us kí muáfi abad tak na hogí, balki wuh azáb i abadí kí sazá uṭhāwegá. Ai azíz parhnewálo, apní besh qímat ján ko halákat men na dálo; balki Rúh ul Quds kí Ulúhiyat ko qabúl karke us kí minnat karo, táki us kí tásir se tumháre dil tabdíl hokar pák hon.

2. Záhír huá, ki *bihisht niháyat pák maqám* hai, ki jis men gunahgár dákhil hone ke láiq nahín. Agar wuh láiq hotá, to phir paidá honá kyá zarúr thá? Lekin is liye ki wahán nápák chíz ko dákhil nahín, Khudáwand áp farmátá hai, Agar koí phir paidá na howe, to wuh Khudá kí bádsháhat ko dekh nahín saktá. Hán, har ek qaum kí aql is bát par qáil hai, ki nápák Alláh ke huzúr na rahne páwegá. Bhalá, is ká kyá zikr hai, ki bihisht aisá nápák maqám ho, ki jis men burí khwáhishen o bad iráde púre ho saken! Lekin mutábiq mazhab i Hunúd o ahl i Islám ke, bihisht ek shahwat khána hai, ki jis men nápák o shahwat parast apní khwáhishon ko púra karen. Afsos, afsos hai! Aur isí bhúl se ye donon mazhab galat thaharte hai. Pas, un sabhon se hamári iltimás yih hai, ki aise náláiq mazhab par bharosá na rakhen, par unhen ehhorakar hamáre Khudáwand se rujú hon, jo ki tumháre gunáhon ko muáf karke ba wasile Rúh ul Quds ke tumhári burí ádaton ko bhí dúr karegá.

3. *Ádmí ko munásib nahín, ki apne kámon par bharosá rakhe, yá fakhr kare*, goyá ki wuh áp apne dil ko badal saktá hai. Hargiz nahín. Yih tabdílí sírf Rúh ul Quds kí tásir se hai, aur usí ká shukr o táríf karná wájib hai. So bará afsos hai, ki aksar log apne kámon par magrúr hokar, apne dil se yún guftagú karte hai: Main ne is qadr Alláh ká nám liyá; main ne pánchon waqt namáz parhí; main ne itne rúpae khairát men diye; main to Alláh kí nazar men bahut nek hún. Par afsos hai, ki yih log apne dil kí haqíqí khaslaton se náwáqif hokar basabab gurúr ke apne ko halák karte hai; jaisá ki Khudá ke kalám men likhá hai, ki halákat se pahle takabbur, aur zawál se áge dil ká gurúr hai. Hán, aise log to zarúr dozaḥh men dále jáenge; kyúнки Alláh ke nazdík gurúr niháyat nafratí chíz hai, jaisá ki phir us ke kalám, fāne khatt i Yaqúb ke 4 báb, 6 áyat men hai, ki Khudá magrúron se muqábala kartá, par garíbon ko fazl baḥshatá hai.

Pas, cháhiye ki ham sab apne dil se ájiz o farotan hokar, apne taín be takalluf o riyá ke Alláh ke supurd karen; aur jo kuchh nekí yá pákízagí ham men maujúd ho, us ke wáste Alláh ká shukr bajá láwen; kyúнки baḥshshnewálá wuhí hai. Ámín.

XIII.

TAQADDUS KI BABAT.

REV. J. H. BUDDEN KI TASNÍF.

Taqaddus kí pairaui karo ; us bagair koí Kḥudáwand ko na dekhegá.—
Ibr. 12 : 14.

INSA'N kí rúhání hálat is zindagí men aisi hai, jaise koí shaḡhs, jism ke haqq men niháyat bímár, balki jánkandani ke álam men pará ho ; aur hakím ke taur par mazhab ; aur dín ká kám yih hai, ki is bímár adhmaú ko bhálá changá aur bahál kar rakhe ; aur jis tarah kachche tabíb aur ním hakím, jo bímár ke marz se kuchh wáqif nahín, aur ilm i tib kuchh nahín rakhte, tau bhí sihat baḡhshne ká wáda karte, is dunyá men bakasrat milte hain, is hí tarah bahut jhúthe aur náqis dín bhí is jahán men phail gae hain, jo “ Kḥudá ki bint i qaum ke gháo ko yih kahke záhir men changá karte hain, ki Salámati, salámatí, jab kí salámatí nahín hai :” aur jis tarah sachche aur pakke hakím ká dastúr yih hai, ki pahle hí pahal bímári kí asl aur jar ko daryáft karke pakar lewe, aur kisú na kisú dhab se dafa kare, us hí tarah sachche dín ká bhí ḡháss nishán yih zarúr hogá, ki tabá i insán ke rúhání marz kí jar, yáne gunáh ko ukháre, aur sab se pahle us ke nest karne ke liye tashḡhís farmáwe.

Chunánchi ham apne páktarín imán men dekhte hain, ki pahle to ámalí gunáhon ke aur un kí tásiron ke nest karne ke liye wuh hamáre Kḥudáwand Ísá Masíh ke kafára ko muqarrar kartá hai, jo ek aisi hai-rat afzá aur hikmat ámez tadbír hai, ki jo koí us par imán láne se us ko qabúl kartá hai, zarúr us ke sáre ámalí gunáh jitne húe hon, ek laḡht muáf ho játe hain. Lekin is par to qanáat nahín kartá hai, balki áge baḡhke yih tajwíz bhí kartá hai, ki wuh ḡharáb aur gunáh álúda tabíat ko, jo bizzátihí harek insán rakhtá hai, nae sir se paidá kare, jab tak ki gunáh ká harek nám o nishán bilkull nest na ho jáe. Kyúnki jab tak yih burí tabíat bahál rahe, to faqat guzre gunáhon kí muáfí se kyá hásil ? Áge kí tarah is hí jar se beshumár gunáh phir baḡhenge. Aláwa is ke hamári áyat se yih bhí ḡhabar milti hai, ki aisi tabíat ke sáth koí Kḥudáwand ko na dekhegá. So is waqt ham is bát ká charchá karte hain ; aur Kḥudá apná fazl baḡhshne táki is ke wasile se hamáre sust dil uskáe jáen. Ámín.

I. Is charcha kí tartíb men pahlí bát yih hai, ki taqaddus ke kyá maṇe hain ?

II. Dúsrí bát, ki insán us ko kis tarah hásil kar saktá hai.

III. Tísrí bát, ki us ke hásil na karne se kyá patíja niklegá.

I. Pas, taqaddus se kyá murád hai? Is lafz kí asl quds hai, aur quds ke mane aslí pákízagí, yañe wuh, jo har tarah kí nápakí aur gunáh se bahut dúr hai : chunánchi K̤hudá kí Rúh, Rúh ul Quds kahlátí hai. Is se ek ism i sifat nikaltá, yañe Quddús, jis ke mane wuh, jo yih quds apní zát meñ rakhtá hai : chunánchi pák firishte K̤hudá ke huzúr meñ taríf karte húe yih pukárte haiñ, ki “ Quddús, quddús, quddús, K̤hudáwánd K̤hudá, zábít ul kull, jo thá, aur jo hai, aur jo ánewálá hai.” Phir siwá is ke ek aur lafz hai, yañe muqaddas, jis ke mane pák kiyá gayá hai ; yañe, wuh jo bizzátíhí pák nahín hai, par kisé wasíle se pák kiyá gayá ho : mislan, insán jo gunáh ke sabab se nápak húa, par K̤hudá ke fazl se, aur imán lâne se pák ho játá hai, tad wuh muqaddas bantá hai. Phir is hálát ká ek nám yañe yihí lafz taqaddus hai ; so us se kyá murád hai, yañe wuh us shaḡhs kí hálát ká nám hai, jo pák kiyá gayá ho. Quds ke mane wuh pákízagí, jo aslí hai, mislan K̤hudá kí : taqaddus, wuh pákízagí, jo paidá húi, mislan insán kí.

Par agar ham is maktúb ke musannif ke mutábíq Músá kí shariát par zarrá gaur karen, to yih bát aur roshan ho jáegí ; kyúnki us meñ is taqaddus ká zikr aksar kiyá játá hai. Ham parhte haiñ, ki wuh mas-kan, jis meñ K̤hudá kí bandagí kí játí thí, aur we káhin, jo bandagí kar-
te the, aur qurbángáh aur bartan bhí sab muqaddas the. Músá ne hukm farmáyá, ki fuláne rasm bajáláne se yih sab chízeñ muqaddas kí jáeñ ; aur ki muqaddas hone ke bað we faqat is hí kám, yañe K̤hudá kí k̤hidmat aur bandagí meñ k̤harch howeñ. So is ká aslí matlab yih hai, ki we ádmí aur we chízeñ, jo K̤hudá kí k̤hidmat par muqarrar hon, sáre aur kámon duniyawí aur jismání se alag kí jáeñ, táki faqat K̤hudá kí k̤hidmat meñ istiámál kí jáeñ ; aur is tarah we muqaddas ban gáñ.

Pas, yih sab jismání báteñ, jo Músá kí shariát meñ thahráí gáí thín, Masíhí zamáne meñ rúhání taur par samjhá cháhiye. Chunánchi Pat-thras ke pahle k̤hatt meñ likhá hai, ki ahl i Masíh “ káhinon kí muqad-das jamáat ho játe, táki rúhání qurbáníáñ, jo Ísá Masíh ke wáste se K̤hudá ko pasand haiñ, guzráneñ.” Phir Timtáús ke dústre k̤hatt meñ likhá hai, ki “ Agar koí apne taín zalíl istiámál se sáf pák kare, to wuh hurmat ká bartan aur mumtáz, aur K̤hudáwánd ke pás ázíz, aur harek achchhe masraf ke liye muhaiyá hogá.” So in báton se sáf záhir hai, ki kámil Masíhí taqaddus ke aslí mane yih haiñ, ki jis tarah shariát ke waqt koí bartan, yá jagah, yá ádmí, duniyawí aur jismání kámon se alag kiyá gayá, táki K̤hudá hí kí k̤hidmat meñ k̤harch ho, usí tarah Masíhí zamáne meñ, imándár shaḡhs apne taín duniyawí garazon, aur jismání k̤hwáhishon se alag karke rúhání qurbángáh par tasadduq kare, táki faqat K̤hudá hí kí k̤hidmat meñ masrúf ho. Chunánchi Púlús rasúl Rúmíon ke maktúb meñ kahtá hai, ki “ Pas, ai bháío, main K̤hudá kí rahmaton ká wásta deke tum se iltimás kartá hún, ki tum apne bada-non ko K̤hudá par taqdís karo, táki qurbán i zinda o muqaddas o pa-sandída ho, ki yih tumhárí jání k̤hidmat hai.”

Lekin is muqaddame meñ ek aur bát ká zikr cháhiye ; yañe, ki pu-ráne ahd meñ koí bartan, bajuz muqarrar húe hukm ke mutábíq, pák o

muqaddas nahīn ho saktá thá. Agar koī is bāt kī jurat kare, ki kisī dústre taur par kisī chíz ko muqaddas ṭhaharāwe, aur maskan ke kām meṇ lāwe, to wuh námanzúr hotá, aur siwá is ke maurid i gazab ṭhahartá. Chunānchi Ahbār ke 10 bāb meṇ likhá hai, ki “Nádáb aur Abihú donon beṭe Hárún ke, harek ne un se apne údsoz liye, aur us meṇ ág bharke us par baḥhúr dālá, aur ek ajnabí ág, jis ká Ḳhudá-wand ne un ko amr na kiyá thá, rúbarú Ḳhudáwand ke guzrání. Tab ág Ḳhudáwand ke huzúr se niklí, aur un donon ko khá gaí, aur we Ḳhudáwand ke sámhne mar gae.” Is tarah bhí, Masihí áhd meṇ ek ráh ṭhahráí gaí hai, ki jis se insán rúhání qurbání guzránne ke liye Ḳhudá ke pás jáen; yaṇe, Ísá Masih ke wasíle se, jis ne kahá hai, ki “Main ráh hún,” “koī Bāp ke pás nahīn já saktá hai, magar mere wasíle se.” So kámil taqaddus kī ḵhássiyat yih hai, ki Ísá Masih par ímán lāne kī ráh se hoṇe, “jo hamāre liye Ḳhudá se hikmat, aur sadáqat, aur taqaddus, aur ázadagí hai.” Pas in báton se maḷúm hotá, ki agar koī Ḳhudá kī muqarrar kī húi ráh ko tark karke kisī dúsrí ráh se apne taín Ḳhudá par taqdís kare, to wuh hargiz manzúr nahīn ho saktá.

Gharaz, ki yih taqaddus ímándáron kī ek ḵhássiyat hai, jo Ḳhudá ke faẓl se dil meṇ paidá hotí hai, aur ámal meṇ nazar átí. Jis waqt kī fíkrmand gunahgár, Ísá Masih par ímán lāne se, apne gunáhon kī muáffí hásil karke apne dil meṇ árám o tasallí pátá hai, aur yih bhí dekhtá hai, ki yih sab faẓl Ísá Masih kī mahabbat se ináyat húa hai, to us ke dil meṇ is hí tarah kī mahabbat bhí paidá hotí hai, aur wuh niháyat árзумand ho játá hai, ki kisī tarah se apní mahabbat záhir kare. Chunānchi jis tarah kī Ísá Masih ne us kī ḵhátir apní ján de dí, us tarah wuh Ísá Masih kī ḵhátir apní ján de dene par taiyár hai: aur haqíqat meṇ wuh ek rúhání taur par aisá hí to kartá hai; “Kyúnki Masih kī mahabbat us ko khainchí hai; ki wuh yih samjhá, ki jab ek sab ke wáste múá, to sab murda ṭhahare: aur wuh sab ke wáste múá, táki jo jíte hain, so na apne liye, balki us ke liye, jo un ke liye múá aur phir uṭhá, áge chalke jien.” 2 Karantíon ká 5 bāb, 14 áyat. Phir “wuh apná nahīn hai, kyúnki wuh qímat se mol liyá gayá hai; pas apne tan se aur apne man se, jo Ḳhudá ke hain, wuh Ḳhudá kī taqdís kartá hai.” 1 Karantíon ká 6 bāb, 20 áyat.

Muwáfíq is ke aise kámil muqaddas kī garaz yih hai, ki apní harek bāt se aur har kām se Ḳhudá ká jalál záhir kare. Us ke ámal kī nok jhonk to yihí hai; us ke sáre ḵhiyál aur harek ḵhwáhish is hí bāt par mutawajjih hotí hain. “Zindagí us ke liye Masih hai.” Baliház is ke us ká harek kām muqaddas hotá, goyá ek rúhání qurbání hai, jo Ḳhudá ko manzúr aur pasandída hai. Balki jo gairon ke haqq meṇ taqaddus se ḵhálí ho, us ke haqq meṇ us kī garaz kī badaulat muqaddas ho játá. Kyá muzáyaqa kī wuh past hálát meṇ ho, yá kamíne ashgál meṇ mustáid rahe? Ek hí bāt hai, ki wuh muqarrar firishta ká kām kare, yá qaidí ke taur par sarakon meṇ mihnát uṭháwe; kyúnki “kháte píte sab kuchh karte húe, wuh sab kuchh Ḳhudá ká jalál záhir karne ke liye kartá hai.”

II. Pas, taqaddus ká bayán ho chuká; aur ab dusrí bát yih hai, ki insán taqaddus i mazkúr ko kis tarah hásil kar saktá hai.

Hamári áyat men likhá hai, ki us kí pairaui karo; ki jis se yih dalálat kí játí hai, pahle, ki bagair pairaui kiye wuh hásil nahín ho saktí; aur dúsre, ki pairaui karne se wuh zarúr hásil hogí; warna, to yih báten ek tarah ká tanz hotín, jaise ki koí kisi langre se kahe, ki Uth, aur mere sáth chal, to main kuchh kuchh dúngá, jis hál ki wuh chal nahín saktá hai, aur aisí bát to shán i K̤hudá se bahut baíd hotí.

Lekin pairaui karne men sháyad ek bhári matlab poshída hai, jis ká kholná ham ko lázim hai. So ab ham tahqíq karte hain, ki pairaui karne men kaun kaun sí báten miltí hain. Aur

Pahli, taqaddus ke pairau men zarúr yih bát hogí, ki wuh apne taín is taqaddus se k̤hálí jánegá, kyúnci agar wuh abtak muqaddas ho chuká, to kis wáste taqaddus kí pairaui kartá hai? Aur haqíqat men yih insán kí aslí hálát hai. Kaun aisá shakhs hai, jo ap se apní marzí ko tark karke K̤hudá kí marzí par chaltá hai? Bar̤k̤hiláf is ke har koí jab tak ki K̤hudá ke fazl se us ká dil nae sir se paidá na ho, faqat apní hí marzí par chaltá hai, balki yih bhí gumán kartá hai, ki aisá kar-ná wájibi hai.

Dúsri bát, ki taqaddus ke pairau kí samajh men us se k̤hálí honá ek gazab hogá; aur isí wáste wuh us kí pairaui kartá hai. Aur yih thík samajh hai; kyúnci is men ki koí k̤hilqat taqaddus se k̤hálí ho, kaisí buráíán miltín! Aisá shakhs goyá Alqádir ko angúthá dikhlatá hai. Jis waqt ki K̤hudá hukm farmátá hai, ki merí marzí par chalo, yih jawáb men, sháyad zubán se nahín, magar dil aur amal ke muhawara se kahtá hai, ki Kyá muzáyaqá! main apní marzí par chalúngá. K̤hudá Taálá ko yih haqír jántá hai. Jis waqt kí K̤hudá Taálá kahtá hai, ki merí marzí par chalne se tujh ko bará fáida hogá, yih jawáb detá hai, ki Nahín to, apní marzí par chalne se ziyáda fáida hogá; aur yún K̤hudá Taála kí dánái yá sachái ko haqír jántá hai. Balki is men Qádir i Mutlaq kí qudrat ko bhí haqír jántá hai; kyúnci yih gumán kartá hai, ki us hí se us ká haqq chhín lene men wuh besazá thaharegá. “Kyá insán K̤hudá ko lútegá?” Mal. 3 : 8. “Kyá ham K̤hudá ko rashk khi-láyá cháhte hain? Kyá ham us se qawítar hain?” 1 Kar. 10 : 22. Albatta is men bará gazab hotá. Chunánchi taqaddus ká pairau aisá bhí jántá hai, aur k̤hiyál kartá, ki agar main is hí hálát men marún, to kyá qiyámat tútegi! Aur is liye basar o chashm taqaddus kí pairaui kartá hai.

Tísri bát, jo tálib i taqaddus men zahir hogí, so yih hai, ki us ke há-sil karne men apne taín nátawán aur náchár samjhegá. Hán, báwajú-de ki us kí pairaui kiyá kartá hai, balki us kí pairaui karne se bhí yih bát darýaft hogí. Sháyad ibtida men us ne aisá k̤hiyál nahín kiyá, balki yih gumán kiyá, ki abhí to main apní tajwíz aur kshish ke zor se muqaddas ban jáúngá; magar fauran yih małúm huá, oi jis qadr wuh koshish kiyá kartá, usí qadr wuh magláb ho játá. Us ke dil kí nápakí jo thí, so dil hí ke k̤hilwat k̤hána aur mándonm en poshída rahí; par jis waqt ki wuh us ke nikálne kí koshish kartá, to jhat afaion ke bach-choñ kí mánind charon taraf bakasrat uñhti hai, aur us kí mihnat ná-ummed aur abas małúm hotí. Par aisí hálát men zarúr ek aur, yane

Chauthí bát, nazar áwegí, ki is muqaddame men wuh apná iláj faqat *Khudá* hí kí qudrat, aur fazl aur marzí par mauqúf jánegá. Sach hai, ki harek dunyawí niámat ke liye ham Parwardigár, i álam kí marzí par mauqúf hain; agarchi asámí apní zamín jote aur bowe, bagair barakat i *Khudá* ke kuchh phal nahín niklegá. Báwajúde ki bímár saikarón tadbíron kare, biná fazl i Iláhí ke kuchh nahín ban partá. Par kitná ziyáda Rúh kí bárík báton men us kí madad zurúr hai! Alal^{kh}usus aise muqaddame men, ki jis men insán ko apní khwáhish aur tabíat ke bar^{kh}iláf barábar laráí karní partí. Aisi hálat men insán kyá kar saktá hai? Kaun bagair madad i Iláhí ke apní marzí ko tark kar saktá hai, táki dúsre kí marzí par chale? Yih bhí taqaddus ká pairau jántá hai. Chunánchi apná sára muqaddama *Khudá* ke hawála kartá hai, aur is hí sabab se us men

Pánchwín bát páí játí hai, yane ki jo tadbíron aur wasílon ko is muqaddame men *Khudá* Taálá thaharátá hai, so ^{kh}ushí aur shukrguzarí ke sáth wuh qabúl kartá, aur kám men látá hai. Wáste gunáhon kí magfírat ke Isá Masíh ke kafáre aur beshqímat lahú par púra bharosá rakhtá hai. Rúh ul Quds kí madad aur fazl ke liye us hí ke kám aur sifárish ká zikr kartá hai. Duá mángne men mashgúl rahtá hai. Pák kitábon ká charchá aur gaur kartá hai. Buzurg muqaddason ke, aur ^{kh}áss karke *Khudá*wand Isá Masíh ke kámil namúna par bare shauq aur shafqat ke sáth nit muláhaza kiyá kartá hai. Fázil ímándáron se dostí aur suhbat tá maqdúr apne rakhtá hai. Gunahgáron kí mashwarat par nahín chaltá, ^{kh}atakáron kí ráh par khará nahín rahtá, thatthá karnewálon kí majlis men nahín baíhtá. Harek bát se, jis ká záhír bad ho, dúr rahtá hai, táki *Khudá*, jo sulh ká baní hai, ap hí us ko bilkull pákíza kare, aur us ká sab kuchh, yane us kí rúh, aur nafs, aur badan, hamáre *Khudá*wand Isá Masíh ke áne tak, be ílzám mahfúz rahe.

Pas, is taqaddus ke hásil karne ke liye yih pánch báten, jin ká zikr úpar huá, zurúr hain; yane pahlí, ki ham apne taín bizzátíhí taqaddus se ^{kh}álí jánen; dúsrí, ki ham yih hálat ek bará gazab samjhen; tísrí, ki ham is kám men apní nátawání aur náchárí se wáqif howen; chauthí, ki ham apná iláj *Khudá* ke fazl par mauqúf jánen; aur pánchwín, ki ham us hí kí tadbíron ko is muqaddame men dil o ján se qabúl karen, aur jidd o jíhd karke kám men láwen. Haqíqat men taqaddus kí pairaui karná yihí hai; aur biláshakk agar koí is taur par us kí pairaui kare, to *Khudá* ká fazl us ko ináyat hogá; aur zurúr ákhir ko us ká matlab bar áwegá; sháyad ekáek nahín; balki yaqín hai, ki aisá bará kám fauran tamám nahín ho jáegá, lékin darja ba darja áge barhke, aur taraqqí pátá chalá jáegá. “Agar wuh in báton par taammul kare, aur unhín ká ho rahe, to us kí taraqqí sabhon par záhír hogí,” aur “wuh jo hai, so sadáqat men *Khudá*wand ká munh dekhegá; aur jab wuh us kí súrat par hokar jáge, to wuh ser hogá.”

III. *Tísrí bát*, ki is taqaddus ke hásil na karne se kyá natíja niklegá; yane, jo hamárí áyat men likhá hai, ki us bagair koí *Khudá*wand ko na dekhegá; ham us ká charchá karte hain.

Yih bát to ham ko nahín málúm, ki kyá muqaddas log jo *Khudá*wand ko dekhenge, so jis tarah kí filhál ham jismání ánkhon se kisi par

nazar karte hai, dekhenge, ki nahin. Is mein to ek barā bhed hai; kyunki wuh, jo mahz aur khalis ruh hai, jaisa ki KHUDA, so kisi ki nazar mein nahin aata. Par KHUDA ki qudrat se baad nahin hai, ki apne ta'in muqaddason ki ruh par aise taur se zahir kare, jo binai ke barabar howe; aur KHUDA ke kalām mein saf khabar hai, ki isi tarah se muqaddas aur sharir donon adalat ke din us ko dekhenge. Magar is mein shariron ko kuchh farhat ya nekbakhti nahin hogi; aur galiban yih to is ayat ke mane hown. So ham bayan karte hai, ki yih kis wajh se hai,—

Pahli, ki KHUDA Taala ki mutbarrak zat aisi qudus hai, ki har tarah ki napaki aur gunah se nihayat nafrat rakhti hai: apne rubaru mein us ki bardasht nahin kar sakti. Is jahan mein albatla KHUDA Taala gunahgaron par bhi tars khata hai, aur un ko halak karne se baz rahi; par yih to is liye hai, ki shayad we tauba karen, aur iman lane se muqaddas ban jayen. Lekin jis waqt ki qabuliyat ka din guzar gaya, aur azmaish tamam hui, aur we hanoz farmanbardar na hue, tad yih mihrbani mauquf hogi. KHUDA Taala ke dil mein un ke liye kuchh tars bhi baqi na rahega, aur na un ke dil mein ummed. Sad afsos, ki befikr gunahgar apni aqibat par gaur nahin karte!

Dusri wajh, ki agar ham gumān karen, ki KHUDA Taala apni zat ki dushmani aur mukhalifat baz rakhe, aisa ki gunahgar aur napak ruh us ke huzur mein kharā hone pawe; tau bhi wuh ap us quds ke huzur ki bardasht nahin kar sakti. Us quds ki raunaq ki jot se wuh ya to andha ho jata, ya us ki chamak se apni napaki aur makruh halat ko aise taur par dekhti, ki sharm aur ghin ke mare wuh marti. Aur yih bat to na faqat khuni, aur zani, aur matwale, aur chor ke haqq mein sach hai; balki aksar admiyon ki babat bhi jo dekhne mein nek hon, aur shayad apne ta'in sadiq, aur rastbaz, aur KHUDA tars jante hai; magar haqiqi taqaddus se khali hai. Mumkin to hai, ki dunya ke nuqmalon mein we sachche thaharen; jismani shahwaton se parhez karen; insān ki mahabbat se mamur hown; khairat aur sakhawat mein mustaid rahen; balki namaz aur bandagi mein bhi nit hazir hown. Par KHUDA ki haqiqi mahabbat un ke dil mein nahin hai; us ki marzi par we nahin chalte hai; us ki sachchi farmanbardari nahin karte hai. Aison ke haqq mein ham kahte, ki agar we KHUDA ke huzur mein khare hone pawen, to fauran un ki khud pasandi jati rahi; un ki neki ke khyal gaib ho jate, aur we apne ta'in khud aise makruh aur ghinaune dekhte, jaise ki filhal KHUDA un ko dekhti hai. Aisi halat mein kyā jan baqi rahi?

Tisri wajh, ki agar ham gumān karen, ki na faqat KHUDA un ki bardasht kare, balki we bhi us ki pakizagi ke pas rah saken, taubhi us mein aur un mein kuchh muwafiqat nahin hoti, aisa ki us ki taraf se un par fazl nazil nahin ho sakti; aur agar ho, to un mein nahin sama sakti; kyunki un ke mel ki jagah kahin nahin hoti. KHUDA aur gunahgar, yane wuh shaks, jo haqiqi taqaddus se khali hai, apas mein zidd hai. Aisi ruh, jo KHUDA ki sachchi mahabbat se khali hai, ruhani taur par murda hai, aur murda ruh zinda KHUDA se kis tarah mulaqat kar sake? Asman mein, jo nur aur zindagi se bhara hua hai, wuh goya

ek kálá beján aur gair shaffáf pindá hotá, ki jis par sári bihisht ki roshní kuchh asar nahín kartí.

Chauthí wajh, ki aisí rúh, jo taqaddus se khálí ho, agarchi Khudá ke huzúr mein howe, tauhí ásmán ke ashgál aur khushí ke qábil nahín hotí. Un kí asl aur matlab yih hai, ki Khudá kí marzí purí howe. Wahán to mahz aqlí khushí pái nahín játí; koí khilqat kí qadr áqil, yá álim, yá roshan tabá kyún na ho, bagair taqaddus ke wahán ek haulnák khilqat nazar áti, aur ásmání kámon ke liye kuchh liyáqat nahín rakhtí. Khudá kí marzí purí karná, is kám mein khushí páná, aur is sabab se us mein khushí páná, ki yihí to Khudá kí marzí hai; aise kám mein ahl i ásmán mashgúl aur garq hote. Lekin wuh, jis kí khaslat apní marzí par chalne kí ban gaí, kyúnkar aise ajnabí aur mukhálif kámon mein khushí pá saktá?

Pánchwín wajh, ki aisí nápák rúh pák ahl i ásmán se bhí mel nahín rakhtí; aur is liye us ko ásmán mein hone se kuchh farhat nahín hotí. Jis tarah ki koí púch, aur najis aur bhayának khilqat hamárá nazar mein ghinauní aur haibatnák hai, usí tarah nápák rúh ásmán kí pák jamáat kí nazar mein nafratí aur makrúh hotí. Kyá aisá shaḡhs un ká sámhná kar sakegá? Yá sáre muqaddason o firishton kí munsíffí haqír jánegá? Is jahán mein to yih mumkin hai, ki fásid o khúní tanhá jangal mein bhág jáe, aur wahán se intiqám ke liye nekon kí rifáqat par, ki jis ne us ko apní god mein se khárij kar diyá ho, apní hiqárat aur adáwat kí áwáz buland kare. Par ásmán mein to yih kyá imkán hai? Wahán unhní kí hiqárat se wuh bilkull shikasta khátirí, máyúsí mein dúbáyá játá. Kyúnki likhá hai, ki ákhir ko sharír zamín kí khák mein se ruswáí aur nafrat i abadí ke liye jág uthenge.

Hásil i kalám, ki dín i Masíhí kí khúbí aur fazílat yih hai, ki us ke rú se Khudá Taálá mutlaq quddús hai, us kí shariát quddús, us kí bihisht quddús; aur ki ahl i Masíh ká farz aur nekbaḡhtí yih, ki dil o ján se taqaddus kí parauí karen, jis bagair koí Khudáwand ko na dekhegá.

XIV.

ASHÁ I RABBÁNÍ, YÁ FASAH I MASÍHÍ.

REV. J. WILSON KÍ TASNÍF.

Tum puráne khamír ko níkal phenko, táki tum tází lu'f bano; kyúnki tum beḡkhamír ho; is liye ki hamára bhí Fasah, yane MASÍH hamáre liye qurbán kiyá gayá hai.—1 Kar. 5: 7.

AHL i Masíh jo us waqt Karinth mein rahte the, aksar naumuríd the, aur Masíhion kí hálát aur huqúq se kam wáqif the. Is liye baz dastúr i

bemauqa un kí kalísiyá meṇ dākḥil húa. Bazon ne gumán kiyá, kí ápas meṇ wájib hai, kí bhái log sab chízen sharákat meṇ rakhen. Ek shaḥs us saho meṇ yahán tak barhá, kí apne báp kí jorú ko lekar apní ṭaharái, aur gumán kiyá, kí Injil ke rú se yih Ísáíon ká áin haqq hai. Jab yih hál Púlús ko maḷúm húa, us ne kamál koshish se un ko jatáyá, kí yih áin sharárat hai, aur Injil kí har ek bát ke ḡhiláf. Us ne farmáyá, kí Us shaḥs ko zurúr kalísiyá se ḡháriḡ karná, jab tak us kí chál se maḷúm howe, kí wuh us harakat kí badí se ágáh húa, aur us se ḡhúb pachhtáyá ho ; aur unhen chitáyá, kí “ Thorá sá ḡhamír sári lúi ko ḡhamír kartá hai; ” yaṇe, agar thorí sí sharárat yá bad maáshí tumháre darmiyán jagah páwe, aur maḡúr jání-jáwe, to tumháre tarí-qa ko bigáregí, aur tumháre díní iqrár ko bátíl aur befáida karegí. Phir un ko jatáyá, kí “ Puráne ḡhamír ko níkal phenken, táki tází lúi banen; is liye kí *Masíh*, jo un ká *fasah* hai, un ke liye qurbán kiyá gayá.” Is meṇ Yahúdíon kí ek íd i ázím ká ishára hai. Mufíd hogá, kí us íd ke ahwál par zará gaur karen ; to Fasah i Masíhí, yaṇe Ashá i Rabbání ke hál aur haqíqat ko achchhí tarah se samjhe.

Músá ke áge, jab baní Isráíl úpar do sau baras ke Misr kí saḡht asírí meṇ rahe the, Ḳhudá ne un kí saḡht mihnaton par nazar kí, aur un ke gam aur áh bharne par kán dhará, aur un kí ribái kí tadbír ṭaharái. Us kár i ázím ke izhár aur yáddásht ke liye us ne Firaún aur Misríon par kái ájib májare aur baláen názil kíṇ. Har chand kí Firaún ne dekhá, aur un se niháyat harj uṭháya, tau bhí hirs aur takabburí ne us ke dil ko saḡht kiyá. Baní Isráíl kí mihnaton se us ko naṣá bará thá, aur us ne un ko jáne na diyá.

Áḡhíran Ḳhudá ne Músá ko farmáyá, kí “ Isráíl ke sáre guroh se kah, kí Is mahíne ke daswen din har ek shaḥs apne báp ke gharáne ke wáste ek barra, ghar píchhe ek barra, apne liye lewe :—Tumhárá barra be áib cháhiye, nar aur ek sálah ho. Aur tum use is mahíne kí chaudahwín tak rakh chhoṛíyo : aur Isráílíon ke firqe kí sári jamáat, darmiyán zawál aur gurúb ke, use zabh kare. Aur we lahú ko lewen, aur un gharon meṇ jahán we use kháwen, us ke darwáze kí dahní aur báín aur úpar kí chaukhaṭ par chhírakeṇ. Aur we usí ráat ko us gosht ko bhúná húa beḡhamírí roṭí, aur karwí tarkárí samet kháwen. Aur tum use yún kháíyo, kamren bándhke, apní jútíán pánw meṇ pahine húa ; apná ása apne háth meṇ liye húa ; aur tum use jald khá líjiyo, kí fasah (yaṇe guzarná) Ḳhudáwand ká hai. Is liye kí main áj ráat mulk i Misr meṇ guzar karúngá, aur sab pahlauṭhe insán ke, aur haiwán ke, jo us meṇ haín, márúngá ; aur Misr ke sáre maḡúdon ko muazzab karúngá ; kí main Ḳhudáwand hún. Aur wuh lahú tumháre liye un gharon par, jahán jahán tum ho, nishán hogá ; aur main wuh lahú dekhke tum se darguzarúngá ; aur jab main Misr kí zamín ke rahnewálon ko márúngá, to wabá tum par na áwegí, kí tumhen halák kare. Aur yih din tumháre liye ek yádgár hogá ; aur tum Ḳhudáwand ke liye is din meṇ íd kí mudáwamat kíjiyo, aur tum apne sab qarnon meṇ is íd ko abad tak ádat muqarrar kíjiyo.” Pas, usí ráat Ḳhudá ke firishte ne Misr ke mulk meṇ guzarkar har ek gharáne meṇ, jis kí chaukhaṭon par us chhírake húa lahú ko na dekhá, un ke pahlauṭhe beṭe ko ján se mára ; ek bhí na bachá. Par jitnon ne Alláh

kí báten sach mánín, aur apne darwáze kí chaukhaṭon par ṭhaharáe húe lahú ko chhiṛká, we sab sahih salámat rahe ; un men kisi ko harj na húa. Us balá se Firáún ne hairán aur tarsán hokar baní Isráíl ko jáne kí ijázat dí. Aur unhon ne apne sáre qarnog men bamújib i hukm Kḥudá ke, us Íd i fasah, yaṇe guzarne, kí hifázat kí, aur áj tak un kí sári pareshání aur shikasta hálí men us kí hifázat kiyá karte haiṇ. Us íd i fasah, yá guzarne, kí hifázat se baní Isráíl kí us baṛí rihái kí yád dunyá men qáim aur tází rahí. Lekin us men baṛí chízen tamsilí thíg, jin ke maṇe Masíh ke áne tak kullí wázih na húe. Injíl men un ká kḥulása miltá hai. Un men se baṛon par liház karná mufíd hogá. Us barre ke báb men lázim thá, kí *beqib*, yaṇe kḥúb bhalá changá ho. Injíl men Masíh ek barra i bedág aur beqib kahlátá hai. “Tum yih jánte ho, kí tum ne fání chízon ke, yaṇe rupe sone ke sabab se apní maurúsi ádat i behúda se rihái nahíṇ páí, balki Masíh ke besh qímat lahú ke sabab se, jaisá kí bedág aur beqib bare ke. Kí wuh pesh az biná i álam muqarrar húa, lekin zamán i ákhir men tumháre liye záhír húa.” 1 Pat. 1 : 18, 19. Agar barra kisi tarah se maríz yá qibdár ho, to us fasah ke láiq na hotá. Agar Masíh gunáh ke áib se niralá mubarrá na hotá, to baní ádam ká fidá hone ke láiq na hotá. Lázim thá, kí us barra ká lahú darwáze kí chaukhaṭon par chhiṛká jáwe, aur jitne kí us ghar ke andar the us ke sabab se bacháo páte the. Injíl men Masíh ká lahú “kḥún i chhiṛkáo” kahlátá hai. Ibr. 12 : 24. Us barre ke báb men hukm húa, kí “us kí ek haḍḍí torí na jáe ;” so Masíh ke ahwál men uská kḥulása hai, kí jab wuh salíb par tangá rahá, pyádon ne sardáron ke hukm se us ke ham-maslúbon kí tangen tor dālín, par Ísá kí ek haḍḍí na torí.

Barre ke báb men farmáyá gayá, kí us ká ek tukrá sarne na páwe ; jo kuchh kháyá na jáwe, ág se jaláyá jáwe. Masíh ká badan qabr men sarne na páyá.

Yún sáf maḷúm hai, kí agarchi us íd i fasah ká pahlá aur harfí matlab us Misrí bacháo se mutállíq thá, par us ká aín matlab Masíh ke kafára yá fidá se taluq rakhtá thá. Yih bát Injíl ke bahut makánon se sábit hotí hai. Wuh íd i fasah, yá guzarná, Masíh ke maslúb hone tak járí rahá, aur bajá húa. Aur Masíh ne áp sál ba sál Yahúdíon ke sáth us kí muháfazat kí. Aur us árese men waqt ba waqt ímá aur ishára detá rahá, kí nazdík thá jab haqíqí aur aslí fidá nazar áwe ; aur wuh, jo zamání aur guzarnewálí thí, us men, jo haqqí aur dáimí hai, apná anjám páwe.

Jab Ísá ko maḷúm thá, kí pahlí aur zamání íd ká ahwál púra húa, aur apne anjám tak pahunchá, us ne apne shágirdon ke sámhne naí, aur haqqíqí aur dáimí us ke badle ṭhaharáí. Usí rát, kí jis men wuh pakarwáyá gayá, us ne shágirdon par záhír kiyá, kí yih pichhlí dafa hai, kí main tumháre sáth íd i fasah kí hifázat karúngá. Aur jab fasah ká kám tamám húa, us ne “roṭí lí aur us par duá kí, aur torí, aur shágirdon ko dí, aur kahá, Leo, kḥáo, yih merá badan hai. Tab piyále ko bhí (yaṇe sharáb ká) liyá, aur shukr kiyá ; phir yih kahke un ko diyá, Tum sab is men se píó : kyúunki yih nae áhd ká merá lahú hai, jo bahuton ke gunáhon kí muáfí ke liye baháyá játá hai.” Matí 26 : 26. Is kám ká matlab us waqt un se chhipá rahá. Lekin baḍ us ke, kí wuh

maslúb húa, aur jí uṭhá, aur ásmán par charhke Rúh Pák ká inám un par uṇelá, tab us kám ká matlab roshní meṇ áyá. Áge se us ne bár bár un ko ishára dekar sáf kahá thá, ki wuh “*khidmat lena* ke wáste nahín, balki *khidmat karne*, aur apní ján ko bahuteron ke fidá meṇ dene ke wáste dunyá meṇ áyá.” Matí 20 : 28. Us ne sáf kahá thá, ki us ká jáná un ke liye mufíd hai ; ki jab tak wuh na jáwe, Tasallí-denewálá un pás na áwega. Yuh. 16 : 7. Lekin baḍ us ke jí uṭhne ke thá, ki “us ne un kí samajh ko kholá, ki nabíon kí kitábeṇ sam-jheṇ, aur un se kahá, ki Yún hí likhá hai, aur yún hí zarúr thá, ki Ma-síh dukh uṭháwe, aur tísre din murdoṇ meṇ se jí uṭhe ; aur Aursha-lím se leke sári qaumon meṇ tauba aur gunáhoṇ kí baḥshish us ke nám se manádi kí jáwe.” Aur yún hí sab kuchh, jo Músá kí Tauet, aur nabíon kí kitábon, aur Zabúr meṇ us ke báb meṇ likhá hai, púra húa. Lúká, 24 : 44—48. Tab un ko sújh parí, ki íd i fasah apná anjám aur insirám tak pahunchá, aur áge ko fasah i Masíhí, yaṇe Ashá i Rabbání, jis meṇ roṭí aur sharáb Masíh kí fidái maut kí nisháníṇ haiṇ, us ke badle meṇ mastámal hogá.

Pas, yih ek rasm i zikarí hai. Lekin kis chíz ká tazkira ? In do chízon ká tazkira ; yaṇe, Masíh ne hamáre badle gunahgár mahsúb ho-
kar kaisá bhári bojh *hamáre gunáhoṇ* ká uṭhá liyá—aur hamáre liye kaisí barí naját ko apne beshqímat lahú se mol liyá.

In do báton kí isbát meṇ bāze nabí aur hawáríon kí gawáhí suniye. “Wuh hamáre gunáhoṇ ke liye gháyal kiyá gayá, aur hamári badká-ríon ke wáste kuchlá gayá ; hamári salámatí ke live us par siyásat húi, aur us ke zaḥmí hone se ham change húa. Ham sab bheron kí mánind bhaṭak gae ; ham meṇ se har ek apní apní ráh par mutawajjih húa, aur *Khudá* ne ham sab kí badkári us par ládí.” Yas. 53 : 4—6. “Aur main Dáúd ke gharáne par, aur Aurshalím ke báshindon par fazl aur duáon kí rúh uṇelúngá, aur we mujh par, jise unhoṇ ne chhedá hai, nazar karenge, aur we us ke liye mátam karenge, jaisá koí apne eklaute ke liye mátam kartá hai ; aur us ke liye gamgín ho-wenge, jis tarah koí apne pahlaṭhe ke liye gamgín hotá hai.” Zak. 12 : 10. “Wuh *hamári khatáon* ke wáste hawála kiyá gayá, aur hamári tasdíq ke wáste jiláyá gayá.” Róm. 4 : 25. *Khudá* ne “us ko ; jo gunáh se wáqif na thá, hamáre badle gunáh ṭaharáyá, ya-ne gunahgár sá sulúk kiyá, táki ham us ke sabab lláhi rástbázi ṭaha-reṇ.” 2 Kar. 5 : 21.

“Ab ákhirí zamáne meṇ wuh ek bár záhir húa, táki apne taín qur-bán karne se gunáh ko nest kare. Aur jaisá ádmíon ke liye ek bár marná muqarrar hai, aur baḍ us ke áḍálat ; aisá hí Masíh ek bár sabhoṇ ke gunáhoṇ ká bojh uṭháne ke liye qurbán kiyá gayá ; aur un ke liye, jo us ke phir áne ke muntazar haiṇ, bagair gunáh ke, wuh naját ke liye phir záhir hogá.” 1br. 9. “Us ne áp apne badan meṇ hamáre gunáhoṇ ko salíb par uṭhá liyá, táki ham gunáhoṇ se chhúṭke rástbázi meṇ chalen ; jis ke már kháne se tum change húa.” 1 Pat. 2 : 24. “Kyúнки Masíh ne bhí ek bár gunáhoṇ ke wás-te dukh uṭháyá, rástbáz nárástoṇ ke liye, táki wuh ham ko *Khudá* ke nazdík pahuncháwe.” 1 Pat. 3 : 18. “Aur Isá Masíh kí taraf se, jo sachchá gawáh, aur un meṇ se, jo marke jí uṭhe, pahlaṭhá, aur

dunyá ke bádsháhon ká sardár hai; jis ne ham ko piyár kiyá, aur apne lahu se hamáre gunáhon ko dho dālā, aur ham ko bádsháh aur káhin Kḥudá ke, yaṇe apne Báp ke liye banáyá.” Musháhadát, 1 : 5.

Aisí áyaton se, jo Injil meṇ bahut haiṇ, wázih hai, ki us ke sáre ímándáron ke gunáhon ká bojḥ us par ládá gayá. Aur yih kaisí bojḥ ! Har ek gunáh ek badí i beniháyat hai. Bashar ká maqdúr nahín, ki ek hí gunáh ká andáz kare. Aur har ek ímándár, jo apne ahwál par dhíyán kare, pahchánegá, ki us hí ke gunáh shumár meṇ lákhon haiṇ, jo yád meṇ áweṇ; aur jo yád se guzre haiṇ, beshumár. Aur unmeṇ bahutere haiṇ, jo niháyat bhárí aur beqiyás ṭaharte haiṇ. So un ká kull jamá kyá hogá ? Har ek zamáne, aur har ek mulk ke sáre bache húon ke gunáh us ke mahsúb hue, aur un ká bár us par ládá gayá, aur un kí siyásat us par parí ! Ai sunnewále, tere gunáhon ká shumár kitná, aur un kí láiq siyásat kaisí ! Agar sabhon ká bár tujhí par ládá játá, aur Kḥudá tujhí se un sabhon ká intiqám letá, to anjám i kár kyá hotá ? Masih i mubáarak ne terí kḥátir un sabhon kí siyásat páí. Us kí zát i Iláhí ne use sambhálá, jab us ká jism i insání tere gunáhon ke bojḥ ke niche gor tak dabáyá gayá ! Agar wuh faqat *insán* hotá, to aise bojḥ ke niche kyá kartá ! Kḥudá kí pák zát har ek qism kí badkárí ke liye “ek bhasam karnewáli ág hai.” Aur us ke nazdík tere bad fíal aur bad tasauwur kitne haiṇ ? Aur har ek kí siyásat abad ul ábád tak barháí jáe, to un kí haqíqat kyá hotí ? Aur terí rihái aur salámatí ke liye Kḥudá ne un sab kí siyásat us par pahunchái. Isí bát ke tazkira aur yádgárí ke liye Ashá i Rabbání muqarrar húa. Yahúdíon ke nazdík id i fasah meṇ us Misrí naját i zamání aur majází ká yádgár, aur haqíqí, aur abadí naját ká, jo Masih kí fidái maut se hásil húi, ishára thá. Masih ko maḥlúm thá, ki Iláhí ihsán ko bhúlná yá haqír jánná insání hai. Pas, apne sab pairauon ke liye farmáyá, ki waqt ba waqt we thoří sí roṭí aur sharáb ke istiámál meṇ us kí fidái maut aur us ká muhásil apní apní yád meṇ láweṇ.

Us ne kuchh hukm nahíṇ diyá, ki sál meṇ kitní bár us kí muháfazat howe. Faqat yihí ṭaharáyá, ki bár bár howe. “Yih merí yádgárí ke liye *kiyá karo*.”—yaṇe jitní óár kalísiyá ke ámilon kí samajh meṇ indal waqt munásib aur mufíd howe. Taklíf aur tangí ke dinon meṇ albatta fáidamand hai, ki us kí kasrat howe. Kyúнки aisá karke ímándár us se tasallí aur dilásá hásil kartá hai.

Maháfizat us kí *kab tak* baní rahegí ? Jab tak dunyá qáim rahegí, yá koí ímándár us kí musáfirat kí taklífon meṇ mubtalá howegá : muwáfíq us ke, jo Injil meṇ hai, “Kyunki jab jab tum yih roṭí kḥáte, aur yih piyálá píte ho, to tum Kḥudáwand kí maut ko, jab *tak ki wuh á jáwe*, dikháte rahte ho.” 1 Kar. 11 : 26. Jab Kḥudáwand ke guzidon ká shumár kámil ho, aur wuh dunyá ke insáf ke liye phir áwegá, tab yih sunnat tamám aur mauqúf hogí. Tab tak us ke sáre pairauon par farz, aur un ke liye niháyat faidamand hai, ki us kí maháfizat kiyá kareṇ.

Par jis sunnat kí maháfizat yahán tak qáim aur bhárí hai, bare taammul aur tasauwur ke láiq hai, ki us kí hifázat kaisí kareṇ, aur us kí taiyárí kyá hai ? Yih bát us ke kalám hí se síkhá cháhiye.

1. *Pahlá*, ashá i rabbání meṇ sharík hone se áge lázim hai, ki har

koí apne dil ke jánchne se, apne sáre gunáhon, taqsíron, bad ádaton ko daryáft kare, mánind Injíl kí is saláh aur hukm ke, “Tum puráne khamír ko nikál phenko, táki, tází lúf bano ; kyúнки tum bekhamír ho ; is liye ki hamará fasah, yañe Masíh, hamáre liye qurbán kiyá gayá hai.” Yañe Yahúdíon par farz húá, ki íd i fasah kí hifázat bekhamír roṭí se karen. Un ká dastúr thá, ki íd kí taiyári meñ battí jalákar apne apne ghar ke har ek goshe aur kone meñ khamír ke wáste khub talásh karen ; na ho, ki zará bhí kahín chhipá húá rahe. Pas, agar us íd meñ, jo faqat zamáni aur ishárádár thí, aur qurbán us ká adná jánwar thá, aísí talásh chhipe khamír ke wáste láiq aur lázim thí, to kitná ziyáda is íd i haqíqí, jis ká qurbán aur fidiya Masíh hai, dil ko jánch lená, gunáh aur badí ke chhipe húe khamír ke wáste, zarúr hotá hai. Aur íd kí hifázat karná “puráne khamír se nahín, aur na badí na sharárat ke khamír se, balki dil kí safái aur sachái kí bekhamíri roṭí se.” Har ek ko, jo us meñ shirkat páwe, yih jáná cháhiye, ki us ká badan Rúh Quds ká maskan hai, jo us meñ rahtá hai, jise us ne Kḥudá se páyá ; aur wuh apná nahín hai, balki wuh mol se mol liyá gayá ; aur farz us ká hai, ki apne jism aur ján se Kḥudá ká ijlál kare. 1 Kar. 6 : 19. Phir Injíl use yúḡ chitáti hai, “Kyá tum nahín jánte, ki nárást Kḥudá kí bádsháhat ke wáris na honge ? Fareb na kháo, ki harámkár, aur but parast, aur záni, aur gándú, aur laundebáz, aur chor, aur lálchí, aur maiparast, aur fahhásh, aur zálím, Kḥudá kí bádsháhat ke wáris na honge. Aur bāze tum meñ se aise hí the ; lekin tum Kḥudáwand Isá ke nám se, aur hamáre Kḥudá kí Rúh se naháe, aur pák kie gae, aur sádiq ṭhahare.” 1 Kar. 6 : 9—11.

“Aur jism ke kám to záhir haiḡ, ki ye haiḡ, ziná, harámkári, nápákí, shahwat, butparastí, jádúgarí, dushmaniáḡ, jhagre, tundiáḡ, gazab, takráren, judáiḡ, bidāten, hasad, qatl, mastiáḡ, shor o shar, aur jo kám ki un ke mánind haiḡ ; aur un kí bábat main tumhen áge hí kahtá hún, jaisá main ne áge yih kahá hai, ki Aise kám karnewále Kḥudá kí bádsháhat ke wáris na honge.” Gal. 5 : 19—21. Yañe jo koí apne dil meñ yá chál meñ in meñ se kisi ke ásár páwe, wuh Kḥudáwand kí ziyáfat se mahrúm hai, aur chitáyá játá hai, ki jab tak fazl i Iláhi kí madad se in sab ko na dabáwe, tab tak Ashá i Rabbání meñ baiṭhne kí jurat na kare. Wuh us se fáida nahíḡ, balki ilzám hásil karegá. “Pas, ádmí pahle apne taiḡ ázmáwe, aur yúnhí us roṭí se kháwe, aur us piyále se piwe ; kyúнки jo koí náláiq taur se khátá aur pítá hai, wuh Kḥudáwand ke badan ká liház na kərke apná ilzám khátá aur pítá hai. Isí sabab se tum meñ bahutere kamzor aur bímár haiḡ, aur kitne so gae. Agar ham apne taiḡ jánchte to sazá na páte. Aur Kḥudáwand hamen sazá deke tarbiyat kartá hai, na ho ki ham par dunyá ke sáth sazá ká hukm howe.” 1 Kar. 11 : 28—32. Par jo jo apne dil meñ aur chál meñ Rúh ke phal páte haiḡ, is ziyáfat meñ un ke liye dawát aur rasái haiḡ. Aur “Rúh ke phal jo haiḡ, so ye haiḡ, yañe mahabbat, aur surúr, árám, aur sabr, aur muláimat, aur nek chálí, aur ímán, aur farotaní, aur parhezgári ; aur koí shariát in kámon ke muḡhálif nahíḡ hai. Aur unhon ne, jo Masíh ke haiḡ, jism ko jismí hawá o hawas samet salíb par mára hai.” Gal. 5 : 22—24.

Un par, jo sazawárí se is ziyáfat men dákhil hon, lázim hai, ki apní az-máish karen, tá jánen, ki un men shinákhht hai, jo Khudáwand ke badan ko us men pahcháne; aur *imán*, jo us kí pahcháñ se zor pakare—aur *tauba* ke wáste, aur *mahabbat*, aur *ain tábidárí*; tá na howe ki náláiq taur par ákar we apná ilzám kháwen aur píwen.

Ki agar un men aisi shinákhht na ho, ki us rotí aur piyále men Khudáwand ke tore húe badan, aur baháe húe lahú ko pahcháne, to yih ziyáfat un se palid aur zalil kí játí, aur us ká *ain mane záya* hotá hai.

Agar un ke dil men *imán* na ho, to is ziyáfat men na sihat na shifá bakhshnewálí qúwat hogí. Ki *imán* hí hai, jo in nishánon men Khudáwand ko pahchántá hai, aur us ke fáidon ko apne wáste takhsís karne, aur us se rúhání khurish hásil karne kí qúwat detá hai.

Aur sachchá *tauba* na ho, to un ko *gunáh kí ain badí* kí láiq pahchán na hotí, aur na Masih ke dukhon kí qadr ká láiq andáz, na is sunnat ke *ain mane* un ko kullí malúm hote. Kyúнки jahán *gunáh kí ain badí* kisi ko khúb malúm ho, aur yih bhí ki us badí ke dafaiya ke liye Masih i mubáarak ne aise dukh, jo be andáz hain, bardásht kie, aur apní ján i ázíz ko niyáz karne se us ke liye is ziyáfat kí rasái aur ummaid ko hásil kiyá, albatta wuh apne *gunáhon* ke sabab pachtáwegá, aur pashemán hogá.

Agar *mahabbat* na howe, to un kí pahchán aur idrák us ke haqq men tira aur náqis hongí. Kyúнки yih kis tarah se mumkin ho, ki ham us kí mahabbat ke láiq andáz páwen, aur us par taammul karen, aur mahabbat kí jumbish hamáre dil men na howe? “Use piyár karte hain ham is liye, ki us ne pahle ham ko piyár kiyá,” aur hamáre wáste apne tañ niyáz kiyá. “Is se barí dostí koí nahín rakhtá, ki ádmí apne doston ke wáste apní ján de.” Yuh. 15 : 13. Agar hamen yaqín ho, ki hamára aisá dostdár hai, jis ne hamáre fidá men apní hí ján ko diyá, albatta us ko piyár karenge, aur mahabbat aur shukrána ke sáth us dost ká tazkira karenge. Lekin us ne na faqat hamen piyár kiyá, aur apne tañ hamáre fidá men diyá; balki yih sab kuchh kiyá, jab ham us ke dushman the, aur dil o ján se us kí dushmaní karte chale játe ! Phir ham us ke wasíle se miláe jákar, aur apní dushmaní se kháli hokar, kyúńkar us ko piyár na karen ? Aur jab áshá i Rabbání men us kí mahabbat aur fidái maut ke nishánon ko apne háth men lewen, to kyá hamáre dilon men mahabbat kí ján aur jumbish na hogí ?

Aur naí aur *ain tábidárí* ká iráda dil men na ho, to us shaḡhs ko is ziyáfat men na rasái, na maqbúliyat howegí. Jab tak koí Masih ko qabúl na kare, aur na us kí panáh pakre, tab tak agar tábidárí kí koshish kare, yá khwáhish bhí rakhe, wuh *dar* ke máre—siyásat ke *dar* ke máre, yih koshish kartá hai. To us kí tábidárí faqat *gulám* kí tábidárí hai—láthí kí már kháne ká *dar*. Aisi tábidárí Khudá ke nazdík pasand nahín áti. Lekin bad us ke ki Masih ko qabúl kiyá, aur jab us men páyá gayá, tab Khudá ko Masih men dunyá ke sáth miláyá aur manáyá húa dekhkar us ko apná Báp kah saaktá hai; aur us kí tábidárí ummaid aur dilásá se milí húi hogí. Tab us kí tábidárí *beṭe* kí sí hogí.

Jo ádmí ki bagair in chízon ke áshá i Rabbání men shámil ho, fáida

na páwegá, balki siyásat ko kháegá píegá; wuh náláiqána us meṇ shámil hotá. Us ke dil aur azúṇ meṇ gunáh amal aur tasallut kartá rahegá. Dil us ká albatṭa us ráh ko, jo kharábí aur maut ke kḥánon tak pahunchátí hai, pasand karegá.

Lekin jo shaḵhs kī sacháí aur sidq i dil se, aur láiq taiyárí ke sáth Kḥudáwand kī ziyáfat meṇ áwe, aur aḥshá i Rabbání meṇ shámil ho, Kḥudáwand ko bahut hí nazdík jántá hai. Wuh yaqínan jántá aur pahchántá hai, kī Isá i mubáarak harchand jismání taur par gair házir, par rúhání taur par házir o názir hai, aur apní bharpúrí se un ke dilṇ ko bhar detá hai; aur us ke waḍe ke wafá aur itmám ko, kī “jahán kahīn us ke shágirdṇ meṇ se do yá tīn us ke nám se ekaṭṭhe hoṇ, wuh un ke sáth házir hai,” hásil kartá hai. Wuh us kī bharpúrí aur parwardigárí se sab kuchh, jo donṇ jahán ke wáste dard-kár ho, hásil kartá hai. Dunyá kī musáfirat kī taklíf, aur imtihán, aur andeshṇ ke wáste qúwat, aur dilásá, aur hidáyat, aur muáfi, aur maqbúliyat, aur miláp Kḥudá ke sáth, aur rasáí us kī huzúrí tak, aur rástbází i abadí, kī jis ke sabab se us ke gunáh phir tazkire meṇ na áwenge.

Kḥulússa is muqaddame ká yih hai, kī jo koí is ziyáfat i Rabbání meṇ shámil hone cháhe, us par lázim hai, kī apne hál ko jánch le, aur láiq taiyárí ko ḍhúnḍhe. Farz hai, kī Masíḥ kī chál ko apná namúna jánkar aisá chale jaisá wuhí chalá, jab dunyá meṇ thá; aur apne taīn jismání kḥwábishoṇ kī tasallut se pák rakhe, jaisá Masíḥ pák hai. Kyúinki is meṇ hamen rúhání taur par Isá hí ke sáth, aur us ke sáre shágird aur múminṇ ke sáth, sájbhá aur ham suhbat hai. Pas, aisí suhbat aur sájbhá ke láiq chál chalan kiyá cháhiye.

Aḥshá i Rabbání meṇ Masíḥ kī kḥássiyaṭ aur kám hamárí ánkhoṇ ke áge záhír kie játe haiṇ. Ham phirke us ko apní ján bahuterṇ ke fidá meṇ dete húe dekhte haiṇ. Us ká badan phirke torá játá, aur us ká lohú ádmíṇ ke gunáhoṇ ke wáste baháyá játá. Us kī shafaqat is dunyá i kharába par hamáre áge záhír kī játí. Hamen phir yád átá hai, kī us ne ham ko piyár kiyá, aur apne taīn hamáre wáste niyáz kiyá; kī “wuh jo Báp kī shán kī shaukat hai, aur sab chízoṇ ko apne suḵhan kī qúwat se sambháltá hai, apne ko niyáz karne se hamáre gunáhoṇ ko dafá karke, Janáb i Aḷí ke dahne já baīthá.” Hamen yád átá hai, kī us hí se, jis ke ham píchhe píchhe salīb tak játe, “sab chízen, jo ásmán meṇ, yá zamín meṇ, kyá dekhí, kyá andekhhí,—sab us hí se khalq kī gaīn, aur us hí se sambháli játi haiṇ.” Hamárí yád meṇ zurúr áwegá, kī “Wuh ab sab chízoṇ par kalísiyá ke liye sir hai; aur aisá nám páyá, jo har ek nám se, jo dunyá meṇ, yá áqibat meṇ námída hai, afzal hai;”—aur ek bádsháhat meṇ, jo dáimí hai, saltanat kartá hai, aur hukúmat i be zawál meṇ. Zarúr hamárí yád meṇ áwegá, kī wuh dīn nazdík hai, jis meṇ wuh ásmán ke bádaloṇ meṇ apne firishtoṇ ke sáth zuhúr karegá, aur sáre murdoṇ ko un kī qabroṇ meṇ se buláwegá, aur murdoṇ aur zindoṇ ká insáf karegá; aur us ke chihre se ásmán, aur zamín bhágenge, aur un ke wáste jagah kahīn na milegí. Yih wuhí hai, jis ne hamáre fidá ke liye apne taīn niyáz kiyá; aur jo hamárí riháí ke wáste salīb par kḥún-basta laṭká, aur zaḵmí, aur kuchlá jákar mar gayá. Wuh kaun hai, jis ke dil meṇ

ásmání rúh kí shirkat yá jumbish zara bhí ho, lashkar i bacháe húon ke sáth pukárne men mustaid na ho, ki “Láiq hai wuh Bara, jo zabh kiyá gayá, kí qudrat, aur daulat, aur hikmat, aur quwat, aur izzat, aur jalálat, aur barkat ká málik howe;—ki us ne har ek qabíle, aur zubán, aur guroh, aur mamlukat se ham ko Alláh ke liye apne lohú se mol liyá, aur ham ko hamáre K̄hudá ke wáste salátín, aur asháb i kahánat banáyá hai.”

Yih ziyáfat i Rabbání, ki jis men yád kiyá jáná us ko khush átá hai, us hí ne muqarrar kí. Is ke matlab men kuchh nahín, jo mushkil ho, balki sáda dil use sahaj se samajh saktá hai. Jab jab ham us kí hifázat ke liye ekat̄the hote, wuh kár i azím, ki jise us ne hamáre wáste kiyá, hamáre rú ba rú dikháyá játá hai. Hamárá ján bhí auron kí mánind nápak, aur bigrí, aur mujrim thí. Ham bhí kinár i tabáhi par khare the, aur us kafára aur fidá i azím ke beniháyat hájatmand the. “Koi ánk̄h na thí, kí shafaqat kare, na bázú, kí hamen bacháwe.” Aur ham ne apne khatre ko nahín dekhá, aur na us se rihái ke liye khwáhish rakhí. Us khatra i azím ke waqt ankhojá, aur ná matlúb wuh shafí i zúljalál hamáre aur hamárá tabáhi ke darmiyán áyá, aur ap hamárá badlá ho gayá. Tab K̄hudá ne hamárá rúhon ke haqq men farmáyá, ki “Gor men paṛne se bachá, kí main ne fidá ko páyá.” Hamáre gunáhon kí najásat ko us ne apne lohú se dho dala. Hamáre dil kí kharábí, us “jar i karwáhat” ko, ki jis se ham palid kie játe the, us ne dúr kiyá; aur apne sáre khális aur sachche pairaon ke wáste ásmání bádsháhat ke darwáze ko kholá. Us ne maut ke nesh, aur gor ke galbe ko nest kiyá, aur gor ke sunsán aur udás makán se, jahán i baqá kí roshní aur jalál ko rasta dikhlayá. Aur wahán ek takht i buland par baithke, un sabhon ke liye shafáat kartá hai, tá we dushmanon se panáh, aur apne gunáhon ke zor se rihái pákar, ákhir tak pákizagí aur sáf dilí men taraqqí karte jáwen. Aur us jahán i ráhat se un ko pukártá rahtá hai, ki “Ai sab koi, jo thake, aur zerbár ho, mere pás áo; main tumhen áram dúngá.” Wuh un kí sári ráhon par nigáh rakhtá hai, aur un ke pánw ko thokar se, aur un kí ánkhen ánsúon se, aur un kí jánon ko balá se bachátá hai. Un kí sári kamzoríon, aur imti-hánon, aur khatron, aur dushmanon par nigáh rakhtá hai. Aur ek ek ko yih kahtá hai, “Tú yahán hí tak á, par is se áge nahín.” Aur un ke háth ko sambhálke haiyát kí ráh men unhen le chaltá hai. Wuh un ke áh bharne ko suntá, un ke ánsúon ko shumár kartá, aur un kí mihnat, aur mashaqaton ko apní kitáb i yádgár men marqúm kartá hai. “Wuh masle húe senthe ko na toregá, aur na san ko, jis se dhúán ughtá hai, bujháegá, aur rástí ko amn ke sáth záhir karegá.” Yas. 42 : 3. Wuh unhen ákhiran, har ek dushman ke úpar galba baṁshegá, aur har ek khatre se rihái. Zill i maut kí wádí men dilásá aur salámatí ke sáth wuh un kí rahnumái karegá; aur apní charí aur láthí se un ko sambhálke, aur us zamín i roshan aur sulh men, jo maut ke pár hai, unhen pahuncháwegá. Wahán unhen harek khatá, aur galatí, aur bhúl chúk, aur najásat, aur aib, aur taqsír se kullí pák karke apne huzúr men jagah detá hai, jahán pur khúshí o shádmání tá abad hain.

Pas, ai mere bhái, yá bahin, jo ye báten parhtá, yá suntá hai, aur

is ziyáfat i Rabbání men hissadár hone ká muntazar hai, agar terá iqrár haqíqí, aur dil terá taiyár hai, to úpar mazkúra ummaid aur huqúq tere hí hain. Agar terí ummaid yihí ho, to tujhe bedár honá, aur jatan kiyá cháhiye, ki “haqq kí tábidárí karke Rúh ke wasíle se apne dil ko pák kare, yahán tak, ki tujh men bháíon kí beriyá mahabbat paidá howe. Kyúнки agar bháíon ko, jinhen tú ne dekhá hai, piyár na kare, to Kḥudáwand ko, jise nahín dekhá hai, kis tarah se piyár karegá?”

Aur saláh aur nasíhat kí bát, jo Injíl se átí hai, sun le, aur apní kḥatír men rakh. “Kí tum tuḥm i fání se nahín, balki gair fání se, yaṇe Kḥudá ke kalám se, jo hamesha zinda aur báqí hai, sar i nau paidá húe. Is wáste tum har ek badí, aur har ek ḍagá, aur makr, aur ḍáh, aur sárí badgoíon ko chhoṛke, nanhe bachchoṇ kí mánind Kalám ke kḥális dúdh ke mushtáq ho, táki tum us se baṛhte jáo; agar aisá ho, ki tum ne maza páyá, kí Kḥudáwand mihrbán hai. Kí tum ek kḥándán i maqbúl, aur sháhí kahánat, aur ummat i muqaddas, aur qaum i maḥsús húe ho, táki tum us kí fazílaton ko, jis ne tumhen táríkí se apní aḗib roshní men buláyá, záhir karo. Ai piyáro, main tum se yú, jaise pardesíon, aur musáfiroṇ se iltimás kartá hún, ki tum jismání shahwaton se, jo ján ke muqábil laṛte hain, parhez karo. Aur apní chalan gair qaumon ke bích nekí ke sáth rakho; táki we jo tumhen badkár jánke tumhári badgoí karte hain, tumháre bhale kámon par nazar karke, tawajjuh ke din Kḥudá ká ijlál karen. Aur chaukas hokar aglí chalan kí bábat, us purání insániyat ko, jo fareb denewáli shahwaton ke sabab se kḥaráb húi hai, utáro. Aur apne dil, aur tabíat kí nisbat men nae bano. Aur naí insániyat ko, jo Kḥudá ke muwáfíq rástbází, aur sachái kí pákízagí men paidá húi, pahino. So daroggoí chhoṛke, har ek apne qaríb se sach bole, is liye kí ham to báham ek dústre ke aḗú hain. Gusse hokar gunáh mat karo; aisá na ho, kí áftáb gurúb ho, aur tum kḥafá ke kḥafá raho. Shaitán ko jagah na do. Koí gandí bát tumhare munh se na nikle, balki wuhí, jo nek cháli ke liye mufid ho, táki sunnewálon ko fáida baḥshe. Aur Kḥudá kí Rúh i Quds ko, jis se tum par chhuṭkára ke din tak muhr húi, ranjída na karo. Sári karwáhaṭ, aur gazab, aur gussa, aur gul, aur badgoí, tamám bad kḥwáhíon samet tum se dúr ho jáwen. Tum ek dústre par mihrbán ho, dardmand, aur ek dústre ko baḥshá karo; chunánchi Kḥudá ne bhí Masih ke liye tumhen baḥshá hai.”

Agar tumhári chalan aisí ho, aur ye chízen tumhári chál men mashhúr aur wufúr hon, to tumhári ummaid aur diní iqrár tumháre liye aisá hogá, jaisá chashma hayát ká; aur dhára us kí tumháre hamsáyon men se saikaron ko barakaten pahuncháwengí, aur bahutere uṭhenge, aur tumháre namúna, aur nek cháli ke liye Kḥudá ká ijlál karenge.

ASHA' I RABBA'NI' kí hifázat karte waqt tasauwar aur taammul is taur par mufid aur munásib honge, yaṇe, “Ai merí ján, yih matlúb aur mubáarak waqt á pahunchá hai, lekin jald guzregá! Tú use aḗíz ján,

aur us se nafa hásil kar. Apní ánkhen dunyá kí fání aur bátíl chízon se uṭhá le, aur Masíh, apne Ḳhudáwand i shafíq par tawajjuh kar : takrím aur tawázú i kámil se us kí mahabbat aur shafaqat par gaur kar. Tere tasauwar báham, aur sanjída hon ; terí sárí qúwatan aur hawáss apne Rabb ke milne ko kamar-basta howen. Main apne bár i ḵhátir us ke huzúr batáún, aur utárun.

Ai Ḳhudáwand, jo akelá har ek dil ká jánchnewálá hai, merí kam-zorion par tawajjuh aur yáwarí kar. Har ek achchhá bíj, kí tere kalám aur terí Rúh se mere dil meṇ boyá gayá hai, ugáíye, phailáíye. Har ek ḵhiyál i bátíl aur hiss i bejá, kí mere dil meṇ jumbish kare, yá jagah páwe, dabáyá jáe, dúr kiyá jáwe.

Dekh, ai merí ján, “ Ḳhudá ke barre ko, jo jahán ke gunáhon ko uṭhá le játá hai.” Durustí se wuh barra kahlátá hai, kí maśúmiyat us kí be dág aur be aib thí, aur halímí, aur sabr be tabaddul aur be intihá. Durustí se wuh Ḳhudá ká barra kahlátá hai, kí us ke qurbán aur fidá ká muhásil, mánind Ḳhudá kí mahabbat kí, sárí qaumon ke liye hai. “ Wuh mazlúm thá, aur gamzada, tau bhí apná munh nahín kholí. Use barre kí mánind zabh karne le gae ; aur jis tarah bher apne bál katarnewálon ke áge gúngá hai, us ne apní zubán nahín kholá.” Yas. 53 : 7. Na dagá, na gálí, na lanat, na karwáhaṭ us kí zubán meṇ thí. Kyá tú us ká pairau hai, aur is ḵhitáb par faḵhr kartá hai ? To us hí kí tarah be dagá aur be dág ho : us hí kí tarah halím aur ḵháksár ho ; us hí kí mánind badí, aur jhagre, aur jabr se dúr rah. Aur jabr, aur bad sulúki ke sah lene meṇ, mánind us kí mustaid ho.

Lekin Ḳhudá ká yih barra gunáh ko kis tarah se dúr kartá hai ? Apne hí jism meṇ us kí láiq sazá bardásht karne se us ne gunáh ke zor ko dafá kiyá. Wuh hamárí ḵhatáon ke liye gháyál kiya gayá, aur hamárí changáí, aur sulh i sání kí siyásat us par parí. O, bár i azím, jo Rabb hí ko jism meṇ gor tak dabáyá ! Hée, bár i azím, gunáhon ká, kí agar Ḳhudáwand áp use na uṭhátá, to jahán ko gor tak, hán, jahannam tak dabátá ! Lekin jab gunáh kí, hán, mere gunáhon kí siyásat púrí húi, tab mere Rabb ne apní ain qudrat se, gor ke bandhan ko torá, aur jí uṭhkar haiyát ká Peshwá húa. “ Láiq hai barra, jo zabh kiya gayá, kí qudrat, aur daulat, aur hikmat, aur qúwat, aur iz-zat, aur jalálat, aur barakat ká málik ho.” Kyá tú, ai Ḳhudáwand Ísá, jis ke muqábil dunyá, aur us kí maśmúrí náchíz hai, kyá tú ne apne taín mere liye salíb par niyáz kiya ! Aur apní maut ke muhásil ká girau, aur baiána is ziyáfat meṇ mere áge rakhtá hai ! To main apne taín terí ḵhidmat aur ijál ke liye niyáz kartá hún. Kásh kí main terí tawajjuh ke láiq hotá ; par jaisá main hún, waisá tujhe detá hún. Mujhe qabúl kar, aur merá mizáj apná sá baná. Apní ḵhúbíán mujh par atá kar. Mere dil aur azúon ko pák aur táhir kar, táki har ek há-lat aur muamalat meṇ tere ahkám bajá láún, aur ain tábidári meṇ apní umr basar karún. Baḵsh, ai mere Rabb, kí main shikasta aur píse húe dil ko tujhe nazr karún, kí tú aisí qurbáni kí tahqír na karegá.

Mere Rabb i mubárák ne na faqat apne jism meṇ dukh uṭháya ; balki us ká báharí aur jismání dukh, har chand kí hamáre qiyás se báhar, tau bhí us ke dukhon meṇ thorá hí hissa thá. Ján us kí marne

tak gamnák húi. Us bág men ranj us kí *rúh* ká yahán tak shadíd húa, kí pasíná us ká lahú ke bare bare qatre kí mánind zamín par *ṭa-paktá* jātá thá. Aur jánkaní men hokar us ne yún duá mángí, “Agar mumkin ho, ai mere Báp, to yih piyála mujh se guzre!” Lekin agar wuh piyála us se guzartá, to mere gunáhon ká kafára na hotá, aur naját kí ummaid kuchh bhí na raktí. Mere gunáhon ke da-faiye ke liye us ne yih sab ranj aur dukh ko sah liyá. Ai merí ján, ap-ne Rabb kí mahabbat aur gam ko dekhkar, kyá tú us se phir kabhí bezár, yá sharminda howegí?

Yaqíqan, ai mere *Ḳhudáwand*, main terá banda hún; paidáish se, *ḵharíd* se, *ahd* se main terá hí hún. Aur is nisbat men main surúr aur tafáḵhur kartá, aur us ke sáre farzon ko qabúl kartá hún. Main ne *ahd* bándhá hai tere sáth, aur us se na haṭungá. Ai mere Rabb, mujhe kyá karná hai? Mujh se, aur mere se, jo terí nazar men bihtar ho, so kar. Terá kám hai, farmáná; aur merá hai, bajá láná. Tú hí ne mujhe *ḵharídá* hai apne lahú ke mol se. To main apne taín, jism aur ján samet, terí *ḵhidmat* ke liye ek “zinda qurbán” sá niyáz kartá hún, kí yih merí láiq aur aqlí *ḵhidmat* hai.” Is men apne fazl kí yáwarí bakhsh, aur merí nazar ko qabúl kar.

XV.

MASÍHION KÍ JAWÁBDIHÍ.

REV. J. WARREN KÍ TASNÍF.

Tum zamín ke namak ho : par agar namak phíká ho jáwe, to kis se nam-kín kiya jáegá? Wuh phir kisú kám ká nahín : wuh báhar phenká, aur ádmíon se latárá jáwe. Tum dunyá ke núr ho. Jo shahr pahár par baná hai, poshída nahín ho saktá. Aur log chirág raushan kar-ke paímáne ke niche nahín, talki chirágdán par rakhte hain; tab wuh sab ko, jo us ghar men hain, raushní detá hai. Tumhárá raushní ádmíon ke sámhne waisíhí chamke, túki we tumháre achchhe kámon ko dekhén, aur tumháre Báp kí, jo ásmán par hai, sitáish karen.— Matí, 5 : 13—16.

YIH sanad us ibárat men se, jo Masíh kí pahárá waz kahlátí hai, lí gaí hai. Us waz ká iráda yih hai, kí sab logon ko, aur *ḵháss* karke apne shágirdon ko, shariát ká rúhání matlab, aur sachchí dindárá kí sifat, aur dindáron kí jawábdihí, sikhláwe. Merá iráda is waqt hai, kí *Masíhion* ke jawábdihí hone ká mazmún kholún.

Aur is men lafz i jawábdihí se yih murád hai, kí *Ḳhudá* ham se sá-

ri munásibat aur farz kí bábat hisáb legá ;—us ne hamen kuchh supurd kiyá, aur bahut kuchh farz thahráyá hai ;—aur ham se sab kí bábat *jawáb* legá. Is se ham *jawábdih* thaharte hai. Itná bayán karne ke bad ham daryáft karen, ki

I. Masíhí kyúnkar jawábdih ma'lú'm hote haiñ ?

1. Is ke jawáb men, *pahle*, main kahtá hún, ki *aql* se sábit hai, ki Masíhí jawábdih hai.

(1.) Yih bát is se záhír o raushan hai, ki insán ko ek dúsre ko piyár karná lázim hai. Pák nawishton ká hukm is muqaddame men yih hai, ki jo kuchh tum cháhte ho, ki dúsra tum se kare, tum us se waisahí karo. Aur is qánún kí tafsír, jo unhín pák nawishton men mundarj hai, yih hai, ki piyár se paosí ko kuchh nuqsán nahín hotá hai. Is tafsír se ma'lúm hotá hai, ki agar ádmí sabhon ko piyár karte, to koí kisi ká kuchh nuqsáu nahín kartá ;—par aur ek tafsír kitáb ul quds men hai, ki jo koí apne bhái ko (kisi baní Ádam ko) hájatmand dekhtá, aur us kí hájat rafá nahín kartá, balki rahm ke síne ko band kartá hai, us men piyár kyúnkar sukúnat kartá hai ? Is se ma'lúm hotá hai, ki sirf nuqsán na karná káfi nahín hai ; balki madad aur mihrbání karní lázim hai. *Aql* se ye sab báten miltí hai. Dunyá men aksar log sirf báton se is kí durustí ká iqrár karte hai. Afsos ki yih piyár dunyá men bahut kam hai ; lekin is kí kamí is sabab se nahín hai, ki log is kí bábat shakk karte hai. We shakk nahín karte hai ; lekin lálach aur khud-garazí ke sabab se yih farz adá karne nahín cháhte hai. Aláwa is ke yih raushan hai, ki agar yih piyár khúb jári ho, to bhúkhon ko khilána, aur nangon ko pahínána us ká sára kám nahín hai. Jis qadr piyár ho, us qadr khwáhish hogí, ki jitne fáide ham ko milte hai, un me aur insán sharík howen. Agar koí shakhs, jo baní Ádam ko piyár kartá hai, koí naí dawái tajwíz kartá, jis se kisi burí bimári se chhuṭkára ho sake, to wuh zarúr fauran us ká bhed mashhúr kartá ; nahín, to wuh apne hamjins kí bhalái kyúnkar cháhtá ? Aur agar koí ádmí kisi tarah ká kaíl tajwíz kartá, jis se ádmí kí bahut mihnát bache, aur un ká fáida howe, to us par farz hotá, ki apní tadbír na chhipáwe, balki aur logon ko sikhláwe, táki we bhí us se áram páwen.

(2.) Ádmí bahut báton men ek dúsre ke muhtáj hai—laṛká chhoṭpan men má báp ká, aur má báp burhápe me laṛkon ke ; chákar málík kí parwarish ká, aur málík chákar kí khidmat ká ; laṛke ustád ke ilm ke, aur ustád laṛkon ke chānde aur mahabbat ká ; nádán hoshyár kí saláh ká, aur hoshyár nádán kí madad ká ; garíb daulatmand kí parwarish ká, aur daulatmand garíb kí mihnát ká ; mahkúm hákim kí panáh ká, aur hákim mahkúm kí tábidárí ká. Is se úpar kí bát sábit hai, yane ki har ek ko aur sabhon ko piyár karná cháhiye. Aur is ká aur ek natíja yih hai, ki jo kuchh ek ke pás hai, ki muhtájon ko de saktá hai, so dená zarúr hai. Khairát, panáh, madad, parwarish, saláh, rahnumái, ṭalim—sab ke sab maqdúr bhar dená sáre insán par farz hai. Aur agar kisi ko Khudá kí pahchán ho, to áyá munásib hai, ki yihí sab se latíf khazána band karke auron ko us men sharík na hone de ? Yihí bát aisi záhír aur raushan hai, ki dalíl karne kí

jagah nahin hai; ap se ap sabit hai, ki jo najat ki rah janta, use nihayat munasib hai, ki auron ko sikhlawe. Jab Masih ne apne shagirdon ko basharat dene ko bheja, to un se kaha, ki "Tum ne muft paya; muft do." Matí 10 : 8.

Pas, aql se munasib thahara, ki sab Isaiyon ko farz hai, ki Injil phailawen, aur admiyon ko kaj rahon se phirawen; kyunki aql sikhlati hai, ki hamen ek dusre ko piyar aur madad karna hai. Aur jab yih sabit hua, tab natija lazim hua, ki ham maqdur bhar dunya ko pak aur raushan karne mein jawabdih hain. Khuda ham se hisab lega, aur yih hisab hamare maqdur se mutalliq hoga. Lekin hamari aql bahut baton mein qasir hai; aur admi, lalach aur khud-garazi ke sabab, is bat mein aqli talim ke mutabiq nahin chalte hain; is waste Khuda ne apne pak kalam mein hamen baqhubi sikhlaya hai. Pas,

2. *Pak nawishton se sabit hai, ki Masih jawabdih hain.*

Hamari sanad se sabit hai. Khulasa us ka yih hai, ki Tum zamin ke namak, aur dunya ki raushni ho:—khabardar, ki tum phike aur andhiyare na ho, ta na howe, ki Allah Taala tumhein phenk dewe. Khuda ki sari paidaish mein us ka ko matlab hai. Us ne ko chiz abas nahin banai; jaisa ki us ne irada se sab kuchh sirja, aur ittifaqan kuchh nahin hua, waisahi har ek chiz se Khaliq ka ko matlab anjam pata hai. Pas, jab ki Khuda ne ham ko Masih ke imandar kar diya, tab us ka ko irada tha. Ky irada? Sirf yih, ki ham najat pawen? Kabhi nahin. Ky wuh daraqht paida karti hai, sirf is liye ki wuh daraqht howe? ya ki admi ke kaan aur faida us se howen? Beshakk jandaron ke kam ke liye use paida karti hai. Us ke sae se, aur us ke phal se, aur us ki lakri se insaan o haiwan faida pate hain. Agarchi aql i qasir faqat thor si chizon ka kam samajh sakti hai, tau bhi sari chizon ke ko ko kam hain; aur ham itnon ka matlab jante hain, ki unhein bhi, jinhein nahin samajhte hain, beematlab aur befaida kabhi nahin kahne ke. Pas, jab sab chizon ke ko ko kam hain,—jab asman, zamin, suraj, chand aur sitare, daraqht aur nabatat, insaan o haiwan, aur kire makore, goya apne apne kam karte hain; aur Khuda in sab ke wasila apna maqsad pura karti hai,—to ky faqat Masih ka kuchh kam nahin hai? Khuda ne hamen zamin ka namak thaharaya hai; to chahiye ki ham zamin par tasir karen. Khuda ne hamen dunya ki raushni thaharaya hai: to chahiye ki ham dunya ko raushan karen.

Is mazmun ke subut mein Luká 12 : 42 se jo likha hai, kam ata hai. Masihion ka bayan us mein khansaman ki misal se hua. Aur is dalil ko us maqam se taraqqi milti hai, jahan gumashta ki misal mundarj hai, Matí 25 : 14—30, aur Luká 19 : 11—26. Khansaman aur gumashta is liye jawabdih hain, ki un ke khawind un ke hath mal supurd karte hain. Jab Khuda ne insaan ko yih dunya aur us ke kar-khane aur muamale die, tab us ne bahut kuchh hamare supurd kiya, aur bahut mal o asbab par hamen khansaman aur gumashta thaharaya. Hamari taqat o qudrat, zihn o aql, mal o asbab, dost aur kunba, iqbal o fazilat, darja o martaba, tandurusti o hoshiyari, amn o chain, furat o rahat, mahabbat o sharakat, sab ke sab usi ki taraf se hamare supurd mein ae hain, aur ham goya us ke mukhtar is khazana par hain. Pas, Khuda ne admi ko jis jis chiz par mukhtar kar diya, unhin chizon

kí bábat use jawábdih ṭaharáyá ; aur jis tarah kí ham dunyáwí aur zátí barkaton kí bábat jawábdih haiṅ, beshakk usí tarah se díní barakatṅ ke istiṁál kí jawábdihí karní hogí.

Yih bát us se, jo Mush. 2 : 4, 5 meṅ likhá hai, záhir hotí hai, ki “Tú ne apní aglí mahabbat chhor dí: so yád kar ;..... aur agar tú tauba na kare, to tere shamádán ko já se be já karúngá.” Mahabbat díndárí kí ján hai ; aur díndárí dunyá kí raushní aur namak hai, to jis díndár meṅ mahabbat nahín páí játí, so goyá phíká namak aur ḍhám-pí húi raushní hai ; aur dunyá us se kyá fáida pá saktí hai ? Pas jab Ḳhudáwand kahtá, ki Tere shamádán ko já se be já karúngá, to matlab hai, ki terí mahabbat kam ho gai ; is wáste terí raushní játí rahí, aur tere ás pás ke log tujh se maza nahín páte haiṅ ; is liye terí fazílat nest karúngá. Is se maḷúm hotá hai, ki jab koí kalisiyá apná wuh kám, jis ke liye Ḳhudá ne use muqarrar kiyá, nahín kartí, to Ḳhudá use qusúrwár ṭaharake sazá detá, balki kabhí kabhí nest bhí karta hai. Aur yih us bát se, jo Ams. 11 : 25 likhá hai, muwáfíqat rakhtá hai, ki “Wuh, jo seráb kartá hai, áp hí seráb hogá.” Jo bakasrat raushní auron par chamkátá hai, so aur raushní Núr se páwegá.

II. *Isáí kis kis bát meṅ jawábdih haiṅ ?* Agarchi kaí báton ká ímá ho chuká hai, jin meṅ Masíhí jawábdih haiṅ, taubhí is bát ká sáf sáf bayán karná cháhiye ; ki koí na kahne páwe, ki hamará jawábdih honá to sábit kiyá, lekin nahín batláyá, ki ham is muqaddama meṅ kyá karen.

1. *Isáí ko munásib hai, ki jītní nekí kar saktí hai, utní kare.* Aksar log púchhte haiṅ, ki kis wáste nekí karen ? Sawáb ke liye ? Hargiz nahín ; ham kyá sawáb kar sakte haiṅ ? Hamáre sab se achchhe kám gunáh se álúda haiṅ ; aur agar ham janam bhar koshish karen, to kabhí aisá koí kám na kar sakenge, ki jo bagair Masíh ke kafára ke maqbúl hogá. Pas, ham apne nek kámon se naját páne kí ummaid na rakhen. Beshakk we, jo Ḳhudá kí ḵhidmat aur bandagí meṅ ziyáda mashgúl haiṅ, bihisht ke liye ziyáda taiyár honge ; aur Ḳhudá ke fazl se apní nekí ká phal páwenge ; lekin yih wuh bát nahín hai, jo aksar karke qaul i sawáb se murád hai.

Nekí kyá hai, jise karne ke ham jawábdih haiṅ ? Bahut ádmí samajhte haiṅ, ki badí na karná nekí hai. Lekin hamará matlab yahán aisá nahín hai, balki is se pare hai. Masíhí ko munásib hai, ki har tarah kí nekí ká píchhá karen. Agar hamáre mulk, aur dúsre mulk ke bádsháh ke darmián laráí howe, aur hamará bádsháh ham se kumak aur koshish cháhe, to hamen ghar par rahne aur dúsre bádsháh kí kumak na karne ke siwáe aur kuchh karná hogá ; agar ham bích meṅ pare rahen, aur na ek kí na dúsre kí taraf howen, to wuh hamen kah saktá, ki Tú ne mere wáste kyá kiyá, jo us ke wáste na kiyá ? Aur agar ham uzr karte, ki Ai Ḳhudáwand, ham ne áp ká kuchh nuqsán nahín kiyá, aur na áp ke dushmanon kí kumak kí ; aur wuh kahtá, ki Aur hamárá bhí kumak na kí ; to ham lájawab hote. Isí tarah se hamen na sirf gunáh se báz rahná cháhiye, par har tarah kí nek chál chalná cháhiye ; nahín, to ham kis tarah se Ḳhudá ke dost ho sakte ? Ḳhudá haqq ká bádsháh hai, aur Shaitán sharárat ká.

Agar ham sirf sharárat se báz rahen, to ham bích men par gae; na idhar na udhar hain; to kis tarah se malúm hogá, ki ham Kḥudá ko Shaitán se ziyáda piyár karte hain?

Lekin yih hál i muhál hai. Jo koí Kḥudá kí taraf nahín hai, so us ká dushman hai. Ham sab Kḥudá ke dushman paidá hote hain; aur agar sachche Masíhí ho gae, to ab na cháhiye, ki ham men dostí ká kuchh nishán na páyá jáwe; aur agar nekí na pái jáwe, to aur kaun nishán hai, ki jis se hamará us ke dost ho jáná áshkára howe?

2. Is se yih bát bhí nisbat rakhtí hai, ki Masíhí ko *sab ádmíon kí bhalái aur fáida dhu'ndhná cháhiye*. Kisí chíz ko do taraf se, yá do tarah kí raushní men, dekhne se use kḥúb daryáft kar sakte hain.

Masíh auron ke fáida ke liye áyá. Jab tak ki ham us ke muwáfiq na ho jáwen, tab tak us ke sáth kḥush nahín ho sakte hain. To jab tak ki hamará dil auron ká fáida na cháhe, aur ham unhen piyár karke un kí bhalái ke liye nit koshish na karen, tab tak ham us ke muwáfiq nahín ho gae; aur Kḥudá un sifaton ko ham men na páwegá, bagair jin ke ham bihisht men dákhil nahín ho sakte.

Kḥudá ne hamein kalísiyá men buláyá, ki ham dunyá ko raushan karen, aur use bigarne se bacháwen, jaisá ki main is waz ke pahle hisse men kah chuká hún. To zurúr hai, ki hamári tásir har taraf malúm howe. Raushní súraj se sídhí átí, palat játí, sab chizon par lagke tirschí játí, yihán tak ki us kí jotein har kahín pahunchtín, aur sab chizon ko raushan kartín. Isí tarah se kalísiyá ko zurúr hai, ki dunyá ko raushan kare. Hamará súraj, Ísá Masíh, ham par chamaktá hai; kyá ham us kí raushní aur chizon par palat dete hain? Kalísiyá to apná yih kám kartí hai; kyá ham us men kuchh karte hain? Kyá ham cháhte hain, ki sachcháí kí raushní, jo ham par chamaktí hai, auron par chamke? Kḥulása yih hai, ki agar ham auron kí bhalái ke liye unhen sachche dín men láne kí koshish nahín karte hain, to ham apní buláhat ká iráda púra nahín karte hain, aur is náfarmání ke liye jawábdihí karní hogí.

Phir, jab Kḥudá ne hamein zamín ká namak ṭhaharáyá, to yih sirf fasáhat o balágat kí bát nahín, balki is se hamáre farz bayán hote hain. Namak ke kyá kám hain? Auwal, aur chizon ko maza dená; doim, chizon ko sarne se rokná. Munásib hai, ki kalísiyá dunyá men namak ká sá kám kare. Jab kalísiyá dunyá par aisí tásir kartí hai, ki us ká maza sab kámon men páyá jáe, tab wuh apná wájibí kám kartí hai. Aur dunyá kí mailán bigarne ko hai: cháhiye ki kalísiyá us par hifázatgar tásir kare, jaisá ki namak bahut chizon kí hifázat kartá hai.

Pas, jab ki kalísiyá ke aise kám hain, to sáf záhir o báhir hai, ki har ek ko, jo us men shámil hai, yihí kám karná cháhiye. Jo jamáát par farz hai, so us ke har ek shaḡhs par. Ek khatra yih hai, ki jo kám jamáát par farz hai, so us ke kisí akele ádmí ko bahut zurúr malúm na howe. Shayád koí Ísáí kahegá, ki Beshakk kalísiya ko munásib hai, ki injíl kí raushní har kahín phailáwen, aur afsos kí bát hai, ki yih farz aur phurtí se adá kiyá nahín játá; lekin tau-bhí na yád kare, ki mujhí par yih farz hai. Ek Angrezí masal yih hai, ki Jo sabhon ká kám hai, so kisí ká nahín; yane, har

ek kahtá hai, ki kám ham sab par farz hai, lekin k̄háss karke mujh par nahín ; aur jab sab isí tarah kahte hain, aur kuchh nahín karte, to kám bilkull nahín hotá hai. Aur is sabab se, ki koí Masíhí is bahána se uzr na kare, injíl ke hukm k̄háss karke jamáat par nahín, balkí har ek wáhid shakhs par hain. Púlús nahín kahtá hai, ki kalísíyá par wáwailá howe, agar wuh injíl na sunáwe ; lekin Mujh par wáwailá, agar *main* injíl na sunáú ! Kalísíyá ko bhí hukm die gae hain ; aur beshakk jo kalísíyá is tarah se phal nahín látí hai, so súkhí dālí ke muwáfíq ho játí hai ; par ham logon ko yád karná cháhiye, ki kalísíyá milke k̄hwáh apná farz adá kare, k̄háwh na kare, ham hí par farz hai, ki ham apní raushní ko dikháwen, aur dunyá ke bích lon kí mánind raheñ. Aur kalísíyá apná farz adá nahín kar saktí hai, jab tak ki har ek, jo us meñ sharík hai, maqdúr bhar koshish na kare. Jab har ek, jo kuchh us se ho saktá hai, sab kuchh karegá, tab kalísíyá “ máhtáb kí mánind hasína, aur áftáb kí mánind jamíla, aur jhandádár fauj kí mánind muhíba ” hogí. Tab us kí raushní har kahín pahunchegí. Tab wuh pání kí satah se chamkegí, aur koh se wádí kí taraf palaṭ jáegí ; aur jaisá kí áftáb se, jab ki wuh apní táqat i kámila se raushan hai, koí chíz nahín chhiptí hai, waisáhi tamám dunyá us se raushan ho jáegí, yahán tak ki koí qaum, kaisí hí wahshí aur jangalí kyún na ho, jihálat aur táríkí i rúhání meñ na rahegí. Sab se barí nahreñ chhoṭe chhoṭe soton se ban játí hain ; kalísíyá kí koshish athámbh bárh ho jáegí, jab sabhon ke chhoṭe chhoṭe sote bahte jáenge, aur ekaṭṭhe hoke dunyá ko qabze meñ láne ko rujú howenge.

Phir, agar sab Masíhon ko zurúr hai, ki aur logon kí naját cháheñ, aur us ke liye mihnát karen, to is bát ká yih natija i zurúrí hai, ki aur báton meñ sabhon kí bhalái d̄húndhná cháhiye ; kyúnki yih muhál hai, ki koí ádmí barí barí báton meñ dúsre kí bihtarí cháhe, aur chhoṭí chhoṭí chízon meñ us se gáfil aur beparwá rahe. Agar sachchá piyár dil meñ ho, to wuh apne taín roz ba roz chhoṭí aur barí báton meñ záhír karegá. Agar koí bhúkhá ho, aur K̄hudá kí ráh se bhí dúr, aur koí Ísáí us se kah de, ki Ísá par ímán lá ; lekin us kí jismání hájat ká kuchh fikr na kare ; to kaun samajhegá, ki us ká piyár sachchá hai ? Beshakk wuh, jo ádmíon ko haqíqat meñ piyár kartá hai, un ke sab dukh dard meñ hamdard hogá, aur un kí har tarah kí muflisí par ranjída hogá, aur un kí sárí lácháragí par tars kháegá. Pas, wuh jánfíshání, jo sirf ádmíon ko dín meñ láne se kám rakhtí hai, so aisí nahín hai, jaisí ki Masíh har waqt, jab dunyá meñ mujassam thá, dikhátá thá. Dekho, ki us ne bhúkhon ko kis tarah se khiláyá, aur bímáron ko changá kiyá, aur ranjidon ká hamdard húa. Use Lázar kí qabr par rote dekho. Use gunahgáron ko qabúlte dekho, jab we tauba karke us ke pás áte the. Use salib par apne dushmanon ke liye duá karte suno. Yihí tumhárá namúma hai. Ádmí duhrí hastí hai ; yane, wuh rúh aur jism hai ; aur jo koí us kí rúh kí bhalái ke liye jánfíshání karke jism ke dukh dard se beparwá hai, us ke fikr aur jánfíshání meñ shakk hai—sháyad wuh sirf bahána hai, ki jis ke sabab se ádmí us kí saḡht-dilí ko daryáft na karen.

Baráks is ke aur ek burái hai. Bahut Masíhí dunyáwí pareshání aur jismání tasdíq par tars kháte hain, par kabhí ádmíon kí rúhání

mufliśí ká kuchh fikr nahín karte haiṁ. Yih niháyat baṛí chúk hai, jis se sábit hotá hai, ki ímán kí baṛí kamtí hai; kyúnki jis ke nazdík áqibat kí chízen haqíqí haiṁ, wuh kyúnkar jismání dukh ke liye tadbír karke rúhání hálát ko farámosh kar saktá hai? Aur yih chúk us se, jo úpar bayán húi hai, aur ziyáda hotí hai. Aisí hai, jaisá chhilke ko baṛí khabardáṛí se rakhná, aur gúde ko phenk dená. Jab tak ki gúda pak jáwe, tab tak chhilká rakhná cháhiye. Badan chhilká hai, aur rúh gúdá; aur we Masihí, jo jismání hájaton ko yád karke rúhání mufliśí ko farámosh karte haiṁ, gúde ko phenk dete haiṁ.

Pas, ai bháío, hamen cháhiye, ki ádmí kí bhalái, is dunyá men, aur áqibat men dhúndhen, aur nit koshish karen, ki har ánsú ko ponchhen, aur har dil ko árám pahuncháwen, aur har ádmí ko sachcháí men láwen. Is tarah se hamáṛí raushní ádmíon ke sámhne aisí chamkegí, ki we hamáre nek kámon ko dekhke hamáre Báp kí, jo ásmán par hai, taṛíf karenge; aur hamáṛí paidáish ká matlab púra hogá; aur hamáre kalisiyá men buláe jáne ká iráda anjám páwegá. Tab ham be-ímán kḥánsámán aur gaffatkár gumáshta na tḥaharenge, aur hamará hisáb kḥushi se kiyá jáegá.

HA'SIL I KALA'M.

1. Is mazmún se daryáft ho saktá hai, ki un ká kyá hál hogá, jin kí raushní is tarah se chamaktí hai. *We mubáarak haiṁ.* "Rahím insán apne hí sáth nekí kartá hai," Ams. 11 : 17. Áqibat men "dáná falak kí chamak kí mánind chamakenge, aur we, jo bahuteron kí sadáqat ke bāis húe, sitáron kí mánind, abad ul ábád tak," Dán. 12 : 3. In do áyaton se sábit hai, ki haqíqí dindáṛí isí dunyá ke liye sab se achchhí daulat hai, aur áqibat ke liye sab kuchh; kyúnki agar wuh, jo aur logon ko piyár karke rahm kartá hai, apne hí sáth nekí kartá hai, to har waqt mubáarakbádí us ke qabze men hai; koí use ranjída kyúnkar kar saktá hai, jab ki wuh áp táqat rakhtá hai, ki apne taín kḥush kare? Agar koí mufliś o láchár us ko mile, to wuh use tasallí dene se apne taín shádmán kartá; agar koí us ká nuqsán kare, to wuh us ke badle men nekí karne se apne dil se nuqsán ke kḥiyál bhulá detá; agar koí use satáwe, to wuh us ke liye duá mángne se apná jí bahlátá hai. Us ko aisá jaushan hai, ki sharíron ke tír kabhí nahín lagne ke. Aur áqibat men us ke hál ká bayán ham kyúnkar kar sakeṁ? Jo Dániel ne ilhám se kahá hai, so jalál ke aise manzar ká ímá detá hai, ki jis ke barábar ádmí kí zúbán kyá kah saktí hai!

2. Aur un ká kyá hál hai, jin kí raushní is tarah nahín chamaktí? *Un ke liye ek wada nahín hai.* Baráks is ke likhá hai, ki jo phal nahín látá hai, "wuh shákḥ kí tarah phenká játá, aur súkh játá hai; aur log unhen baṭorte, aur ág men jhonkte haiṁ, aur we jalte haiṁ," Yúh. 15 : 6. To har ek Masihí baḥhúbí aur baṛí fikr o andesha se daryáft kare, ki us kí raushní chamaktí hai, ki nahín. Hán, agar nahín chamaktí hai, to sháyad nahín hai. Agar chirág raushní na de, to kaun kah saktá hai, ki jaltá hai? Hán, sháyad jaltá hai; lekin kaun kah saktá hai? Fauran use kholo; dekho, ki jaltá hai, ki nahín. Mat kaho, ki Hai hamáre pás, lekin dhámpí húi. Yih nahín ho saktá hai. Log chirág bálke nahín chhipáte haiṁ. Aur agar abní tak

jaltá hai, to jaldí kholke kám men láo ; nahín, to bujh jáegá, aur tum phíká namak aur andhere hoke náqis thaharoge, aur báhar phenke jáoge. Aur agar tumhárá hál aisá bilkull kharáb na ho, magar tum goyá mushkil se bacho, to tumhárá kaisá nuqsán hogá. Tum yahán dín-dínárí kí kuchh khushwaqtí hásil nahín kar sakoge ; aur áqibat men sitáron kí mánind na chamakoge ; aur tumhárí wuh niháyat khushí na hogí, jo bahuteron kí sadáqat ke báis hone se miltí hai. Agar sharm aur afsos bihisht men ho sakte, to beshakk we Masíhí, jin kí raushní se is dunyá men kuchh fáida na húá, sharminda aur ranjída hote. Khudá ká shukr, ki us maqám i mubáarak men sharm o ranj dakhil nahín páte ; lekin ímándáron men wahán faraq hogá ; jo apne Naját-dihinda se is dunyá men ziyáda muwáfiqat rakhte hai, wahán ziyáda izzatdár honge ; aur wuh dáaya muqaddas hai, jis ká maqsad dindárí aur bihisht kí mubáarakbádí men álá martaba hai.

3. Is dunyá men *kis kí izzat karní cháhiye* ? Kháss karke un kí, jo apne Málik kí sí raushní ziyáda dikhláte hai. Dunyá unhen izzatdár nahín samajhtí hai ; lekin dunyá hamáre liye qánún na howe. Ham áqibat kí raushní se chale ; tab sab chízen apní apní haqíqat ke muwáfiq nazar áwengi.

Ai bháío, ham aisí chál chalen, aur aisí raushní dikhláwen, aur aisí tásir karen, ki hamáre ásmání Báp kí taríf howe, aur hamárá árám is dunyá men, aur khushwaqtí áqibat men, barháí jáwe.

“Ai achchhe diyánatdár naukár, shábásh ! tú thore men diyánatdár niklá, main tujhe bahut par mukhtár karúngá ; tú apne kháwind kí khushí men dákhil ho.”

“Ai bure aur sust naukár ! Tum us nikamine naukár ko báhar andhere men dalo : wahán roná aur dánt písna hogá.”

In do báton men se, hashar ke din, kaun *tujh se kahí jáegí* ?

XVI.

MASIH HAMARÍ RASTÍ, PAKÍZAGÍ AUR KHALÁST.

REV. A. KREISS KÍ TASNÍF.

Masíh hamáre liye hikmat i Iláhí, aur rástí, aur pakízagí, aur khalási hai.—1 Kar. 1 : 30.

Ye báten injíl ká khulása hai ; aur un se na faqat hamárá láchár aur pareshán hálát, balki naját kí ráh bhí záhir hotí hai. Jis tarah Khudá ne ádmí ko paidá kiya thá, ab wuh us aslí hálát par nahín hai ; kyúunki

Khudá ne us ko apní súrat par banáyá ; so jaisá Khudá pák hai, waisá hí us ne ádmí ko bhí pák aur begunáh paidá kiyá. Wuh apne Khá-liq aur us kí marzí ko jántá, aur qudrat rakhtá thá, kí us kí marzí par chale. Garaz wuh us kí yagánagat men niháyat nekbakht aur mubá-rak thá ; par náfarmánbardári se Khudá ke hukm ko torke gunahgár húa. Is tarah Khudá kí súrat, jis par ádmí banáyá gayá thá, bigar gai ; yane, ádmí kí pákízagí játi rahí ; us ká dil aur aql, jo Khudá kí pahchán se raushan thí, tárik ho gai ; aur wuh Khudá se judá hoke na faqat bahut dukh aur tasdíq páne lagá, balki maut ke qabze men bhí pará, aur hamesha kí halákat ke láiq húa ; lekin jaise bure daraakht ke achche phal nahín, waise hí gunahgár ádmí ke farzand bhí pák nahín ho sakte ; balki gunahgár hain. Is liye Dáúd ne kahá, kí “ Dekh, main ne burái men súrat pakrí, aur gunáh ke sáth merí má ne mujhe peñ men liyá.” So hain apne janam se Khudá ke gazab ke farzand aur jahannam ke láiq hain. Ah, ah ! pareshán ádmí, jo ham hain ! kaun ham ko is badaní maut aur hamesha kí halákat se bacháegá ? Ham apne taín bachá nahín sakte hain ; lekin injíl se malúm hotá hai, kí ham kis tarah maut se chhútké zindagí ko pahunchen ; kyúinki wuh ek naját denewále kí khabar detí hai, jo na faqat qádir, balki mushtáq bhí hai, kí hamárá pareshán hálát se hamen khalási de-we ; aur is liye dunyá men áyá thá, kí gum húon ko dhúndhe aur bachá-we. Is khush-khabarí ká khulása yih hai, kí “ Masíh hamáre liye hikmat i Iláhi, aur rásti, aur pákízagí, aur khalási hai.”

Ham in báton se zahir karenge, kí ham Masíh ke wasile se phir in sab chízon men, jin ke ham naját páne ke liye muhtáj hain, sharík ho sakte hain.

I. *Masíh hamáre liye hikmat i Iláhi hai.*—Jab tak ádmí Khudá ke mel men thá, us kí pahchán us ke dil aur aql ko raushan kartí thí, aur wuh us kí talím se us kí pahchán men barhtá játá thá. Is tarah us ne sachcháí aur zindagí kí ráh par hidáyat páí. Lekin gunáh ke sabab Khudá se judá hoke us ke dil aur aql yihán tak tárik ho gae, kí us ne apne Bání ko nahín pahcháná. Is dunyá ke hakímon ne bhí, jo dunyáwí chízon men barí aql o hikmat zahir karte the, us Khudá ko, jo ásmán aur zamín ká paidá karnewála hai, aur us ráh ko, jo zindagí ko pahuncháti hai, apní hikmat se na pahcháná. Un kí hálát se, jo but-parastí ke gunáh aur nádání men giriftár hain, zahir hotá hai, kí ádmí bagair madad i Iláhi ke kahán tak Khudá kí pahchán hásil kar saktá hai. Sabab kyá hai, kí ádmí, jise Khudá ne aql dí hai, patthar, aur lakrí, aur aisi fání chízon ke áge jhuká, aur un ko apná málík jánke pújtá, aur un kí Khudá kí sí bandagí kartá hai ? Púlús hawári ne is sawál ke jawáb men lihá hai, kí “ Unhon ne Khudá ko pahchánke us kí Khudái ke láiq tazim na kí, aur na shukrguzári kí ; par apne khiyálon men behúda ho gae ; aur un ke besamajh dil andhere hue. We apne taín dáná thaharáke nádán ho gae ; aur unhon ne gairfání Khudá kí buzurgí ko fání ádmí, aur parinde, aur chárpáe, aur kíre makore kí súrat se badal dálá. Isi sabab se Khudá ne un ke dilon kí shahwatan kí nápakí par un ko chhoñ diyá, kí we ápas men apne apne badan ko behurmat karen. Unhon ne sachche Khudá ko bátíl buton se badalá,

aur K̄hālīq ko, jo hamesha mubārak aur barhaqq hai, chhorke maḡ-lūq kī parastish aur bandagī kī.” Is se zāhir hai, ki ādmī ne aise wasīle se, jo badan aur jān ko halāk kartā hai, apne taīn bachāne chāhā. Agarchi hakīmōn meṇ aise log the, jo but-parastī kī nādānī par haṇste the, taubhī apnī aql o dānish se jhūṭh ke badle apne bhāiōn ko sachchāī na sikhā sake. Ādmī apnī qudrat se najāt pāne ke liye dānāī nahīn hāsīl kar saktā ; par jo kuchh ādmī ke nazdīk nāmumkin thā, so K̄hudā ne kiyā, jo chahtā hai, ki ādmī bachēn, aur sachchāī kī pahchān pāwēn. Us ne apne iklaute Beṭe ko dunyā meṇ bhejā, tāki dunyā us ke wasīle se sachchāī kī rāh pāwe. Jo koī hakīm apne haqq meṇ nahīn kah sakā, so us ne apne haqq meṇ kahā, ki “Dunyā kī raushnī main hūn ; jo merī pairawī karegā, so andhere meṇ na chalegā, balki zindagī kī raushnī us kī hogī. Rāh, aur haqq, aur zindagī main hūn : koī bagair mere wasīle ke Bāp pās nahīn ā saktā hai.” Us ne apnī ṭalīm aur kāmōn se un chīzōn kī, jin kā najāt pāne ke liye jānnā zurūr hai, ek kāmīl aur sachchī pahchān dī ; yāne, hamāre bachāne ke liye K̄hudā kī tadbīr hamēn batāī, ki ham kisī tarah nahīn, magar us ke Beṭe Iśā Masīh ke dukh aur maut ke wasīle se, najāt pawēn ; jaise us ne Nikūdīmus se kahā, ki “Jis tarah Mūsā ne sām̄p ko bayābān meṇ bulandī par uṭhāyā, isī tarah zurūr hai, ki Ibn i Adam bhī uṭhāyā jāwe ;” yāne, salīb par mare—malāūnōn ke liye malāūn howe—aur apnī jān kafāra meṇ dewe—“tāki jo koī us par īmān lāwe halāk na howe, balki hamesha kī zindagī pāwe.”

In bāton se Masīh ne zāhir kiyā, ki najāt kī rāh kyā hai, aur ham kis tarah us par chalne kī qudrat pāwēn. Yih hikmat i Ilāhī is dunyā ke hakīmōn ke madrasōn meḡ nahīn sikhlaī gai ; kyūnki yih soch kisī ādmī ke dil meṇ nahīn āyā, ki K̄hudā āp hamāre gosht aur lahū meṇ sharīk hoke hamārī najāt ke liye apne taīn qurbānī guzrāne. Agarchi K̄hudā kī aur najāt kī rāh kī pahchān sārī hikmat se barī aur achchhī hikmat hai, taubhī is dunyā ke bahutere hakīm us ko haqīr jānte ; aur is ṭalīm par, ki ham faqat ek maslūb Masīh ke wasīle se najāt pā sakte, haṇsī karte haiṇ ; lekin dunyāwī aur Ilāhī hikmat ke muqābala meṇ likhā hai, ki “Main hakīmōn kī hikmat ko nābūd, aur dānāōn kī dānāī ko nest karūngā. Kahān hakīm ? kahān kātīb ? kahān is dunyā kā bahs karnewālā ? Kyā K̄hudā ne dunyā kī hikmat ko bātīl nahīn kiyā ? ki jab hikmat i Ilāhī se yūn hūā, ki dunyā ne apnī hikmat se K̄hudā ko na pahchānā, to K̄hudā kī yih marzī hūī, ki waz kī nādānī se īmān lānewālōn ko bachāwe. Aur Masīh un ke liye, jo bulāe gae haiṇ, kyā Yahūdī kyā Yūnānī, K̄hudā kī qudrat aur hikmat hai.” So koī hakīm, jo Masīh ko nahīn jāntā, apnī hī hikmat par faḡhr na kare ; kyūnki us ne ab tak itnā bahut nahīn sikhā, ki hamēn najāt pāne ke liye kis par īmān lānā, aur is dunyā meṇ kis tarah guzrān karnā chāhiye. Lekin jis kī hikmat Masīh hai, us ne aīsī hikmat pāī, jo najāt kī bābat use bhūlne nahīn detī. Yih hikmat sab qīmātī chīzōn se beshqīmat hai, aur chhoṭōn aur barōn ko ārāsta kartī hai. Jo ujyāle aur sachchāī se ziyāda andhere aur jhūṭh ko piyār kartā hai, so us se nafrat rakhtā, aur us kī tarbiyat aur ṭalīm ko nahīn chāhtā hai. Lekin ab rāt bahut guzar gai, aur subh nazdīk hai ; is liye hamēn chāhiye, ki nīnd se jāgeṇ, aur murdōn

men se uthen, táki Masíh ham ko raushan kare, aur hamáre liye hikmat i Iláhi howe.

II. *Masíh hamáre liye rástí hai.*—Hamen rástí i Iláhi cháhiye is liye, ki bagair us ke ham Kḥudá kí aḍálat ke taḡht ke áge khare nahín ho sakeuge ; kyúнки wuh haqq o insáf karnewálá hai, aur be tarafdárái ke har kisé ko, us ke kámon ke muwáfiq, phal degá.

Aisá shakhs, jo záhiri men badí nahín kartá, aksar log use rástbáz jánte hain ; lekin, yih aisé rástí nahín, jo Kḥudá ko rázi kare. Us ke huzúr faqat wuh rástbáz hai, jis ne begunáh hoke tamám shariát ko aisá purá kiyá, ki ek hukm ká bhí taqsírwár na húá. Lekin ádmion men, jo gunáh ke sáth paidá hoke bure kḥiyálon, aur kámon, aur báton se us ko roz roz bərháte hain, kaun hai, jis kí rástí kámil hai ? Jo jism se paidá húá, so jism, yane gunahgár hai ; is liye hamáris hálát kí bábat Púlús hawáris ne likhá hai, ki “Koi nek nahín, ek bhí nahín ; sab gumráh hain ; sab ke sab nikamme hain ; koi nekokár nahín, ek bhí nahín.” Is se záhír hai, ki agar Kḥudá ham se aḍálat ke sáth hisáb lewe, to us ke huzúr koi betaqsír ṡahar nahín saktá. Pas, kis tarah ham rástbáz i Iláhi banen ? Masíh hamáre liye rástbází i Iláhi hai. Us kí nekí kámil hai ; kyúнки us ne begunáh hoke tamám shariát ko purá kiyá, aur is kámil nekí ko apne dukh aur maut ke wasile se hamáre wáste hásil kiyá ; chunánchi likhá hai, ki “Kḥudá ne us ko, jo gunáh se kuchh iláqa nahín rakhtá ṡá, hamáre liye gunáh ṡaharáyá, táki ham us ke sabab se Kḥudá kí rástí banen.” Wuh hamáris taqsíron ke sabab se pakrá gayá, aur hamáre sádiq hone ke wáste jiláyá gayá ; so kámil rástí hamáre liye taiyár hai ; lekin us men koi sharik nahín ho saktá, magar wuh, jo Masíh par imán látá hai ; chunánchi likhá hai, ki Kḥudá se jo nekí hai, wuh Isá Masíh par imán lāne se miltí hai, aur un sabhon ke liye, aur un sabhon men hai, jo imán lāte hain ; kyúнки un men kuchh tafáwat nahín ; wuh, jo kám nahín kartá, yane apne nek kámon par bharosá nahín rakhtá, balki us par, jo gunahgár ko rástbázon men shumár kartá, imán látá hai, usí ká imán rástbází meḡ giná játá hai ; kyúнки har ek imán lāne-wále kí nekí ke liye Masíh shariát ká saranjám hai ; is liye un par, jo Masíh men hain, kuchh sazá ká hukm nahín, balki Kḥudá kí maqbúliyat un par hai. Par jo log apní hí nekí par fakhr karke samajhen, ki ham bagair Masíh kí nekí ke ásmání bádsháhat men dáḡhil honge, un kí bábut Kḥudáwand ne farmáyá, ki “Un ke háth pānw bāndhke báhar andhere men dāl do, jahán roná aur dānt pīsná hogá.” Lekin we, jo nekí ke bhúkke piyāse hoke Masíh kí nekí ko páte hain, so mubárák hain ; kyúнки we ser honge, aur apne Báp kí bádsháhat men súraj kí mánind chamkenge.

III. *Masíh hamáre liye pākizagí hai.*—Kḥudá ne farmáyá hai, ki “Tum pāk ho, kyúнки main pāk hún ;” aur jo niāmaten Masíh ne hamáre liye hásil kí, so bhí ham men tásir paidá kartí hain, ki gunáh kí gulámí men giriftár na rahen, balki aglí chalan kí bábat us purání kḥo, jo fareb denewáli shahwaton ke sabab se bigar gai hai, tark karen, aur apne jī ján men nae banen ; aur naí kḥo, jo Kḥudá ke

muwáfíq ne kí meṇ, aur haqq kí pákízagí meṇ paidá húi, iḡhtiyár karen; kyúнки ásmání Yarúshálam meṇ koí nápák aur makrúh dáḡhil nahín hogá. Lekin kis tarah ham, jo apní zát se gunáh se álúda haiṇ, aise pák banen, jaisá Ḳhudá pák hai? Injíl se záhír hai, ki Masíh, jo hamáre liye pákízagí hai, hamáre dilon ko sab buráion aur gunáhon se sáf o pák kar saktá hai.

Wuh apní *pák chalan* se hamen pákízagí ke liye bulátá hai; kyúнки wuh hamesha apne Báp kí marzí par chalá, yahán tak ki us ne apne dushmanon se kahá, ki “Tum meṇ se kaun hai, jo mujh par ek gunáh sábit kar saktá hai?” Us ne ḡhatá na kí, aur us kí zubán meṇ fareb na thá; aur is tarah “us ne hamáre liye ek namúna rakha hai, ki ham us ke naqsh i pá par chalen.”

Wuh apní *talím* se ham ko pákízagí ke liye bulátá hai; kyúнки us ne sáf sáf záhír kiyá, kí faqat we, jo pák dil haiṇ, Ḳhudá ko dekhenge. So us ne Nikúdímus se kahá, ki “Agar ádmí Rúh aur pání se phír paidá na howe, to wuh Ḳhudá kí bádsháhat meṇ dáḡhil nahín ho saktá.” Aur Patras hawári ne likhá hai, ki “Tum farmánbardár farzand bankar un hirsón ke, jin meṇ tum nádání ke waqt giriftár the, hamshakl na bano; balki jis tarah tumhárá bulánewálá pák hai, apní sab chalan meṇ pák raho.”

Isá Masíh hamárá pákízagí ke liye *Rúh i Quds ko bhejtá hai*, ki hamáre dilon ko raushan aur pák kare, aur hamen gunáh kí ráh se phiráke ásmání niámaton se árásta kare; kyúнки jin ke dil meṇ Rúh i Quds bastá hai, un kí chalan se us ke phal záhír hote haiṇ, jo mahabbat, aur ḡhushí, aur árám, aur sabr, aur muláímat, aur nek-ḡhoí, aur ímán-dárá, aur burdbárá, aur parhezgárá haiṇ.

Isá Masíh ne hamárá pákízagí ke liye *apná lahú baháyá*, jo ham ko hamáre gunáhon se pák kartá hai;—kí “agar bailon aur bakron ká lahú aur bachhiyá kí rákh nápákon par chhiḡkne se badan ko pákíza kartí hai, to Masíh ká lahú, jis ne azlí Rúh se Ḳhudá ke áge apne taín qurbání guzráná, hamáre dilon ko murde kámon se Ḳhudá kí ibádat karne ko kyá ziyádatar pák nahín karegá?” Aur “we kaun haiṇ, jo safed pairáhan pahine, aur ḡhurme kí dálíán háthon meṇ lie, us takht aur Barra ke áge khare haiṇ? Ye we haiṇ, jo barí áfat se áe haiṇ; aur unhon ne apne pairáhan Barre ke lahú se dhoke unhen safed kiyá.” Pas, koí gunáh aisá bará nahín, jo us ke lahú se miṡáyá nahín já saktá. Aur agarchi hamáre gunáh ḡhún kí tarah hote, taubhí barf kí mánind safed ho jáenge.

Agarchi ham apní insání tabíat kí kamzorí ke sabab roz roz gunáh karte haiṇ, lekin agar ham ímán se Masíh ke miláp meṇ rahen, to wuh ham ko pák karegá, táki ziyáda phal láwen, aur pákízagí meṇ barhen; aur hamárá sab kuchh, yáne hamárá rúh, aur nafs, aur badan, us ke áne tak begunáh salámat rahe. Par ádálát ke din khulá khulí záhír hogá, ki Masíh hamáre liye pákízagí hai; kyúнки us ke ímán-dár log us kí pákízagí meṇ sharík hoke aise pák o sáf záhír honge, jaise ki unhon ne kabhí gunáh na kiyá. So we Masíh kí pákízagí ko pahinke ádálát ke din Ḳhudá ke áge sharminda na honge; balki beaib aur bedág páe jáenge. Is liye hamen cháhiye, ki Masíh kí pákízagí kí talásh karen, táki ham is láiq ṡhaharen, ki Ḳhudá ko dekhen.

IV. *Masih hamare liye khalasi hai.*—Bani Isráel kí khalási, jo unhon ne Músá ke wasíle se Misr se nikalne men pái, us khalási ká, jo Masih ke wasíle se ímándáron ke liye taiyár hai, ek nishán hai : kí jaisá baní Isráel Misr kí saht gulámí men afsos karte the, waisá hí dindár log bhí is dunyá men, apne dushmanon ke sabab, jo gunáh, Shaitán, maut, aur jahannam ká khauf hai, aur unhen satáte hai, áh máрте aur afsos karte hai. Lekin injil se záhir hai, kí Masih khalási denewálá hai, jo unhen sáre dukhon aur un ke dushmanon ke zor se bacháegá.

Wuh un ko gunáh se ázád kartá hai ; kyúнки un ke gunáhon ko muáf kartá, aur apne lahú se un ke dilon ko sáf kartá, aur unhen qudrat bahtshatá hai, kí jismání taur par nahin, balki rúhání taur par chale. Aur agarchi gunáh un par hamla kare, taubhí un ke fání badan men bádsháhat nahin karne pátá ; kyúнки jis ko Beṭá ázád kare, so tahqíq ázád hai. Lekin hamesha kí zindagí men, jahán koí nápak chíz nahin hai, we gunáh se aise ázád honge, kí kabhí phir imtihán men na parenge, aur gunáh se na satáe jáenge.

Masih Shaitán se, jo garajnewále sher kí mánind phirtá, aur cháhtá hai, kí har kisi ko kháwe, ham ko bachátá hai ; kyúнки wuh is liye záhir huá, kí Shaitán ke kámon ko nest kare. Us ne apní maut ke wasíle se Shaitán ko fath kiyá, aur sardáron aur mukhtáron ko nangá karke íbrat ke liye záhir men dikháya ; aur us ne ap se un par fath kí shádmání kí. So hamará zoráwar dushman maglúb hai ; aur Masih kí fath ke sabab ham bhí us par galib ho sakte hai.

Phir, wuh maut se hamen bachátá hai. Agarchi wuh salib par mar gayá, taubhí tisre din jí uthá ; aur is tarah us ne maut ko nest kiyá, aur zindagí aur baqá ko injil se raushan kiyá hai ; kyúнки yih mumkin na thá, kí wuh, jo qiyámat aur zindagí hai, maut ke phande men rahe. Aur us kí qudrat se ham bhí jiláe jáenge ; jaise us ne kahá, kí “ Waqt átá hai, jis men we sab, jo qabron men hai, Kḥudá ke Beṭe kí áwáz sunenge, aur nikal áenge ; ” kyúнки cháhiye, kí “ yih fání badan baqá ko pahine, aur yih murda zindagí ko pahine : aur jab yih fání baqá ko, aur yih murda zindagí ko pahin chukeyá, tab wuh bát, jo likhí hai, púri hogí, kí Fath ne maut ko niglá. Ai maut, terá dānk kahā hai ! ai qabr, terí fath kahā hai ! Shukr Kḥudá ko, jis ne hamen, hamare Kḥudáwand Isá Masih ke wasíle se, fath bahtshí.” Us ke ímándár khushí se us din ke muntazir hai ; kyúнки jánte hai, kí wuh un ke kasíf badan kí shakl ko tabdíl karke apne jism i latif kí mánind banáegá.

Wuh jahannam aur hamesha kí halákat se chhurátá hai ; kyúнки “ us ne hukm ke dastkhatt ko, jo hamare barkhiláf thá, mitá dālá, aur bích men se leke salib par mekh se thonká.” So “ Kḥudá ke barguzidon par kaun dáwá karegá ? un ká rástbáz thaharānewálá Kḥudá hai. Kaun sazá ká hukm degá ? Masih, jo mar gayá, aur jí bhí uthá, aur Kḥudá ke dahne háth baiṭhá hai, hamári sifárish kartá hai.” Wuh ádalat ke din un ko, jo us ke hai, apne Báp ke mubáarak log záhir karegá, aur unhen kahegá, kí “ Áo, wuh bádsháhat, jo dunyá kí paidáish se áge tumhare liye taiyár kí gai hai, mírás men lo.” Aur we hamesha kí zindagí men dákhil honge.

Yih khalási is dunyá men shurú hotí hai, lekin us dunyá men kámil hogí ; ki tab Masíh ke log aisí khushí karenge, jo bayán se báhar aur jalál se bharí hai ; kyúinki “ Khudá un kí ánkhoñ se sab áusí ponchhegá, aur phir maut na hogí, aur na gam, na nála, aur na phir dukh hogá ; ki agli chízen guzar gaín.” Is se záhir hai, ki injíl hamári láchár hálat ke muwáfiq wuh wasíla batáti hai, jis ke ham naját páne ke liye muhtáj haiñ ; kyúinki aise naját denewále ko záhir kartí hai, jo qádir hai, ki ham ko sári buráioñ se bacháwe, aur ásmání bád-sháhat tak mahfúz rakhe. So ham, jo apní zát se Khudá ke dushman haiñ, us ke wasíle se Khudá ke farzand ban sakte haiñ ; aur jab farzand howen, to wáris thaharen, yane Khudá ke wáris, aur mírás men Masíh ke sharík haiñ ; kyúinki Khudá, “ jis ne apne Beṭe hí ko dareg na kiyá, balki ham sabhoñ ke badle use diyá, to wuh us ke sáth sab chízen kyúinkar hamen nahín degá ?” Is liye agar Masíh hamáre liye hikmat i Iláhí, aur rástí, aur pákízagí, aur khalási hai, to ásmán ká darwáza hamáre wáste khulá hai ; aur sab kuchh, jo Ádam ke gunáh ke sabab kho gayá, so ham Masíh kí nekí aur maut ke sabab se phir pá sakte haiñ.

Pas, ham aur kis chíz ke muhtáj haiñ ? Sab kuchh hamáre liye taiyár hai ; par us men sharík hone ke liye cháhiye, ki ham ímán se Masíh ko aisá qabúl karen, jaisá injíl us kí khabar detí hai. Tab ham bhí, apne kúch ke waqt, Púlús hawári kí tarah, kah sakenge, ki “ Ham achchhí laráí lar chuke ; ham daur kar chuke ; ham ne ímán ko nigáh rakhá ; ákhir nekí ká táj hamáre liye dhará húa hai, jo Khudáwand, hamárá rástbáz hákim, us din hamen degá ; aur faqat hamen nahín, balki un sabhoñ ko, jo us ke záhir hone ke mushtáj haiñ.”

XVII.

ADALAT KA DIN.

REV. F. SCHNEIDER KI TASNÍF.

Ham sab ko zurúr hai, ki Masíh kí masnad i adálat ke áge házir howen, táki har ek jo kuchh us ne badan men kiyá, kyá bhalá kyá burá, us ke muwáfiq páwe.—2 Kar. 5 : 10.

Is áyat men is bát ká bayán hai, ki Khudáwand Ísá Masíh dunyá kí adálat karegá.

Ham is talím par gaur karke is ká pánch báton se bayán karenge : yane,

I. *ʾIsā Masīh* *Ḳhudāwand* aur *bādshāh* kī *sūrat* meṇ *dunyā* kī *ʾadālat* *karegā*.

II. Yih *ʾadālat* *sabhoṇ* ke *sāmhne* hogī.

III. Is *ʾadālat* meṇ *bhale* *bure* *logoṇ* se *aḷg* *kie* *jāenge*.

IV. Yih *ʾadālat* *Ḳhudā* ke *kalām* ke *muwāfiq* hogī.

V. Har *ek* kī *ʾadālat* *us* ke *kām* ke *muwāfiq* hogī.

I. Yih *bāt*, kī *Masīh* *dunyā* kī *ʾadālat* *karegā*, *us* *bāt* ke *barkhilāf* *nahīn*, *jo* *Masīh* *ne* *Yūhannā* 12 : 47 *farmāi* : “ *Main* *is* *liye* *nahīn* *āyā*, *ki* *dunyā* *kī* *ʾadālat* *karūn*, *balki* *is* *liye* *ki* *dunyā* *ko* *bachāūn*.” *Kyūnki* *maḷūm* *hai*, *ki* *Yūhannā* *kī* *āyat* *meṇ* *Masīh* *apne* *pahle* *āne* *kī* *bābat* *bolṭā* ; *aur* *albatta* *yih* *sach* *hai*, *ki* *Masīh* *us* *waqt* *is* *liye* *nahīn* *āyā*, *ki* *dunyā* *kī* *ʾadālat* *kare*, *balki* *is* *liye* *ki* *gunahgāroṇ* *ko* *bachāwe*, *aur* *apne* *Ḳhādimoṇ* *se* *sab* *qaum*, *kyā* *Yahūdī*, *kyā* *but-parastoṇ* *ko*, *tauba* *karne* *aur* *īmān* *lāne* *ke* *liye* *bulāwe*.

Lekin *jaō* *Masīh* *dunyā* kī *ʾadālat* *karne* *ko* *āwegā*, *tab* *aur* *sūrat* *se* *āwegā* ; *kamzorī* *se* *nahīn*, *balki* *qudrat* *se*—*beizzatī* *aur* *hiqārat* *se* *nahīn*, *balki* *buzurgī* *aur* *jalāl* *se*—*naukar* *kī* *sūrat* *se* *nahīn*, *balki* *Ḳhudāwand* *aur* *Bādshāh* *kī* *sūrat* *se*. *Jab* *Ḳhudāwand* *phir* *āwegā*, *tab* *apnī* *jān* *gunahgāroṇ* *ke* *liye* *phir* *nahīn* *degā*, *balki* *dunyā* kī *ʾadālat* *karegā* ; *apne* *dīndār* *logoṇ* *ko* *is* *dunyā* *ke* *ranj*, *dukh*, *aur* *musibatōṇ* *se* *bachāwegā* ; *aur* *apne* *dushmanōṇ* *ko*, *jo* *us* *ke* *tābi* *meṇ* *rahnā* *nahīn* *chāhte* *the*, *taqsīrwār* *ṭhahrāwegā*, *aur* *sazā* *degā* *insāf* *se* : *jaisā* *Pūlūs* *ne* *likhā*, 2 *This*. 1 : 6—10, “ *Kyūnki* *Ḳhudā* *ke* *nazdik* *insāf* *yih* *hai*, *ki* *jo* *tumheṇ* *aziyat* *dete* *haiṇ*, *unheṇ* *aziyat* ; *aur* *tumheṇ*, *jo* *aziyat* *pāte* *ho*, *hamāre* *sāth* *ārām* *dewe* ; *us* *waqt* *kī* *Ḳhudāwand* *ʾIsā* *āsmān* *se* *apne* *zabardast* *frishton* *ke* *sāth* *bharaktī* *āg* *meṇ* *zāhir* *hogā* ; *aur* *un* *se*, *jo* *Ḳhudā* *ko* *nahīn* *pachhānte*, *aur* *hamāre* *Ḳhudāwand* *ʾIsā* *Masīh* *kī* *Injīl* *ko* *nahīn* *mānte*, *badlā* *legā*. *We* *Ḳhudāwand* *ke* *chihre* *se*, *aur* *us* *kī* *qudrat* *ke* *jalāl* *se* *abadī* *halākat* *kī* *sazā* *pāwenge* ; *us* *din* *jab* *wuh* *āwegā*, *ki* *apne* *muqaddasoṇ* *se* *jalāl* *pāwe*, *aur* *apne* *sab* *īmāndāroṇ* *meṇ* *taajjub* *kā* *bāis* *ho*.” *Jab* *Masīh* *bādshāhī* *sūrat* *meṇ* *ʾadālat* *karne* *ko* *āwegā*, *tab* *us* *kā* *ānā* *bilkull* *maḷūm* *aur* *zāhir* *hogā*. *Tab* *log* *nahīn* *kah* *sakenge*, *Dekh*, *yahān* *Masīh* ! *yā* *wahān* ! *balki* “ *jis* *tarah* *se* *bijlī* *pūrab* *meṇ* *chamaktī* *hai*, *aur* *pachchhim* *tak* *raushan* *kartī* *hai*, *Ibn* *i* *ʾAdam* *kā* *ānā* *isī* *tarah* *se* *hogā*.” *Us* *waqt* *harek* *us* *ko* *dunyā* *kā* *bādshāh* *aur* *Ḳhudāwand* *jānegā* ; *hān*, *we* *bhī*, *jo* *us* *ke* *nām* *kā* *inkār* *karte* *the*, *soī* *bhī* *jo* *us* *kī* *bādshāhat* *ke* *phailāo* *dunyā* *meṇ* *rokte* *the*, *aur* *jo* *gunāh* *kī* *gulāmī* *ko* *us* *kī* *bandagī* *se* *ziyāda* *piyār* *karte* *the* ; *ye* *sab* *us* *ko* *dekhenge*, *jaisā* *Mushāhada* *kī* *kitāb* *meṇ* *likhā* *hai*, “ *Dekho*, *wuh* *bādaloṇ* *par* *ātā* *hai*, *aur* *har* *ek* *ānkh* *us* *ko* *dekhegī* ; *aur* *we* *bhī*, *jinhoṇ* *ne* *use* *chhedā* ; *aur* *zamīn* *kī* *sārī* *guroheṇ* *us* *ke* *liye* *chhātī* *pīṭenge* ; *aur* *we* *kahenge* *pahāroṇ* *aur* *pattharoṇ* *se*, *ki* *Ham* *par* *giro*, *aur* *ham* *ko* *us* *ke* *chihre* *se*, *jo* *taḡht* *par* *baiṭhtā* *hai*, *aur* *Barre* *ke* *gazab* *se* *chhipāo* ! *kyūnki* *us* *ke* *qahr* *kā* *roz* *i* *ʾazīm* *ā* *pahunchā* ; *ab* *kaun* *ṭhahar* *saktā* *hai* ?” *Wuh* *Qādir* *i* *mutlaq* *bādshāh* *aisī* *ham* *se* *ʾadālat* *karegā*, *ki* *us* *kā* *fatwā*, *hukm*, *qazā* *barqarār* *rahegā* *hamesha* *tak*. *Koī* *dāwa* *yā* *appīl* *nahīn* *ho* *saktā* *hai*. *Afsos* *un* *par*, *jinhoṇ* *ne* *fazl* *kā* *waqt* *befāida* *guzārā*, *aur* *Masīh* *kī* *najāt* *qa-*

búl nahín kí; kyúinki un ke liye bād us ke naját kí kuchh ummaid báqí nahín rahí. Lekin mubáarak we, jinhon ne K̤hudáwand ká kalám mán liyá, jo ásmán ke báshindon ke ham-watn the, jahán se naját bakhshnewále K̤hudáwand Ysá Masíh kí ráh takte the. Un ko K̤hudáwand kí sháhansháhi buzurgí k̤haufnák na hogí, par we sídhe hoke sir úpar uṭhāwenge, is liye ki un ká chhuṭkárá á pahunchá. Iúká, 21 : 28.

II. Ysá Masíh ádalát karegá zāhíran, áshkárá, sabhon ke sāmhnē. Aisá hogá, ki sab kuchh, jo poshida hai, zāhir hogá. Likhá hai : “ Aur sab qaum us ke áge házir kí jáengí, tab us kí áwáz sunenge murde aur jite.” Kyúinki murdon kí qiyámat ádalát ke áge hogí. Jaisá Yúhanná kí Injíl 5 : 25—29 likhá hai, “ Main tum se sach sach kahtá hún, wuh waqt átá hai, aur ab hai, ki murde K̤hudá ke Beṭe kí áwáz sunke jenge. Isí liye, ki jis tarah Báp áp men zindagí rakhtá hai, usí tarah us ne Beṭe ko dí hai, ki áp men zindagí rakhe. Aur use ikhtiyár diyá hai, ki ádalát kare, is liye ki wuh Ibn i Ádam hai. Is se taajjub na karo; kyúinki wuh waqt átá hai, jis men we sab, jo qabron men hain, us kí áwáz sunenge; aur jinhon ne nekí kí hai, zindagí kí qiyámat ke wáste niklenge; aur jinhon ne badí kí hai, sazá kí qiyámat ke liye niklenge.” Jaisá koí murda qabr ke andhiyáre men K̤hudá ke Beṭe kí áwáz se nahín rah saktá hai, waisáhi us ke huzúr men kuchh bhí poshida na rahegá, jo jo ádmí ne is dunyá men kiyá; tamám dunyá, firishton, aur ádmíon ke sāmhnē, sab gunáh zāhir aur áshkár hongē. Andhiyáre ke sab kám, dagábāzī, fareb, chori, harámkárí, zinákárí, jhúṭh, riyá, kufr, zāhir hogá. Jo jo kisí ko maḷúm na howe; jo jo bilkull poshida hai; hán, dilon ke bhed, māsúbe, k̤hiyál aur árzu; wuh sab kuchh Masíh zāhir dikhlāwegá. Kyúinki likhá hai, (2 Kar. 5 : 10), “ Ham sab ko zurúr hai, ki Masíh kí masnad i ádalát ke áge házir howen, táki har ek jo kuchh us ne badan men kiyá, kyá bhalá kyá burá, us ke muwáfíq páwe.”

III. Is ádalát men har ek jald maḷúm karegá, ki merá hál K̤hudáwand ke fatwá ke muwáfíq kaisá hogá. Kyúinki likhá hai, “ Aur jis tarah garariyá bheron ko bakríon se judá kartá hai, wuh ek ko dúsre se judá karegá. Aur bheron ko dahne, aur bakríon ko báen khará karegá.” Bhale ádmí bure logon se alag kie jáenge. Badan qiyámat men jānon kí hálát ke muwáfíq hongē. “ Wuh, jo faná men boyá gayá thá, baqá men uṭhegá; jo behurmatí men boyá gayá thá, wuh jalál men uṭhegá; jo kamzorí men boyá gayá thá, wuh qudrat men uṭhegá.” Dindáron ke badan jaláli aur rúhání hongē. Rástbáz apne Báp kí bádsháhat men áftáb kí mánind núrání hongē. Matí, 13 : 43. Aur badan ásmání bhí hain, aur k̤hákí bhí hain; par ásmáníon ká jalál aur hai, aur k̤hákíon ká aur. Áftáb ká jalál aur hai, máhtáb ká jalál aur, sitáron ká jalál aur hai. Kí sitára sitáre se jalál men faraq rahtá hai. 1 Kar. 15 : 40, 41. Murdon kí qiyámat men maḷúm hogá, ki wuh mihnát aur koshish, jo ádmí ne pák hone parkí, befáida nahín hai. Kyúinki jaisá k̤hákí, waise we bhí, jo k̤hákí hain; aur jaisá ásmání, waise we bhí, jo ásmání hain. Aur jis tarah

ham ne kḥákí kī súrat páí hai, ham ásmání kī súrat bhí páwenge. I Kar. 15 : 48, 49. Lekin bure log, jinḥoṇ ne Kḥudá ke faẓl aur Kḥudá-wand Ísá Masih ko haqír jáná, aur Masih kī kalísíyá ko satáyá, apne báp, yaṇe Shaitán kī súrat rakhenge.

Un sab ko, kyá bhale kyá bure, jo apní súrat se zāhir honge, Kḥudá-wand ek dúsré se judá karegá, jaisá garariyá bheroṇ ko bakrioṇ se judá kartá hai. In ko tasallí, mahabbat, kḥushí kī báteṇ kahegá; aur un ko kḥaufnák sazá kī báteṇ.

IV. Tum púchhte ho, ki Ibn i Ádam hamárí kis shariát se adálat karegá? Jawáb yih hai, ki Wuh hamárí adálat karegá ek shara ke muwáfiq, jo ham ko maḷúm thí. Agar aisá na hotá, to Kḥudá na farmá saktá, ki Tum us ke muwáfiq chalo. Yih shara, jis ke muwáfiq adálat kī jáegí, Kḥudá ká pák kalám hai. Yih ṭhaharegá, harchand amr is zamín par tamám ho játá hai. Jaisá ki Masih ne farmáyá, “Ásmán aur zamín ṭal jáenge, par merí báteṇ hargiz na ṭalengi.” Matí, 24 : 35. Harchand sab kuchh, jo abhí kḥúbsúratí aur zindagi rakhtá, jism kī ráh par chala gayá; háṇ, “jab súraj andherá ho jáegá, aur chánd apní raushní na degá, aur sitáre ásmán se gir jáenge, aur ásmán kī qúwateṇ hil jáengi;” (Lúká, 24 : 29); “jab ásmán sanná-ṭe ke sáth játe rahenge, aur anásir jalkar gudáz ho jáenge, aur zamín un kárigariṇ samet, jo us meṇ haiṇ, gal jáengi;” (2 Pat. 3 : 10); tad bhi Kḥudá ká kalám wuh shara aur qánún hogá, jis ke muwáfiq Kḥudá-wand dunyá kī adálat karegá; jis ke muwáfiq ajr aur sazá degá; jaisá Masih ne farmáyá, “Jo mujhe haqír jántá, aur merí bátoṇ ko qabúl nahíṇ kartá, us ke liye adálat karnewálá hai—kalám, jo main ne kahá hai—wuh us kī pichhle din adálat karegá.” Yúh. 12 : 48. Aur jaisá us ne Yahúdiṇ se kahá, “Gumán na karo, ki main Báp pás tumhárí faryád karúngá. Ek hai, jo tumhárá faryád karnewálá hai, yaṇe Músá, jis par tumhárá bharosá hai.” Yúh. 5 : 45. Jaisá Yahúdí aur Ísáioṇ ne Kḥudá ká kalám mán liyá, yá radd kiyá, us ke farmánbardár yá náfarmánbardár húe, waisá hí un kī adálat kī jáegí. Lekin gair qaumoṇ kī us shariát ke muwáfiq adálat kī jáegí, jo un ke diloṇ meṇ likhí húí hai; jaisá likhá hai, Róm. 2 : 5, 16, “Is liye jab gair qaumoṇ, jinḥeṇ shariát na milí, apne liye áp hí shariát haiṇ. We shariát ká kḥulása apne diloṇ meṇ likhá húa dikháte haiṇ, aur un kī tamíz bhí ga-wáhí detí, aur un ke kḥiyál ápas meṇ ilzám dete yá uzr karte haiṇ.” Is liye, ai piyáro, tum, jo Kḥudá ká kalám rakhte ho, us ko achchhí tarah se daryáft karke us par amal karo; kyúñki is ke muwáfiq tumháří adálat kī jáegí.

V. Kḥudá-wand apní adálat meṇ har ek ko us ke kám ke muwáfiq degá. “Tab wuh unḥeṇ, jo us kī dahiní taraf haiṇ, kahegá, Ai mere Báp ke mubáarak logo, us bádsháhat ko, jo dunyá kī paidáish se tumháre liye taiyár kī gai, mírás meṇ lo. Kyúñki main bhúkhá thá, tum ne mujhe khána khiláyá; main piyásá thá, tum ne mujhe pání piláyá; main pardesí thá, tum ne merí kḥátirdárí kī; nangá thá, tum ne mujhe kaprá pahináyá; bímár thá, tum ne merí kḥabar lí; qaid meṇ thá, tum mere pás áe. Us waqt rástbáz use jawáb meṇ kahenge, Ai

Khudāwand, kab ham ne tujhe bhúkhá dekhá, aur kháná khiláyá ? yá piyásá, aur pání piláyá ? Kab ham ne tujhe pardesí dekhá, aur khátir-dárá kí ? yá nangá, aur kaprá pahináyá ? Ham kab tujhe bímár, yá qaid men dekhkar tujh pás áe ? Tab bádsháh un se jawáb men kahegá, Main tum se sach kahtá hún, jo jo tum ne mere un sab chhoṭe bháíon men se ek ke sáth kiyá, wuh mere sáth kiyá. Tab wuh báen taraf wálon se kahegá ; Ai maláúno, mere sámhne se us hamesha kí ág men jáo, jo Shaitán aur us ke lashkar ke liye taiyár kí gai hai. Kyúнки main bhúkhá thá, par tum ne mujhe kháne ko ná diyá ; piyásá thá, tum ne mujhe pání ná piáyá ; pardesí thá, tum ne merí khátir-dárá ná kí ; nangá thá, tum ne mujhe kaprá ná pahináyá ; bímár, aur qaid men thá, tum ne merí khabar ná lí. Tab we bhí jawáb men kahenge, Ai Khudāwand, kab ham ne tujhe bhúkhá, yá piyásá, yá pardesí, yá nangá, yá qaidí dekhá, aur terí khidmat ná kí ? Tab wuh unhen jawáb men kahegá, Main tum se sach kahtá hún, kí jo jo tum ne mere in sab se chhoṭe bháíon men se ek ke sáth ná kiyá, wuh mere sáth bhí ná kiyá. Aur we hamesha ke azáb men jáenge, par rástbáz hamesha kí zindagí men.” Is se sáf záhir hotá, kí Khudāwand ádmíon kí kis taur se ádalát karegá. “ Wuh har ek ko us ke kámon ke muwáfíq badlá degá. Un ko, jo nek kám par qáim rahke buzurgí, aur izzat, aur baqá ke cháhnewále hai, hamesha kí zindagí degá ; magar un par, jo fasádi, aur sachcháí se mukhálif, aur nárástí ke tábi hai, qahr aur gazab hogá.” Róm. 2 : 6, 7, 8. Yih bát, kí Khudá har ek ko us ke kámon ke muwáfíq badlá degá, us talím se mukhálif nahí, kí “ har ek shariát ke kámon ke bagair rástbáz ho játá hai, sirf ímán kí ráh se.” Is bát ke bhí barákhiláf nahí hai, jo Masíh ne farmái, “ Jo kí ímán látá, aur báptismá pátá hai, naját páwegá ; aur jo ímán nahí látá, us par sazá ká hukm kiyá jóegá.” Lekin yih talím albatta is gumán ke barákhiláf hai, kí ádmí aise ímán se, jo murda aur sab achche kámon se khálí hai, sirf Khudá ke fazl kí pahchán se rástbází aur naját páwe ; kyúнки sachche ímán men mahabbat ká kám bhí zurúr hai. Sachche ímán ká bayán Gal. 5 : 6 hai ; aisé ímán, jo mahabbat kí ráh se tásír kartá hai. Sakht dilí ká ádmí, jo auron kí láchárá, ranj, dukh, musíbat par rahm aur madad nahí kartá, aisé ádmí Khudá ko bhí piyár nahí kartá. Ímándár log Khudá kí mahabbat ko pahchánte hai, aur is mahabbat se ubháre játe hai, kí sab ádmíon se mahabbat rakhen ; aur kháss kar láchár, kangál, bímáron par rahm karte, aur maqdúr bhar Khudá kí bádsháhat ke phailáo ke liye koshish karte hai. Us mahabbat par, jo ham ne Masíh ke liye auron par záhir dikhlái, Khudāwand apní ádalát men kháss kar nazar karegá ; jaisá Masíh ne apne shágirdon se farmáyá, Matí 10 : 40, 41, “ Jo tumhen qabúl kartá, mujhe qabúl kartá hai ; aur jo mujhe qabúl kartá, use, jis ne mujhe bhejá, qabúl kartá hai. Jo koí nabí ke nám se nabí ko qabúl kartá hai, nabí ká ajr páwegá ; aur jo rástbáz ke nám se rástbáz ko qabúl kartá, rástbáz ká ajr páwegá. Aur jo koí un chhoṭon men se ek ko shágird ke nám se faqat ek piyalá ṭhandá pání piláwegá, main tum se sach kahtá hún, kí wuh apne ajr se mahrúm ná rahegá.” Is mahabbat ke kámon men, jo ádalát ke dín men aisé fáidamand hongé, sirf rahm aur khairát shámil nahí hai ; balki mihrbání bhí, farotání,

sabr aur ádmíon ke sulúk men zarúr hain ; jaisá Lúká 6 : 37 men likhá hai ; “ Aib na lagáo, to tum par bhí aib lagáyá na jáegá ; aur gunáh sábit na karo, to tumháre bhí gunáh sábit kie na jáenge ; baḡsho, to tum bhí baḡsho jáoge.”

Ai piyáro, apne dilon ká hál ḡhúb parakho ; kyúнки malúm hai, ki ádmí, jo saḡht dili ká hai, jo tauba nahín kartá, jo auron par rahm aur mihrbání nahín záhír dikhlatá, us par Ḳhudá ká qahr ádálát ke din men paregá. Bhárí báten hain, jo likhí hain,—“ Aur we hamesha ke azáb men jáenge, par rástbáz hamesha kí zindagí men.” Is liye har ek ham men apne dil ko saḡht na kare, baḡki fazl ke waqt men Ísá Masíh aur us kí naját ko páwe, táki ádálát ke din men us ká qahr us par na pare. Ámín.

XVIII.

ROZA I HAQÍQÍ KÍ KAIFIYAT.

REV. J. WILSON KÍ TASNÍF.

So we áke us se kahne lage, ki Yúhanná ke aur Farísíon ke shágird roza rakhte hain, par tere shágird rozá nahín rakhte. Ísá ne un se kahá, Kyá barátí jab tak dúlhá un ke sáth hai, roza rakh sakte hain ? Jab tak dúlhá un ke sáth hai, we roza rakh nahín sakte. Par din áwenge, jab dúlhá un se liyá jáegá, aur we un dinon men roza rakhenge.—Markus, 2 : 18—20.

UN sárí qaumon men, jo sachche Ḳhudá se zará bhí wáqif húín, yih rasm járí húi hai, ki ḡhatar, yá ḡhauf, yá tangí ke waqt roza rakheḡ.

Aur yih munásib hai. Yih insán ke tabá aur Alláh kí marzí ke muwáfíq hai. Insán kamzor, aur ásí, aur ájiz hai ; aur Alláh rahmán. Jis waqt us ke chihre kí raushní un se báz rakhí jáe, aur bezárí ke ásár un par nazar áweḡ, kyá hí wájib hai, ki we kháná kháne se báz raheḡ, aur áish o ishrat ko dúr karke apní ján ko taklíf deweḡ, aur apní apní ḡhata aur becháragi ká iqrár karenḡ. Jab we aisá karte, aur Alláh un ke tauba aur pachhtáwe ko dekhtá, ki haqíqí hai, wuh un par tars khákar rahm farmátá hai.

Lekin koí ádat, jo áp se bahut hí achchhí ho, jab begaur aur befikrí se istiámál kí játí, tab nákára aur láhásil hotí hai. Is taur par Ya-

húd log bahutere roza i mu'ayan kí hifázat karte the, par roza kí haqíqat aur matlab se gáfíl rahte the. Háb, unhon ne apní rozadárí ke sabab apne taín baní Ádam meñ afzal aur niháyat K̲hudá-parast ṭaharáyá; aur Masih aur us ke shágirdon par shikáyat kí, aur sábit karne cháhá, ki we dín ke faráiz meñ káhil aur gáfíl haiñ. Masih ne apne shágirdon kí mu'azarat kí, aur roza rahne ke haqíqí matlab ko bayán kiyá. “Kyá barátí jab tak dúlhá un ke sáth hai, roza rakh sakte haiñ? Jab dúlhá un ke sáth hai, we roza rakh nahín sakte. Lekin dín áwenge, jab dúlhá un se liyá jáegá, aur we un dinon meñ roza rakhenge.” Yáñe, roza rakhná mátam aur zári karne ke waqt munásib hai. Lekin k̲hiláf i aql aur k̲hiláf i tabá bhí hai, ki k̲hush-hálí ke aiyám meñ, jab báhar bhitar sab kuchh bahál hai, roza rakhne aur mátam karne kí súrat banáwen. Shádí ke waqt jab dúlhá házir hai, aur barátí us ke sáth k̲hush o k̲hurram hote haiñ, sab koí kahte, ki mátam aur záriáñ karná bejá hai. Yih us bewaqúf kí mánind hotá, jo puráne aur phate húe kapre par nae thán ke paiwand lagáwe, yá naí sharáb ko puráne chamre kí mashkon meñ dále. Nayá thán puráne kapre ke muwáfíq nahín, aur naí sharáb purání aur sarí húe mashkon ko pháregí, aur bah jákar zái hogí. Masih us waqt tak apne shágirdon ke sáth thá. Un ká sab kuchh bahál rahá. Un kí har ek k̲hwáhish us ke huzúr bar átí thí. Us hálát meñ roza rakhná bajá na hotá. Lekin Isá ko ma'lúm thá, ki we chand barason ke bád dunyá meñ akele rah jáenge; dúlhá un se judá kiyá jáegá; aur dunyá un ko pareshán aur tabáh karne ke liye darpai howegí. Us hálát meñ we roza ke mane pahchánenge, aur us ká fáida bhí hásil karenge. Is bát kí haqíqat is waq̲ ke silsile meñ ma'lúm hogí.

Is amr kí haqíqat daryáft karne ke liye in do báton par gaur kiyá cháhíve. Yáñe,

Pahlí, Roza rakhne ká matlab aur sabab kyá hai?

Dúsrí, Us kí hifázat kis tarah kí cháhíve?

Do qism kí rozadárí rawá haiñ. *Ek* jo ámmúm, yáñe k̲háss o ámm ke liye hai. Jis waqt kisi mulk yá sarzamín par áfat, yá akál, yá Al-láh kí nák̲hushí ke ásár kisi súrat se nazar áwen, us waqt roza rakhná aur mátam karná bajá hai; aur us ká ishtihár bhí sab kahín karná jáiz aur rawá hai.

Dúsrí qism yih hai, jahán roza rakhne aur mátam karne kí zurúrat faqat ek gharáne yá ek hí shakhs par ho. Tab us ká ishtihár karná bejá hotá. Jaisá ki Masih ne apne pairauon ke wáste farmáyá, ki “Jab tum roza rakho, makkároñ kí mánind turshrú mat ho; kyúnki we apne munh bigárte haiñ, táki ádmíon kí nazar meñ rozadár howen,” wagaira, Matí, 6 : 16—18. Is hálát meñ roza kí manádí yá ishtihár bejá hotá. Roza kí haqíqat rozadár aur K̲hudá hí ko ma'lúm howe. Yún roza i nihán, aur roza i ámm ke darmiyán imtiyáz kiyá cháhíve.

Jo roza, ki láiq aur haqíqí hai, us meñ ye tén báteñ zurúr pái jáengí. Yáñe *pahlí*, ki rozadár kháne, aur pine, aur har qism kí nafsání lazzaton se ba qadr i maqdúr báz rahtá hai. *Dúsrí* yih, ki wuh K̲hudá ke áge farotaní se apne gunáhon ká iqrár kartá, aur kamál ájizí ke sáth iltímás kartá, ki K̲hudá rahm khákar siyásat karne se darguzare. *Tísrí*

yih, kí minnat kartá, kí *Khudá* we sab díní aur dunyáwí barakaten, jin kí us ko yá auron ko ihtiyáj hai, baḡhshe.

Jahán ye sab báteṃ pái játín, rozadárí haqíqí aur fáidamand hogí. Par jis ke roze meṃ ye báteṃ pái na játín, wuh roza bátíl aur befáida hai.

Bahut log us ko roza káhte haiṃ, jahán faqat ek muddat tak kháne píne se báz rahte haiṃ, aur jánte nahín, kí báz rahne ká sabab, yá roza rakhne ká matlab kyá hai. Yún ahl i Islám aksar roze ke báb meṃ barí galatí meṃ paré haiṃ. Qurán ke mutábíq jáiz yih hai, kí “ Kháo, aur píó, jab tak sáf nazar áwe tum ko dhárí safed judí dhárí siyáh se fajr kí ; phir púra karo roza rát tak, aur na lago un se—yáne *auraton* se—jab itikáf meṃ baithé ho masjidon meṃ.” Yún un par jáiz hai, kí rát bhar aish o ishrat meṃ káten ; kí kháte píte rahen, aur mastí, yá jo jí cháhe, us meṃ rát ko sarf karen, aur fajr ko phir roze meṃ rahen ; goyá, kí Alláh ko rát meṃ sújh nahín partá, yá insán ke kámon par liház nahín kartá ! Aise roze par Alláh yún sawál kartá hai : “ Jab tum ne roza rakhá, aur mátam kiyá, to kyá mere liye, *hán*, mere liye roza rakhá thá ?” Zakariyáh, 7 : 5.

Jáhil aur jalsázon ká dastúr íai, kí aise kámon meṃ mátam karne aur ishrat karne ke hudúd ṭaharáwen, aur kahen, kí Fulání gharí tak mátam karo, aur apní ján ko taklif deo ; phir us ke bad fulání gharí tak dil bahlákar aish o ishrat karo. Sachche ambiyá aur Alláh ke bheje hoon ne aisá nahín kiyá. We is bát meṃ muttáfíq húe, kí baní Ádam jab roza rakheṃ, to roza ke sabab, aur zurúrat, aur munásibat par gaur karen, aur dil us meṃ yaháq tak fikrmand howe, kí achchhe se achchhe kháne meṃ, aur aish o ishrat meṃ bhí lazzat na howe. Unhon ne qánún ke taur par nahín ṭaharáyá, kí kis qadr, yá kitní muddat tak kháne píne se báz rahá cháhiye. Is bát meṃ baní Ádam kí hálát aur táqat meṃ tafáwat hai. Un ke ámal se, jo Tauret Injíl ke kaí maqámon meṃ manqúl hai, maḡlúm hogá, kí we kis qadr báz rahte the, aur ham ko bhí kis qadr báz rahná munásib hai.

Yún Tauret meṃ sahífa i Yashúa ke 7 báb meṃ hai, kí jis din baní Isráíl kí fauj shahr i Ai kí fauj se shikast húi : “ Logon ke dil pighal gae, aur pání se ho gae. Tab Yashúa aur Isráíl ke sáre buzurgon ne apne kapre pháre, aur *Khudá*wand ke áhdnáme ke sandúq ke áge shám tak aundhe paré rahe, aur apne siron par kḡák uráí. Aur Yashúa bolá, Hée, ai *KHUDA*’WAND Taálá, tú in logon ko kis liye Ardan pár láyá, kí ham ko Amúrion ke háth meṃ giriftár kare, tá we ham ko nábud karen ? Ai, kásh kí ham qanáat karte, aur Ardan ke pár rahte ! Ai *Khudá*wand, ab jo Isráíli apne dushmanon ke áge se bhágte haiṃ, main kyá kahún ? Kí Kanaání aur is zamín ke sáre basnewále sunenge, aur ham ko gher lenge, aur hamára nám zamín par se miṭá dálenge, aur tú apne buzurg nám ko kyá karegá ?” Us hálát meṃ maḡlúm hotá hai, kí na kháne píne meṃ, na aish o ishrat meṃ kuchh lazzat thí.

Phir, Samúel ke pahle sahífe ke 7 báb meṃ hai, kí sandúq i shahádat aur áhdnáme ká Filistíon ke háthon meṃ pará, aur bís baras ke arse tak bad hálí meṃ rahá, “ Tab sáre baní Isráíl ne *Khudá*wand ke huzúr nále kie. Aur Samúel ne Isráíl ke sáre gharáne ko kahá, kí agar tum apne dilon se *Khudá*wand kí taraf phiro, to un ajnabi

maḥbūdōṇ ko aur Istárat ko apne darmiyán se nikál phenko, aur Ḳhudáwand se dil lagáo, aur usí akele kí ibádat karo, to wuh Filistíōṇ ke háth se naját baḳhshegá. Aur baní Isráíl ne Baqlím, aur Istárat ko nikál phenká, aur akele Ḳhudáwand kí bandagí karne lage. Phir, Samúel ne kahá, ki sáre baní Isráíl Misfá meṇ jamá howeṇ, táki main tumháre liye Ḳhudáwand se duá mángūṇ. So we sab Misfá meṇ faráham húa, aur pání nikálá aur Ḳhudáwand ke áge chhirkáo kiyá, aur us din roza rakhá, aur wahán bole, ki ham Ḳhudáwand ke gunahgár haiṇ.” Aur Ḳhudá ne un ke istigfár aur záriáṇ suníṇ, aur un ká roza qabúl kiyá, aur unheṇ un ke dushmanōṇ ke háth se rihái baḳhshí.

Phir, Tawárfkh ke dúsre sahífe ke 20 báb meṇ likhá hai, ki “ Baní Moāb, aur baní Amún, aur un ke sáth bahut log jang ke liye Yahusafát par charḥ áe.—Tab Yahusafát ḍar gayá, aur Ḳhudáwand kí talásh ko apná ruḳh kiyá, aur *tamám Yahúdáh meṇ roza rakhne kí manádí karwái*. Aur baní Yahúdáh jamá húa, ki Ḳhudáwand se madad mángeṇ, aur we Yahúdáh ke sáre shahroṇ meṇ áe, ki Ḳhudáwand ko dhúndheṇ. Aur Yahusafát Yahúdiáh aur Aurshalím kí jamáat ke darmiyán Ḳhudáwand ke ghar meṇ nae sahn ke áge khará húa, aur kahá, ki Ai Ḳhudáwand, hamáre bápádōṇ ke Ḳhudá, kyá ásmán meṇ tú Ḳhudá nahíṇ ? Aur tú qaumoṇ kí sárí mamlukatoṇ ká hákim nahíṇ ? Aur tere háth meṇ aisá zor aur qudrat hai, ki koí terá sámhná nahíṇ kar saktá. Kyá tú ne, ai hamáre Ḳhudá, is sarzamín ke báshindōṇ ko apní guroh Isráíl ke áge se ḳhárij nahíṇ kiyá, aur use apne dost Ibráhím kí nasl ko hamesha ke liye nahíṇ diyá ? Aur we us meṇ base, aur tere nám ke liye us meṇ ek maqdis banáyá ; kyúṇki unhon ne kahá, Agar balá, jaisá ki talwár, aur áfat, aur marí, aur kál ham par á pare, to ham is ghar ke áge aur tere huzúr á khare hongey, ki terá nám is ghar meṇ hai, aur ham apne dukh meṇ tujh se faryád karenge, aur tú hamárí sunegá, aur hamen naját baḳshegá. Aur ab, dekh, ki baní Amún, aur ahl i Moāb, aur koh i Saír ke log, jin meṇ tú ne baní Isráíl ko, jab we zamín i Misr se nikal áe, áne na diyá, balki we un se phir gae, aur unheṇ halák na kiyá ; dekh, we ham ko yih badlá dete haiṇ, ki charḥ áte haiṇ, táki ham ko hamárí mírás se nikáleṇ, jis ká tú ne ham ko wáris kiyá ! Ai hamáre Ḳhudá, kyá tú un ká insáf nahíṇ karegá ? Kyúṇki is bare amboh ke muqábil, jo ham par charḥ átá hai, ham kuchh táqat nahíṇ rakhte ; aur kyá karen, so bhí nahíṇ jánte ; balki hamárí ánkheṇ tujh par haiṇ. Aur tamám Yahúdáh apne ál o aýál, yaṇe apní jorúáṇ aur larkoṇ samet, Ḳhudáwand ke áge khare húa.” Aur Ḳhudá ne un ke roza aur záriáṇ qabúl kíṇ, aur un ke dushmanōṇ ko hazímat dekar un ko rihái baḳhshí. Un ke ahwál se maḷúm hotá hai, ki un ke roze ke dīnoṇ meṇ achchhe se achchhá kháná un ke liye mazadár na thá, aur rát ke waqt aish o ishrat ke nám o nishán bhí un ke darmiyán na the.

Phir, Azrá ne (Azair) apne sahífe ke 13 báb meṇ likhá, ki “ Main ne Aháwá kí nadí par manádí karwái, ki *Roza rakho*, ki ham apne Ḳhudá ke huzúr ájizí karen, aur us se duá mángeṇ, ki safar meṇ ham ko aur hamáre bálbachchoṇ, aur hamáre mál ko ba salámat rakhe. Kyúṇki mujhe sharm áí, ki bádsháh se sipáhí aur sawár máng lúṇ, ki we ráh meṇ ham ko dushman se paúáh deweṇ ; kyúṇki ham ne bádsháh se

kahá thá, ki hamáre *Khudá* ká háth panáh dene ko un sabhon par hai, jo us ke *tálib* hain ; par us ká jabr, aur qahr un sabhon par *jhúm* rahtá hai, jo use chhorté hain. So, ham ne roza rakhkar is bát ke liye apne *Khudá* se *duá* mángí ; aur hamárá *duá* qabúl húi.” Un kí us sarguzasht se bhí *ma'lúm* hai, ki we roza rakhne ke sabab jánte the, aur un ke roze ke dinon men we achchhe kháne yá ishrat ká *khiyál* nahín rakhte the. We *Aurshalím*, apne watan ko phir jáne par the, lekin ájiz, aur kamzor, aur bechára the ; aur guzar un ká dushman aur wahshí qaumon kí sarhadon men se thá. Unhon ne *Fáras* ke bádsháh se kahá thá, ki Alláh hí par hamará *tawakkul* hai, ki hamárá panáh kare, aur dushmanon ke háth se hamen mahfúz rakhe, ki us ká háth panáh dene ko, un sabhon par hai, jo us ke *tálib* hain. Isná i ráh men we mushkil men par gae. Áge jáne se dahshat aur khatar thá ; píchhe phirne men sharm aur zarar. Un ká chára na rahá. We roza rakhne, aur Alláh apne *Khudá* ko *dhúndhne* lage ; us ne qabúl kiyá, aur un ke safar ke *saranjám* ko sahih *salámat* pahuncháyá. Unhon ne kuchh fikr na kiyá, ki subh yá shám ko *kis waqt* “ dhári safed aur dhári siyáh ká faraq nazar áwe.” Balki apne khatar aur mushkil par fikrmand húe, aur *Khudá* kí *razámandí* ke hásil karne par, yahán tak, ki achchhe kháne aur píne, aur áish o ishrat kí lazzat se bhí *farámosh* húe.

Aur *Dáúd* ne, jab us ká *larhá* bímár ho maut ke qaríb pahunchá thá, “ us *larke* ke liye *Khudá* se árz kí, aur roza rakhá, aur ghar men jákar sári rát *zamín* par pará rahá.” 2 *Samúel*, 12 : 16.

Phir, *Dáníel* nabí ke waqt jab *Fáras* ke bádsháh ne *saláhkár* i bad-bátin ke fareb se *Dáníel* ko, biná *qusúr* kiye, sher i babar kí mánd men *dalá* thá, “ Tab bádsháh apní *bárgáh* men gayá, aur sári rát fáqe men rahá, aur báje ká manch us ke áge láyá na gayá, aur nind us se *játi* rahí.” *Dán.* 6 : 18.

Phir *Dáníel* ke 10 báb men yún likhá hai, “ Main *Dáníel* un dinon men *tín* hafte tak gam kartá rahá. Main ne *tín* hafte ke guzarne tak lazzat kí ro'ti na kháí, aur mere munh men gosht, yá sharáb na áyá, aur main ne apne par tel na malá.” Aur aglab hai, ki us ke mulk kí *wirání*, aur apne *Khudá* kí haikal aur *kalísíyá* kí be hurmatí par gaur karne se, gam aur malálat us ke dil par yahán tak gálib húe, ki achchhe se achchhá khána us ko *nágawár* húa.

Aur *Yúnas* nabí ke *sahífe* ke *tísre* báb men hai, ki jab unhon ne nabí kí *zubán* se *Khudá* kí *tahdíd* aur *wa'id* apne shahr par suná, “ Tab *Nainawe* ke *báshinde* *Khudá* par *ímán* láe, aur roza kí *manádí* kí, aur sáre chhote *baron* ne *tát* pahine. Aur yih *khabar* *Nainawe* ke bádsháh tak pahunchí, aur wuh apne *taht* par se *uthá*, aur bádsháhí libás ko *utár* *dalá*, aur *tát* *orhkar* rákh par *baith* gayá. Aur us ne bádsháh, aur *amíron* ke *farmán* se, *Nainawe* men *manádí* aur *ishtihár* *karwáyá*, ki na *insán*, aur na *haiwán*, na galle, na *mawáshí* kuchh chakhen, aur na *kháwen*, na *pání* *píwen*. Lekin *insán* aur *haiwán* *tát* pahinen, aur *Khudá* kí *taraf* dil se *faryád* karen ; balki har *koí* apní apní *burí* ráh se, aur apne apne *zulm* se, jo un ke háthon men hain, phir jáen. Kyá jáne *Khudá* phire, aur *thahar* jáe, aur apne bare qahr se *báz* rahe, *táki* ham log *halák* na hon ! Aur *Khudá* ne un

ke ámál ko dekhá, ki we apní apní búrí ráh se phir gae ; tab Khudá us badí se, jo un kí bábat talhid kiyá thá, phirá, aur use na kiyá.” Un ká roza manawí aur haqíqí roza thá. Us men kuchh tiflagí, “ kálá aur safed dhári” ke faraq nazar áne, yá aise kuchh butlánon ke haqq men, dákhil na húi. Un kí badkáríon kí yád, aur Alláh kí rahmat aur pákizagí, aur sacháí kí pahchán, un ke dilon men gálib húi, aur aise sab bátíl aur be fáida khyálon ko un se dúr kiyá. Yún in sab roza i mazkúr se, aur bahutere in ke siwá, jo Tauret men mundarj hai, yih bát málím hai, ki jis roza i manawí aur haqíqí se Khudá rází húa, aur use qabúl kiyá, rozadár ká dil kisi tarah ke gunáh se, khwáh apne, khwáh apní qaum ke gunáh se yahán tak gamgín húa, ki roza ke waqt achchhe se achchhe kháne píne men us ke liye lazzat na húi.

Aur Nahamiyáh ke sahife ke 1 báb, aur Yúel nabí ke 2 báb, 12—17 áyaton ko bhí yahán parho.

Injíl men bhí roza rakhne ká tazkira jo hai, usí tarah ká hai. Ámál ke 10 báb men Karnelius apná ahwál yún bayán kartá hai, ki “ Chár roz hús main ne is waqt tak roza rakhá ; aur tisre pahar ko apne ghar men duá mángtá thá ; aur kyá dekhtá hún, ki ek mard núrání libás men mere sámhne khará húa, aur kahá, Ai Karnelius, terí duá qabúl húi, aur terí khairát Khudá ke huzúr yád men áí.” Karnelius Róm kí fauj men ek súbadár thá. Us ke log butparast the, aur wuh ap butparastí men parwarda húa. Jab us kí palṭan Yahúdíáh men áí, aur wuh Tauret Injíl kí talím se wáqif hone lagá, tab apní jihat aur gunáhon se ágáh hone lagá, aur dil us ká barí ghabráhat men par gayá. Tab roza rakhne, aur duá mángne, aur apne gunáhon ke qabúl karne se sachche Khudá, aur sachche dín ko dúndhne lagá. Us dil tangí men wuh apne kháne kí lazzat par albatta khyál na kartá. Phir, Ámál ke 13 báb men likhá hai, ki “Antákiyá kí kalísíyá men baze nabí aur ustád the ; un men Barnabás, aur Shamaún, aur Lukius, Mánáen, aur Sául the. Aur jis waqt we Khudáwand kí bandagí karte, aur roza rakhte the, Rúh i Quds ne kahá, ki Mere liye Barnabás aur Sául ko aláhida karo, us kám kí khatir, jis ke wáste main ne unhen buláyá. Tab unhon ne roza rakhke, aur duá máng ke, un par háth rakhá, aur unhen rukhsat kiyá.” Yih wuhí bát, jo Masih ne kahá, ki “ Dulhá un se liyá jáegá, tab we un dinon men roza rakhenge.” Hawári, aur shágird Masih ke, shumár men thore, aur yatímon kí mánind dunyá men rah gae. Un kí kalísíyáen kam hún, aur dúr dúr shahron men aláhida thin. We sab kabín mazlúm aur majbúr the. We dushman aur butparast káhin aur ámilon ke ámal aur ikhtiyár men the. So, we aksar auqát tangí, aur taklif, aur khatar men the ; aur koí nahín jántá thá, ki wuh kis dín ko ká kí már kháe, yá qaid men pare, yá már bhí dálá jáe. Us hálát men albatta khatar aur andeshamandí un ke dilon par gálib hotí, tab roza rakhná bajá hotá.

Aur Púlús aur Barnabás usí safar men, jab bahutere mulk aur shahron men manadí kar chuke, tab un kí kalísíyáon men phirá kiye, aur shágirdon ke dilon ko taqwíyat dí, aur tákid kí, kí imán par sábit rahen, aur kahá, Zurúr hai, ki ham barí musibaton se Khudá kí bád-

sháhat meṇ dākhlil howeṇ. Aur har ek kalísíyá meṇ buzurgon ko muqarrar karke, aur roza ke sáth duá mángke, unheṇ Kḥudá ko, jis par ímán láe the, supurd kiyá. Yahán bhí roza i maṇawí murád hai. Kyúinki un kalísíyaon ke bhái band aksar ímán meṇ nau záda, aur Injíl ke mazmún aur qánún se kam wáqif the. Aur un ke buzurgán bhí apne apne nae kám se tajribakár na húe; is sabab se bhí andesha thá, na ho, ki khalal, aur bidat, aur beráhi meṇ pareṇ. To us khatar aur andesha kí khatír roza rakhná, aur duá mángná bahut hí munásib thá. Aur un kí rozadári aur duaeṇ maqbúl húṇ.

Aur Injíl meṇ roza rakhne ká tazkira hai, jo námaqbul aur lá hásil húa. Lúká ke 18 báb meṇ hai, ki “Do shaḡhs namáz karne ko haikal meṇ gae, ek Farísí, दूसरा bájdár. Farísí alag khará hokar yún duá mángtá thá, ki Ai Kḥudá, main terá shukr kartá hún, ki auron kí mánind luṭerá, zálím, zinákár, yá jaisá yih bájdár hai, main nahín hún. Main hafte meṇ do bár roza rakhtá, aur apne sáre mál kí dahyakí detá hún. Par bájdár ne dúr se khará hoke itní bhí na jurat kí, ki apní ánkheṇ ásmán kí taraf uṭháwe, balái yih kahke apní chhátí piṭtá thá, ki Ai Kḥudá, mujh gunahgár par rahm kar. Main tum se kahtá hún, ki yih shaḡhs दूसरे se sádiq ṭharke apne ghar gayá.” Farísí ne bahut roza rakhá—hafte ke do dín fáqon meṇ kátá, lekin roza i haqíqí na rakhá; kyúinki apne roze ke sabab yá mujib par gaur nahín kiyá. Apne gunáhon ko nahín pahcháná, balki samajhtá thá, ki apne roze se bará sawáb hásil kartá thá. Yún haqíqí aur maṇawí roze ke muhásil ke badle us ká roza faqat us kí magrúrí, aur kḥudbíní, aur námaqbulí ko barhátá thá.

Mahammad ke báb meṇ baz musannifon ne likhá hai, ki “Wuh hafte meṇ do bár roza rakhtá thá.” To us ká roza us Farísí ke roze ke barábar thá, aur us ká muhásil barábar. Lekin us kí mánind Mahammad apne haqq meṇ nahín kah saktá, ki “luṭerá, aur zálím, aur zinákár main nahín hún.”

Pas, Tauret aur Injíl se maḡlúm hai, ki roza rakhná bahut hí munásib, aur fáidamand hai, jab achchhi tarah se kiyá jae. Lekin jab gáfílí, yá galatí se kiyá jae, tab fáida ke badle zarar aur nuqsán hásil hotá hai. Aur jis jis waqt kisi ká roza fáidamand aur maqbúl húa, rozadár ká dil apne gunáhon, aur apne bhái band aur qaum ke gunáhon kí pahchán se yahán tak gamgín thá, ki kháne píne meṇ lazzat na rahí. Aur ímándáron ke dilásá aur rahnumái ke wáste Kḥudá taʿlá ne apne kalám meṇ maṇqúl karwáyá, ki gae guzre zamánon meṇ jis jis waqt roza rakhne ká báis húa, yá zurúrat parí, Kḥudá-paraston ne duá, aur zárián, aur itiráf i gunáhon ke sáth roza rakhá; aur Rahmán ne kán deke suná, aur unheṇ un kí sári mushkil aur musibat, aur khatron se bacháyá. To wájib hai, ki Hindústán meṇ jo jo Kḥudá-parast hain in báton par gaur karke soch karen, ki un par kyá faraz hai? Kyá roza rakhne, aur duá aur zárián karne ke bahut hí báis nazar nahín áte hain?

1. Pahlá báis, jo sachche ímándáron ke dil meṇ bhárí ho, so yih hai, ki aksaron ke darmiyán, khawáss hon yá awám, jahán haqíqí Kalám Ulláh phailáyá játá, chhoṭe bare use haqír jánte hain; aur us se darguzar kar aur kitábon aur taríqon ko bartar jánte hain, jin meṇ nafs pálne,

aur jí kí cháh par chalne páwen. Yún, Masíh kí báten un ke hál men púrí hotí haiñ, ki “ Núr jahán men áyá, aur ádmíon ne táríkí ko núr se ziyáda piyár kiyá; kyúнки un ke kám bure the. Ki jo koí burá kartá hai, wuh núr se dushmaní rakhtá hai, aur núr ke pás nahín átá; na ho, ki us ke kám zahir hon.” Yúh. 3 : 19, 20. “ Agar main na áyá hotá, aur unhen na kahtá, un ká gunáh na hotá; lekin ab un pás un ke gunáh ká uzr nahín ” Yúh. 15 : 22. Yih waisá hai, jaisá ki koí, jis ke háth men áb i haiyát diyá jáwe, aur wuh use náchíz jánkar kisi táláb i kasíf se pítá rahe. Jab tak K̲hudá kí ráh un ko malúm na húi, aur us ká kalám un ko diyá nahín gayá, tab tak us se gáfíl rahne ká aib un par nahín lagtá. Lekin jab se unhon ne K̲hudá kí sharíat ko páyá, aur ján bújhke apne taín haiyát i abadí ke nálaíq thaharáyá, tab se we us kí gáflatí aur tahqír karne se mazúr na rahenge. Aur yih ímándároñ, aur K̲hudátarsoñ ke liye roza rakhne, aur duá, aur zárián, aur istigfár karne ká bhári sabab hai.

2. Aur *dúsrá* sabab yih hai, jab lafáíán, aur wabáen, aur qahtsá-líán, jo K̲hudá kí nákhushí aur gusse kí nisháníán haiñ, zamín par nazar átiñ, aur baní Ádam ko gher letíñ, aur zál kartí haiñ, bahut hí thore haiñ, jo in chízon ko apní khátir men láte haiñ.

3. *Tísrá* sabab yih hai, ki ahl i Hind, jo fazl i Iláhí se K̲hudá ke kalám aur us kí ráh kí pahchán tak pahunché haiñ, aksar jis qadr un ke haqq men intizár karná munásib hai, dánish, aur dín-tái, aur safái i dil men taraqqí nahín kartí haiñ. Yahan wahán do ek nazar áte haiñ, jin kí chál aur ahwál se malúm hai, ki we dunyá kí bandhan se chhút gae, aur Shaitán aur dunyá kí suhbat aur pairawí se wida karke unhon ne sidq i dil se K̲hudáwand Isá kí pairawí ikhtiyár kí hai. Tis par bahutere haiñ, jo ek háth aur ádhe dil se dunyá se lage rahte haiñ. Lút kí jorú kí mánind, we us Sadúm par, ki jis se báhar nikle haiñ, píchhe nigáh kar rahte haiñ. We butparaston, aur bátílparstón ke darmiyán rahte haiñ, aur un kí qurbat aur sangat men un ke tariqon se wáqifiyat rakhte haiñ. Is sabab se hirs i dunyá, aur dagá, aur hila hawála, jo dín rát un ke ás pás nazar áte haiñ, bahut bár un ke dilon men jagah páte haiñ; aur “ us fasád aur saráhat se, jo dunyá men haiñ, chhútkar phir us ke dhasáo men phans játe haiñ.” Aur jis qadr we dunyá kí lílá krírá, khel o tamáshá, aur rasúm i bátílparastón kí qurbat men rahte, yá un men shámil hote, us qadr K̲hudá ká kalám un ko be maza malúm hotá, aur tásir us kí un ke dilon se dafá ho játi hai. Aur usi qadr parhezgári, aur ikhlásmándí, aur sáf-dili, aur sachche dín ke faráiz unhen nápasand áte haiñ. Aur kabhí kabhí aisá hotá, ki we dunyá kí qurbat aur lazzaton se farefta hokar sachchí sídhí ráh ko tark karke un men já shámil hote haiñ; aur un ke hál men yih masl thík áti hai, ki “ Kuttá apní qai kí taraf, aur dhoí húi súar apne daldal men loñne ko phirí hai.” Un ká hál Masíh kí ek tamsíl ke muwáfíq hai, yane “ Jab palid rúh ádmi se nikli, to súkhí jagahon men phirtí, aur áram gáh dhundhtí hai, aur nahín pátí. Tab kahtí hai, Main phir apne ghar men, jahán se nikli hún, jáúngí; aur áke use khálí aur jhára buhárá sáf suthrá pátí hai. Tab jákar aur sát rúhen, jo us se badtar

haiṇ, sáth láti, aur waháñ já rahtí hai ; so, us ádmí ká pichhlá hál agle se badtar hotá hai." Matí 12 : 43—45.

Lekin un meṇ se, jinḥoṇ ne is qadr apní náó imándarí kí'na torí, bahutere haiṇ, jo dunyá kí qurbat aur sangat ke ḡhwáháñ haiṇ. We is bát se gáfil rahte haiṇ, ki we dunyá ke logon meṇ se buláe gae haiṇ, táki "Ḳhándán i guzída, aur ek sháhána kahánat, aur ummat i muqaddás, aur qaum i maḡhsús howeṇ, aur us kí fazílaton ko, jis ne unheṇ táríki se apní ajib roshní meṇ buláyá, záhír kareṇ." 1 Pat. 2 : 9. We is bát ko bhúl játe, ki we "jahán ká núr haiṇ," aur "jahán ká namak," aur ek "shahr, jo unchái par dhará hai ;" ki un par hukm húá, ki "beilzám aur bebad hoke terḡ tircḡ qaum ke darmiyán Ḳhudá ke beaib farzand bane raheṇ ; aur haiyát ká kalima liye húe núr kí mánind dunyá meṇ chamkeṇ."

Yún báhar ke log un kí chál se ṡhokar kháte, aur dushman un ke zariá se kufr aur takabbur karne ká qábú páte, aur Injil kí aṇin fazílat par parda dálá játa hai.

Kyá roza rakhne aur záriáñ karne ká báis is meṇ páyá na jáe ?

4. Aur *chauthá* sabab is meṇ páyá játa, ki Hindústán meṇ bahutere haiṇ, jo Ísáí kahláte haiṇ, tau bhí sachchhe dín kí ráh aur rasmon ko haqír jánte haiṇ, aur un kí takrím aur hifáat se dúr rahte haiṇ. We áp haiyát kí ráh meṇ nahín játe, aur un ke liye bhí, jo dáḡhil hone cháhte, ṡhokar kháne ká báis hote haiṇ. Aur un ke wasile se jáhil aur gumráhōṇ ke darmiyán Ḳhudá ke nám aur us kí ráhōṇ kí tahqír kí játi hai.

5. Aur *pánchwán* sabab un kí ḡhátir hai, jo Wiláyat se kalám Ulláh ká ishtihár dene ko firistáda hokar áe haiṇ. Un kí kamzori, aur kam iatiqádi, aur mihnat aur mashaqaton kí kamí ká bhí fikr karná hai. Kyúñki kalísiyá ke peshwáon, ámilon ko munásib nahí, ki auron ke hál meṇ roza rakhne, aur záriáñ karne ke sabab i kullí ḡhúñdheṇ, Balki un ko wájib hai, ki apne gunáhoṇ, bhúl chúkon kí talásh kareṇ, aur unheṇ qabúl karke Ḳhudá ke chihre kí roshní ko cháheṇ, aur us kí báz rakḡ húi niámaton ko khoj kareṇ. Anbiyá i Aláh ne yúñhí kiyá. Maslan Dáníel ne jab Aurshalím aur Ḳhudá ke kalísiyá kí wiránōṇ par gaur kiyá, tab apná hál yún bayán kiyá, ki "Main ne Ḳhudáwand apne Ḳhudá kí taraf apná munh pherá, táki namáz aur duá se roza, aur rákh aur tāt ke sáth us se darḡhwást karúñ. Aur main ne Ḳhudáwand apne Ḳhudá ke huzúr duá mángí, aur iqrár kiyá, aur kahá, ai Ḳhudáwand, jo Ḳhudá i ázím aur muḡib hai, aur un sabhoṇ ke liye, jo use piyár karte, aur un ke liye, jo us ke ahkám ko mánte haiṇ, paimán aur rahmat ko mahfúz rakhtá hai. Ham ne ḡhatá kí hai, ham ne gunáh kiyá, ham ne sharárat kí, ham ne bagáwat kí, ham tere hukmon aur tere sunnaton se phir gae haiṇ. Aur ham nabíon tere bandon ke shinawá na húe, jinḥoṇ ne tere nám se hamáre bádsháhōṇ, aur hamáre amíron, aur hamáre báp dádon, aur hamáre mulk ke sáre logon ko, waz kiyá. Ai Ḳhudáwand, sadáqat tuḡn ko hai, aur zarḡrúí ham ko, jaisá áj ke dín hai ; háḡ, Yahúdáh ke logon, aur Aurshalím ke báshindōṇ ko, aur sáre Isráílíon ko, jo qaríb haiṇ yá báid, un sab mulkon meṇ jabáḡ kahíṇ tú ne un ke gunáhoṇ ke sabab unheṇ hánká. Ai Ḳhudáwand, chihre kí zarḡrúí

ham ko hai, hamáre bádsháhon, hamáre amíron, aur hamáre bápádáon ko, ki ham tere gunahgár húe. K̤hudáwand hamáre K̤hudá ko rahmat aur ámurzish hai, ki ham us se phir gae haiñ,” Aur usí tarah sáre ambiyá, jab roza rakhne aur zárián karne lage, tab *apne* aur apní ummat ke gunáhon ko yád men láe. Aur *ham logon* ko wájib aur zurúr hai, ki aisáhi kareñ.

Aur jo koí úpar mazkúra kí báton par gaur kare, aur sidq i dil se un ke ahwál ko daryáft kare, albatta us ko roza rakhne, aur duá mángne ke báis kí kamí na hogí.

Ai parhne yá sunnewálo, kyá tum ne kabhí usí tarah roza rakhá hai ? Mat samjhiyo, ki agle zamánon men roza rakhne ke mújib aur zurúrat ab se ziyáda thín. Yashúa, yá Nahamiyáh, yá Dáníál ke waqt men koí sabab yá mújib na thá, jo ab maujúd nahín hai. Kyá tum is mulk ke hál par gaur kar sakte ho, aur roza rakhne ká sabab aur zurúrat na dekho ? Agar úpar mazkúra kí báton par gaur kar sakte ho, aur mátam aur zárián karne ká sabab na malúm karo, aur dil men sakete na jáo, to mújib hai shubhe ká, na ho, ki tumhári ánkhen gunáh kí k̤harábí ke dekhne ko kholí nahín gaí haiñ. Tum ne abhí tak un sári makrúhát ke liye, jo zamín men kí játi haiñ, gamgín hone aur áh bharne na síkhá na jáná hai ! Lekin agar is mulk ke hál aur ámal par, k̤hwáh ahl i Masíh, k̤hwáh gairon ke, gaur karne se k̤hilwat men gam kháte, aur ranjon ká hámil hote, ki kabhí kabhí tumháre kháne píne men lazzat na rahí hai, aur isí tarah se roza rakhte ho, to kalám Ulláh tumháre dilásá aur k̤hátir jamáí ke wáste wadon, aur barakaton se bhará húa hai. K̤hudá taála un par, jo k̤harábí aur bhuláwe ke dinon men apne, aur apne ham-jins kí badí aur bhúl chúkon kí k̤hátir gamgín hote, aur roza, aur zárián, aur iatiráf i gunáh karte haiñ, tawajjuh i k̤hair kartá hai ; aur un ke námon par likhá hai, ki “We mere hongé us din, jis men main apní guroh i k̤háss ko jamá kar-úngá.”

XIX.

KHUDA KI MAHABBAT.

REV. GOPÍ'NA'TH NANDÍ' KÍ' TASNÍ'F.

Is liye ki K̤hudá ne jahán ko aisá piyár kiyá hai, ki us ne apná eklautá Beṭá baḥshá, táki jo koí us par ímán láwe, halák na ho, balki hayát i áladí páwe ; kyúunki K̤hudá ne apne Beṭe ko jahán men is liye nahín bhejá, ki jahán ke qatl par fatwá dewe, balki is liye ki jahán us ke sabab se naját páwe.—Yúh. 3 : 16, 17.

Is báb ke shurú men mutálaḥ karne se wázih hotá hai, ki yih áyaten un dilchasp aur zurúrí nasihaton ká, ki jin ko hamáre K̤hudáwand ne

ek shaḡhs Niqúdímus námí se, rát ke waqt, irshád kí thín, ek hissa hai. Aur bází ṭalímen, jo us ne shahr i Aurshalím aur berúnját ke logon ko díy, aur wə barí karámaten, ki jo us ne waháñ dikhlaín. albatta us shahr i buzurg ke aksar ádmíon ko maḡlúm húa. Agarchi us waqt janáb Masíh ne bahut muajaze na dikhlae hog, tispar bhí jo kuchh ki us se waháñ par barmalá wáqi hue, zurúr aur yaqín i kullí hai, ki un kí shuhtrat un sab logon, ḡháss karke Farísíon ke álimon aur fázilon men baḡhúbí ho gai thí.

Pas, maḡlúm hotá hai, ki Niqúdímus Farísí, aur sháyad ki us barí majlis, yañe sanhedrim ká ek sardár thá. So wuh hamáre Naját-dihinda ke wəz se ḡhwáh áp hí musharraf húa, yá us majlis ke aur kisí shaḡhs se uskí ṭalím kí waza aur zarúrat kí bábat daryáft karke, álam i tanháí men, sunne yá síkhne ko, magar baliház khauf lan tan qaum i Yahúd ke, táki use ilzám na den, rát ke waqt áyá, aur kamál ḡhushí o ḡhurramí se us kí ḡhidmat men házir hoke, barí tázím aur takrím ke sáth us se iltimás kí, ki “ Ai Rabí, ham jánte haiñ, kí tú ḡhudá kí taraf se muállim hoke áyá ; kyúñki koí shaḡhs yih muajaza, jo kí tú dikhátá hai, jab tak ḡhudá us ke sáth na ho, nahín dikhá saktá.” Al-hásil muarriḡh muḡaddas ne ham par yih záhír na kiyá, kí shaḡhs i mazkúr ká kyá sawál thá, magar ham apne Naját denewále ke maḡúl jawáb se us ke sawál kí kaifiyat ko, jo haqíqat men bálátar thí, daryáft kar sakte haiñ, yañe ki “ Mañ tun se sach sach kahtá húa, agar koí ádmí sar i nau paidá na ho, to wuh ḡhudá kí mamlukat ko dekh nahín saktá.” Niqúdímus ká díl, sháyad ki barí fazilat ke báis niháyat ḡhamand o gurúr se pur thá ; is sabab se wuh apne us bare mushkil sawál ká yih jawáb sunkar mutajjib huá, o isrár i mañí ko na pákar, kamál taajjub o hairat se bol uthá, ki “ Ádmí jab búḡhá ho gayá, to kyúñkar paidá ho saktá hai ? Kyá use yih qudrat hai, kí do bárah apní má ke peṭ men dar áwe, aur paidá howe ?” Pas, ḡhudáwand Ísá Masíh ne yih sunkar, aur us ko niháyat mushtáq deḡhkar, aur sachche dín kí máhiyat se use beḡhabar pákar, wuh us jawáb ke mañe batláne men rujú húa ; lekin iqtídár ke taur par ḡhitáb farmáke muḡhátib húa : yañe, “ Mañ tujhe sach sach kahtá hua, agar ádmí pání aur Rúh se paidá na howe, to wuh ḡhudá kí mamlukat men dáḡhil ho nahín saktá :” aur us ne us kí diljamáí karne ke liye yih farmáyá, kí dunyáwí tadbíreñ, o yá ki madad i insání faqat dunyáwí chízon kí tígír tabdíl par tásir kartí haiñ, par ján kí rúhání o haqíqí tabdílí men kárgar nahín hotíñ ; kyúñki ḡhudá hí kí Rúh Pák ká kám hai, kí us se insán ásmán kí aish o ishrat ke láiq ṭhahartá hai, tásir kare. Phir istarah se irshád kiyá ; yáñe “ Jo jism se paidá búá hai, jism hai ; aur jo Rúh se paidá húa hai, rúh hai.” Niqúdímus agarchi ilm i dunyáwí men chá-lák o mustaíd thá, magar hamáre ḡhudáwand kí ṭalím ke bhed ko daryáft na karne ke báis us kí kaj fahmí us ke chup rahne se záhír húa ; is liye Masíh ne us ko is fikr o taammul men ḡhámosh deḡhkar farmáyá, kí “ Taajjub na kar, jo mañ ne tujhe kahá, kí tumheñ sar i nau paidá honá zurúr hai.” Pas gaur kiyá cháhiye, kí wuh tabdíl dilí kí ṭalím, kí jis ká daryáft karná qiyás i insání se ḡhárij hai, aur ḡhudá hí kí Rúh ká kám hai, kí insán ke batin ko sáf kare ; so ek hawá kí tamsíl láke mai us kí tásir ke samjháyá, yih kí “ Hawá jis taraf

chahtí hai, us taraf chaltí hai, aur tú uskí áwáz suntá hai, lekin nahín jántá, ki wuh kahán se átí hai, aur kidhar ko játí hai : harek, jo Rúh se paidá huá hai, aisá hí hai.” Shaḡhs i mazkúr, agárchí sardár o sharí-
 ʿat síkhlánewálá, aur sháyad kí bará fázil aur buzurg Farísí thá, lekin us ne ṭalím i mazkúr se kisí ko ṭalím na kiyá ; aur na wuh áp us tásír aur tabdílí ke taur se wáqif thá. Is liye hairat aur fíkr men parke
 Ḳhudáwand se kahne lagá, ki “ Yih chízen kyúnkar ho saktí haiñ ?”
 Garaz us dam phir hamáre Naját-dihinda ne use farmáyá, ki tere aur sáre gumráh gáratí maḡhlúqát ke wáste is tarah kí tabdílí niháyat zurúr hai ; kyúnki wuhí, jis ko ki tú Ḳhudá kí taraf se ek muállim samajhkar hamkalám huá, ḡháss Masíh mauúð aur Ḳhudá ká eklautá Beṭá hai. Chunánchí us rahím o karím Báp ne apní ḡháss mahabbat o niháyat mihrbání se apná eklautá Beṭá baḡhshá, ki kámil naját us hí par ímán rakhne se hai. In áyaton mazkúr se irshád kiyá, “ Is liye ki Ḳhudá ne jahán ko aisá piyár kiyá hai, ki usne apná eklautá Beṭá baḡhshá, táki jo koí us par ímán láwe, halák na howe, balki hayát i abadí páwe. Kyúnki Ḳhudá ne apne Beṭe ko jahán men is liye nahín bhejá, ki jahán ke qatl par fatwá dewe, balki isliye ki jahán us ke sabab se naját páwe.”

Ab is ḡháksár kí iltímás us Janáb i Bárí se yih hai, ki wuh apne Rúh i Quds kí tásír se hamáre is náqis fahm ko roshan kare, táki ham us ke muqaddas kalám ke samajhne, aur samjháne men díl o ján se rujú hon, ki jis se tumháre aur hamáre ján kí naját ho, aur hamesha ṭaríf aur jalál us ke pák nám ká ho. Hásil i kalám áyaton mazkúr ke mañe baḡhúbí daryáft karne ke wáste un ko tén hisse men bayán kareñge ; chunánchí,

I. Ḳhudá kí mahabbat, ki lásání o láintihá hai.

II. Dunyá, yañe tamám Ádamzád basabab gunáh ke gazab i Iláhi men giriftár haiñ ; kyunki Alláh Ṭaálá ne, ki jis ká rahm behadd hai, apne azíz Beṭe ko bhejá, ki azáb uṭhákar mará jáwe. Pas, is se maḡlúm huá, ki sirf wuhí gunahgáron ká Naját-dihinda i ḡháss hai.

III. Kisí insán ko is qurbání se fáida nahín, magar us ko, ki jo ímán láwe ; aur us ímán láné ká samra hayát i abadí hai.

I. *Ḳhudá kí mahabbat ke bayán men, ki lásání o láintihá hai.* Agar-chí har fard is farḡhunda Taslís ká kamál rahmat o mihrbání se ʿalaihada ʿalaihada uhda rakhtá hai ; tis par bhí báwajúd un ʿalaihada uhdon ke harek ká jalál us tadbír i naját ke ḡhátima par eksán hai ; aur mahabbat, jo kí tadbír i naját se záhír húa, us Taslís men se har ek kí hai ; aur gunahgár kí naját hásil karne se Taslís ká jalál i abadí záhír huá. Pas, hamen lázim nahín, ki aisá gumán karen, ki Báp, yañe Ḳhudá i Quds ne apná insáf qáim rakhne ke liye bagair Beṭe kí razámandí ke us ko baḡhshá ho, yá naját, ki bihtarín niʿmaton se hai, zabardastí se hásil kí gai ho ; hargiz nahín ; balki yih púra honá naját ke kám ká sirf us kí láhadd o láintihá mihrbání o mahabbat ká báis huá, ki us ne apne Beṭe, yañe hamáre Naját-dihinda ko baḡhshá, jaisá kí áyat i mazkúr se záhír hai. “ Is liye Ḳhudá ne jahán ko aisá piyár kiyá, ki us ne apná eklautá Beṭá baḡhshá.” Ḳhudá kí mahabbat, jo kí hamáre tamám o kamál ʿaish o ishrat kí ibtidá o bunyád hai, bilá zuhúr

us mahabbat ke koí us uaját se babramand na hotá, aur na ásmán ká darwáza i rahmat khultá; balki us darwáze se báhar be husúl i naját ke zár o náláḡ máyús rahte. Is wáste us Ḳhudá i karím o rahím ne is jahán i fání par aisí mahabbat kí, yāne Yahowáh ká piyár aisá behadd o láintihá thá, ki báwajúd hamáre is qadr ziyádati gunáh o sharárat ke, us ne uiháyat mihrbání o kamál shafaqat se apní rahmat záhír kí, jaisá ki likhá hai, I Yúh. 4 : 9, “ Aur Ḳhudá kí mahabbat, jo ham se hai, is se záhír húi, ki Ḳhudá ne apne eklaute Beṭe ko dunyá meṅ bhejá, ki ham uske sabab se hayát i abadí páweṅ.” Pas, záhír húa, ki mahabbat wuh shai hai, yāne jis dam ki insán se amal meṅ áwe, to beshtar uske ḡhawás i nek, jo ki uskí ḡhássiyat hai, paidá hotí hai; kyúunki wuh mahabbat jab ki nekoí se milkar wáqi hotí, to haqíqat meṅ us se Ḳhudá ká jalál záhír hokar ham ko aur hamáre hamsáyoṅ ko aish o árám baḡhshtí hai; magar jab ki sharárat kí taraf targib howe, to haqíqatan us kí tásír máḡús hokar, ízá o ranj záhír kartí hai. Alalḡhusús jis waqt ki ham yih báteṅ Ḳhudá kí zát i pák se nisbat karen, to zurúr uskí zát i pák se ináyat o maráhamat áshkár hogí, jaisá ki kitáb i muḡqaddas meṅ mastúr hai, yāne ki “ Ḳhudá mahabbat hai.” Albatta Ḳhudá kí mahabbat ádmí kí mahabbat ke taur par nahín; kyúunki insán us chíz kí ragbat, jo ki nafs ko ḡhush kare, o yá ki us ke nafa o árám ká báis ho, aur un chízoṅ par, ki us kí nazar meṅ bihtar maḡlúm hoṅ, iltifát kartá hai; lekin Ḳhudá ká rahm is tarah par nahín, ki faqat nekokároṅ hí ká hissa ho, balki badoṅ o gumráhoṅ par bhí namúdár hotá hai; kyúunki báwajúd hukm udúlí ke ham us ke pák hukm ko radd karke, aur uskí ráh i rást se gumráh hoke, apne bure dil kí ḡhwáhish par chalte, aur balki us hí ke sabab áj tak us ke gazab ke níche haiṅ; tis par bhí us Ḳhudá i rahím ne aisá piyár kiyá. To kyá ham meṅ kisé tarah kí bhaláí yá nekí páí játi hai, ki jis se ham us kí mahabbat ke tálib hue ? Kyá ham sab ke sab gunáh o badzáti se bigaṛ nahín gae ? Kyá ham sabhoṅ ne apne dil ko saḡht karke apní ánkheṅ band na kíṅ ? Kis liye apní baṛí mahabbat us ne ham sab gunahgároṅ par namúdár kí ? Aur kis wáste wuh un par, jo us se sarkashí aur dushmaní rakhte the, mihrbán húa ? Par taajjub hai, ki us ne ek dam meṅ sabhoṅ ko halák na kiyá, is liye ki sab ke sab maut ke láiq aur jahannamí the ! Pas, is se sáf saríh hai, ki us rahím o karím Báp ne is qadr mihrbání o ḡhush sulúki kí, ki us láintihá mihrbání ká ham gunahgároṅ se adáe shukr nahín ho saktá; aur us hí behadd mahabbat ke sabab us ne apne eklaute Beṭe ko hamáre gunáhoṅ ke kafáre meṅ diyá. Agar aisí mahabbat záhír na hotí, to gunahgár filwáqi us árám o chain se mahrúm rahte; is liye ki hamáre pás kyá hadiya aur kyá kafára thá, jo us lásání mahabbat, yá apne gunáhoṅ ke iwaz guzránte ? Turfá yih, ki us ne apní ináyat o rahmat ke us beshqímat motí ko, iwaz meṅ ham gunahgároṅ ke, aṭá kiyá; jaisá ki Hús. 14 : 4 meṅ hai, ki “ Main un ke aṛne ko sadháúngá, aur main kusháda dilí se un ko taiyár karúngá; kyúunki merá gussa us se dúr húa.” Garaz yih mahabbat láintihá sab gunahgároṅ ko bulátí, aur pukártí hai, ki áweṅ, aur us sote se, bagair zar aur beqímat leṅ, aur píeṅ. Yas. 55 : 1 meṅ hai, ki “ Ai sab piyáso, pání pás áo; aur jis ke pás naqdí na ho, áo,

mol lo, aur kháo; aur wain aur dúdh berupae aur be qímat kharí-do.” Pas, záhír húa, ki yih mahabbat har mulk, o har qaum, o har ek zamáne ke gunahgáron ke wáste káfi hai; kyúнки us ke rú ba rú kisé tarah ká farq, buland o past, kále o gore, Hindú, Musalmán, Yahúd o Ísáí meñ nahín; balki jo shakhs apne gunáh ke bojھ se dabá ho, us ke pás jáwe, aur us mahabbat kí barakat ká fáida bidún qímat o bagair rupae ke hásil kare. Aláwá is ke aur bhí us kí mahabbat se hamen niháyat khushí o khurramí miltí hai, aur hamáří zindagí kí harkát o saknát usí kí muhabbat se roshan o hawedá haiñ; to pas, us álishán mahabbat ká, ki jis ne ibtidá meñ sab chízen, yane ásmán, aur zamín, aur jo kuchh ki us meñ hai, paidá kiyá, aur us kí khabargírí bhí kartá hai, aur hamáří roz marra kí hájaton kí wuhí muhabbat kafil hai; aur jis dam ki ham sote yá jágte haiñ, to hamáří nigahbání kartí. Pas, us kí yih mahabbat azímussbán kháss hilm o farotání se wábasta hai; aur na sirf insán hí ke liye, balki tamám álam par, yane haqír se haqír maḡhlúqát us kí mahabbat ke iháte se aláihada nahín; lekin yih mahabbat i álm banisbat us mahabbat ke, jo us ne hamáří naját ke báb meñ záhír kí, azbaski kamtarín o haqír hai; kyúнки yih naját Yahowáh kí us kamál mahabbat aur iráde ko, jo ki us ke apne logon ko árám meñ dákhil karne ke liye hai, záhír kartí hai; balki us kí takmíl ke liye Kḡudá i rahím jism meñ záhír hoke hamára Naját-dihinda húa, aur dukh uṡháne aur máre jáne ko qabúl kiyá. To ab ham sawál karte haiñ, kyá is se bhí aur koí ziyádatar mahabbat ho saktí hai, ki jab ham gunahgár hokar dushman i Kḡudá the, tab hamáre Kḡudáwánd Masih ne hamáre wáste maslúb hokar apne besh-qímat lahú ko baháyá, aur us hí lahú ke sabab ham se aur Kḡudá i rahím o ádil se mel húa? jaisá ki likhá hai, ki “Koí shakhs us se ziyáda dostí nahín kartá, ki apní ján apne doston ke liye de. Par Kḡudá ne apní mahabbat ko hamáre sáth is taur se áshkára kiyá, ki jab ham gunáh karte chale játe the, Masih hamáre wáste múa.” Phir dekho 1 Yúh. 3: 1, “Dekho, kyá mahabbat Báp ne ham se kí, ki ham Kḡudá ke farzand kahláweñ.”

Pas, ab hamáří iltimás harek se yih hai, ki us mahabbat par, jo ki Kḡudá i zuljalál ne záhír kí, apní tamám aql o qiyás se gaur farmáweñ; yane, ai ázizo, us mahabbat ne faqat tumbáří naját ke wáste zuhúr pakrá, aur tum par us áftáb i mahabbat ká núr chamkí hai; to is hál meñ lázim hai, ki us kí tahsíl meñ is qadr koshish o saí karo, táki us áftáb i darakhshán kí mahabbat ke sáe tale baithkar khush ho; aur us ko har ek baní Ádam, yane Hindú, Musalmán, qabúl karke, wuh árám, jo Kḡudá i Sádiq ká apne bandon se wáda ho chuká, mírás meñ le.

II. Algaraz us mahabbat i lláhí ko, jis qadr ki ham se ho saká, izhár kiyá, táham dalil i doim meñ tum ko fikr o taammul zurúr hai, ki is zuhúr i muhabbat ká natíja kis ke wáste kháss húa; magar áyat mazkúr se yih maḡlúm hotá hai, ki “Us ne dunyá ko aisá piyár kiyá, ki apne eklaute Beṡe ko baḡhshá;” aur kitáb i muqaddas meñ lafz i dunyá se bahut maṡne murád haiñ, ki jin ká bayán is muḡhtasar meñ gunjáish nahín rakhtá; magar ham us maṡne par, ki áyat i maz-

kúr se wázih hai, rujú karte hai; kyúнки dunyá se tamám maḡhlúq Ádamzád se murád hai, jo ki dar asl gunahgár o tabahkár hai; kyúнки gunáh ne un par gazab i Iláhi kí ág ko bhaḡkáyá, aur gunáh hí se un par dukh aur inusibat ái; aur us gunáh se we náláiq o náchíz ṡaharkar us marz i gunáh ká iláj bhí na kar sake. We to is qadr kamzor o nátawán ho gae, ki us aish o árám meṡ daḡhl na páyá, ki jis aish meṡ un ká báp Ádam tawallud húá ṡá; magar Ḳhudá ne insán ko us hálát i náummedi meṡ nazar i rahmat se dekhkar apne ekloute aur ázíz Beṡe ko is irshád se bhejá, ki jo koí us par ímán láwe, halák na howe, balki hayát i abadí páwe; aur us Ḳhudá i Qádir ne kull maḡhlúqát se niāmat i naját ká waḡa kiyá; aur yih ḡhush-ḡhabarí naját kí har qaum o har firqe ke logon ko dí gá; to haqíqat meṡ yih naját agarchi ináyat íām hai, par sirf we hí us se fáida páwenge, jo ki us ko qabúl karen; jaisá ki Matí, 22: 14 meṡ mazkúr hai: “Is liye ki bahut hai, jo buláe gae hai; lekin barguzída ṡore hai.” Ḳhudá ibtidá se waqíf hai, ki kaun us ke ázíz Beṡe kí mahabbat kí panáh legá, aur us kí qurbání se fáida úṡhāwegá. Báwajúde ki hamáre gunáh kí álúdagí dhone ke liye hamáre Naját-dihinda ká ḡhún baháyá gayá; lekin jo ki uske ḡhún ko apne gunáh ki bímári ke liye istiāmál na karegá, haqíqatan us ke liye asar na baḡhshegá. Wáqi yih, ki kafára i gunáh ḡhás unḡiṡ ke wáste, ki jin ko wuh Parwardigár i álam ibtidá se jántá ṡá, ki yih log marz i gunáh se sihat pákar jenge; algaraz jin logon ko, ki us marz i gunáh se shifá pánewálon meṡ jántá ṡá, so kaun hai? Yih wuhí log hai, ki ḡhás Masih kí qurbání ke lanú ke sabab barguzída i Ḳhudá, aur pesh az biná i álam hayát i abadí meṡ muqarrar kie gae. Aur bittaḡhsis o bittaḡqíq dunyá ke maṡne áyat i mazkúr se faqat us hí qaum o qabíla se, jo ki ímán láwen o bach jáwen, murád húi; aur aison hí ke wáste Masih ne yih áḡshán qurbání guzrání, jaisá ki Yúh. 17: 9, 10 meṡ Ḳhudá-wand ne farmáyá, “Main un ke liye sawál kartá huṡ; main dunyá ke liye nahí, magar un ke liye, jinḡe tú ne mujhe diyá hai, sawál kartá hún; ki we tere hai; aur sab mere tere, aur tere mere hai; aur main un meṡ jalál se muzaiyan hún.”

Ái bháío, dunyá ke lafz ke maṡne, is áyat meṡ bayán ho chuká; to ham ko lázim hai, ki gaur karen, ki yih dunyá sab kí sab gárat o tabáh ho gá; kyúнки Ḳhudá ke kalám i muqaddas se sáf záhír hotá hai, ki tamám Ádamzád gunahgár hokar apní ráh i rást se bhaṡak gae, aur ek laḡlit gunáh kí álúdagí se nápak ho gae; jaisá ki Rúm. 3: 23 meṡ marqúm hai: “Is wáste ki sabḡon ne gunáh kiyá hai, aur itne na húe, ki Ḳhudá ke sitúda hon.” Pas, us gunáh ne insán ke batin ko ḡharáb kar diyá; aur sáf wázih hai, ki insán waisá hí na rahá, jaisá Ḳhudá ne us ko apní súrat par banáyá ṡá; balki wuh pákízagí aur kámiliyat se, ki jis meṡ wuh paidá huá ṡá, gir pará hai. Filhaqíqat agarchi kitáb i muqaddas is muqaddame meṡ záhír na kartí, to zurúr hai, ki is báb meṡ aql íām ko dalálat hotí, ki Ḳhudá i quddús, jo ki beniháyat pák hai, aise nákámil o nápak ko, jaisá ki insán hai, paidá na kare; par tahqíq yih hai, ki insán ká Ḳhalíq wuhí Ḳhudá i qádir hai; aur wuh kalám i muqaddas meṡ farmátá hai, ki us ne insán ko apní súrat par banáyá, jaisá ki

Paid. 1 : 27 में marqúm hai. Aur yih bhí zâhir hai, ki kull maḡhlúqât unhín gunahgâr wâlidain se paidâ hue ; is wâste ki kisí qaum o firqa se aisâ nek kâam wâqî na húa, ki bilkull gunâh se mubarrâ ho. Ab tamâm o kamâl subût ho chukâ, ki wâlidain i auwal ham sab ke wuhí the ; to yaqín hai, ki ham bhí unhín ke pairau hon ; kis wâste, jab ki darâḡht burâ ho, to us kâ phal ḡharâb hogâ ; aur chashma zahardâr ho, to us kâ sotâ bhí zarar pahunchâwegâ. Garaz sachchâ kalâm, jo ham kitâb i muqaddas में parhte hai, yih hai, ki tamâm banî Ádam us asli safâi o pâkízagî se gir gae, aur us kî sadâqat sirf rozmarra ke tajriba se maḡlûm hotî ; balki sâf zâhir hotâ hai, ki ádmî dar asl gunâh kî taraf ziyâdatar ragbat karke barkhilâf is ke nekî se is qadr rujú na hone ke apne hí nuqsân ke ḡhwâhân hote hai. Yih bhí rást hai, ki insân tabâhkar apne में koî irâdat o qudrat apnî táqat में aisí nahín rakhtâ, ki us ke sabab is badî se pák ho ; balki us ke dil ke sab ḡhiyâl, aur háth ke kâam, aur us ke irâde bilkull Ḳhudâ kî pâkízagî o sadâqat se barkhilâf hai.

Pas, jab ki insân aise hâl में giristâr hue, to us se siwâ qahr i Rab-bânî ke tale píse jáne, aur us gâr ke láiq rahne ke, ki jahân ronâ aur dânt písnâ hogâ, kyâ zâhir hotâ hai ? Lekin Ḳhudâ ne un ke sâth aisâ sulúk na kiyâ. Us ne jaisâ mihrbân báp apne ná farmânbardâr beṡe se kartâ hai, ba tarîq i aulâ kiyâ. Hañ, us se bhí bihtar sulúk kiyâ : us ne apne ekloute Beṡe ko bhejá, táki apne úpar hamâri aziyateñ le-ke mârâ jáwe. Aur bhí us hí áyat में, ki jis kâ mazkúr ho rahâ hai, yún likhâ hai, ki Ḳhudâ ne apnâ eklautâ Beṡâ baḡhshâ ; to kyâ ham yih gumân karen, ki Ḳhudâ Báp ne apne Beṡe ko, bagair us kî razâmandî ke bhejá ho ? kyâ is se yih sâbit hotâ hai, ki Ḳhudâ i rahím ne jabr se, yâ bagair us kî ḡhushu ke aisâ kâam kiyâ ho ? Har-giz nahín ! balki wuqú is wâqíât kâ kamâl ulfat o razâmandî ko wâzih kartâ hai ; kyúñki Masih kî halimi, o mujassam honâ, aur dukh uṡhânâ, aur mârâ jánâ, yih sab us kî ḡhâss rúhânî ḡhwâhishoñ ke mutâbiq thâ ; aur wuh farmâtâ hai, Mati, 20 : 28 में, “ Chunâñchí Ibn i Ádam is liye nahín áyâ, ki maḡhdúm bane ; balki is liye áyâ, ki ḡhâdim ho, aur apnî ján ko bahutoñ ke liye fidiya में de.” Phir Yúh. 10 : 15 में hai, “ Dekho, jis tarah Báp mujhe jántâ hai, main usí tarah Báp ko jántâ hun ; aur main bheroñ ke liye apnî ján detâ hún.” Aur Púlús 1 Tim. 2 : 6 में ilhâm se kahtâ hai, “ Jis ne, yañe Masih ne, apne tañ sab ke kafâra में diyâ ; ki bar-waqt us par gawâhí ho ;” aur Titus, 2 : 13, 14 में zikr hai : “ Aur us mubâarak ummed ke, aur buzurg Ḳhudâ aur apne bachânewâle Isâ Masih ke zuhúr i jalíl ke muntazir rahen ; ki us ne âp ko hamâre badle diyâ, ki hamen mol lekar sâri badkâríoñ se chhurâwe, aur ummat i ḡhâss ko, jo nekokâri में bajân o dil masrúf howen, apne liye táhir kare.”

Aur baḡhshne ke lafz se murâd hai, ki Ḳhudâ Taâlâ ke wuh irâde, jo us ne áge se muqarrar karke apne pák nabioñ kî maḡrifat zâhir kie the, púre hon ; ki Masih hamâre wâste dukh uṡhâke hamâre gunâhoñ kâ kafâra ho. Bagair us ke ráh i najât wâ na hotí, aur insân kâ ab tak Ḳhudâ se mel na hotâ ; balki is dam tak Ḳhudâ ke dushman rah-te ; chunâñchi agle Yahúd, jo ḡhatâ kî qurbânî guzránte the, to kyâ

un qurbáníon meṇ yih matlab bátiní na thá? Yāne ki Masíh ne ḵháss qurbání apne jism kí nisbat guzrání, is liye ki haiwánát ká lahú muḥfid na thá, jaisá ki Ibr. 10 : 4 meṇ hai, “Muhál hai, ki bailon aur bakron ká ḵhún gunáhon ko miṭáwe.” Algaraz ab ham tahqíq se qabúl kar leṇ, ki Isá Masíh kí qurbání, hamáre gunáhon kí magfirat ke liye muḥfid hai. To ham ko yih natíja nikálná lázim hai, ki Masíh ne hamáre wáste aisá dukh sahá, jaisá ki ham sab par apne gunáhon ke iwaz meṇ zurúr thá. To yih wájib hai, ki ham bakhúbí jāneṇ, ki barguzí-dagán i Ḳhudá ke liye wuhí Naját-dihinda aur ḵhalásí denewálá hai. Algaraz yih bacháo mahz hai, ki insán siwá us ke, yāne Ḳhudáwand Masíh ke, ki jis kí bábat muqaddas kitáb meṇ likhá hai, aur koí naját kí tadbír kare; jaisá ki Ām. 4 : 12 meṇ mazkúr hai: “Aur kisi dúsre meṇ salámatí nahín; is liye ki ásmán ke tale aisá aur dúsrá nám nahín, jo insánon ko baḵshshá gayá ho, ki ham us se naját pá sakeṇ.” Pas, subút húa, ki tamám baní Ādam apní badkárí se táríkí meṇ giriftár haiṇ; aur be táidi Haqq ke us táríkí meṇ phanse haiṇ; kyúñki gunáh ne un kí áñkhoṇ ko tárík karke un ke dilon ko niháyat saḵht kar diyá. Isí tarah ham bhi bizzatíhí us gunáh kí táríkí ke sabab Yahowáh ke núr ko kisi hálát meṇ imtiyáz nahín kar sakte. Par Ḳhudáwand Isá Masíh dunyá kí roshní hokar wuh táríkí zail karne ko raunaq afroṇ húa; jaisá ki Yúh. 12 : 4—6 meṇ farmátá hai: “Main jahán meṇ núr áyá hún, táki jo koí merá muṭtaqid howe, andhere meṇ na rahe.” Aur Yasaiyáh ne bhi ham sab ko gum-shuda bheron kí mánina, jo bagair chaupán ke áwára húi hon, mushábihat dí hai. Par dekho, ki Ḳhudáwand Masíh kaisá dilsoz garariyá hai, ki jis ne apne galle kí ján ke liye apní ján dí; jaisá ki Yúh. 10 : 11 meṇ marqúm hai: “Achchhá chaupán main hún; achchhá chaupán bheron ke liye apní ján detá hai.”

III. Tisre, yāne kisi ko us qurbání se fáida nahín, magar us ko, jo ímán láwe; aur us ímán láne ká samra hayát i abadí hai.

Hameṇ aisá ḵhiyál karná lázim nahín, ki Masíh ne apní ján tamám álam ke wáste qurbání kí, aur ki us qurbání se har ek naját páegá, is iṭtibár se ki kafára i gunáh ho chuká, aur ham sab ke sab naját kí ráh par qadam níarte haiṇ. Aisá gumán karná wájib nahín; is liye, ki hamáre Ḳhudáwand ne batákid is aqida kí talím ko áyat i mazkúr meṇ farmáyá, yāne, “Jo koí us par ímán láwegá, halák na hogá, balki hayát i abadí páwegá.” Aur yih ímándárí kyá hai? Us par ímán láná do taur par: pahlá yih, ki jab kisi chíz kí bábat suná játá hai, to sirf us ko zábiri qiyás se mán lená; aur dúsrá yih, ki na sirf iqrár karná, balki us kí ráh ko sadáqat i dilí se iḵhtiyár karke us meṇ qadam baḥáná, aur ímán meṇ mustahkam honá. Áyat i mazkúr meṇ yih tafsír hai, qabúl karke naját ke wáste us par ímán láná. Par matlab us farmáe ká yún ḵhiyál kareṇ, jis se wuh haqíqatan dil nishín ho, yāne ek zinda o sachchá Ḳhudá hai, jo Rúh hai, aur bilkull quddús o qádir i mutlaq, álim ul gaib, rahm o jalál meṇ kámil, aur us ká ádl mukammal, aur us kí zát pák, házir o názir. Dúsre yih, ki ham ímán se is qadr mamúr hon, ki wuh áp hí Ḳhudá i Qádir sab ká Ḳháliq hai, aur áp hí us baṛí qudrat se sab dunyá ko qáim

karke apní dánái se us ko anjám detá hai. Us Kḥudá i wáhid ne hamáre wálidain ko paidá kiyá; par we apní burái ke sabab Kḥudá Taálá ke hukm radd karke gunahgár ho gae; aur wuh pákízagí, kí jo unhen pahle baḥshí gaí thí, zálil ho gaí. Tísre yih, kí hamára ímán is tarah par ho, kí ham unḥín ke farzand aur bizzátihí hamára kḥamír gunáh hai; aur basabab is hí ke us ke qahr aur sazá kí mírás ke wáris ho gae. Chauthé, kí ham láchár ho gae, aur apní táqat qudrat se wuh kámiliyat aur pákízagí, kí jis ke bagair bihisht meṇ dákḥil na ho sakeṇ, hásil nahín kar sakte. Páñchweṇ, yih bhí farz hai, kí Masíh wuhí hai, jo Kḥudá se apne pák nabíon kí marífat mauúid húa; kí wuh hamáre jism i kḥatí meṇ mujassam húa; aur kí us meṇ insániyat o Ulúhiyat donoṇ mushtarik haiṇ; aur kí wuhí sirf Kḥudá ká ek lautá hai. Chhathweṇ, yih bhí zurúr hai, kí yih qurbání, jo us ne apne jism se guzrání, is qurbání se kḥáss matlab yih hai, kí jo aḍl Kḥudá i ádil cháhtá hai, aur hamáre gunáh miṭáne ke liye kámil o bilkull mufid ho; kí us ká dukh uṭḥáná nágahání na thá, balki ibtidá i álam se muqarrar húa thá; aur us ká kḥún baháná, yāne salbí maut, kí wuh hamáre gunáhoṇ ke wáste mare, aur hamen rástbáz sábit karne ke liye jí uṭhe; kyúнки yihí us ke mujassam hone, aur dukh uṭḥáne, aur máre jáne ká sabab thá; kí wuh mará un sabon kí kḥatír, jo us par ímán láweṇ, tá ba zamán i ákḥir. Sátweṇ, hamen ímán rakhná cháhiye Rúḥ ul Quds par, kí ek fard i Taslís hai; wuh dil kí safái ká hákim hai; aur jab tak kí insán us ke wasile se sar i nau paidá na ho, wuh Kḥudáwānd Masíh ke huzúr á nahín saktá; aur na wuh us niāmat ká, kí jo us se wāda kí gaí, sharík ho saktá hai. Áṭhweṇ, zurúr hai, kí hamára yih ímán ho, kí ham ímán se bachenge; aur wuh ímán, kí jo sirf Kḥudá hí ke Beṭe par rakhne se hai.

Jab hamára Kḥudáwānd Niqúdímus se ham-kalám húa thá, tab us ne yih farmáyá, kí “Jo koí us par ímán láwe, halák na ho, balki ha-yát i abadí páwe.” Is kalám se sirf us ká yihí matlab na thá, kí us ko Ibn Ulláh jánkar ímán láwe, balki us ko Naját-dihinda samajhkar qabúl karen; aur jo tālímát bhí, kí us ne apní zubán i mubáarak se irshád farmáṇ, mán len; jaisá kí yih ímán Niqúdímus se talab kiyá gayá, aisá hí jo kí naját ká tālib ho, zurúr hai, kí is umda tālím ko qabúl kare. Pas, jáiz hai, kí yih aqída sádiq ho, aur us ká kám bhí wajsá hí ho. Chunánci muqaddas kitáb meṇ aise ímán kí bábat Kḥudáwānd ne bárhá irshád kiyá hai; aur we, jo sachái aur rásti se ímán láe, us inām ke, kí jis ke we mutaláshí the, fauran mustafid hūe. Maslan, jab kí Lázar kí bahin Marsá Kḥudáwānd Isá pás apne bhái kí maiyat se rotí húi áí, tab hamáre mubáarak Kḥudáwānd ne is aqída i kḥáss kí bábat us se sawál kiyá, aur farmáyá, “Aur jo koí jítá hai, aur mujh par ímán látá hai, kabhí na maregá; áyá tú yih yaqín rakhtí hai?” Yúh. 11 : 16; aur jab us ne qabúl kiyá, aur kabá, kí “Yih durust hai; hán, ai Kḥudáwānd, mujhe yaqín hai, kí Kḥudá ká Beṭá Masíh, jo cháhiye thá, kí dunyá meṇ áwe, tú hí hai;” algaraz natíja is ká yih, kí us ká bhái, jo chár dín hūe, kí mar chuká, aur dafan kiyá gayá thá, jí uṭhá.

Ham wasíqa i qadím se bahut se aur Kḥudá ke agle logon ke

ímán kí bábat zāhir kar sakte haiñ, magar is maqám par itná hí káfi hai. Púlús hawárí ne Ibráníon ko apne maktúb ke 11 báb meñ is tarah ke ímáñ kí bábat Rúh i ilhám se bahut sá likhá hai; magar unheñ bhi mundarj karke túl dená na cháhiye; kyúñki us maktúb ke mutála karne se baḡhúbí zāhir o roshan hogá.

Is aqída ki talím kí zurúrat i ḡháss kí bábat, jo hamáre Naját-dihinda o ḡhalásí denewále ne áyat i mazkúr meñ irshád kiyá, zāhir karke, ab ham muḡhtasar us ká fáida i ázím bayán karenge, yañe hayát i abadí ká mazkúr, ki jis hayát i abadí ke barḡhiláf maut i abadí hai; yañe, hayát i abadí ke yih mañe, ki wuh jalál ke sáth, jis ká wajúd hamesha tak maujúd rahtá hai, aur kabhí maḡdúm nahíñ hotá, balki kamál ḡhushi o ḡhurramí se Ḳhudá i pák ke huzúr meñ basar kartá hai; bas. Aur maut i abadí se yih murád hai, ki us ke qiyám ko faná to nahíñ, magar us ke ranj ki intihá bhí nahíñ; aur siwá is ke hamesha ká nála, o shewan, o ranj, o musíbat, ki jo sazá aur tazír se matlab hai. Aur roz marra kí zindagí se yih matlab hai, ki har fard i bashar ká wuh waqt, jo paidáish se aur marte dam tak shámil hai, is taur par hai, aur Ḳhudá ke kalám ke aksar maqámát meñ bhí mazkúr hai; maslan Sulaimán apní Amsál ke 3 : 2 meñ kahtá hai, ki “We pírí aur umr kí darázi tujhe baḡhshenge.” Magar zindagí, jo ki hayát i abadí se murád hai, aur jo hamáre Ḳhudáwand se hásil hotí hai, wuh hamesha kí ḡhushi Firdaus meñ páná hai, aur us ke huzúr meñ hamesha hamesha tak rahná, jo ki hamárá zindagí ká beḡh o bunyád hai. Insán kí ján rúh hai, aur wuh nest nahíñ hotí; faqat kuchh arse tak is jism i ḡhátí se judá rahtá hai; jaisá ki insán i bad kí, waisá hí mard i rástbáz kí bhí; kyúñki Yas. 57 : 1 meñ likhá hai, ki “Rástbáz bhí marte haiñ.” Algaraz us se murád, yañe maut se tabdíl i maqám kí bábat mañe rakhtá hai, yih haiñ, ki wuh is dunyá i didaní se us álam i nádídani meñ, ki wuh bure se bhale meñ mubaddal hokar Ḳhudá ke huzúr házir kiyá játá hai. Par yih hál fásiq ádmí ká nahíñ hotá; wuh to martá, aur hamesha ke ázáb meñ ḡalá játá; us hí kí maut ko agar púchho, to filhaqíqat maut hai; is liye ki us ká hál jis dam ki kálbud i ḡhákí se judá hotá hai, niháyat ḡharáb ho játá; kyúñki wuh aise gár i jahannam meñ pahunchtá hai, ki jahán siwá ná-ummedí, o ranj, o musíbat, aur kuchh nahíñ; aur haqíqat meñ wuh maqám maut ká hai. Chunánchi sharmindagí ke sáth us ká jism bhí misl i jism mard i rástbáz ke roz i hashr ko uthegá. Pas, we log ki bemadad i Naját-dihinda, yañe Isá Masih ke marte haiñ, un ká hál bhí aisá hí haulnák hai; aur we, jo rástbáz haiñ, hamesha jíte haiñ, aur wuh ḡhushí, ki jis kí intihá nahíñ, mirás meñ páte haiñ, aur Ḳhudá kí taríf aur shukrguzárá kiyá karte haiñ.

Ái ázizo, kalám i Iláhí se yih bát baḡhúbí zāhir o roshan hai, ki hamárá hál kis qadr badtar o ḡharáb hai, aur ham sab kis qadr gazab i Iláhí ke sazáwár haiñ. Ab merí iltimás un sabhog se, ki jo Ibn Ul-láh par ímán rakhte haiñ, yih hai, ki ḡhúb yád karen, ki kis qímat i álá se hamáre liye naját ḡharidí gai. Hamáre Naját-dihinda o ḡhalásí baḡhshnewále Masih ke besh qímat ḡhún se ḡharid húi; to hameñ lázim hai, ki ham yád karen, ki ham Janáb Rabb-ul-álamín se bilkull dúr uftáda the, aur baráks us kí marzí ke kám kiyá kie; magar

Khudáwand Masíh ne hamáre aur us ke darmiyán wásita hokar ham se aur Khudá i pák se mel karwáyá ; aur wuh rástbázi, ki jo ham ne apní badkirdári se kho dí thí, az sar i nau hamáre liye hásil kí ; aur us Khudá i rahím ne apná Beṭá hamáre gunáhoṇ ke iwaz meṇ dekar hamáre gunáhoṇ kí magfírat kí. To kyá ham yaqín na karen, ki wuh hamen aur sab niámateṇ, ki banisbat is niámat i naját ke kamtarín o haqír haig, apní ʿám rahmateṇ se atá karegá ? Pas, zurúr hai, ki ham apne sáre dil se us ke waḍoṇ par ímán rakheṇ ; aur us ímán ke sáth yih safar i chand roza dunyá ká baḵhair o ḵhúbí tamám karen. Aur ai piyáro, tum, jo ab talak aise ábdár motí se, jo naját ke motíeṇ meṇ anmol hai, benasíb ho, dúsrí bár bhí hamáre guzárish tum se yihí hai, ki Khudá ke wáste apní ján ke bacháo kí tadbír karo ; aur yih hálát, ki jis meṇ tum giriftár ho, yaqín jáno, ki is se tum ko kuchh bha-láí na milegí ; aur na wuh aish o ishrat, ki jis ke tum mutláshí ho ; to agarchi tum aisí hálát meṇ us hayát i naját kí bihtaríeṇ se dúr ra-ho, to yaqín hai, ki kabhí ḵhazána i naját hásil na kar sakoge.

Afsos, hazár afsos, ki dunyawí muámaloneṇ meṇ bare siyáne ho, ki us meṇ hamará nafa yá nuqsán hai ; aur haqíqat meṇ yih dunyá fání hai ; par ján, jo ki beqímat hai, us ke bacháo kí bábat kuchh bhí ḵhiyál nahín karte. Albatta jab ki tum se sawál ho, to kahoge, ki Ham to ján kí naját ke joyáṇ haig ; par, ai bháío, kyá us kirdár se, jo ki haiwán bhí nahín karte, naját ke málik hoge ? Yáne mittí o patthar kí múrateṇ banákar un kí súrateṇ se naját ke tálib ho, to kyá yih mumkin hai ? Pas, tum nahín jánte, ki yih kárigaríá is hí dunyá kí haig, aur yahán rah jáengí. Lekin kaun tumhárá rafíq hokar tum-háre sáth us ḵhaufnáḵ safar ká ham-safar hogá ? So lázim hai, ki is ḵhiyál o ḵhwáb meṇ gáfil na rahkar bedár ho ; aur Masíh Alláh ke, jo shafi haqíqí hai, dáman i daulat ke zer sáe áo, aur wuh niámat i mírás, ki jo Alláh Taʿálá ne roz i azal se muqarrar kí hai, apní mírás banáo, táki tumháre ján hamesha kí aish o ishrat meṇ ḵhushí o ḵhur-ramí hásil kare ; aur taríf, aur jalál, aur qudrat us ke pák nám ko abad ul ábád ho. Ámín.

XX.

MUSIBATON MEN TASALLI.

REV. F. SCHNEIDER KI TASNÍF.

Jab wuh ye báteṇ un se kahtá rahá, dekh, ek sardár áyá, aur use sijda karke kahá, ki Merí beṭí abhí mar gaí ; par tú ákar apná háth us par rakh, to wuh jéegí. Tab Ísá uṭhkar apne shágirdoṇ samet us ke pí-chhe chala. Aur dekho, ek qurat ne, jis ká bárah baras se lahu járe

thá, píchhe se ákar us ke kurte ká dáman chhuá ; kyúнки wuh apne jí men kahrtí thí, ki Agar main faqat us ke kurte ko chhuún, to bach já-úngí. Ísá ne phirke use dekhkar kahá, ki Ai betí, khátirjamá ho ; tere ímán ne tujhe bacháyá. Aur wuh aurat us gharí se bach gai. Aur Ísá us sardár ke ghar men pahunchá, aur báníslí bajánewálon aur dhúm macháte logon ko dekhke un se kahá, ki Kanáre ho ; kyúнки lar-kí nahín marí, balki sotí hai. We us se hansne lage. Par jab we log báhar nikáde gae, to us ne andar jáke us ká háth pakrá : tab lar-kí uthí. Aur is májara kí shuhrat us tamám mulk men phail gai.—
Matí, 9 : 18—26.

BAHUT log is zindagí ke ranj, dukh, musibat aur áfaton par aisi kamiatiqádí se faryád karte aur kurkuráte haiñ, ki koí samajh sake, ki is zindagí kí musibaton men tasallí aur khátirjamái kí bát nahín hai ; hán, ki koí kھیál kar sake, ki K̤hudá bojھ rakhtá, lekin sambhálne kí táqat nahín baḡhshtá hai. Par aisá nahín hai ; kyúнки koí musibat nahín hai, jis ke wáste K̤hudá ne dándáron ke liye tasallí aur khátirjamái taiyár nahín kí. Yasaiyáh nabí kí mařifat se K̤hudá ne farmáyá, Main tujھ ko zor baḡhshtá, main terí madad kartá, main apní rástbázi ke dahine háth se tujھ ko sambháltá hún. Is liye maḡlúm hotá, ki agar ádmí musibat men tasallí, o khátirjamái aur ummaid nahín rakhtá hai, to sirf us ká qusúr hai ; kyúнки we bedínon kí mánind tasallí aur ummaid kí talásh bilkull nahín karte, yá nádánon kí mánind wuháñ nahín dhúndhte haiñ. jaháñ sirf páí játi hai ; yane us ke pás, jis ne wáda kiyá hai, Musibat men mujhe pukár, to main tujھ ko bacháúngá, aur tú merí taříf karegá. Ye kaisí tasallí kí báteñ haiñ ! Aur jab ham in áyaton par gaur karte haiñ, jo áge sunái gaiñ, tab ham ko maḡlúm hogá, ki kái ek tasallí aur khátirjamái hásil hotí haiñ. Is liye ham in áyaton ke muwáfíq kái ek tasallí kí báton ká bayán karenge, jin se ham is zindagí kí musibat sabr ke sáth sah sakenge.

- I. Har ek ádmí kisi dukh, ranj, gam, musibat, yá tangí men hai.
- II. Har ek soche, ki merí musibat sab se baří nahín.
- III. Musibateñ ádmí kí aksar K̤hudá kí taraf hidáyat kartí haiñ.
- IV. Ímán kí ráh se ádmí har ek dukh, ranj, musibat men tasallí, madad aur bacháo patá hai.
- V. K̤hudá kí madad aur bacháo ajíb hai.

I. Injíl kí ye báteñ hamen yád diláti haiñ, ki har ek ádmí kisi dukh, ranj, gam, musibat men hai. Likhá hai : Dekho, ek sardár ne áke use sijda kiyá, aur kahá : Merí betí ab tamám húi ; par tú chal, apne háth us par rakh, ki wuh jí uṭhegi. Ek sardár thá, jo is dukh men giriftár thá, ki us kí betí, sháyad us kí chhoṭí piyáři betí, mar gai. Us ká ikhtiyár, jo logon ke pás rakhtá thá, us kí hoshyáři aur martaba us ko is dukh aur gam men nahín bachá saká ; us ne bhí apne ghuṭhne dukh ke máre ṭeke ; us ne apná háth gam ke máre minnat karne ko uṭháyá ; us ne apná munھ madad mángne ke wáste kholá. Ai muhtájo aur kangálo, tum subھ ko fíkron ke sáth uṭhe, aur sánjh ko andeshon ke sáth leṭe ho ; ai garibo, aur chhoṭe log, jo roz roz apne dukh aur musibat uṭháte ho, hasad kí ánkhon se amír

aur daulatmandon ke mahallon par nazar mat karo ; mat samjho, ki is dunyá ke bare log sirf nekbaḡht haiṅ ; dekho, ek sardár áyá, jis kí beṭi mar gaí thí. Ranj, dukh, musibat, gam aur maut amíron ke mahallon men bhí áti hai. Yaqín hai, ki har ek ádmí kisí dukh, ranj, musibat men giriftár hai. Pas, ádmí kaháṅ un se panáh legá ? Sháyad martaba men ? Hée, hée ! Bahutere aur amír aur bare ádmí, chhoṭe aur garibon se badalná cháhte the ! Sháyad apní daulat men ? Yaqín jáno, ki daulatmandon kí imáraton men bhí bahut chhipe húe fikr, aur andeshe, aur bahut poshíde gam, dukh, aur taklíf haiṅ. Sháyad apní buzurgí aur táqat men ? Hái, ho saktá, ki zoráwar sardár tamám lashkaron par fath páwe, shahr aur mulkon ko barbád kare, balki is zindagí kí taklíf, ranj aur musibaton se ázádagí nahín pá saktá hai. Hái, aur yih bát bhí sach hai, ki sab se bare aur amír ádmíon kí buzurgí, shán aur shaukat aksar jaldi játi rahtí hai ; kyúnki yih sab fání haiṅ. Har ek ádmí par is dunyá men zurúr partá hai, ki ranj, dukh, gam, taklíf, musibat uṭháwe ; yih sabkon ká hál thá, jo hamáre áge the, aur aisá abhí hai, aur aisá hí hogá. Is liye, ai dukh aur taklíf uṭhánewálo, apne dukh aur ranj ke bojh sabr ke sáth uṭháó ; ai gam khánewálo, mazbúṭí se saho, jo Ḳhudá ká háth tum par rahtá hai. Ḳhudáwand ne bhí apní salíb apne úpar uṭháí. Us par nazar karo ; us kí salíb tum bhí uṭháó ; us ke pás jáo, jab musibat, ranj, dukh tum par partá, aur tum ásání aur sabr ke sáth uṭhá sakoge. Lekin koí kahe : Merí musibat sab se barí hai, wuh in áyaton se ek aur tassallí kí bát sikhe, yaṇe,

II. Terí musibat sab se barí nahín hai. Likhá hai, ki Ísá uṭhke apne shágirdon ke sáth us ke píchhe chalá. Aur dekho, ek aurat ne, jis ká bárah baras se ḡhún jári thá, us ke píchhe áke us ke kurte ká dáman chhúá ; aur jí men kahtí thí : Agar main sirf us ká kurtá chhúúngí, bhalí changí ho jáúngí. Kaun kah saktá hai, ki un donon men kis kí musibat barí thí, is sardár kí, jis kí beṭi mar gaí thí, yá us aurat kí, jis ká bárah baras se lahú jári thá ? jis ne, jaisá Markas kí Injil men likhá hai, bahut se hakimon kí dawáen khái thin, aur apná sab mál ḡharch karke kuchh fáida na páyá thá, balki us kí bímárí aur bhí baṛi gaí thí. Us ne in barason ke arse men kaí ek dafá beshakk madad cháhi, idhar udhar chalí gaí, ki waháṅ yá yaháṅ iláj apní bímárí ke wáste páwe. Betásir tum yih bát sun sakte ho, jo us kí bábat likhí hai ?—Agar main sirf us ká kurtá chhúúngí, to main bhalí changí ho jáúngí. Sháyad ki báze un men se, jo Masíh ke píchhe chalte aur apne ranj, dukh, gam uṭháte the, jab us bímár aurat ko dekhte the, ḡhiyál kiyá, Haqíqat men merí musibat sab se barí nahín. Hái, sháyad ki ham men se kaí ek, jo dukh aur ranj men giriftár haiṅ, isí tarah kahenge, agar un ko sab musibaten, jo hamáre bháíon aur bahinon par parti haiṅ, maḡlúm hotí haiṅ. Sirf thoṛe shaḡhs haiṅ, jo is aurat kí mánind bárah baras se madad cháhte, aur duá mángte haiṅ ; thoṛe haiṅ, jo dín dín, rát rát, hafta hafta, mahíná mahíná, baras baras se dukh aur ranj men haiṅ. Ham apne bháíon aur bahinon ke sab dukh, gam, aur musibaten nahín jánte haiṅ ; kyúnki we musibaten, jo záhir haiṅ, aksar sab se barí nahín. Sab se barí musibat-

en poshida hai, jo ham ko malum nahin hoti hai. Hazar hazar apne dukh aur gam dil mein chhipate hai, aur kisi ko malum nahin hota hai. Agar tu un ke gam aur dukh ko janta, to apni musibat par kurkuranā barā gunāh samajhta. Ai tu, jo ranj aur dukh uthata, aur gam khata hai, yaqin jan, ki un ka shumar, jo tujh se ziyada sabab se kah sakte hai, Beshumar ranj aur dukh mujh ko gherthe hai, bahut hai. Is liye tu sabr, jurat, aur ummaid na chhor de; aur in ayaton se har ek musibat mein yih tasalli hasil kar, ki teri musibat sab se barī nahin hai. Isi tarah se tu sabr ke saath Kḥudā ki shukruguzārī karke kah sakegā, Ai Kḥudāwand main kaun hūn, ki tu mujh ko bahut ranj, dukh, aur musibat se bachata hai? Main tere rahm aur mihrbanī ke laiq nahin hūn.

III. Ek aur tasalli ki bat, jo ham in ayaton se hasil karte hai, yih hai: ki musibaton Kḥudā ki taraf hamāri hidayat karti hai. Wuh sardār aur bīmār aurat ilāj dhundhte the; madad ki arzū ke saath Masih ke pas ate the; aur jab Kḥudāwand ne barī mihrbanī se un ki madad ki, tab we us par ziyada mazbutī se imān lae; aur beshakk un ke dilon mein mahabbat, aur shukruguzārī, aur bharosā ziyada hua. Jaisa we musibat ke sabab se Kḥudāwand ko dhundhte the, waisa hi abhi bahutere dukh aur ranj mein giriftār hoke Kḥudāwand aur us ki madad aur tasalli ki talash karte hai. Yih sachchi aur tajriba se sabit bat hai, ki sirf thore admi Kḥudā ko dil o jan se dhundhenge, aur piyar karenge, agar musibat na hoti. Shayad koi gumān kare, ki khushi ke din admi ki bihtar Kḥudā ki taraf hidayat karte hai; lekin aisa nahin hai; kyunki bahutere khushi mein apne Kḥudā ki fikr aur yad bilkul nahin karte hai. Sachcha mazbut imān, mahabbat, aur ummaid musibat ke dinon mein bihtar paida aur mazbut hote hai. Aksar admi Kḥudā ki niāmaton aur fazl sirf us waqt achchi tarah se kam mein late hai, jab un ka dil ranj, dukh, gam, musibat ke wasile se is dunya ki daulat, shān o shaukat, aish o ishrat ki arzū se khali ho gaya. To jo bharosā ke saath, aur tamān dil se kah saktā hai, Ai mere Kḥudāwand, main tujh ko nahin chhor deta hūn; main ne ap ko tujhe bilkul supurd kiya; tere liye main jita, tere liye main martā hūn; main zindagi aur maut mein terā hūn; us ne yih bat khushi ke dinon mein nahin sikhi, balki musibat mein us ne apne Kḥudāwand ko paya. Ek dindār shakhs ne yun likha,—“Isā kho denā, sab kuchh kho denā. Is liye Isā ko na kho de. Lekin kis waqt us ko jaldi kho deta hai? Khushi ke dinon mein. Kaban us ko āsānī se patā hai? Musibat ke dinon mein. Jaisa main kisi ke pas ziyada khush nahin hūn, magar Isā ke pas, waisa hi merā ziyada bhalā nahin, magar musibat mein; wahan main Isā ko patā, aur us mein khush hotā hūn. Jab main ne is dunya ki sab chizen kho di, to Isā merā sab kuchh hai; meri daulat aur māl jata raha, lekin Isā meri daulat hai; meri khushi jati rahi, lekin Isā meri khushi hai. Main kaisa khush hūn, ki Isā Alifā aur Omegā, auwal aur ākhir hai. Merā dost jata ranā, lekin Isā meri jan ka dost hai; bihtar dosti dunya mein nahin, sirf teri dosti, ai Kḥudāwand Isā Masih. Isā ko panā, āsmān ko panā hai. Tu kyā aur chahata hai.” Pas, agar is zindagi

ke ranj, dukh, gam, aur musibat kí tásir aisí ho, kí we K̤hudá kí taraf hamári hidávat kartí haiṅ, to ham ko nahíṅ cháhiye, kí sabr aur bharosá ko chhor dewen. Sab dīndār ádmí, jo is dunyá men ranj, dukh, taklīf uṭháte, aur gam kháte the, musibaton ko mubáarak samajhte the, aur ham bhí isí tarah karenge, agar ham k̤hiyál karen, kí K̤hudá ne un ko bhejá. Is liye ek dīndār shakhs ne musibaton kí bábat likhá, “Ai piyárí musibat, agar koí tujhe nahíṅ cháhe, to tú mere pás á; kyúñki main jántá hún, kis ne tujh ko bhejá hai; main jántá hún, kí tú apne sáth ek rahim K̤hudá ko le áti hai; aur agar wuh merá, to main aur kyá cháhú.”

IV. Tasallí kí bát yih bhí hai, kí ádmí ímán kí ráh se har ek musibat men tasallí, sabr, madad, bacháo pátá hai. Injíl men likhá hai, —Tab Isá ne píchhe phirke use dekhá, aur kahá, Ai beṭí, k̤hátirjama rakh, kí tere ímán ne tujhe changá kiyá; pas, wuh aurat usí gharí se changí ho gai. Wuh aurat beiláj nahíṅ rahí; ímán kí ráh se us kí madad húi. Sachche ímán kí kaisi tásir aur iṭhtiýar hai! To jo durustí se K̤hudáwand par ímán látá hai, us kí beshakk hál tak madad kí játí hai. Main kahtá hún, hál tak; kyúñki Ibn i ádam is liye áyá hai, kí sabhon kí madad kí jáwe, jo us par ímán láte haiṅ. Ai piyáro, tum un se, jo is zindagí ke bahut dukh, ranj aur taklīf uṭháte haiṅ, píchho, kí Tum ne kis taur se musibaton ká bojh uṭháyá, aur sabr ke sáth bardásht kí? we tum ko yih jawáb denge, Ímán kí ráh se hamári madad, tasallí aur táqat hai. Lekin yih bas nahíṅ hai, kí tum auron ke ímán se síkho, kí ímán aisí tásir rakhtá; balki zurúr bhí hai, kí tum is bát ko apne tajruba se síkho. Jo ímán látá hai, so bachta hai; ímán se ham sab khatron, dukh, ranj, gam aur musibat par gálib áte haiṅ. Jaisá tú ímán látá, waisá hí tujhe hogá. Ibráníon ke maktúb 11 báb men yih bát sáf maḷúm hotí hai. Is liye ímán láo, to tumhári madad kí jáegí. K̤hudá se yih minnat karo, kí Hamáre ímán ko ziyáda kar. Ham tujh se dunyá kí daulat, izzat, k̤hushí, shán aur shaukat nahíṅ mángte haiṅ; sirf ímán cháhte; kyúñki is se kyá aur ziyáda hai?

V. Tasallí kí píchhlí bát, jo ham in áyaton se síkhte haiṅ, yih hai, kí K̤hudá kí madad aur bacháo aksar ajīb hai. Likhá hai,—Aur jab Isá us sardár ke ghar men pahunchá, aur us ne bānslí bajánewále aur jamaat ko gul macháte dekhá, to unhe kahá, Kináre ho, kyúñki larķí nahíṅ mar gai, balki sotí hai; we us par hanse. Jab we log báhar nikále gae, us ne andar jáke us ká háth pakrá, aur wuh larķí uṭhí. Tab us kí shuhrat us tamám mulk men húi. Wuh aurat, jo bárah baras se bímár thi, changí bhí húi ek dam se; likhá hai, kí Us ne us ke kapron ko chhú liyá, to changí ho gai, aur filfaur us ke lahú ká sotá band húa, aur us ne apne badan ke ahwál se jáná, kí us waqt se changí húi. Tab Isá ne filfaur apne men jáná, kí mujh men se qúwat niklí; us bhír kí taraf mutawajjih hokar kahá, kí Mere kapre ko kis ne chhúa? Us ke shágirdon ne use kahá, Tú dekhtá hai, kí log tujh par gire parte haiṅ; phir tú kahtá hai, mujhe kis ne chhúa? Tab us ne chároṅ taraf nigáh kí, táki use, jis ne yih kám kiyá thá, dekhe. Aur wuh aurat, jis par yih wáqi húa, jáñkar dartí aur kámpṭí áí, aur

us ke áge gir paří, aur sach sach use kahá. Tab us ne use kahá, ki Beťi, tere imán ne tujhe bacháyá; salámat já, aur apní áfat se bachí rah. Wuh larkí mar gaí thí, aur ab ek bát se jí uťhí. Tum púchhte ho, Yih kis taur se húa? Ham sirf yih jawáb de sakte haiñ, K̤hudáwand kí madad aur bacháo aĳíb hai. Us ke nazdik kuchh bhí nahín anhoná hai; jab wuh boltá, to wáqí hotá; jab hukm detá, to maujúd hotá. Us kí ráh aur kám aĳíb haiñ. Kis ne lál samundar meñ ráh taiyár kí, ki Isráíli log súkhí ráh par guzar sakte the? Kyá us ne nahín kiyá? Kis ne Iliás ko bayábán meñ gosht aur roťi baĳhshí? Kyá us ne nahín diyá? Ai musíbat uťhánewále, tú K̤hudá kí madad kí ráh nahín dekhtá hai, is liye ki tú madad kí ráh nahín jántá hai; tú in áyatön par gaur kar, aur shakk na kar, ki K̤hudá teri madad bhí kar saktá hai. Ai gam khánewále, tú kuchh iláj nahín jántá hai, jis se tú apní taklíf se bache; K̤hudáwand par nazar karke us par bharosá rakh, kyúñki wuh sab kuchh durust karegá. K̤hátirjamá rakhke kah, K̤hudáwand merá uĳiyálá, aur merí naját hai; main kis se ċarún? K̤hudáwand merí zindagi ká zor; kis se main ċarún? Jaisá us waqt K̤hudáwand kí aĳíb madad aur bacháo kí shuhrat tamám mulk meñ húi; waisá hí abhi us kí shuhrat hai: hamará K̤hudá bachátá hai; hamará K̤hudáwand maut se bhí chhurátá hai. K̤hudáwand kí mashwarat aĳíb hai, lekin wuh sab kuchh baĳhair anjám kartá hai; wuh ham par hamári samajh aur minnat se ziyáda kar saktá hai.

Ai piyáro, in báton par gaur karke ranj, dukh, gam, musíbat sabr ke sáth uťháó, aur saho. Har waqt aur har ahwál meñ yún kaho, Jo jo mere K̤hudá kí marzí hai, so so ho; us kí hidáyat ke tábi meñ main rahúngá; jaisá wuh cháhtá hai, waisá hí main bhí cháhúngá. Aur jab tum ne K̤hudá ke liye farotání aur sabr ke sáth apní salib uťháí, to baċ us ke tumhárá hál aisá hogá, jaisá Mukáshafát kí kitáb meñ likhá hai, (7 : 13—17), We, jo sufed jáme pahine haiñ, kaun haiñ, aur kahán se áe? Ye we hí haiñ, jo baĳí musíbat meñ se áe; aur unhon ne apne jámon ko Barre se lahú se dhoyá, aur unhen sufed kiyá. Isí wáste we K̤hudá ke takht ke áge haiñ, aur us kí haikal meñ rát dín us kí bandagí karte; aur jo takht par baithá hai, un ke darmiyán sukúnat karegá; we phir bhúkhe na honge, aur ná piyáse; aur we dhúp aur garmí na uťháwenge. Kyúñki Barra, jo takht ke bích o bích hai, un kí gallabání karegá, aur unhen páníön ke zinde soton tak pahuncháwegá. Shukrguzári aur ċaríf us kí, jis ne yahán tak bacháyá, aur jis ne waċa kiyá hai, ki Jo jo mujh par imán látá hai, wuh kabhí nahín sharminda hogá. Ámín.

XXI.

KHUDA APNE LOGON KI JA' I PANAH.

REV. J. OWEN KI' TASNÍF.

Main un ke liye maqdis húngá.—Hiz. 11 : 16.

Is waqde ke mazmún ke parhne se malúm hogá, ki kaisí latíf, aur mahabbat kí báten ye hai. Pusht dar pusht Baní Isráíl apne Riháí-kuninda. aur Háfiz, aur Hádí ke barķhiláf tarah tarah ke gunáh karte the. Hálánki us ne unhen Misr kí gulámí se chhurá liyá thá, aur bayábán men un ko khiláyá, piláyá, aur khatron aur dushmanon se bacháyá, aur unhen ahd ke mutábíq zamín i Kanaán men pahuncháyá thá ; tau thí we waqt ba waqt us se kurkuráthe the, aur us se gáfil rahte the. Bahut der tak wuh sabr kar rahá ; lekin jab ki un kí sarkashí bardásht se báhar ho gai thí, un par dúr se dushmanon ko charhá láyá ; aur ákhir us ne unhen un dushmanon ke supurd kiyá. Peshtar waqt ba waqt kahtá thá, ki agar tauba na karen, albatta wo dushman dúr, yane Bábul se áwenge, aur un ke háth se main apne logon ko tambíh dúngá. Áyat i mazkúr men Alláh kahtá hai, Jab main asbát i Isráíl ko Bábul men, aur us ke ás pás ke mulkon men, paráganda karúngá, unhen na bhúlúngá ; balki jahán kahín we mujhe dhúndhenge, aur mere áshiq honge, main házir o názir húngá, aur un ká majh ko dhúndhná ábas na hogá. Har ek jagah men, jahán we howen, aur merí taraf rújú láwen, main un kí sunúngá ; balki “ Main un ke liye maqdis húngá.”

Agle zamáne, yane Músá ke ahd men, maqdis wuh jagáh thí, jo sab se páktaín kahlátí thí, aur jahán ahd ká sandúq, aur Karúbím the, aur jis men har waqt dákhil honá nárawá thá. Sál men sirfek dafa us men dákhil honá rawá thá ; aur siwá sardár káhin ke koí dúsrá us men já na saktá thá. Jab wuh játá thá, lahu apne liye aur Baní Isráíl ke wáste chhíraktá thá, aur dákhil hoke oakhúr bhí jalátá thá. Is kám men wuh ánewále Masih kí maut aur shafáat ko dikhátá thá. Is maqdis ke nazdík imándár Khudá kí parastish karte ; aur us imán ke sabab se, jo Masih par rakhte, chain o aman men rahte the. So yihí maqdis un ke liye panáhgáh thí ; kyúнки wahán peshnishán us Masih ke the, jo sáre imándáron kí panáhgáh hai. Usí maqdis men injíl, yane khush-khabarí ká tamám matlab maujúd thá ; aur injíl hí men imándáron kí panáhgáh dikhái játí hai. Isí sabab se maqdis ke mané kadhí parastish kí jagah, kadhí burj, aur qila, panáhgáh hai, jaisá ki áyat i mazkúr se wázih hotá hai.

I. Maqdis ke manē *parastishgāh*, yanē *masjid* haiṇ. *Khudā* ne us āyat meṇ wāda kiya, ki jahāṇ kahīṇ mere *khāss* log parāganda howeṇ, mainṇ un ke nazdik rahūngā. Agarchi dūr ke mulkon meṇ titar bitar howeṇ, taubhī merī nazar se chhip na rahenge; aur *khāss* karke jab we mujhe dhūndheṇ, mainṇ hāzir o nāzir hūngā; jahāṇ kahīṇ mujh se duā māngeṇ, mainṇ un kī sunūngā; har jagah, jahāṇ merī parastish karne chāheṇ, wuh pāk hai. So Pūlus Rūh ke ilhām se kahtā hai, “Mainṇ chāhtā hūṇ, ki insān *har jagah* duā māngeṇ.”

Agle zamānon meṇ pahlē *khaimagāh*, aur baḍ us ke haikal maqdis thī; jis meṇ we, jo *Khudā* ke tālib aur āshiq the, jamā hote the, ki us kī parastish karen, aur use dhūndheṇ. Lekin *Khudā* kahtā hai: Jab mainṇ apne logon ko un ke gunāhon ke bāis se zamin i Kanaān meṇ se nikālke unheṇ Bābul aur us ke ās pās ke mulkon meṇ parāganda karūngā, jahāṇ se waqt ba waqt Aurshalīm kī haikal meṇ nahīṇ ā sakenge, tab mainṇ hī un ke darmiyān hoūngā, aur mainṇ un kī maqdis hūngā. Har shakhs, har waqt, jab dil se chāhe, mujhe pāwegā; aur zurūr nahīṇ hogā, ki dūr kā safar karen, tāki mujhe pāweṇ; kyūnki mainṇ har ek ke dil meṇ rahūngā, jo mujhe dhūndhtā hai, aur dil o jān se chāhtā, ki mainṇ hamesha us ke sāth rahūṇ. Musbat, tang hālī aur bīmārī meṇ mainṇ apne tālibon ko milūngā. Jahāṇ mere wāste makān banāte haiṇ, yā merī parastish ke liye jagah thaharāte haiṇ, mainṇ unheṇ qabūl karūngā, aur apnā fazl un par nihāyat baḥshūngā. Yih kaisā latif aur dil pazir wāda hai! Aur yih ab tak qāim hai, aur sab ke liye hai, kyā Yahūdī kyā gair qaum hog. Isrāīlī log Bābul ke mulk meṇ parāganda ho gae, jahāṇ se do sibt phir āe, yanē Yahūdā aur Binyāmīn; aur das asbāt kho gae, jin kā ab tak patā nahīṇ lagtā, ki we kahāṇ haiṇ; aur kisī ko yaqīn nahīṇ, ki kahāṇ rahte haiṇ. Lekin ab un ke liye yihī wāda hai, ki jab we *Khudā* kī taraf phireṇge, *Khudā* un ko milegā, aur unheṇ apnī kalisiyā meṇ shāmil karegā. Yahūdā kī aulād, jo Yahūd kahlāte haiṇ, agarchi apne watan ko phir āe, tau bhī saḥt dilī aur gardankashī ke sabab se, aur Masih ke radd karne aur maslūb karne ke bāis se we wahāṇ se phir nikāle gae, aur ab tak tamām rū i zamīn par parāganda, āwāra aur sargashta rahte haiṇ. Un kī haikal, jo Aurshalīm meṇ thī, barbād ho gai; aur we wahāṇ jā nahīṇ sakte, ki id yā *Khudā* kī bandagī kī aur rasūmāt bajā lāweṇ. Par yih wāda un kī *khātir* hai. Har ek mulk meṇ, jahāṇ we rahte, agar wahāṇ *Khudā* kī taraf phireṇ wuh un ko milegā; balki un ke darmiyān rahegā, agar we use bhar maqdūr dhūndheṇ: *Khudā* un ke liye maqdis hogā; un kī majlison meṇ, un ke gharon meṇ, aur un ke dilon meṇ hāzir o nāzir rahegā.

Yih wāda Allāh ke sāre pāk logon ke liye hai,—sabhon ke wāste, jo ki Abirahām kī rūhānī nasl haiṇ. Jo imāndār haiṇ, so haqīqat meṇ *Isrāīlī* haiṇ; kyūnki *Khudā* ke sāth duā māngne meṇ *gālib* hote haiṇ. Paid. 32: 28. Duā, aur imtihan, aur ranj, aur rahat ke waqt, rāt din, hamesha, balki har dam buzurg Allāh un ke dilon meṇ rahtā, aur un ke dil us ke liye haikal ban jāte haiṇ.

II. *Khudā* apne logon kī *panāh* hai. Jab Isrāīlī log maqdis

ke nazdik jate the, tab apne gunahon ki saza se panah dhundhte the. Kai ek log, jab us ke bhitar jate the, mazbah ke singh ko pakarte the; aur jab dushman un ke nazdik ate, to unhen chhune se baz rahte. Bayaban mein jab ki we musafir the dushmanon se maqdis un ki panah thi. Wahab ikatthe hoke Khuda se madad mangte the, aur Khuda un ki sunkar un ka madadgar aur dastgir hota tha. Khuda maqdis mein apne buzur ki nihaniya dihati tha; kyunki un ke darmiyan wuh us ka maskan tha. Aur jab we zamin i Kanaan mein pahunchte, tab Allah un par haikal mein zahir hota; aur jab we khatre ya musibat mein parte, tad wahab jake us se madad mangte the.

Tamam bani Adam, ba sabab apni bigri hui asl aur amal ke, bare khatron mein rahte hain; yane, apni kharabi o badraftari, aur hajrawi o sarkashi ke bais se Allah ke gazab ke laiq hain.

Khuda pak hai, aur naresti aur napaki se nafrat rakhti hai; is liye un se bhi nafrat rakhti hai, jo ki gunah mein mulauwas hain. "Khuda ka gazab asman se admon ki sari bedini aur badkari par nازل hota hai." Róm. 1: 18. Us ki anken aisi pak hain, ki wuh badkari, se razi nahin ho sakti; so gunahgar apne Khaliq ke samne kaisi khaufnak halat mein rakti hai! Us ke liye "Adalat ka ko haibat-afza intizar, aur aisa gazab i atashbar, jo mukhalifon ko kha legi, baqi hai." Ibr. 10: 27. Us halat se kis tarah chhut jaegi? Allah Taala us se naraaz hai, aur us ke gazab se kyunkar bach jaegi? Koi insaan us ko ribai nahin de sakti, aur tamam ru i zamin par koi tadbir nahin ho sakti, jis se wuh khatirjamai aur makhlasi pawe. Khuda ne ap hi ek rah kholi, aur use ham par zahir kiya hai. "Tarannum karo, ai asmano, ki Yahwah ne yih kiya; aur lakaaro, ai zamin ke gaharapo, ki Yahwah najat deti hai." Allah, jis ke bar-khilaf insaan ne gunah kiya, sare gunahgaron ko, jo tauba karke us ke Bege par tharosa rakhte hain, gunah ki saza se panah deti hai. Us ne apni dani aur tawani se aisi tadbir ki, jis se us ki sari sifaten beib rahen, aur gunahgar lanat se bachke us mein panah lewe. Har ek, jo gunah karti hai, so lanati hai; par najat ki tadbir ke mutabiq jo koi Khuda ke Farzand par iman lati, us ke satab se rast gin jati hai, aur Khuda use apne gharane mein qabul karti hai. "Masih ne hamen mol lekar shara ki lanat se chhuraia, ki wuh hamare badle maurid i lan hui." Gal. 3: 13. Isi tarah "Khuda ap hi sadiq (yane rast) thaharti, aur us ko, jo isa Masih par iman lati hai, sadiq thaharti hai." Róm. 3: 26. "Rahmat aur sachai milnewali hain; sadaqat aur salamat bos o kanar karti hain." Zab. 85: 10.

Khuda ke adl se bhi zurur hai, ki badkar saza sahe. Har ek kam mein, har ek shaks ki taraf, aur tamam alam mein Khuda ki adalat zurur zahir ki jaegi. Agar adil na hota, to kamil na hota, aur is liye Khuda na ho sakti. Lekin jab gunahgaron ko najat deti, us ka adl bilkul be khalal rakti, balki ziyada zahir hoti hai. Sab kuchh, jo ki Khuda ka adl gunahgar se chahti hai, Masih ne badkaron ke iwaz mein pura kiya. Isi tarah Khuda ka adl abhi gunahgaron ki maqdis hai; us ke adl mein Masih ke wasile se we panah le

sakte, aur us meñ amn o chain ke sáth rah sakte haiñ. K̤hudá sádiq ul qaul hai. Us ne kahá, ki “Har ek shaḡhs, jo un báton ke karne par, jo sharā kí kitáb meñ likhí haiñ, páedár nahin rahtá, maláún hai.” Gal. 3 : 10. Zurúr yih qaul púrā ho jáwe, kyúñki jab tak ásmán aur zamín ṭal na jáe, na harf, na harakat us ke qaul se ṭal jáegá, jab tak sab púrā na howe. Par Ísá Masíh se, agar ham us par bharosá rakheñ, us ká qaul púrā ho gayá, aur hamesha tak sábit rahegá. Isi tarah ham K̤hudá kí sachcháí meñ panáh le sakte ; Masih ke wasile se K̤hudá kí sachcháí sáre imándáron ká maqdis ban gayá hai.

Zurúr, ki K̤hudá kí hukúmat aur saltanat kámil rahen. Jab koí gunáh kare, to wuh gunáh ká natíja páwe, yañe maut, hamesha kí maut ; nahin, to k̤hatákár shumár meñ bahut barh jáenge. Jab ek shaḡhs gunáh kartá, aur sazá nahí pátá, to aur bhí gunahgár ban jáenge ; aur dahshat hai, ki gunáh isí tarah phail jáegá, yahán tak ki sári k̤hilqat kharáb hogi. So zurúr, ki dáná aur mihrbán Hákim pahle se badkár ko gunáh kí tambíh dewe ; tá na howe, ki us kí hukúmat nest ho jáwe. Har tarah se zurúr hai, ki K̤háliq o Málik sarkashon ko gunáh ká phal dewe, yañe maut. Par naját kí tadbír aisí aḡib hai, ki K̤hudá kí hukúmat beaḡib rahe, aur gunahgár bhí beaḡib gine jáweñ. Masih ke wasile se gunahgár K̤hudá kí saltanat meñ panáh letá hai. K̤hudá kí saltanat, jo peshtar gunahgár kí muḡhálif thi, ab us kí maqdis ban játi. Har tarah se K̤hudá un kí maqdis hai, jo us par tawakkul karte haiñ.

Imándáron ke rúhání dushman bahutere haiñ ; un ke lashkaron ká sardár, yañe Iblis, “Sher i garán kí mánind ḡhúnḡhtá phirtá, ki kis ko khá jáwe.” 1 Pat. 5 : 8. Tarah tarah se we unheñ gherte, un ká imtilán lete, aur un kí halákat ke tálib hote haiñ. We hamesha jágte ; muḡaddason ke liye jál aur phande ḡálte haiñ ; aur cháhte, ki unheñ giriftár karke barbád karen. Shaitán niháyat k̤hush hotá hai, jab dekhtá, ki koí imándár gunáh meñ partá ; kyúñki us ká dil kina aur hasad se b̤harpúr hai ; aur sadá wuh hamárá barbádi ḡhúnḡhtá hai. Waqt ba waqt sharír ádmí us kí taraf se áte haiñ, aur hamárá burái karne ke k̤hwáhán hote haiñ. Hamáre bad ho jáne ke liye us ke mutálib bahutere aur bahut tarah ke haiñ. Is sabab se bár bár ham jahannam ke k̤hatron meñ parte haiñ.

Par agar Masíh ke wasile se ham K̤hudá meñ panáh leweñ, wuh hamárá maqdis hogá. Jo ham us se mahabbat rakheñ, wuh “Hamára chaṭán, hamára garh, hamára chhuránewálá, hamára K̤hudá, hamára patthar, jis par hamára tawakkul hogá, hamári ḡhál, hamári naját ká singh, hamára únchá turj hogá.” Zab. 18 : 2. Dindár bhí áfaton aur musibaton meñ parte haiñ, aur tarah ba tarah taklíf páte haiñ ; lekin har halat meñ “Yahowáh ká nám ek bará burj hai, jis meñ sádiq daurte haiñ, aur amn meñ rahte haiñ.” Amsál. 18 : 10. Dunvá meñ kadhi garib aur láchár ho játe haiñ, un ke mál asbab kho'ját haiñ, un kí daulat uḡáb kí mánind apne liye par banáke ásmán kí taraf ur játi hai, yá un ke má báp, bhái bahin, larke bále bimár hote, yá mar játe haiñ. Aisí hálaton meñ K̤hudá

par tawakkul karná achchhá hai; kyúnkí wuhí sabhon ke liye maqdis hai, jo us ke pás áte, aur us ká bharosá rakhte hai.

Is bayán se malúm hotá hai, ki Kḥudá kaisá qádir hai, kaisá mihroán; ki us kí sárí sífateṅ kaisí kámil aur bharosá ke láiq hai.

Phir, ki Alláh se alag insán kaisá bemadad aur láchár hai.

Phir, kalám Ulláh kaisá besh-qímat hai, jis se ham malúm karte hai, ki muflis ko kahán se madad mil saktí hai. Us besh-qímat kitáb ko ham apní chhátí par bandheṅ, apní gardan ká tauq banáweṅ, aur use apne dil kí takhti par liheṅ. Har waqt wuh ham ko batáwegí, ki kahán se tasallí hásil kareṅ, aur kaun ham ko dushmanoṅ se riháí degá. Mubárák haiṅ we sab, jin kí panáh Kḥudá hai; Kḥushá hál hamesha tak hongé we sab, jin kí maqdis Alláh hai. Ai parḥnewále ! Yih nekbakhtí teri howe !

XXII.

RUHANI BAZAR KI BABAT.

REV. P. HERNLE KI TASNÍF.

Áo, ai sab piyáso, pání pás áo, aur jin ke pás naqdí na ho, áo, mol lo, aur kháo; sharáb aur dúdh beqímat aur berupae mol lo.—Yas. 55 : 1.

Ái mere ázizo, ye báteṅ Yasaiyáh nabí kí haiṅ; us ne Kḥudá Taálá kí taraf se nabí, aur manádí karnewálá home yúṅ kahte húe logon ko Kḥudá ke pás buláyá, ki Ái logo, áo, idhar áo, mol lo, aur kháo; áo, sharáb aur dúdh beqímat aur rupae mol lo. So Yasaiyáh nabí rúhání saudágar húa; kyúnkí saudagar ke muwáfiq hamen ek bázár men le jáke apná mál dikhlátá, aur us kí taríf kartá hai, táki us ko mol le ne ke wáste hamen targíb dewe. Lekin wuh bázár dunyawí nahín, balki rúhání hai; phir us ká mál is dunyá ká nahín, balki Kḥudá ká, aur ásmání bádsháhat ká hai.

Áj Kḥudá ke fazl se us rúhání bázár ko tumháre áge kholke us kí nisbat tín báteṅ bayán kiyá cháhtá hún.

I. Us ikhtiláf ke bayán men, jo us rúhání aur sab dunyawí bázaron ke darmiyán wáqi hai.

II. Us mál ke bayán men, jo us rúhání bázár men miltá hai.

III. Is bayán men, ki ham us rúhání mál par kyúncar qábiz ho sakte haiṅ.

I. Suno, ai piyāro, jaisā ki duniyāwī, yaṇe ādmīon ke bāzār haiṁ, waisā hī ek rūhānī, yaṇe Ḳhudā kā bāzār bhī hai. Lekin in donoṁ ke darmiyān barā farq hai, jo Ḳhud bāzār kī nisbat, aur us ke māl, aur ādmīon ke kharid o faroḳht karne se maḷūm hotā hai; kyūnki ādmīon kā bāzār bilkull gunāh kā makān hai, jo har tarah kī burāī, aur nāpā-kī, lālach, aur behūda bāthchī, gālī, aur jhūṭhī bātoṁ, chorī, aur fareb o maḳr se bharā hai; aur jo koī is bāt ko bāwar na kare, us ko zurūr hai, ki thoṛī der kisī bāzār meṁ jāwe, aur apnī ānkheṁ kholke pahle Ḳhudā ke das hukmon ke maṇe soche, aur piche dekhle, ki ādmī us bāzār meṁ kyā kyā karte, kyā kyā bolte haiṁ; tab us ko jaldī se maḷūm ho jāegā, ki jaisā ki ham ne kahā, ādmīon kā bāzār gunāh kā makān hai.

Wuh bāzār, jo Yaṣāiyāh nabī apnī kitāb meṁ hamāre āge kholdā hai, aisā nahīṁ hai, balki bilkull dūsri tarah kā hai. Wuh rūhānī aur Ḳhudā kā bāzār hai, jo zulm, aur burāī, aur gunāh se nahīn, balki bhalāī, aur rāstbāzī, aur nekī, aur mihrbānī, aur rahmat, aur mahabbat se bharā hai. Lālach, aur fareb, aur jhūṭh, aur chorī us se dūr hai; isī sabab se wuh rūhānī bāzār ādmīon ke bāzaron par kullī bartarī aur fauqiyat rakhtā hai.

Aur jaisā bāzār, waisā hī us kā māl aur kharid o faroḳht karnā. Pas, jo kuchh ādmī āpas meṁ bechte mol lete haiṁ, kyā sonā, kyā rūpā, kyā billaur, kyā motī, sab ke sab fānī haiṁ; kyūnki duniyā aur us kī sab chīzeṁ guzartī chālī jātī haiṁ; sab ghās ke muwāfiq haiṁ, jo āj hari hai, kal murjhāegī; āj naī hai, kal purānī; āj achchhi hai, kal kharāb; kyūnki jo duniyā kā hai, so duniyā ke muwāfiq hai; aur duniyā bāqī nahīṁ, balki fānī hai. Is liye Iṣā Masih ne farmāyā hai, ki Māl apne wāste zamīn par jamā na karo; ki wahān kīrā aur zang kharāb kartā hai, aur chor churāte haiṁ; balki āsmān par apne liye māl jamā karo, jahān na kīrā, aur na zang kharāb kartā, aur na chor le jātā hai; kyūnki jis jagah tumhārā māl ho, tumhārā dil bhī wahīn lagā rahegā.

Par agarchi wuh māl, jo ādmī āpas meṁ kharid o faroḳht karte haiṁ, fānī hai, aur kharāb ho jātā hai, tau bhī log kabhī kabhī us par bahut dām lagāke, bahut se rupae dete, aur lete haiṁ; aur use binā rupae paise bāzār meṁ koī nahīṁ pā saktā. Ādmīon ke bāzaron meṁ naqdī zurūr hai, aur banyā jitnā ziyāda rupae letā, aur apne pās jamā kartā hai, utnā hī ziyāda Ḳhush hotā hai; par kabhī rāzī nahīṁ hotā, aur bagair paise kisī ko kuchh nahīṁ detā. Is liye duniyā ke bāzaron meṁ aksar sirf daulatmand aur mālدار ādmī, jin ke pās bahut rupayā hai, apnā kām, aur beohār, aur saudāgari kar sakte haiṁ, lekin kangāl aur garib lāchār rahte haiṁ.

Dekho, jo māl ādmī duniyā ke bāzaron meṁ kharid o faroḳht karte haiṁ, aisāhī hai; lekin jo māl Ḳhudā ke, yaṇe us rūhānī bāzār meṁ diyā liyā jātā hai, bilkull dūsri tarah kā, aur duniyā ke māl se nihāyat bihtar hai; kyūnki wuh fānī nahīṁ, balki bāqī hai; jismānī nahīṁ, balki rūhānī hai; duniyāwī nahīṁ, balki āsmānī; badan ke wāste nahīṁ, balki jān o dil aur rūh ke liye hai; aur do ek din kā, yā baras do baras kā nahīṁ, balki qadīmī hai; yaṇe, hamesha tak rahtā hai; kyūnki Ḳhudā se aur āsmān se hai; aur jo Ḳhudā detā hai, so albatta

bahut achchhá, aur khúbsúrat aur fáidamand hai. Aur agarchi wuh mál, jo Khudá ke bázár meñ miltá hai, ádmí aur dunyá ke mál se bahut achchhá, aur bhalá aur muft hai, tau bhí muft meñ, oiná daulat, biná rupae, biná paise diyá játá hai; jaisá ki Yasaiyáh nabí kahtá hai, ki Are áo, jin ke pás naqdí na ho; áo, aur mol lo, aur kháo; sharáb aur dúdh beqímat aur berupae mol lo. Isi sabab se har ek ádmí is bázár meñ áke beohár kar saktá hai. Kyá daulatmand, kyá kangál, kyá bará ádmí, kyá chhotá, khwáh us ke pás naqdí ho, khwáh na ho, har ek kaisá hi muhtáj ho, is rúhání bázár meñ apní rúhání zurúriyát pá saktá hai.

II. Dekho, ai mere bháío, Khudá ká bázár aisá hí hai. Kyá yih achchhá bázár nahíñ hai? Hái, bahut achchhá bázár hai, khásskar kangálon ke wáste; aur jo us meñ yih dastúr hai, ki sab ko har kuchh muft meñ diyá játá hai, to khíyál átá hai, ki bahut se bahut ádmí, balki sab ke sab is bázár meñ kharid o farokht karne, aur apní zurúriyát páne ke liye áwenge. Suno, jo aisá bázár ho, jis meñ sab kuchh bahut sastá bheke, to kyá sab ádmí waháñ na jáenge? Hái, jáenge, yaháñ tak ki wuh bázár ádmíon se bhar jáegá, aur din ráat bhará rahéga, balki sab kí, jo waháñ jamá hote haiñ, us meñ samáí na hogí. Ab dekho, Yasaiyáh nabí hameñ ek aisá bázár batátá hai, jis meñ har kuchh na faqat bahut sastá, balki muft miltá hai. Waháñ rúpe paise nahíñ lagte haiñ, balki nabí pukárke kahtá hai, Jis ke pás naqdí na ho, so yaháñ áke mol le. Pas, kyá bahut log us bázár meñ kharid o farokht karne ke liye ekatthe hote haiñ? Nahíñ, afsos! bahut ádmí nahíñ, balki thore thore áte haiñ. Kyúñ? Is liye, ki us bázár ká mál rúhání hai, lekin ádmí jismán, aur khákí, aur bure, aur gunahgár haiñ; aur us mál ki barí qímat ko nahíñ pahchánte; aur is liye, ki us ko nahíñ pahchánte, use baqír jánke nahíñ mángte haiñ.

Pas, us bázár meñ kyá mál hai? Yasaiyáh nabí kahtá hai, ki Sharáb aur dúdh hai. Is ke kyá máne? Dúdh ke máne muqaddas injil aur us ki khushkhabarí ho sakti hai, jaisá ki Púlús hawári ne kahá hai, ki “Dúdh tum ko piláyá;” yane, manádi karke tum ko injil síah í, aur us kí achchhí aur míthí khabar dí hai; aur sharáb ísá Masíh ke lahú se murád ho saktí hai, jise us ne apní barí mihrbání se hamáre naját ke wáste baháyá, aur jis ko ham log ashá í Rabbání meñ rúhání taur par píte haiñ, táki us kí maut kí yádgáre kareñ, aur apne gunáhoñ se muáfí páweñ. So in do chizon par sab kuchh shámil hai, jo hamáre naját aur hamesha kí zindagí ke wáste ‘darkár hai; yane, ímán, tauba, gunáhoñ kí muáfí, Khudá se miláp, dil ká árám, hayát í abádí kí ummed, zindagí meñ khushi, bimáre meñ sabr, maut meñ tasallí, marne ke píchhe ásmán kí khushi, aur abádí neabakhtí, wagaira.

III. Suno, ai piyáro; yih sab achchhí chízeñ, jo fání nahíñ, balki baqí, aur sone, aur rúpe, aur motí, aur billaur, aur sári dunyá ke mál aur rupae se bahut achchhí haiñ, us rúhání bázár meñ tayár haiñ. Yih sab chízeñ har ek ádmí ko zurúr haiñ; kyúñki jo un ko qabze meñ láwe, us ká hál achchhá hogá;—wuh naját páwegá. Lekin jo un ko apná na kare, wuh kabhí naját nahíñ pá saktá; balki wuh us

shakhs kī mánind hogá, jo shádí ká libás pahine bagair áyá, aur báhar us andhere mein dálá gayá, jahán roná, aur dáut kirbíráná hogá. Is liye dil se púchh pá aur daryáft karná cháhiye, ki ham log kyun kar un chizon ko, jo K̤hudá ke bázár mein miltí haiñ, qabze mein láweñ ? Itná to ham sun chuke haiñ, ki un ke mol lene ke liye rupae aur paisa zurúr nahíñ; is liye ki K̤hudá ke bázár mein sab kuchh muft baḡhsá jātá hai. Aur jo ham láchár bandoñ ko dená aur karná munásib hai, so faqat yih hai, ki duá mángeñ, aur árzu rakheñ, aur imán aur mátam-díli ke sáth áweñ. Sust na raheñ, laháná na kareñ; balki áweñ, jaldí áweñ; dil se mángeñ; aur jo jo ham ko mile, us ko ḡhushi se qabúl kareñ, aur K̤hudá ká shukr kareñ. Jo koí imán látá, so patá hai.

Suno, ai piyáro; main bhí K̤hudá ke kalám ká ḡhidmat-guzár hoke áj apní rúhání dúkán, yane K̤hudá kī muqaddas kitáb ko tumháre áge kholtá, us ka qímatí mál tumheñ diḡhlátá, aur us ke iḡhtiyár karne ke liye us kī taríf kartá húa; aur jo us mein sab aur bátoñ se ziyáda besh-qímat aur maḡtúl hai, so yihí khabar hai, jo tum ko aksar dí gai, aur ab dí jātí hai, ki Isá Masih autár leke is dunyá mein áyá, aur apná la-hú baháyá, aur mar gayá, aur phir jí uthá, aur ásmán par gayá; táki jo koí us par imán láwe, halák na howe, balki hayát i abadí páwe. Háiñ, asl motí yih sachchí aur maḡbúl bát hai, ki Isá Masih is liye dunyá mein áyá, ki gunahgároñ ko bacháwe.

Pas, ai piyáro, is dunyá kī fání chizon se munh pherke idhar áo; in achchhí bátoñ ko, jo muqaddas kitáb mein haiñ, gaur se dekho; unheñ iḡhtiyár karo, aur mol lo. Sab kuchh tumháre wáste taiyár kiyá gayá hai. Kyunki Rahim-ur-rahmán K̤huda tumheñ piyár kartá, aur nahíñ cháhtá hai, ki koí tum mein se rúhání kangál hoke halák ho jáwe; balki yih cháhtá hai, ki har ek Isá Masih ke wasile naját páke sachchá daulatmand aur haqiqí nekbaḡht howe. Aur K̤hudá tumháre rupae paise bhí nahíñ cháhtá, balki apná besh-qímat mál muft detá hai; táki har ek, jo kaisá hī kangál aur láchár ho, áke apní zurúriyát pá sake; so áo, ai sab garíbo, mol lo, aur daulatmand ho; aur ai daulatmando, tum bhí áo, mol lo, aur mat kaho, ki ham kisí chiz ke muhtáj nahíñ; kyunki is dúkán mein aisí chizeñ maujúd haiñ, jo tumhári daulat se bahut bihtar haiñ, aur tum bhí un ke muhtáj ho. Sach máno, ki har ek daulatmand, jo K̤hudá aur us ke kalám ká talib na ho, sach much garíb aur láchár hai; par jo imán kī ráh se K̤hudá kī bádsháhat ká sharik húa, wuh yaqínan daulatmand hai. Pas, áo, ai sab piyáso, páni pás; aur jin ke pás naqdí na ho, áo, mol lo, aur kháo; beḡimat berupae mol lo.

XXIII.

RUHANI LARAI KI BABAT.

REV. P. HERNLE KI TASNI'F.

Imán kí achchhí laráí kar ; hayát i abadí le le, jis ke liye tú buláyá gayá.—1 Tim. 6 : 12.

AI mere azizo, yih nasihat Púlús hawáí ne apne piyáre shágird Timtáus ko kí hai. Wuh K̄hudá kí bát ká k̄hidmat-guzár hoke is nasihat ká bará muhtáj thá ; kyúunki jo K̄hudá kí bát sikhlátá hai, us ká kám yih hai, ki us hamesha kí zindagí kí manadí kare, jis ká wada sachche K̄hudá ne ibtidá i álam se ádmion kí bábat kiyá hai, aur Ísá Masíh kí jagah men ádmion ko naját páne ke wáste buláwe, aur hayát i abadí men sharík hone ke liye un kí madad aur dildáí kare ; par jo us ne ap naját aur zindagí na pái ho, to is kám ko kyúnkar púr-á kar sakegá ? Aur jab tak k̄hud Ísá Masíh ká sachchá shágird na húa ho, kis tarah auron ko sikhláwegá ? Kis tarah un ko buláke kahegá, ki Áo, Ísá par imán láo, aur us kí pairaui karo ? So zurúr hai, ki pahle wuh ap imán láke Ísá Masíh ke wasíle se hamesha kí zindagí le le, aur us ke bad apne parosion ko buláke K̄hudá kí bát aur naját kí ráh un ko sikhláwe ; nahíu, to wuh andhá rahnumá hai ; aur ham log jánte hain, ki jo andhá andhe ko le jáwe, to donon garhe men gir parenge.

Lekin is bát ko sach máno, ki Púlús ne yih nasihat na sirf Timtáus ko, aur us kí marifat injil ke siklanewálon, yane qasison ko, balki un sab ko bhí kí hai, jo un kí nigahbání ke supurd hain, yane sab Ísáion ko. Púlús hawáí un men se aur ham logon men se harek ko nasihat karke farmátá hai, ki Tú larke, tú larí, tú mard, tú aurat, imán kí achchhí laráí karke hayát i abadí le le, jis ke liye tú buláyá gayá, aur ab bhí buláyá játá hai.

Púlús kí is achchhí nasihat men tén báton hain, jin ko ham ab K̄hudá kí madad se daryáft aur bayán karenge.

I. Imán kí achchhí laráí kar.

II. Hayát i abadi le le.

III. Jis ke liye tú buláyá gayá.

I. *Imán kí achchhí laráí kar.* In báton se Púlús hawáí Masíh ke shágirdon ko sipáhion se tashbíh detá hai ; aur jab ham log is bát ko sochte hain, to k̄húb malúm hotá hai, ki sach much Ísáí sipáhi logon kí mánind, hán, rúhání sipáhi hain ; aur jab tak is dunyá men rahte

haiṇ, un ko laṛnā aur *jhagarnā* zurūr hai; aur un kī laṛāī kabhī ākhir na hogī.

Suno, ai piyāro, sipāhī apnā kām nahīṇ kartā, balki ek bare ādmī, yaṇe kisī sardār, yā rājā, yā bādshāh kī k̥hidmat meṇ hoke us kā kām yā naukarī kartā hai. So sipāhī bādshāh kā naukar hai, aur bādshāh se khāne, pīne, aur kapre ke wāste talab, aur laṛne ke wāste hathyār pātā hai; aur bādshāh in sab chīzon ko is murād se detā hai, ki sipāhī zindagānī guzrāne ke wāste fikr na kare, apnī marzī par na chale, sustī na kare, balki hamesha, dīn rāt apnī k̥hidmat meṇ masrūf rahe, aur dil lagāke apne bādshāh kā kām kare; aur us kā kām jo hai, so yih hai, ki mardānagi se apne bādshāh aur watan ke wāste laṛāī kare; hāṇ, sipāhī logon ko munāsib hai, ki bādshāh ke sāth jhande ke niche apnī jān deke, aur jo zurūr ho, to apnā laḥū bahāke maut tak apne bādshāh aur mula ke dushmanon se, jo un ke dushman bhī haiṇ, laṛā kare.

Dekho, ai piyāro, sipāhī kā hāl aur kām aisā hai; aur Isā Masīh kā shāgird rūhānī bāton meṇ us ke barābar hai. Wuh rūhānī sipāhī hai; us kā k̥hawind mālīk sab bādshāhon kā Bādshāh, rajāon kā Rājā, amīron kā Amīr hai; kyūnki us kā K̥hudāwand Isā Masīh āsmān o zamīn kā mālīk hai; aur us kā jhandā salīb hai, jis par Isā Masīh, jānī dushman se, jo Shaitān hai, muqābala karne, aur ādmion ko us ke qabze se bachāne ke wāste mar gayā; aur talab, jo rūhānī sipāhī pātā hai, so sab barakateṇ, aur faṛ, aur maṇatēṇ haiṇ, jo Isāī apne K̥hudāwand Isā Masīh ke hāth se roz roz jān o badan ke wāste pāte haiṇ; aur hathyār jo hai, so bandūq, aur pītal kī top, aur lohe kī talwār nahīṇ, balki K̥hudā kā kalām hai; kyūnki Masīh kā shāgird duniyā nahīṇ, balki rūhānī sipāhī hai; so chāhiye ki us kā hathyār bhī rūhānī howe, jaisā ki Afsion ke khatt ke 6 bāb meṇ liṣhā hai. Us maqām meṇ Pūlūs yūṇ farmātā hai, ki “Ai mere bhāio, K̥hudāwand se, aur us kī qudrat se zorāwar bano, K̥hudā ke sāre hathyāron ko bāndho, tāki tum Shaitān kī hīlabāzī ko ḍaḍā kar sako; kyūnki hamēṇ sirf ādmion se nahīṇ, balki Shaitān, aur burī rūhon se laṛāī hai. Is wāste tum log K̥hudā ke sāre hathyār pahīn lo, tāki tum bure dīn muqābala kar sako, aur sab kām karke khare rah sako. Tum apnī kamar sachchāī se kaskār neki kā zira pahīn, aur imān kī ḍhāl lagāke qāim raho, aur najāt kā k̥hod, aur rūh kī talwār, jo K̥hudā kā kalām hai, le lo; aur dil deke har tarah kī ḍuā aur iltimās se har waqt ḍuā māngo; aur hamesha jāgte raho.”

Dekho, ai mere āzizo, yih rūhānī sipāhion, yaṇe Isāī logon kā hathyār hai. Is ko lagāke dil se apne bādshāh Isā Masīh kī k̥hidmat, aur imān kī achchhi laṛāī kiyā chāhiye, tāki ham dushman par gālīb āke najāt pāweṇ. Aur dushman jo haiṇ, so jānī dushman haiṇ; yaṇe, Shaitān, aur us ke sāre shāgird, bure ādmi, Shaitān ke imtihān, duniyā kā lālch, āish o ishrat, dil kī burī k̥hwāhishēṇ, aur hawā o hawas, wagaira—ham sab kā nānā nahīṇ le sakte; kyūnki jānī aur rūhānī dushman behisāb haiṇ. Chāhiye ki Isā Masīh kā shāgird un sab rūhānī dushmanon se k̥hūb laṛāī kare; kyūnki we chāhte haiṇ, ki na sirf badan, balki ādmī kī jān ko bhī māreṇ; yaṇe, sāre ādmion ko jahannam kī us āg meṇ, jo kabhī nahīṇ bujhti, ḍalwā deṇ; aur azbas

ki we jání dushman zoráwar haiñ, to cháhiye ki ham log un se larái karne meñ sustí na kareñ ; aur jab tak ki un par gálib na ho leñ, larái se báz na rahen ; kyúñki jo ham log un ká muqábalá na kareñ, to we hamará kareñge ; aur jo ham log K̤hudá kí madad se un par gálib na howen, to we ham par gálib howenge. Jo kói larái kare, leñin dil deke apní sárí qúwat o qudrat, aur barí mardánagí aur zor se maut tak lar larke fath na páwe, wuh hayát i abadi ká táj bhí na páwegá. Gálib honá, aur ákhir tak sabr karná, aur qáim rahná zurúr hai ; aur jo aisá kare, wuhí naját páwegá.

II. Isí sabab se Púlús hawárí ne faqat yúñ na kahá, ki imán kí larái karo, balki us ne yih bhí kahá, ki *hayát i abadí le lo* ; Yih Isáron kí larái kí murád, aur sabab i ákhir hai. Ham log apní ján kí naját aur hayát i abadí ke wáste Shaitán se larne haiñ. So, ai yáro, áo, achchhí tarah dil o ján se lareñ, táki apne jání dushmanon ko niche karke havát i abadí le leñ. Is ke kyá mane haiñ ? Is ke yih mane haiñ, ki Isá Masih ko qabúl karke us kí pairawí karo ; kyúñki faqat us meñ hayát i abadí hai. Isá Masih ásmán se dunyá meñ áyá, ki gunahgáron ko, jo gunáh ke sabab murde haiñ, zindagí kí ráh dikháwe ; wuh paidá húa, aur apní ján deke, aur apná beshqumat lahú baháke mar gayá, ki ham lácháron ke live hayát i abadí taiyár kare. Isá Masih áyá, aur phir ásmán par gayá, ki ham lácháron ke wáste hayát i abadí ke makánon ko taiyár kare, táki jaisá wuh jitá hai, ham bhí, jo sachchá imán láte haiñ, hamesha tak jien. Kyúñki yun likhá hai, ki Jo kói us par imán láwegá, so hayát i abadí páwegá. Phir Isá Masih áyá, ki apne muataqidoñ ká sardár howe ; kyúñki jis tarah zurúr hai, ki sipáhion ká ek sardár ho, jo un ko larái ke dastúr sikháwe, hukm aur intizám kare, fauj ke sámhne chalke un ko dushmanon par hamla karne ko le jáwe, usí tarah rúhání sipáhion ko sardár cháhiye. Aur un ká sardár Isá Masih hai ; wuh na faqat ham ko le játá, hamáří hidáyat aur dilwári kartá, balki ap hamáre wáste lartá hai. Sach máno, koi ap se ap Shaitán ko niche nahin kar saktá, is live ki wuh bará zoráwar dushman hai, aur us ki burí faujeñ beshumár haiñ ; lekin Isá Masih un se bará zoráwar aur bahádúr hai ; us ke sámhne Shaitán khará ho nahin saktá, balki bhág játá hai.

III. So, ai mere piyáro, Isá Masih ke jhánde ke niche áke us ke sáth Shaitán se larái karo ; us par apná sab bharosá rakho ; us kí madad ke wáste duá mángo, ki wuh tum ko Shaitán, aur sáre jání dushmanon par fath bakhshe. Yih hayát i abadí hai, *jis ke liye ham buláe gae* ; aur ab tak roz roz buláe játe haiñ. Pas, kis tarah buláe játe haiñ ? Jawáb, K̤hudá ne apní barí mihrbáni se pahle ham ko hayát i abadí ke wáste paidá kiya ; aur jab ádmí K̤hudá kí bát na mánke gunahgár húa, aur sazá kí ráh se us ká marná muqarrar húa, tab K̤hudá ne barí mahabbat se wáda kiya, ki qurat kí nasl se Najátdene-wálá paidá hogá, jo maut ká dukh utháke ádmion ko maut se bacháwegá. K̤hudá ne waqt ba waqt dindáron aur nabion ko khará kiya, jionon ne K̤hudá ke ilhám se manádi karke Isá Masih kí khabar di, ki wuh ánewálá hai ; aur ádmion ko imán láne, aur naját meñ sharík

hone ke wāste bulāyā. Hanūk, Nūh, Ibrāhīm aur us ke beṭe, Musā, Dāūd, aur sab nabī, ḵhāsskar Yasaiyāh nabī, yih sab Īsā Masih ke āne kī ḵhabar dete, aur ādmīon ko bulāte the ; aur in sab ke pīchhe jab muqarrar waqt pūrā hūā, Masih āp āyā, aur zindagī, aur najāt lāyā ; jaisā ki likhā hai, ki Us meṇ zindagī thī, aur wuh zindagī ādmīon kī raushnī thī. Aur Īsā Masih ne āp farmāyā, ki rāh, aur haqiqat, aur zindagī main hūṇ ; aur isī zindagī meṇ sharik hone ke wāste us ne ādmīon ko yūn kahne bulāyā, ki “Ai sab logo, idhar mere pās āo, to tum apnī jān kā ārām pāoge.” So jo koī us kī bāt mānke āyā, us ne na sirf ārām, balki hayāt i abadī pāī. Aur jab Masih āsmān par gayā, us ne apne ḥāgirdon ko hukm kiyā, ki ab tum log jāo, aur injīl kī manādī karne ādmīon ko hayāt i abadī ke wāste bulāo ; un ke pīchhe aur dīndār ādmī paidā hoke, bulāyā kie, aur isī tarah dunyā ke shurū se ab tak ādmī zindagī ke wāste bulāe jāte haiṇ, aur āge ko bulāe jāenge. Tum log bhī hayāt i abadī ke wāste bulāe gae, aur āj phir bulāe jāte ho. Ḵhudā āp apne kalām meṇ tum ko bulātā hai, aur main bhī Ḵhudā ke nām se Masih ke iwaz bulātā hūṇ ; so suno, aur māno, yād karo ; āj najāt kā dīn hai ; āj Ḵhudā kī bāt sunke apne dilon ko saḵht mat karo, balki āo, imān kī achchhī larāī karo ; rūhānī talwār, jo Ḵhudā kī bāt hai, ḵhūb lagāo ; Shaitān ko niche karo ; hayāt i abadī le lo, jis ke liye tum sab log Īsā Masih meṇ bulāe gae. Āmīn.

XXIV.

ITWĀR, YĀ SABAT KĪ HIFĀZAT.

REV. J. WILSON KĪ TASNĪF.

“Agar tū roz i sabat se apnā pānw phirāwegā, aur mere muqaddas dīn meṇ apnī ḵhushī karne se ; aur sabat ko roz i ḵhurram, aur Ḵhudāwand kū muqaddas aur mukarram jānegā ; aur us kī takrīm karke apne kāmōn ke karne, aur apnī ḵhushī ke chāhne, aur apnī bāton ke kahne se būz rahegā ; tab tū Ḵhudāwand meṇ m srūr hogā ; aur main tujhe zamīn ke ūnche makānon par urūj bakhshūngā, aur Yaqūb tere bāp kī mīrās tujhe khilāūngā ; ki Ḵhudāwand hī ke muṇh ne yih farmāyā hai.”—Yas. 58 : 13, 14.

PAIDA'ISH ke dūsre bāb meṇ likhā hai, ki “Ḵhudā ne sātweṇ dīn apne sāre kām se, jo kartā thā, ārām kiyā. Aur Ḵhudā ne sātweṇ dīn ko mubārak kiyā, aur use muqaddas ṭhaharāyā, is liye ki us ne usī dīn apne sab kām se, jo us ne kiyā, aur banāyā thā, ārām kiyā.” Is se murād nahīn hai, ki Ḵhudā apnī sārī mihnaton se thakā aur mānda hokar

árám-talab húa. Kyúinki wuh “ aqsá i zamín ká paidá karnewálá hai, wuh thaktá nahín, aur mánda nahín ho játá ; wuh thake húon ko zor bakhshatá hai, aur nátawánon kí tawánái barhátá hai.” Yas. 40 ; 28. K̲hudá ne faqat kahne se sab kuchh paidá kiyá. “ Us ne kahá, aur ho gayá ; us ne farmáyá, aur qáim húa.” Zab. 33 : 9. Aur jo cháhtá, to saikaron aur jahánon ko, un kí sári mamúrí samet, ek bát kahne se paidá kar saktá, tau bhí kuchh mánda na hotá. Insán, kamzor aur zaíf insán kí k̲hátir thí, kí Rabb ul álamín ne árám kiyá. Wuh jántá thá, kí baní ádam is dunyá kí mihnát aur musibatón meñ mánde, aur thake, aur zerbár, aur zaíf, aur árám ke muhtáj howenge. Wuh jántá thá, kí baní ádam zaíf i aql, aur qásir ul ilm, aur tarbiyat ke hájat-mand honge. Isí liye us ne insán ke aiyám meñ ek sátwáñ hissa árám aur tarbiyat i Iláhí ke liye alag thahráyá, aur áp us árám ká ek namú-na diyá.

Us din se leke áj ke din tak, jahán kahín, aur jab kabhí, kisé mulk vá zamáne meñ, baní ádam ne bamújib i hukm K̲hudá ke us árám kí hifázat kí hai, unhoñ ne ilm, aur irfán, aur sihat, aur tarbiyat, aur khush akhláqí, aur diyánatdári meñ taraqqí kí hai. Lekin un sab mulkon meñ, jahán jahán sabat i muqaddas kí hifázat haqír jání gáí, yá farámosh kí gáí hai tahán baní ádam jahálat aur zillat meñ par gae haiñ ; aur ilm aur irfán ghaṭ gae haiñ—khush akhláqí aur nek chálí bigar gáíñ, aur zail húañ, yaháñ tak kí insán jahálat aur zalálat meñ haiwánon kí mánind ho gayá hai. Ittilá kam hai, kí zamán i Ádam se leke Músá ke waqt tak unhoñ ne sabat kí kis qadr yád rakhí, aur us kí hifázat kí. Lekin imá aur alámaton se, jo háth átí haiñ, malúm hotá, kí we aksar sabat se gáfil rahe. Kyúinki likhá hai, kí “ K̲hudá ne zamín par nazar kí, aur dekhá kí wuh bigar gáí ; kyúinki har ek bashar ne apní taríq ko zamín par bigará thá.” Paid 6 : 12. Aur aisí harkat aur qatáhat hargiz waqú meñ na átí, jahán baní Ádam aksar sabat kí yád ko hifz karte. Par jahán jahán koí gharáná, yá gáñw, kí jis meñ sabat kí hifázat barqarár rahí, tahán “ Núr i K̲hudá un ke sir par chamaktá, aur we us ke chihre kí roshní meñ chalte the.”

Músá ke waqt meñ jab K̲hudá ne das hukmon ko baní Ádam ke wáste farmáyá, tab chauthé hukm ko auron se dústre taur par farmáyá, kí “ Tú roz i sabat ko muqaddas jánke yád rakhiyo : chhah din tak tú mihnát karke apne sáre kám káj kar, lekin sátwáñ din K̲hudáwand tere K̲hudá ká sabat hai ; us meñ kuchh kám na karná, na tú, na terá beṭá, na teri beṭí, na naukár chákar nar o nári, aur na mawáshí, na mihmán, jo tere phátakon ke andar ho ; kyúinki K̲hudáwand ne chhah din meñ ásmán, aur zamín, aur daryá, aur sab kuchh jo un meñ haiñ, banáyá, aur sátwon din meñ árám kiyá. Is liye K̲hudá ne sabat ke din par duá kí, aur use muqaddas thahráyá.”

Is se záhír hotá hai, kí baní Isráíl áge se Itwár ke hukm se wáqif the, aur us waqt sirf ihtiyáj rakhte the, kí us ke haqq meñ yád diláe jáen.

Phir K̲hurúj ke 16 báb meñ, das hukmon ke d-ne se áge, likhá hai, kí “ K̲hudáwand ne Músá se kahá, kí Dekh, main ásmán se tumháre liye roṭí barsáúngá : ye log har roz nikalke jítná ek hí din ke liye kifáyat kare, har ek din samet liyá karen. Aur yún hogá, kí chhaṭhe din we

jole áwenge, so pakáwenge; to wuh jituá ki roz marra jama hotá thá, us ká dúná ho jáegá. Aur yún húá, ki chhathe din unhoṇ ne roṭí se dúná jama kíṇ, do do umar ek ek ke liye. Aur jamáat ke sardáron ne áne Músá ko khabar dí. Us ne unheṇ kahá, ki Yih wuhí hai, jo Kḥudáwand ne kahá thá, kal ká din Kḥudáwand ká sabat i muqaddas hai; jo tumheṇ pakáná ho, paká lo, aur jo ubálná ho, ubál lo; aur jo bach rahe, so apne liye subh tak mahfúz raho. Chunánchi unhoṇ ne, jaisá Músá ne kahá thá, subh tak ranne diyá; wuh na sará, na us meṇ kíre pare. Aur Músá ne kahá, ki Use *áj kháo*, kyúñki áj Kḥudáwand ká sabat hai; áj tum maidán meṇ na páoge. Chha din tak tum use jama karoge, par sátwen din, jo *sabat* hai, kúchh na páoge.” Yún maḷúm hotá hai, ki we das hukmon ke dene ke áge sabat ki hifázat aur taqdis se wáqif the. Phir sahífa i Gintí meṇ (15 : 32—36) hai, ki “Jab baní Isráíl bayábán meṇ the, unhoṇ ne ek shaḥs ko dekhá, jo *sabat ke din* lakrián jama kartá thá. Tab we us ko, jo lakrián jama kar rahá thá, pakarke Músá aur Ilárún aur sári jamáat ke pas láe. Unhoṇ ne use qaid meṇ dālá; kyúñki un se bayán nahín kiyá gayá thá, ki us se kyá kiyá jáwe. Tab Kḥudáwand ne Músá ko farmáyá, ki Yih shaḥs már dālá jáwe; sári jamáat kḥímagáh ke báhar us par pathráo kare. Chunánchi sári jamáat use kḥímagáh ke báhar le gai, aur use sangsár kiyá, ki wuh mar gayá, jaisá Kḥudáwand ne Músá ko farmáyá thá.” Phir zamán i Músá se pandrah sau baras baḍ, Masíh ke waqt meṇ, jab we qaríb chár sau baras ke arse tak kisí nabí kí hidáyat se benasíb ho rahe the, Farísí log Masíh ke shágirdon par khafa hue, is liye, ki we “sabat ke din meṇ kheton se guzarkar báleg tor apne háthon se malkar kháne lage.” Lúká, 6 : 1. In sab báton se maḷúm aur sábit hai, ki we kis qadr sabat kí hifázat aur taqaddus se wáqif aur mutafakkir the.

Un zamánon meṇ, jo Músá se Masíh tak guzre, kabhí kabhí aisá húá, ki un par sháhán i aubásh saltanat karte the, aur badmásh aur zarparast káhinon ne un kí hidáyat kí; tab butparastí mulk meṇ dá-khil húi, aur sab káhin phailí aur apne zahr ko kháss o ámm kí tabíat meṇ tásir dí. Tab sabat i muqaddas ghaṭatí aur be riwájí meṇ pará. Kḥudá ne un ke pás bhárá bhárá paigám aur nasíhaten bhejí, aur bár bár us ke báb meṇ unheṇ chitáyá aur jatáyá, aur us ghaṭatí aur behukmí ke anjám kí khabar un ko dí.

Músá jitá hí thá, jab Kḥudá ne hifázat i sabat ke báb meṇ unheṇ yún jatáyá, “Tum apne liye *but* na banáyo, aur na múraten taráshí hún, aur na maḥbúd khará karo, aur na apne liye pathhar kí taswír apní zamín par qáim karo, ki us ke áge síjda karo; is liye ki main Kḥudáwand tumhárá Kḥudá hún. Tum mere SABATON kí muháfazat karo, aur mere maqdis se daro; main KḤUDA WAND HÚ.” Aur agar tum merí na sunoge, aur mere bar-khiláf chaloge, to main tumháre sáth mukhálifat se gazab par chalúngá, aur main bhi tumháre gunáhon ke báis tum ko sáť bár sazá dúngá. Aur tum apne beṭon ká, aur apní beṭon ká gosht kháoge. Aur main tumhárá únchí jagahon ko dhá dúngá, aur tumháre maḥbúdon ko kharáb karúngá, aur tumhárá lásheṇ tumháre buton kí lásheṇ par phenkúngá, aur kḥud main tum se nafrat karúngá. Aur tumháre shahron ko wirán karúngá, aur tum-

háre maqdison ko ujár dúngá, aur main tum se khushnúdí kí bú qabúl na karúngá. Aur main tumhári zamín ko ujárúngá; aur tumháre dushman, jo wahán rahte hai, us se hairán hongé; aur main tumhen gair qaumon mein paráganda karúngá, aur tum par pichhe se talwár chalaúngá, aur tumhári zamín ujár hogí, aur tumháre shahr wíran. Zamín apne sáre wíran rahne kí muddat mein, jab tum dushmanon ke shahron mein hoge, SABATON kí ráhat páwegí. Tab zamín áram karegí, aur apne *sabaton* ko adá karegí. Aur zamín apní sári wíráni kí muddat mein áram karegí, kyúinki jab tum us par búdobásh karte the tumháre sabaton mein áram nahín páyá.” Aur un ke zamánon kí gardish mein Khudá ne in sab waḍo aur waḍon ko áin sihat aur sachcháí se un par púra kiyá, jab jab we us kí sunnaton ko bhúlkar sabat kí hifázat se báz áe the.

Tawárikh ke dúsre sahífe mein, qarib ek hazár baras Músá ke bad, un ke ahwál mein yún likhá hai, kí “ Káhin aur logon ke sardár bhí gair qaumon ke sáre nafratí kámon kí mánind badkáríán kiyá karte the, aur unhon ne Khudáwand ke ghar ko, jo us ne Aurshalím mein muqaddas thahráyá thá, nápak kiyá. Aur Khudáwand un ke bápádádon ke Khudá ne apne rasúlon kí marifat se un ke pás paigám bheje, balki subh sawere se bhejá kiyá, kí apne logon ko, aur apne maskan ko bachá rakhe. Lekin unhon ne Khudá ke paigambaron ko thañthon mein uráyá, aur un kí báton ko náchíz jáná, aur us ke nahíon se hansá kiye, yahán tak, kí Khudáwand ne apná gazab apne logon par názil kiyá, kí chára na rahá. Tab wuh Kasdíon ke bádsháh ko un par charhá láyá; us ne un ke maqdis hí mein un ke jawánon ko talwár se már dálá, aur kunwáron, aur kunwáron par, aur búrhon, aur burhíon par rahm na kiyá; Khudá ne sab kuchh us ke háth mein kar diyá. Aur wuh Khudá ke ghar ke sáre chhoṭe bare básanon ko, aur Khudáwand ke ghar ke khazáne ko, aur bádsháh ke aur us ke sardáron ke khazáne ko sab ke sab Bábul ko le gayá. Aur unhon ne Khudá ke ghar ko jalá diyá, aur Aurshalím kí díwár ko dhá diyá, aur us ke sáre mahallon ko ág se jalá diyá, aur sári qímatí chízon ko barbád kiyá. Aur wuh unhen, jo talwár se bache, Bábul ko asíri mein le gayá, aur wahán we us ke, aur us ke beṭon ke gulám Fársíon ke musallit hone tak rahe. Táki Khudáwand ká kalám, jo Yaramiyáh ke munh se kahá gayá thá, púra howe, jab tak us zamín ne *apne SABATON ko adá na kiyá*. Kyúinki *jítne din wuh ujár parí, wuh sabat kartí thí*, jab tak sattar baras púre hue.” 2 Tawárikh 36 : 14—21.

Is se malúm hotá hai, kí qarib chár sau nauve baras ke wuh tamám qaum Khudáwand ke thaharáe hue sabaton se gáfil rahí thí. Aur us ghaflatí aur be hukmí ke badle Khudá ne un ko sattar baras tak sakht asíri mein bhejá. Lekin sattar baras kí asíri mein, jahán butparaston ne un par ámal kiyá, aur *sabat* kí barakatein un par názil na hún, aur un ká watan ujár pará rahá, aur haikal í muqaddas wíráni aur behurmatí mein rahí, aur maqbare un ke bápádádon ke gairon se latáre gae, un ko fursat húi, kí apní ráhon par, aur Khudáwand ke sabaton par jin kí unhon ne tahqír kí thí, dhýán karen. Un kí asíri ke áge Khudá ne bahut cháhá, kí unhen bacháwe, aur hosh mein láwe, us se áge, kí nácháragí pare. Yasaiyáh nabí kí marifat se us ne bár bár is tarah kí

dilásá denewálí báten un ke pás bhejín : “ Agar tú sabat se apná pánw phiráwegá, aur mere muqaddas din meñ apní khushí karne se ; aur sabat ko khurramí jánegá ; aur us kí takrím karke *apne* kámoñ ke karne, aur apní khushí ke cháhne, aur *apní* báton ke kahne se báz rahégá ; tab tú Khudáwand meñ masrúr hogá ; aur main tujhe zamín ke únche makánoñ par urúj karáúngá, aur Yaqúb tere báp kí mirás se tujhe khiláúngá.” Aur “ Mubáarak wuh insán, jo yih kartá hai, aur wuh ádamzád, jo us meñ lagá rahtá hai, jo SABAT ko mántá, aur use ná-pák nahín kartá, aur apná háth sári badkárí se báz rakhtá hai.”

Phir, us ne Yaramiyáh nabí kí mañifat is tarah ke paigám un ke pás bheje, ki “ Já, aur merí qaum ke beñon ke pháñak par, jis meñ se Yahúdáh ke bádsháh áyá jáyá karte haiñ, aur Aurshalím ke sab pháñakoñ par khará ho ; aur un se kah, ki Ai Yahúdáh ke bádsháh, aur sab Yahúdáh aur Aurshalím ke báshinde, jo in pháñakoñ se guzarte ho ! Khudáwand ká kalám suno. Khudáwand yúñ farmátá hai, Tum áp se chaukas raho, aur *sabat* ke din bojh na uñháó, aur Aurshalím ke pháñakoñ se mat láó ; aur tum *sabat* ke din apne ghar se bojh mat le jáó, aur kisí tarah ká kám na karo, balki *sabat* ke din ko muqaddas jáno, jaisá main ne tumháre bápádóñ ko farmáyá.” “ Aur aisá hogá, ki agar tum filhaqíqat merí suno, Khudáwand kahtá hai, aur *sabat* ke din is shahr ke pháñakoñ se bojh na láó, balki *sabat* ke din ko muqaddas jáno, yaháñ tak ki us meñ kuchh kám na karo ; to is shahr ke pháñakoñ se bádsháh aur sardár dákhil honge, jo Dáúd ke tañht par julús karenge ; we aur un ke sardár, Yahúdáh ke log, aur Aurshalím ke báshinde rathoñ, aur ghoron par sawár honge ; aur yih shahr hamesha tak ábád rahégá.” “ Lekin, agar tum meri na sunoge, ki *salat* ke din ko muqaddas jáno, aur *sabat* ke din Aurshalím ke pháñakoñ se bojh leke dákhil na ho ; to main us ke pháñakoñ meñ ág lagáúngá, jo Aurshalím ke mahalloñ ko khá jáégí, aur na bujhegí.” Yaramiyáh, 17 : 19—27. Lekin yih sab un ke wáste mufid na húa. “ Unhon ne na suná, na kán lagáyá, balki apní gardan ko sañht kiyá, ki na sunen, aur nasíhat qabúl na karen.”

Phir, bad un kí asírí ke, jab Aurshalím phir ábád húa, Nahamiyáh nabí Khudáwand kí taraf se un ko jatátá rahá. Us ke sahífe meñ yún likhá hai, “ Un dinoñ meñ main ne kitnoñ ko dekhá, jo *sabat* ke din kolhú raundte, aur púle laute, aur gadhe ládte, aur *sabat* ko bhí sharáb aur angúr, aur anjir, aur sáre bojh Aurshalím meñ láte the. Aur jis din we kháne kí chizen bechte the, main ne unheñ nasíhat dí. Us meñ Súr ke log bhí baste the, jo *sabat* ke din machhli aur ñar tarah ká mál láke Yahúdáh aur Aurshalím ke logoñ ke háth bechte the. Tab main ne Yahúdáh ke sharíf logoñ se takrár karke kahá, Yih kyá burá kám hai, jo tum karte ho, ki *sabat* ke din ko muqaddas nahín jánte ho ? Kyá tumháre bápádóñ ne aisá nahín kiyá, aur hamará Khudá ham par, aur is shahr par, yih sári burái nahín láyá ? Tad bhí *sabat* ke din ko nápák karke Isráíl par ziyáda gazab bharkáte ho ? Phir yúñ húa, ki *sabat* se áge, jab Aurshalím ke pháñak andhere hone lage, tab main ne pháñakoñ ke band karne ká hukm diyá, ki jab tak *sabat* na bíte, tab tak we khole na jáen. Aur main ne apne naukaron ko pháñakoñ par rakhá, ki *sabat* meñ koí bojh bhitar áne na pá-

we. So, baiparí aur har tarah ke mál ke bechnewále, ek do bár Aurshalím ke báhar shabbásh húe. Tab main ne unhen dhamkáyá, aur unhen kahá, ki Tum log kis wáste shahr panáh ke áge shabbásh ho ? Agar phir aisá karoge, to main tum par báth dálúngá. Us waqt se we sabat ke dín phir na áe. Aur main ne Lewiön ko hukm kiyá, ki apne ko pák karke phátakon ke darbán hone ko áwen, ki sabat ke dín ko muqaddas karen.” Nahamiyáh 13 : 15—22.

Is se malúm hotá hai, ki Yahúd log har waqt bátíl parast, aur but paraston se ghire húe the, jo un ke sabaton kí tahqír karte, aur unhen bhúláne, aur latárne par mustáid rahte the. Aur unhin kí ummat men aise log the, jo besabr hoke apne dil men kahá karte, “ Nau chandi kí id kab guzar jáegi, ki ham galla bechen, aur *sabat ká dín*, táki gehún ko bechne ke liye báhar nikalen !” Ams. 8 : 5. Us hálát men we har waqt khatre men rahe, na ho, ki hifázat i sabat ko bhúlen, yá butparaston, aur bátíl paraston kí pairaui karke us kí tahqír karen. Aur jo jo us hálát men ikhlásmándi se sabat ki hifázat par qáim rahe, albatta haqíqí dindári, aur dil kí istihkámí ke hajatmand húe. Tau bhi kхудá ne sabat ke haqq men apná qánún dhíla na kiyá, aur us kí ghaflati yá kharábí men kisi ko mazúr hargiz na chhorá.

Ahl i Masih ke alhwál Hindustán men unhin kí mánind hai. Ki ham bhi butparast, aur bátíl paraston se, jo sabat i muqaddas kí qadr se wáqif nahín hai, ghire húe hai. Ahl i Mahammad ke yahán sabat ká *nám* to hai, lekin us ká *kám* aur láiq hifázat un ke pás nahín—aur us ke fáide aur rúhání barakaten un ke háth nahín áti—un ke khiyál men bhi nahín áti hai. Mahammad ne, Yahúdi aur Nasráníon kí taqlíd karke, apne pairaon ke liye sabat ká nám thaha:áyá. Lekin wuh kхудá sabat kí haqíqí qadr aur fáide se wáqif na thá. Is liye faqat sabat ká *nám* apne pairaon men chhor gayá. Pas, ahl i Mahammad áj ke dín tak sabat kí qadr aur quddúsi ke shinásá nahín hai ; is liye we us kí haqíqí aur rúhání barakaton se mahrúm hai.

Pas, jis qadr Yahúdi log butparaston kí qurbat aur sangat men khatron se ghire húe the, usi qadr ahl i Masih Hindustán men khatron se ghire húe hai. We shumár men thore hai, aur butparast aur bátíl paraston ke darmiyán rahte hai. Un kí qurbat aur sangat se sabat kí qadr aur láiq hifázat ke ghat jáne ká khatra hai. Un sab báton men, jo hifázat ke láiq hai, sabat afzal hai. Jab butparast qaumon ke hál par gaur karke un ko, jo sab se jáhil aur ních hai, nazar karte hai, to kyá dekhte hai, magar ek guroh jahán sabat kí pahchán aur hifázat pái nahín játi, aur us kí barakaten názil nahín hoti hai. Aur jab rú i zamín ká sair karke un mulkon par, jo sab se álim aur fázil aur khush akhláq hai, dekhte hai, to yih kyá hai, magar ek guroh, jis ke darmiyán sabat kí pahchán aur us kí hifázat hai, aur us kí barakat aur niámaten hásil hui hai ? Jis jis qaum men sabat i muqaddas kí shinákht aur hifázat maujúd nahín hai, wahán ibádat bhi nahín hai. Wahán ke log díní tarbiyat aur kхудá ki ibádat ke liye ekkatthe hone se báz rahte hai. Wahán insán aur ásmán ke darmiyán muámala mauqúf húa. Wahán zindagi aksaron ke sáth faqat barason ke belazzat aiyám guzarí hai. We biná árám páe, aur biná dil kí tázagí hásil kie apni apni zindagáni zái karte játe hai, un kámon men,

jīn se na dil kī tarbiyat na khush aḥlāqī kī taraqqī pāī jāti hai. Bal-ki tarbiyat aur ārām aur dil kī tar o tāzagi ke badle gulgula aur bejā tamāshe, aur nālāiq hangāme ke manshā hote haiṅ, jo badan ko zaifī o zawāl tak shitābī se pahunchāte haiṅ.

Agar, un sab Isāī mulkon meṅ, jo ab ilm o hunar aur tarbiyat meṅ rū i zamīn par sab se afzal aur sharīf haiṅ, sabat kī hifāzat kā farz dafā kiyā jātā, to pachās baras bhī na guzareṅ jab tak kī jahālat, aur wahshat aur waswās kā sāya un ke sāre atrāf par chhā jāe; aur bad-māsh aur harīs, aur zālīm aur badbātin maḥlūm karen, kī wuh qūwat, jis ne āge unheṅ bāndh liyā, so gaī, yā miṭ gaī hai. Aur aish o ishrat kī khwāhish, aur daulat aur izzat aur martabat kī hirs, aur we sab bad khwāhishen, jo insān ke harīs aur tamāī dil meṅ amal karte haiṅ, un ko bare zor aur jaldī se butparaston kī jahālat aur nich hālat kī qurbat meṅ pahunchātīṅ.

Insān, jo janam se gumrah hai, aur āmal o aḥlāl se mujrim, apnī khāssiyat aur khaslat ke badalne, aur nau paidā hone kā nihāyat hājat-mand hai; aur us fatwā aur sazā se, jo us par ṭaharāī gaiṅ, rihāī pāne kī barī ihtiyāj rakhtā hai. Is meṅ sabat kī fursat aur niāmaten nihāyat kām ātī haiṅ. Khudā ne isī kām kī khātir sabat ke ārām ko ṭaharāyā. Har chha roz kī mihnat aur mashaqaton ke ākhir meṅ sabat i muqaddas hamāre upar apnī roshnī aur rāhat atā kartā hai, aur āwāz i salīm ke sāth hamen Khudā ke ghar kī taraf bulātā hai. Us meṅ hamārā Khāliq i jalīl ham se miltā hai, aur apne takht i fazl ke upar se apne chibre kī raushnī ham ko baḥshatā, aur hamārī faryāden aur duāen suntā hai, aur hamārī tauba aur ṭarīf qabūl kartā, aur Masīh hamāre muḥallis kī khātir hamāre gunāhon ko muāf kartā hai. Har ek zamāne aur har ek mulk meṅ jahān jahān sabat kī hifāzat Khudāwand ke liye aur us ke hukm ke bamūjib kī gaī hai, ye sab barakaten banī Ādam par nāzil hūī haiṅ. Wahān najāt kī khushkhabarī ishtihār kī gaī, aur qabūl bhī kī gaī hai. Wahān banī Ādam ne Allāh apne Khudā ko ḍhūndhā, aur pāyā hai. Wahān unhon ne apne apne gunāhon kī shināḥt pāī hai, aur pachhtā pachhtāke Khudāwand Isā Masīh par imān lāe, aur us ke zariye se muāfi aur maqbūliyat pāī, aur apne Khāliq kī tābidārī sar i nau karne lage haiṅ. Aur imāndāron ke dil apnī muāfi aur maqbūliyat kī pahchān se maut ke dar, aur qahr ke zor par gālīb hokar āsmānī khushīon kā āgāz zamīn hī par tasarruf meṅ lāe haiṅ. Jahān kahīn shumār meṅ do yā tīn tak Masīh ke nām meṅ ekaṭṭhe hūe haiṅ, wahān wuh bhī apne wāde ke muwāfiq un ke sāth hāzīr hūā hai, aur apnī kbāss niāmat aur barakaton ko un par atā kiyā hai. Yūn sabat i muqaddas ke wasile se is jahān i pareshān ke aur ālam i āsmān ke darmiyān ilāqa aur muāmala sar i nau barpā kiyā gayā hai.

Lekin jahān kahīn banī Ādam ne sabat i muqaddas kī hifāzat ko chhor diyā, aur us din meṅ ekaṭṭhe hone se bāz āe haiṅ, wahān ye sab niāmat aur barakaten mauqūf hūī haiṅ. Aise sab makānon, aur mulkon meṅ dunyā, aur gunāh, aur Shaitān banī Ādam ke dilon ko tasarruf meṅ lāyā hai. Un ke sāre khīyāl aur khwāhishen faqat “hirs i jismānī, aur hirs i chashmī, aur gurūr i zindagi” se paidā hotī haiṅ. Aḥiāb kī mānind we sharārat karne ke liye apne taīn bech dālte:

aur Yarubám kī tarah we áp gunáh karte, aur áspás ke logon ko bhí apní sharárat meñ phansáte, aur sharik karte haiñ. Waháñ duá aur záriáñ ásmán kī taraf charhtí nahíñ. Aur mihr kī áwáz bhí us álam se suní nahíñ játí, jo baní Ádam ko tauba karne, aur Masíh par ímán láne kī taraf buláwe. Waháñ K̤hudá dhúndhá nahíñ játá, aur páyá bhí nahíñ játá. Bahut kam haiñ, jo rahmat yá mihr kī khoj karte haiñ, aur bahut hí thore use páte haiñ. Kam haiñ, jo darwáza i zindagí par khatkhatáte, aur bahut kam haiñ, jinhon ke liye wuh kholá játá hai. Aksar sab ke sab us chaurí aur terhí ráh meñ dákhil hote, aur maut ke mak̤hfi makánon aur pátál ko ekat̤the játe haiñ; aur K̤hudá un ke báb meñ yih farmátá hai, ki “Afráím apne buton se mil gayá hai, use chhor de.”

Jaháñ kahíñ sabat i muqaddas kī hifázat nahíñ hai, waháñ sachchí ibádat, aur sachchá dín bhí maujúd nahíñ hai. Insán apne K̤hudá aur K̤hálíq ko bhúl játá hai, aur K̤hudá insán ko chhor játá hai. Wuh sarzamín k̤hush atwári se k̤hálí hokar sahará ban játí, ki jis meñ na k̤hushí, na k̤húbsúratí nazar átí hai. Us wírání par Áftáb i sadáqat kī raushní tulú nahíñ hotí, aur fazl i Iláhí kī os us par názil nahíñ hotí. Gunáh se sarí húi, aur jihálat se súkhí húi insán kī rúh apní k̤hássiyyat ko kho detí, aur ádmíon ke áge, aur Shaitánon, aur haiwánon, aur kíron makoron, aur taráshe húc lakron, aur pattharon ke áge jhuktí, aur un kī bandagí kartí hai. Un ke áge insán apní munájáten, aur sitáish aur saná k̤hwáni kartá; un ke áge apní qurbániáñ charhátá—háq, unhíñ ke áge apne larke bále, aur apní jorú kī izzat aur safáí ko guzrántá hai! Haiwání but ká haiwání parastish karne-wálá hokar ummed rakhtá hai, ki un se panáh bhí aur barakat bhí páwe, jab ki har ek qism kī k̤hatá aur k̤harábí meñ masrúf hotá hai! Jaháñ sabat kī yád aur hifázat játí rahí, insán kī hálát yihí hai.

Yún dunyá ke guzre zamánon meñ sabat kī qúwat aur qadr par nazar karke, aur us kamál jatan par, ki jis se K̤hudá ne us kī hifázat ká farz baní Ádam par thaharáyá; ab zará gaur kiyá cháhiye, ki Hindustán meñ K̤hudá-paraston par us kī hifázat kaisí lázim aur zurúr hai. Is waz ká matn, yá múl, us bāt ká achchhá naqsha aur namúna hai. Us meñ K̤hudá ne farmáyá, aur dunyá ke ák̤hir tak baní Ádam ko farmátá hai, ki “Agar tú sabat se apná páñw phiráwegá, aur mere muqaddas dín meñ apní k̤hushí karne se; aur sabat ko roz i k̤hurram, aur K̤hudáwand ká muqaddas, aur mukarram jánegá; aur us kī takrím karke apne kámon ke karne se, aur apní k̤hushí ke cháhne, aur apní báton ke kahne se báz rahegá; tab tú K̤hudáwand meñ masrúr hogá; aur main tujhe zamín ke únche makánon par urúj karáúngá, aur Yaqúb tere báp kī mírás se tujhe khiláúngá.”

Yún mañlúm hotá, ki láiq aur jáiz nahíñ, ki sabat i muqaddas ek bojh yá taklíf samjhá jác, jo hameñ dunyá ke kár o bár aur tasauwar, aur ishraton se báz rakhtá hai. Balki us ke badle yih jáná cháhiye, ki yih ek dín ráhat aur barakat, aur árám, aur áish ká hai, jo Alláh hí ne hameñ bañshhá hai. Aur na faqat k̤hud hamáre wáste, balki hamáre gharáne ke wáste—hamáre larke bále, naukar chákar nar o ná-rí aur mawáshí, aur musáfir, yá mihmán, jo hamáre phátacon ke andar hon, táki we hamáre sáth árám páweñ. Har ek gharáne ke má

báp yá mawálí ko lázim hai, ki koshish karke dekhne, ki sab ke sab, jo un ke pháṭakon ke andar hai, sabat kí takrím karke us kí hifázat karen. Un ko lázim hai, ki jatan karke un sabhon ko, jo un ke pháṭakon ke andar hon, yá un ke shinawá howen, Kḥudá ke ghar men házir karen, táki imándár bandon ke sáth Kḥudá kí ibádat men shámil howen. Un par farz hai, ki chaukas hokar na sustí yá tagáfíli se, na duniyáwí kár o bár yá bát chit se Kḥudá ke sabat i muqaddas ko behurmat karen. Balki us ke badle kamál koshish karke kalám Ulláh, yane Tauret Injil ke parhne aur sunne men, aur tasauwar, aur ibádat-guzarí, aur aisí guftagú karne men, jis se dil tádib aur tarbiyat páwe, us din ko sarf kiyá cháhiye. Apní báteñ kahní, aur apní khushí cháh-ní maná hai. Kḥudá ke chihre kí raushní dhúndhúa, aur us se muámala karná rawá aur farz hai. Larke bálon, aur naukar chákaron ko sikhlána, aur parháná, aur diní tarbiyat dená, rawá aur farz hai. Zindagí ke faráiz, aur ahwál, maut kí haqíqat, aur áqibat ká hál—aisí sab báton ká síkhná, aur síkháná, parhná, aur parháná, aur un men tasauwar aur guftagú karná jáiz aur fáidamand hai; aur hukm i Alláh ke muwáfíq, har shakhs ko, jo Kḥudá ke hukmon kí hifázat kiyá cháhe, farz hai, ki hoshyár aur bedár ho, tá na howe, ki un logon kí suhbat men beṭhe, jo sabat i muqaddas ko zalíl jánkar use duniyáwí mansúbe bándhne men sarf karte haiñ. Ki aisí ádat aur suhbaton kí tásir se sabat kí hurmat aur yád bhí dil se guzartí haiñ.

Ai bháío, aur tum sab, jo Hindustán men Kḥudáwand se ɗarte ho, in báton par gaur karo. Kyúнки tumhári khairiyat, aur itminán i khátir inhíñ par mauqúf haiñ. Jis qadr tum apne dil o diyánat se Kḥudá ke sabat ko hifz karoge, us hi qadr tum ilm i Iláhi, aur Kḥudá-shinási, aur áqibat kí pahchán men taraqqí karoge, aur Iláhi niá-maten aur barakaten tumhári sárfi mihnat aur muámalon par názil hongí. Tumhen bahut gaur kiyá cháhiye, ki tum duniyá ke logon men se buláe gae ho, táki “Kḥándán i guzida, aur ek sháhána kahánat, aur ummat i muqaddas, aur qaum i maḥsús ho, aur us kí fazílaton ko, jis ne tumhen táríki se apní ájib raushní men buláyá, záhir karo.” 1 Pat. 2 : 9. Yihí tumháre buláe jáne, aur guzida hone ká matlab hai. Agar tum in báton ko yád karke sabat i muqaddas kí hifázat karo, aur “use Kḥudáwand ka pák din, aur mukarram jáno, aur us men apní khushí ke cháhne, aur apne kámon ke karne, aur apní báton ke kahne se báz raho,” to albatta tumháre pardesí aur bahutere tumháre bhái bandon men se, tumhen durusht aur sáhib i áib-joí ṭaharáwenge, aur tumhen duniyáwí chinton, aur mansúbon, aur kár o bár men phusláná aur miláná cháhenge.

Jahán kahíñ nazar pherá karoge, tahán insán aur haiwán Itwár i muqaddas ko behurmat karte, aur Kḥudá ke hukm ko latárte dekhoge. Aur tumhen bará khatra hai, na ho, ki un ke dekhne se, aur un kí ádaton kí áshnáí se Kḥudá ká pák din tumháre nazdík haqír jáná jae. Yih bát qadim se sábit rahí hai, ki “burí suhbaton achchhi ádaton ko bigártí haiñ;” aur kháss karke jahán bahut hí thore haiñ, jo Kḥudá ke sabat i muqaddas kí qadr aur qímat se wáqif haiñ, aur aksar use páemál karte aur haqír jánte haiñ. Lekin us hál se har dam bedár húa cháhiye. Aur jis dam ki baní Ádam ke hál par dekhne se tum-

hárá páñw ñig jáne par howe, tab dunyá kí suhbat se báz ákar K̤hudá ke kalám par gaur karo, aur dekho, kí K̤hudá hí kí nazar meñ sabat kaisá muazziz aur mukarram hai, aur us ne kaise wādon, aur wāidon se use gherá hai. Aur tum meñ se jo shaḡhs. kí apne dil meñ aur chál meñ sabat ko muazziz aur mukarram jáne, aur bamújjib i hukm K̤hudá ke us kí muháfazat kare, wuh shaḡhs K̤hudáwand apne “K̤hudá meñ masrúr howegá, aur K̤hudá use zamín kí únchí jagahon par urúj baḡhshegá, aur use us ke báp Yaqúb kí mírás se khiláwegá.”—Yāne us ke dil ko sárí rúhání barakaton, aur niāmaton, aur tasallíon se bharkar use masrúr karegá. Aur us shaḡhs ke liye Itwár yá sabat, jo zamín par hai, us abadí sabat ká, jo ásmán meñ K̤hudá ke logon ke wáste rah játá hai, ek nishána aur baiāna hogá.

Us shaḡhs ko tajriba se maḡlúm hogá, kí sabat i muqaddas ek din hai, jis meñ badí aur gunáh se, mihnāt aur mashaqqat se, aur āish o ishrat se báz rahná hai. Ek din, kí jis meñ K̤hudá kí ibádat kí játí, aur ilm i Iláhí aur maḡrifāt hásil kí játí, aur dil kí pákízagí pahchání aur baḡhái játí hai—Ek din, kí jis meñ K̤hudá-parast āpas kí ham suhbat, aur K̤hudá ke huzúr meñ rúhání ḡhushíon, aur ásmání tasauwaron meñ masrúr hote haiñ; aur pahle áfrinish ke ājāib o garāibon kí, aur us maḡhlasí ke bartar ājāibon kí, jo Masíh ke wasile se dunyá meñ ishtihár kí gaí, tashhír karne meñ we shádmán hote haiñ.

Sabt ke tasauwar aur muāmalon meñ K̤hudá ḡháss karke házir hotá, aur Masíh meñ hokar muáf kartá, aur insán ke dil ko pák aur durust kartá hai. Aur Rúh i Sidq ḡháss karke Itwár ke shuglon meñ Iláhí mahabbat ká baiāna dil meñ bhartá, aur sulh o shádmání kí ráhat baḡhshtá hai. Pas, sabat i muqaddas ek din ummed, aur tasallí, árám aur tasarruf ká hai. Us meñ Alláh apne chihre ko záhír kartá; aur apne bandon ke majma par Iláhí mahabbat ātá kartá hai. Us din meñ Masíh, jo K̤hudá ká Barra, K̤hudá ká jalál, aur ásmán kí tajallí hai, un ke tasauwaron ko sádá aur sáf kartá, aur un kí mahabbat ko baḡhátá, aur kámil kartá, aur taām i ásmání se unhen khilátá, aur āb i hayát ke chashmon pás unhen le chaltá, aur rúhání niāmaton se un ke dilon ko ser aur asúda kartá hai.

XXV.

QINÁAT KI BĀBAT.

BA'BU' JOHN HARI' KÍ TASNÍF.

Díndárí to qináat ke sáth baḡá nafa hai.—1 Tim. 6 : 6.

K̤HUDA' Taálá ke kalám se ham ko yih talím miltí hai, kí díndárí ke kái baḡe baḡe ajzá haiñ, jo sab milke ek badan kí súrat par bante haiñ, yāne, K̤hudá ko pahchánná, aur apní haqíqat ko jánná, gunáh kí buráí

ko ma'lúm karná, us se pachhtáná, phir us se báz áná, tab ímán, um-med, mahabbat, rástbázi, parhezgári, pákízagí, tawakkul, bardásht, sabr, farotání, milámsári, hamdardí, gamkhwári, aur qináat, wg.

Jis tarah se ki badan meñ bahut se ázá haiñ, aur sab milke ek hí badan bante haiñ, usí tarah se dindári ko bhi ham ek badan se ru-shábihat dete, aur ajzá i mazkúra i bálá ko us ke ázú t̄haharáte haiñ. Jis tarah se ki insání badan meñ agar koi nuqs ho, to wuh kámil badan na kahláegá, balki náqis : maslan, agar ek páñw na ho, to langrá, yá ek háth na ho, to t̄undá, yá ek ánk̄h na ho, to káná, yá nák na ho, to naktá, yá kán na ho, to búchá, kahláegá ; usí tarah se dindári ke ajzáon meñ se agar ek ajzá kí bhi kamtí ho, to wuh dindári kámil na kahláegí, balki náqis. To ab main dindári ke un ajzáon meñ se ek juz, yane qináat ká kuchh mukhtasar layán karne kí jurat kartá hún, is ummed par, ki K̄hudá ke fazl se is ke parhñewálon ko kuchh fáida ho.

Hamári sanad meñ áyá hai, ki “Dindári to qináat ke sáth bará nafa hai.” Ab ham us ko tin hisson meñ taqسیم karke bayán karte haiñ, yane

I. Daryáft karen, ki qináat kyá hai ?

II. Apní hálát par qináat na karne se kaisí buráíñ pesh átiñ.

III. Apní hál t par qináat karne se kaisí k̄hushí sachche dindar ko hásil hotí hai.

I. Daryáft karen, ki qináat kyá hai ?

Qináat to Arabí lafz hai, aur us ke mane rázī ba razá i Iláhi rahná, yane dunyawí hawá o hawas se alag hoke sirf us hálát se, jis meñ K̄hudá Ta'álá ne ham ko rakhá hai, rázī rahná, aur us ká ijlál karna, aur us kí shukrguzári karná, yihí ham par farz hai.

Tajrube kí rah se ma'lúm hotá hai, ki qináat to ek haqíqí daulat hai, jis ke hásil karne bagair ham sadá kangál rahte haiñ, aur us ke hásil hone se ham aise k̄hush rahte, ki agar tamám jahán ká k̄hazána hamáre háth lagtá, tau bhi waisí k̄hushí na hotí, jaisí qináat se ham ko hotí hai. K̄hilqat ke intizám par gaur karne se ham ko qináat kí talím miltí hai, kyúnki K̄hudá Ta'álá ne, jo tamám jahán ká Názim hai, baní Ádam ko apní mashiyyat i Iláhi se ek ek hálát meñ rakhá hai ; yane ek ko bádsháh banáyá, aur dúsre ko raíyat ; ek ko hákim mu-qarrar kiyá, dúsre ko mahkúm ; ek ko amír, dúsre ko faqir ; aur ek ko daulatmand, dúsre ko kangál ; aur is intizám se us kí aín hikmat záhir hotí hai ; yane, tamaddun ká taur nazar áta, ki kyúnkar ek dúsre kí madad ká muhtáj hai. Dunyá ke intizám hi par liház karne se ahl i dánish ko yih talím miltí hai, ki hamára ek bará Sháhansháh hai, jo sáre sháhon par bádsháhat, aur sáre hákimon par awelá hukúmat karnewálá hai ; wuh to goyá Báp kí sí shífat rakhke is kura i zamín ke tamám báshindon ká ek gharána banátá hai, aur sabhon ká intizám aur bandobast un kí haqíqí hálát ke muwáfíq kartá hai, aur ek ek ko apní marzí ke mutábíq rozí detá hai ; yane, jis tarah se koi báp apne larke bálon kí tabíyat pahchánke un kí tabíyat ke andáze ke muwáfíq un ko apní daulat meñ se hissa detá hai, aur un kí chál chalan ko dekhtá, aur un kí guzrán ke taur par liház kartá hai, usí tarah se K̄hudá Ta-

ālá hamárá samáí aur bardásht ke mutábiq apní daulat i bepáyán men se hissa detá hai.

Tajriba kí ráh se jáná játá, ki ham to isí jahán ke wáste nahín paidá húe; kyúinki thore dinon tak ham is dunyá men rahte, aur bad us ke yaháñ se chale játe. Is se ma'lúm hotá hai, ki hamará k̄háss watan yih nahín hai, par ek dúsrá watan hai.

Yih dunyá to hamáre wáste ek madrasa hai. Madrase men tálib ul ilm sirf is liye játe, ki waháñ chand muddat tak rahke ilm tahsil karen, aur jab fazilat ko pahunch jáwen, to waháñ se niklen, aur apne károbár men mashgúl hoke us ilm ko láiq taur par kám men láwen. Ham bhí is dunyá ke madrase men tálib ul ilmog kí mánind haiñ, aur tamám k̄hilqat hamáre wáste ek jild kitáb hai, jis men K̄hudá kí kái sifaton ká bayán ajib o garib súrat ke hurrúf aur tarah ba tarah chamkile rang ke sáth likhá gayá, jis ko bagaur mutála karne se ham us kí qudrat, paidáish, aur parwardigárá, aur hifázat ke kám men, dekhte haiñ; aur dúsrí jild us kí wahí ásmání hai, jis men we báten, jo k̄hilqat kí jild se náqis aur mubham samjhí gaín, kámil aur sáf nazar áín. Aur siwá in ke aur báten bhí, jin ká insán kí bihtarí ke liye záhir karná zurúr thá, likhí gaín; yane, us ke parhne se ham apní hastí kí garaz i auwal, aur K̄hudá kí marzí, aur us ke qánún apní guzrán ke báb men, ma'lúm karte haiñ. Aur tísrí jild us kí hukúmat hai, jis men agarchi wahí ká sá sáf bayán K̄hudá kí sifaton ká nahín, tau bhí us men bahut sí báten aísí haiñ, ki jo na wahí, na us kí k̄hilqat kí kitáb men páí játín; yane, is ke muláhaza karne se ham us ká intizám, aur us kí hukúmat k̄hilqat ke báb men dekhte haiñ. Pas, jab ham is madrase men chand muddat tak rahke fázil ho játe, to apne ásmání watan ko, jahán jáne ke liye ham taiyár hote haiñ. chale játe; chunnáñchi 2 Kar. 5 : 1 men likhá hai, “Kyúinki ham jánte haiñ, ki jab hamará yih k̄híma sá miṭṭí ká ghar ujar jáwe, to ham ek imárat K̄hudá se páwenge. Wuh ek ghar hai, jo háthon se nahín baná, balki abadí aur ásmán par hai.” Tálib ul ilm to sirf madrase hí ká nahín ho rah-tá, balki kisí umda kám ke liye taiyár hotá hai; aur sháýad bahut mihnat aur barí tangí kí hálát par qináat kartá; to kyá ham sirf isí dunyá ke madrase ko apná watan samjhen; aur isí se apná dil lagáwen; aur us men bahut aish o ishrat se rahne cháhen; aur kurkuráwen, is liye ki hamen yaháñ bahut sukh nahín miltá hai; aur us kí hawá o hawas men giriftár hoke isí ke ho rahen? Nahín, balki qináat ká jáma pahinke apne ásmání watan ke liye ilm tahsil karen, táki ham ko yih silá mile, ki “Ham us ko is tarah ján jáwen, jis tarah wuh ham ko jántá hai.”

Ham to is dunyá men musáfir haiñ, aur yih dunyá hamáre liye ek sará hai. To kyá musáfir sará hí ko apná mahall samjhegá, aur us kí zarí zarí sí koṭharíon ko apná daulat-k̄háná? Hargiz nahín. Magar wuh to sirf jarídagí ká libás pahinke apní manzil i maqsúd kí taraf safar kartá chalá jáegá, aur jab tak apne makán par na pahunche, ráh men kisí se dil na lagáegá. Musáfir to ráh men apná dil kisí se nahín lagátá, aur na sará ko apná watan jántá, balki rát din manzilen tai kartá húa apne watan kí taraf barhá chalá játá hai; to kyá ham sirf is dunyá hí ko, jo sará kí mánind hai, apná watan samjhen, aur is kí

faní chizon ko apní milkiyat aur gandí daulat ko apná khazána ? Kyá ham musáfirat kí tangi se naráz howen, aur qináat na karen, jab tak kí apne taín is dunyá ke bojh se na dabáwen ? Kyá qináat na karne se hamára safar halká ma'lúm hogá ? To kyá ham har ek bojh aur ul-jhánwále gunáh ko utárke, aur sabr ká libás pahinke, us ráh mein, jo hamáre sámhne á parí hai, daurte chale na jáwen, táki zindagí ká hár inám mein le len ? Zurúr bizzurúr.

Pas, úpar ke mukhtasar bayán se sábit húa, kí qináat kyá hai ; ab zurúr dúsrí bát ká gaur kiyá cháhiye ; yáne,

II. *Apní hálát par qináat na karne se kaisí burá'ín pesh áti hai.*

Apní hálát par qináat na karne se bahut sí burá'ín pesh áti hai ; magar un mein se kái ek ká bayán ikhtisár ke sáth agar karen, to bihtar ho ; chunánchi,

Pahlí burá'.—Jab kí ham apní hálát se, jis mein Khudá i Bartar ne ham ko rakhá hai, rází na hoke hawá o hawas ká píchhá karte hai, to goyá ham Khudá Ta'álá ke bandobast aur intizám ko torne kí jurat karte ; aur hálánki jánte hai, kí hamára kiyá kuchh na hogá, jab tak kí Khudá kí marzí na ho, tis par bhi apne dil kí korí ke sabab aise harís ho játe, kí apne taín hamesha ke imtihán aur har tarah kí námá-qúl aur muzirr khwáhishon mein dálte hai, jo insán ko tabáhi aur halákát ke daryá mein dubá detí hai ; aur is bát se bekhábar rahte hai, jo likhí hai, kí “Zar-dostí sári burá'ion kí ja' hai, jis ke baze árzúmand hoke imán kí ráh se bha'ak gae, aur ap ko tarah tarah ke gamon se chhedá ; par tú, ai mard i Khudá, in chizon se bhág, aur rástbázi, dindári, imán, mahabbat, sabr aur farotání ká píchhá kar.” Jab ham apní hálát par qináat na karke hawá o hawas mein giriftár hote hai, to goyá ham apní ázádí ko muft bech dálte, aur hirs ke bande hoke jidhar jidhar wuh ham ko dauráe phirti, udhar hí daure phirte hai, aur yahán tak kí fikr o afkár ke sabab hamára dil aísá tárik ho játá, kí phir núr i marifat ham par kabhí jalwagar nahín hotá ; tab wuh tamsíl, jo hamáre Naját-dihinda ne is báb mein farmáí hai, hamáre haqq mein thík hotí ; yáne, “Jo bij kánton mein boyá gayá so wuh hai, jo kalám suntá, par is dunyá kí fikr aur daulat ká fareb kalám ko dabá detá, aur wuh bephal hotá hai.”

1. Hawas to burí balá hai. Chunánchi hamáre buzurg báp Ádam ne jab bahut jánne kí hawas kí, to apní aslí hálát (pákizagí aur rástí) se gir gayá, aur ziyáda jánne ke barákhiláf núr i marifat ko kho diyá. Sháyad Bába Ádam ne yih khyál kiyá hogá, kí agar main ziyáda jánne lagún, to ziyáda khushí mujh ko hogí ; lekin afsos, kí ziyáda khushí ke iwaz barí musibat mein par gayá ; kyúunki likhá hai, kí “Tú apne munh ke pasíne se roti kháegá.”

Ázíz bháio, dekho, hawasnáki ká kaisá burá anjám hai. Jab kí hamáre báp Ádam ne sirf ek bát kí hawas karke apní sachchí khushí ko kho diyá, aur bág i Ádan se nikálá gayá ; to ham, jo tarah tarah kí hawas karte, aur qináat ke kúche se apne qadam ko u'bháke hirs ke maidán mein rakhte hai, kis qadr apní sachchí khushí, aur áram i Ilá-hí, aur bihisht kí abací ni'maton se dúr parte játe hai !

2. Hawas to kyá hí turí balá hai. Chunánchi Esau ne ek luqma

kháne kī hawas karke apne pahlaūthe hone ká haqq, fānī k̥húrāk ke liye, apne bhāī Yáqúb ke háth bech dālā ; aur us barakat se, jo pahlaūtheapan ke sabab us ko milne par thī, mahrúm hoke apnī umr bhar hasrat o fśos hī meṇ rahā. So, ai āzizo, ham k̥habardār raheṇ ; kahīṇ aisā na ho, kī ham bhī fānī aish o ishrat kī hawas meṇ phapske apne lepálak hone ká haqq, jo hamāre Najāt-dihinda ne apnā besh qīmat lahú bahāke mol liyā hai, kho deṇ ; aur abad ul ābād tak āsmānī niāmatoṇ se mahrúm hoke jahannam kī āg meṇ hasrat-angez o dard-āmez āheṇ o chīkheṇ mārā kareṇ ; jaisā likhā bhī hai, kī “ Agar ādmī sārī dunyā ko hāsīl kare, aur apnī jān ká nuqsān uṭhāwe, to use kyā fāida hogā ? ” Mar. 8 : 36, 37.

3. Hawas to burī hī balā hai. Lút kī jorū ko yād karo. Jab K̥hudā Taāla ne Sadúm aur Āmūra par un ke bāshindoṇ kī badkārī ke sabab āg aur gandhak barsāī, to apne bande Lút ko us ke gharāne samet us haulnāk āfat se bachāne ke liye do firishtoṇ ko bhejā, jinheṇ ne, bāwajūde kī sáf kholke un se kah diyā, kī K̥habardār, tum píchhe phirke na dekhñā ; tis par bhī Lút kī jorū ne apne ghar kī hawas karke píchhe phirke dekhā, aur namak ká k̥hanbhā ban gaī.

So, ai dosto, ham chaukas raheṇ, kahīṇ aisā na ho, kī ham bhī Lút kī jorū kī mānind fānī makān kī chāh meṇ paṛke, apnī abadī zindagī ko kho deweṇ, aur abad ul ābād tak jahannam kī āg ke kunde ban jāweṇ.

Shiqr.

Hoshyār raho, ai yār, hoshyār ;
Dil sīne meṇ sām̐ hai zahrdār.

Dúsrī burāī.—Jab kī ham apnī hālat par qināṭ nahīṇ karte, par apnī hawason ko pūrī karne ke liye tarah tarah kī tadbíreṇ karte, aur apnī tadbíroṇ par bharosā rakhte, aur samajhte haiṇ, kī is tadbír se ham zurūr apne maqsad i dilī par kām̐yāb honge, to goyā ham apne taīṇ K̥hudā Taāla se ziyāda dānishmand ṭhaharāte haiṇ. Insān kī dānāī K̥hudā ke nazdīk himāqat hai. Kyā koi nanhá laṛkā, jo dunyā ke māmaloṇ se mahz bek̥habar hai, apne bāp se, jo barā tajrubakār ho, kahe, kī Ai bāp, tú ne jo bandobast merā kiyā hai, so náqis hai ; is liye māiṇ āp apnā bandobast apnī k̥hwāhish ke mutābiq karūngā ; to log us laṛke ko kyā sanjhenge ? kyā koi us ke taīṇ aqlmand kahegā ? Nahīṇ ; balki jo us kī bāteṇ sunegā, use nádān ṭhaharāwegā. Aur agar shāyad us ká bāp us apne laṛke ko aisī nádānī ká kām̐ karne de, aur us ko na roke, to āk̥hīr i kār us ká kyā hāl hogā ? Us ká hāl us hī laṛke ká sá hogā, jis ká zikr Lūkā 15 : 12—16 hai, kī “ Un meṇ se chhoṭe ne bāp se kahā, kī Ai bāp, māl se jo merā hissa hai mujh ko de. Tab us ne māl unheṇ bāṇṭ diyā. Chand roz ke bād chuotā beṭā sab kuchh jamā karke dūr mulk ko chal niklá, aur wahāṇ apnā sab māl badchālī meṇ urāyā ; aur jab wuh sab kuchh k̥harch kar chukā, us mulk meṇ barā kāl paṛā, aur wuh muhtāj hone lagā. Tab wuh jāke us mulk ke ek shak̥hs ká naukār banā, jis ne use apne kheton par bhejā, kī súaroṇ ko charāwe ; aur use árzū thī, kī un chhīlkon se, jo súar khāte the, apnā peṭ bhare ; aur koi use na detā thā.”

Ham to Qádir i Mutlaq, dáná o bíná Kḥudá ke sámhne larke, balki kíre makore haiṇ; ham kyá us ke bandobast meṇ dam már sakte haiṇ, ki kyúṇ aisá kyá, aur kyúṇ waisá na kyá? “Kyá kárigarí ká-rigar se kah saktí hai, ki Tú ne mujh ko kyúṇ aisá banáyá? Aur kyá kumhár miṭṭí par muḡhtár nahíṇ, ki ek hí londe meṇ se ek bartan hurmat wálá, aur dúsrá be hurmat banáwe?” Rúm. 9 : 20, 21.

Tísrí buráí.—Jab ham apní hálát se rází nahíṇ rahte, magar apní hawas ko barháte haiṇ, to goyá ham apne paṛosí par rashk le játe haiṇ. Injil meṇ likhá hai, ki “Tú apne hamsáe ko apní mánind piyár kar.” Lekin hawasnák ádmí aisá nahíṇ kartá, balki wuh to kḥud-garazí karke us se rashk kartá hai; kyúṇki jab wuh kisí shaḡhs ke mál o daulat ko dekhtá, aur us ki kḥush guzrán par nazar kartá hai, to hasad se bhar játá, aur háe mártá hai, ki Afsos, main aisá kyúṇ na húá? Chunánchi aksar aisá ittifáq húá hai, ki daulat yá milkiyat kí cháh se beṭe ne báp ko már dälá, aur bhaí ne bhái ko. Agar harís cháhe, ki hirs ko barháke daulatmand ho jáwe, to námumkin hai; kyúṇki hirs karne se daulat hásil nahíṇ hotí; magar Kḥudá kí baḡh-shish se, jaisá ki Zabúr meṇ likhá hai, ki “Iqbál na mashríq se átá hai, na magrib se, aur na janúb se; balki Kḥudá ádil hai. Wuh ek ko girátá hai, aur dústre ko úthátá.” Is se maḡlúm húá, ki koí shaḡhs apní hoshyarí yá chálákí se kámyáb nahíṇ ho saktá hai, magar jis ko Kḥudá kámyábí baḡhshe, wuh kámyáb hotá hai. Is dunyá meṇ bahut haiṇ, jinhou ne bahut se fann síkhe, aur tarah tarah ke hunar bhí há-sil kiyé, magar nán i shabína ke liye muhtáj haiṇ; agar iqbálmandí o kámyábí insán kí aqlmandí o hunarwarí par mauqúf hotí, to hunar-mand hí bare iqbálmand hote. Garaz ki kámyábí aur iqbálmandí ha-was karne se nahíṇ hásil hotí, to kyúṇ ham apní beshqímat ján ko púch aur besabát kḥushíou ke wáste khatra meṇ dál deṇ, aur rát din fikr kar karke apní zindagí talḡh karen, jise Kḥudá Taálá ne apne ja-lál ke záhir karne ke liye hamen baḡhshá hai?

Chauthí buráí.—Jab ham apní hálát se kḥush na rahke hawá o ha-was kí pairawí karte haiṇ, to goyá ham Kḥudáwánd Isá Masih ke us qaul ko jhuṭhláte haiṇ, jo us ne apne shágirdou se farmáyá, ki “Is liye main tum se kahtá hún, ki apní zindagí ke liye fikr na karo, ki ham kyá kháenge, kyá pienge? aur na apne badan ki, ki kyá pahin-enge? Kyá zindagí kḥurák se bihtar nahíṇ, aur badan poshák se? Parindou ko dekho; na we bote, na laute, na koṭhí meṇ jamá karte haiṇ; tau bhí tumhárá Báp, jo ásmán par hai, un kí parwarish kartá hai. Kyá tum un se bihtar nahíṇ ho? Tum meṇ se kaun hai, jo fikr karke apní umr meṇ ek gharí barhá saktá hai? Aur poshák kí kyúṇ fikr karte ho? Jangalí sausan ko dekho, kaise barhte haiṇ; wuh na mihnát karte, na kátte haiṇ; par main tumhen kahtá hún, ki Sulemán, apní sárí shán o shaukat meṇ, un meṇ se ek kí mánind mu-labbas na thá. Pas, jab Kḥudá maidán kí ghás ko, jo áj hai, aur kal tanúr meṇ jhonkí játi, yún pahináta hai; to ai sust ítiqádo, kyá tum ko is se ziyáda na pahináegá? Is liye fikr na karo, ki ham kyá khá-enge, kyá pienge, aur kyá pahinenge.” Matí 6 : 26—30. In áyatou se sáf záhir hotá hai, ki Kḥudá aisá qádir aur rahím hai, ki apní sárí kḥilqat kí parwarish o hifázat har dam kartá rahtá hai, yabáṇ tak ki

ek zarra zarra kī khabargīrī wuh kartā hai. K̤hudāwand Isā Masīh ne ham ko hawā ke parindon aur ghās se, jo subh kō lahlahātī aur shām ko kātī jāti hai, gairat dilāi hai; aur sáf tajrube kī rāh se ham ko sikhlāyā, kī hamārī fikr karne se kuchh nahīn hotā; to kyūn ham aise hawasnāk ho jāwēn, kī apne dil ko, bāwajūd aisī umda nasīhat sunne ke, saḡht kar len, aur unhīn bāton kā pichhā kiye chale jāēn, jo hamare maqdūr se bāhar haiñ ?

Pānchwīn burāī, jo sab se barī hai, so yih hai.—Jab ham rāzī ba razā nahīn rahte, balkī hawā o hawas ke pāband hote haiñ, to goyā ham apnī hawas kī parastish karte haiñ. Shariāt meñ lihā hai, kī “Tū Allāh ko, jo terā K̤hudā hai, apne sāre dil se, aur apnī sārī jān se, aur apne sāre zor se, aur apnī sārī idrāk aur aql se piyār kar.” Lekin jab ham bejā hawason aur burī k̤hwāhishon ko apne dil meñ jagah dete, to ham unhīn ko apne maḡbūd banāke rāt din un ko apne k̤hiyalon meñ pūjā karte haiñ. Agarchi ham zāhīran butparastī nahīn karte, yāne patthar aur lakrī tarāshke apne liye but nahīn banāte, tis par bhī hawas ko apne dil meñ jagah dene se ham k̤hiyalon meñ apne liye but garhā karte, aur unhīn kī pūjā karte haiñ; kyūnki jab ham K̤hudā se ziyāda aur kisī chīz ko piyār karte, to usī waqt ham butparastī kar chuke haiñ. K̤hudāwand Isā Masīh ne sáf farmāyā hai, kī “Koi do k̤hāwindon kā banda nahīn ho saktā; kyūnki wuh ek se adāwat rakhegā, aur dūsre se mahabbat; yā ek kī tazim karegā, aur dūsre ko haqīr jānegā. Tum K̤hudā aur daulat donon ke bande nahīn ho sakte.” Matī 6 : 24. Phir Pūlūs ne farmāyā hai, kī “Kyā tum nahīn jānte, kī tum K̤hudā kī haikal ho, aur K̤hudā kī Rūh tum meñ bastī hai?” 1 Kar. 3 : 16. Pas, kyā mumkin hai, kī K̤hudā Taālā kī haikal meñ koi nāpāk aur gandī chīz rah sake, yā koi shaḡhs K̤hudā aur dunyā donon ko rāzī kar sake? Raushnī ko tārīkī se kyā munāsibat, aur rāstī ko darog se kaun sī muwafiqat, aur Masīh ko Bāl se kaun sī mutābiqat? Ai bhā o, ham ko barī hoshyārī karnī chāhiye, kahīn aisā na ho, kī ham fānī k̤hushī ke liye, jo chand roza hai, apnī abādī k̤hushī aur hayāt i jāwidānī ko kho dewēn. Dil to barā farebī hai; hazāron tarah ke hile o uzr apnā matlab pūrā karne ke liye dhūndhtā hai; aur kisū na kisū bahāne se apnī marzi pūrī karne ko chāhtā; lekin munāsib hai, kī apne maqdūr bhar use dabāwēn, aur apne qabze meñ rakheñ; kyūnki tamām mulk ko qabze meñ kar lenā āsān hai, magar dil ko qabze meñ karnā nihāyat mushkil hai; aur barā bahādur aur jawānmard usī ko kahiye, jo dil ko apne qabze meñ rakhtā hai. Chāhiye, kī ham K̤hudā se duā māngēn, kī wuh apne Rūh i Pāk kī madad baḡhshe, kī ham apne dil ko jit sakeñ, aur us kī hawason aur burī k̤hwāhishon par gālib ā sakeñ, tāki ham wuh darja pāne ke lāiq hon, jo gālib ānewalon ke bāb meñ wāda kiya gayā hai, kī “Wuh, jo gālib hotā, aur mere kāmōn par āk̤hir tak āmal kartā hai, main use qaumon par iḡhtiyār dūngā, aur wuh lohe ke āsā se un par hukūmat karegā, kī we kumhār ke bartanon kī mānind chaknāchūr ho jāenge; jaise main ne bhī apne Bāp se pāyā hai; aur main use subh kā sitārā dūngā.” Mush. 2 : 26—28.

Upar ke bayān se wāzīh hūā, kī apnī hālat par qināāt na karne se kaisī burāīān pesh āti haiñ. Ab tīsri bāt ke muḡhtasar bayān par zarra lihāz karne se maḡlūm hogā, kī

III. *Apní hálát par qináat karne se kaisí khushí sachche dindár ko hásil hotí hai.* Hamáre sanad meñ áyá hai, ki Dindári to qináat ke sáth bará nafa hai. Haqíqat meñ dindári qináat ke sáth ban partí hai; kyúñki dindári kuchh dunyá hásil karne ke wáste nahín, par áqibat kí khushí aur hayát i abadí hásil karne ke liye hai. Bamújib is ke, jo shakhs ki Masíh par ínán láne ke sabab Rúh i Pák kí hidáyat se sar i nau paidá húa, yáñe, sachchá Masíhi ban gayá hai, wuh apne tamám dil, aur khwáhish, aur táqat se sirf Khudá ko dost rakhtá hai; aur is dosti ke qáim rakhne par qádir bhí hai, jaisá ki likhá hai, “Kyúñki Rúh i Quds ke wasile se, jo hamen milí, Khudá kí mahabbat hamáre dil meñ jári húi.” Aur jab sachche Masíhi ne daryáft kiyá, ki Khudá use Masíh meñ hoke kis qadr piyár kartá hai, to wuh bhí sab chíz se ziyáda Khudá ko piyár karegá; aur phir dunyá aur us kí murdár lazzat ká dhúndhnewálá na rakhe, us ká rágib na hogá, jaisá ki Yúh. 4 : 19 meñ zikr hai, ki “Ham Khudá ko is sabab se piyár karte haiñ, ki pahle us ne hamen piyár kiyá hai;” aur usí khatt ke 2 : 15—17 meñ likhá hai, ki “Dunyá aur dunyá kí chízoñ kí mahabbat na rakho; jo koí dunyá kí mahabbat rakhtá hai, us meñ Báp kí mahabbat nahín; kyúñki har ek chíz, jo dunyá meñ hai, yáñe jism kí khwáhish, aur áñkh kí khwahish, aur zindagí ká gurúr Báp se nahín, dunyá se hai, aur dunyá aur us kí khwáhish guzar játi hai; lekin jo Khudá kí marzi par chaltá hai, wuhí abad tak rahegá.”

Isí mahabbat ke sabab se, jo Masíhi ke dil meñ thaharí hai, wuh nit khush rakhtá, aur dil se Khudá kí buzurgí kartá hai; yáñe, jaise larká apne báp kí buzurgí kartá, wuh Khudá kí is qadr izzat o hurmat kartá hai, ki us ká dil aur fir hamesha Khudá hí meñ rakhtá hai; jaisá ki Dáúd 63 Zabúr meñ kahtá hai, ki “Ai Khudá, tú merá Khudá hai, main tujhe tarke dhúndhúngá; ki merí ján terí piyási hai, aur merá jism khushk aur súkhi zamín meñ, jahán pání kí búnd nahín, terá mushtáq hai; táki terí qudrat aur terí hashmat ko dekhe, jaisá ki main ne Bait i Quds meñ dekhá hai; is liye ki terí rahmat zindagí se bihtar hai; so mere lab terá shukr karte rahenge; jab tak ki main jítá hún, terí sitáish karúngá, aur terá nám le leke apná háth utháúngá. Meri ján yúñ ser hogí, jaise gúda aur charbí kháke hote haiñ, aur merá munh shigufta laboñ se terí sitáish karegá.” Aur jis waqt ki sachchá Masíhi kisi tarah ke imtihán meñ pare, to wuh Yúsuf kí mánind kahtá hai, ki Main kyúñ aisá burá kám karúñ, aur Khudá ká gunahgár hoúñ; kyúñki jo kuchh wuh kartá hai, dunyá ke liye nahín, balki Khudá ke wáste kartá hai. Aur sachchá Masíhi apne har kám meñ, apní hoshyári aur chálakí par bharosá nahín rakhtá, aur na dunyá ke kisi martaba yá izzat kí unmed rakhtá hai, balki sirf Khudá kí taraf rujú kartá, aur apní guzrán kí maishat ke liye itná fikr-mand aur álúda nahín hotá, balki bakhilí aur daulat jamá karne kí fir apne pás se dúr karke is par qináat kartá hai, ki han, Khudá i Bartañ ne us ke peshá meñ itní barakat bakhshi, ki apne rozine kí khurák aur poshák hásil kare; aur jab ki Ásinání Báp ne Isá Masíh ke wasile se áqibat ke khazánoñ ke darwáze us par khole haiñ, to is muqaddame meñ bhí albatta bilkul khátir jamá hai, ki dunyawí guzrán ke rozine ko bhí pahuncháwegá; jaisá ki Zab. 28 : 7 meñ hai,

“Kḥudáwand merá zor aur merí sipar hai; mere dil ne usí par tawakkul kiyá, aur mujhe usí kí pushtí húi. So merá dil shiddat se kḥush húa; main gáke us kí madh karúngá.” Sachchá Masíhí apne sab andeshon aur fikron ko Kḥudá par chhor detá hai, kí wuhí jaisá us ke liye munásib jáne, waisá hí kare. Aur sachche Masíhí ko Kḥudá jis ráh aur raste mein chaláwe, kḥwáh mushkil ho, yá ásán, bahar hál wuh rází, aur tangí, aur sakhtion mein sabr kartá; kyúнки wuh jántá hai, kí un ráhon aur matlabon ká maqsad, kí jin mein Kḥudá use chalátá, yih hai, kí us ká dil aur ziyáda Kḥudá se nazdíki dhúndkar ákhirat ke jalál ke aur ziyáda láiq ho jae. Is liye ranjon mein bhí kḥush rahtá. Aur jaisá kí Zab. 27: 3—5 mein likhá hai, sachchá Masíhí bhí kahtá hai, kí “Kḥudáwand par tawakkul kar, aur bhalá kar; tú zamin par zindagí basar kar, aur amánat se phal le. Kḥudáwand se lazzat dhúndh, kí wuh tere dil ke inatálíb púre karegá. Apní ráh Kḥudáwand par chhor de; us par tawakkul kar; wuh sab baná legá.” Aur Ibr. 12: 5, 6 mein likhá hai, kí “Mere beṭe, Kḥudáwand kí táḍib ko náchíz mat ján, aur tú, jab wuh tujhe malámat kare, shiwasta dil na ho; kí Kḥudáwand jise piyár kartá hai, use tambíh detá hai; aur har ek beṭe ko, jise wuh qabúl kartá hai, píṭtá hai.” Aur phir 2 Kar. 4: 17, 18 mein hai, kí “Hamáre hál ká halká ranj niháyat firáwání se kḥushí ke abadí bojh ko hamáre liye paidá kartá rahtá hai; aur ham na un chizon par, jo dekhne mein áti nain, balki un chizon par, jo dekhne mein nahín átin, nazar karte hain. Kyúнки jo chízen dekhne mein áti hain, chand roza hain; aur we, jo dekhne mein nahín átin, abadí hain.” Aur Róm. 5: 3—5 likhá hai, kí “Ham musibaton mein bhí fakhr karte hain, kí jánte hain, musibat se sabr, aur sabr se tajruba, aur tajruba se ummed paidá hotí hai; aur ummed sharminda nahín kartí.”

Garaz, jo sachchá Masíhí hai, apní hálát par qináat karke yún hí kḥush rahtá, aur apní zindagí bhar Kḥudá kí taríf aur shukrguzarí kiyá kartá hai; aur yún apní chál se sab logon ke liye, jo us ke ird gird rahte, namúna banke dikhlátá hai, kí “Dindárí to qináat ke sáth bará nafa hai.”

XXVI.

MASIH KÁ JUA MULAİM.

REV. GOPÍNÁTH NANDÍ KÍ TASNÍF.

Ai sab logo, jo farománda aur zerbár ho, idhar mere pás áo; kí main tumhen áram dúngá. Merá júá apne úpar le lo, aur mujh se síkho; kí main farotan aur dil se kḥáksár hún; aur tum apne jon mein áram páoge; kí merá júá muláim aur merá bojh halká hai.—Matí 11: 28, 29, 30.

YIH áyaten hamáre Kḥudáwand ne, jab kí wuh is jahán i fání ká rau-

naq baḡhsh thá, us waqt apní zubán i mubáarak se irshád kíñ. Is lá-sání mahabbat ke, jo Ḳhudá ne ham par záhír kí, bayán o adá i shukr meñ zubán i insán zaíf ul-bunyán kí qásir hai; chunáñchi us pák Rúh-ul-Quds kí táíd se ham thorá sá bayán karte haiñ, táki sunnewálon ko púra fáida hásil ho. Us hí bab kí ikkíswíñ áyat se mañlúm hotá hai, ki hamará Ḳhalásí Baḡhshnewálá o Naját-dihinda Korzain, aur Baitsaidá o Kaparnáhúm ko, ki jin meñ us kí bahut sí karámaten wuqú meñ áí thíñ, bataur tañ o tishna ke farmátá hai, ki “Ai Korzain, tujh par wáwailá hai; Baitsaidá, tujh par wáwailá hai; is liye ki agar yih muajaze, jo tumheñ dikháe gae, Súr o Saidá meñ dikháe játe, to we táť pahinkar aur ráḡh malkar kabke tauba kar chukte.” To afsos, ki báwajúd zuhúr aisí karámaten ke un sang-dilon ne tauba na kí; isí wáste hamáre Ḳhudáwand ne farmáyá, ki ádálát ke dín un kí hálat Súr o Saidá kí hálat se badtar hogí. Pas, us ne gunahgáron ko, panáh ke wáste, baří mahabbat o kamál iqtidár se buláyá: “Ai sab logo, jo farománda aur zerbár ho, idhar mere pás áo: main tumheñ árám dúngí. Merá júá apne úpar le lo, aur mujh se síkho; ki main farotan aur dil se ḡhásár húñ; aur tum apne jion meñ árám páoge; ki merá júá mu.aim, aur merá bojh halká hai.” Pas, ab hamen lázim hai, ki is áyat ke máne daryáft karne ke liye Janáb Rabb-ul-álamín se madad talab karen. Bad is ke fahmáish is tafsír ko chár hisson par taqsím karte haiñ:—Pahle yih, ki buláne, yañe dáwat kí zurúrat i ḡháss o matlab kyá hai. Dústre, ki kis kí dáwat hotí hai. Tísre yih, ki Masíh ká júá muláim, aur us ká bojh halká hai. Chauthé, us ke júe ke tábi hone se gunáh ke zerbár apní jánon meñ árám páte haiñ.

I. *Buláne, yañe dáwat i Masíhí kí zurúrat i ḡháss o matlab kyá hai?*

Masíh ke nazdík áne se yih matlab hai, ki ham apne gunáhog se tauba karke sachche ímán se áp ko us kí itáat meñ masrúf rakheñ, balki jismání taur par nahín; kyúñki aisá hí hotá, to us kí zindagí ke waqt mumkin thá, jab ki wuh is jahán i fání meñ maujúd thá; lekin jab ki us Ḳhudá i mujassam ne saúd farmáyá, to aisá qiyás karná ná-mumkin hai, ki jismání taur par us ke huzúr házir hon. Pas, jis tarah kí gunáh ham ko us ke huzúr se dúr kartá hai, usí taur tauba aur ímán bhí hamen us ke pás pahuncháte haiñ. So in áyaton se bhí mere pás áne ke yih matlab o mání samjhá cháhiye, jo áyanda áyaton ke haiñ; Mujh par tawaḡkul rakho; Mujh par ímán láo; Mujh par nigáh karo aur bach jáo; aur in sab áyaton meñ Ḳhudá kí Rúh i Pák ká asar i kámila insán ke dil meñ záhír hotá hai, jis se ki ham táqat páte haiñ, ki ham ímán meñ zabardast hokar us naját ko badil o ján qabúl karen. Alhásil niháyat gaur ká maqám hai, ki injil i muqaddas kí dáwat Musalmán o Hindúon ke mazhab ke muwáfíq nahín; jaisá kí Róm. 1: 16 meñ mastúr hai; “Kyúñki main Masíh kí injíl kí bábat sharmátá nahín; ki us ke wasíle Ḳhudá Qádir hai, ki harek ko, jo ímán látá hai, naját baḡhshé, pahle Yahúdí ko aur phir Yúnání ko;” kyúñki us kí ḡhássiyat o sírat muláim hai, aur jab ki us ko durustí se qabúl karen, to zurúr natíja yih hai, ki tamáníyat i rúhání o jismání hásil ho. Ab sábit húa, ki yih mazhab i haqíqí us Ḳhudá i qádir o quddús se hai.

Pas, ai bháio, jo kuchh is dāwat i injil kí sírat o safát kí bábat jahán tak ki ham se ho saká, bayán kiyá; magar yún lázim hai, ki us kí zurúrat par k̄hiyál karen; kis wáste ásan nahín, ki harek ádmí aslí mání o matálib is dāwat ki daryáft kare; hán, magar we log, ki jin kí fahm ko K̄hudá kí Rúh ne roshní baḡhshí hai; kyúunki we us kí hidáyat se apní tabáh hálát ko gaur karke us kí zát i pák ko apní ján kí panáh jánkar us áftáb i naját ke sáye ki taraf daurte hai. Aur insán i k̄hákízád ká ilm kotáh hai; is liye wuh k̄hud baḡhud be hidáyat i Iláhi is niāmat i dāwat kí zurúrat o tīnat ko qiyás nahín kar saktá; 1 Kar. 2 : 11, “Kí ádmí kí rúh ke siwá, jo us men hai, kaun us ke ahwál ko jántá hai? isi tarah koí K̄hudá kí rúh ke siwá K̄hudá ká hál nahín jántá.” Algaraz, ai naját ke tálib, haqíqí rást-bází kí shinákht hásil karná duniyáwí ilm o izzat o daulat ke maqdúr men nahín; kyúunki qadím tawárikhon se sábit hai, yāne Misrión, o Kaldión, o Yúnánión, o Rómión kí tawárikh ke mutála karne se bilkull hál daryáft hotá hai, ki we log ilm i duniyá men niháyat kámil aur mustaid bhí the; tis par bhí sachche dín kí we chíze, yāne dín i haqíqí, ki jis ke daryáft se un kí abadí bihtarí thí, mahz jáhil o mahrúm the; aur máhiyat i Parwardigár o Iláhiyat ko daryáft na kar sake; to záhir húa, ki us ilm se un ko kyá fáida; un kí hálát haqíqat men waisí hai, jaisá kí muqaddas Púlís ne Róm. 1 : 21, 22 men bayán kiyá hai, “Kyúunki unhon ne báwajúde ki K̄hudá ko pahcháná, us kí taqdís us kí K̄hudái ke láiq na kí, aur na shukrguzári kí; par apne qiyáson se gumráh ho gae, aur un ke dil náfahmí se tárik hue. We apne taín hakím thaharáke ahmaq ho gae; aur unhon ne gair fání K̄hudá ke jalál ko Ádam i fání kí, aur parindón, aur chárpáeón, aur rengnewáli chízon kí shakl kí shabih se badal kiyá.” Alhásil is zamáne kí hálát, yāne but-parastí, jo ki Ahl i Hind men ráij hai, niháyat qábil i gaur hai; kyúunki un kí but-parastí kí tárikí ne gálib hokar yahán tak un ke dilon ko tíra o tárik kar diyá, ki un ke ayál o atfál bhí us fiál i but-parastí men kis qadr sargarmí se mnstaid hokar koshish karte hai. Pas yih k̄haráb háláten dekhkar kamál yaqín hai, ki is sabab se jalál ke K̄hudáwand ne apná taḡht i ásmání chhorá, aur jism i k̄hátí ko qabúl karke ham men sukúnat iḡhtiyár kí, aur gunáh ke zerbáron ko kamál rahm o mihrbání se pukártá hai, táki us se apne is marz i gunáh ká iláj talab karen. Pas, kyá hí mubáarak hai we, jo apní is tabáh hálát se ágáh hokar us hayát kí panáh ke pás bhágte hai. Ai sunnewálo, agar hamará K̄hudáwand mujassam hokar aur dukh uṡhakar apne beshqímat lahú ko na bahátá, to gunahgáron ká hál kaisá burá hotá; kyúunki K̄hudá kí shariát i pák, jo torí gain thin, hargiz púrí na hotí; to lázim hai, ki us ke is jahán men áne kí zurúrat men hargiz shakk na karen. Ab ai piyáre bháio, yih dāwat ham tak pahunchí. Pas, báwajúd is pahunchne ke, jaisá ki Injil i sharif men zikr hai, qabúl na karen, to yaqín hai, ki hamará hál bhí un kí háláton se badtar hogá, ki jin ko bádsháh ke beṡe kí shádí men dāwat dí gai thí, aur unhon ne, jaisá ki wasíqa i jadíd men likhá hai, qabúl na kiyá; lekin ham jo is dāwat ko qabúl karen, to barakat i mauúd hamará hissa hogá, ki jo K̄hudáwand Isá Masíh ne apní zubán i mubáarak se irshád farmáyá, jaisá ki Matí 25 : 34 men mazkúr hai,

“Tab bádsháh unhen, jo us ke dahní taraf haiñ, kahegá, ki Ai mere Báp ke saádatmand logo, idhar áo, aur wuh mamlúkat, jo biná i álam se tumháre liye taiyár kí gaí hai, mirás men lo.”

II. *Kis kí dáwat hotí hai?* Pas, jab ki is dáwat kí zurúrat aur matlab kí bábat daryáft ho chuká, to lázim hai, ki jin logon ke wáste yih dáwat muqarrar húi, us par gaur karen; kis wáste, ki yih dáwat gunáh ke zerbáron ká hissa húa, aur un ko ináyat kí gaí; aur jis súrat men ki gunáhon ke wáste inám i dáwat kháss ho chuká, to kisi tarah kí qaum o zát, kále o gore kí qaid na rahí. Dekho ki dunyá kí sab qaumen un hí wálidain i auwal, yane Ádam o Hawá se paidá hún; to wáqi yih hai, ki is sabab se ham sab bhí gunahgár o tabáhkár haiñ, aur isí wáste hamáre mubáarak Naját-dihinda aur K̤halási Denewále ne yih dáwat i naját ám ko atá kí, na kháss ko: aur Púlús Hawári ne bhí Kalasioñ ke maktúb men Rúh i ilhám se farmáyá, (3 : 11,) ki “Waháñ na Yúnání hai, na Yahúdí, na khatna, na námaḡhtúní, na Barbarí, na Isqútí, na banda, na ázád; par Masih kull aur kull men hai.” Aur yád karo, ki har firqe ke log buláe gae haiñ, aur wáqi sab ke wáste hai; par we log na yaqín karenge, jo apne dil men magrúr o mutakabbir hokar apní rástí par bharosá rakhte haiñ; kyúñki K̤hudáwand farmátá hai, ki Main rástbázon ko buláne nahín áyá, balki gunahgáron ko, táki tauba karen. Ab zábir húa, ki is dáwat se faqat wuhí log fáida páwenge, jo log, ki halímí, shikasta-dilí ke sáth us ko qabúl karen, aur apní rástbází par takiya na rakhkar ap ko past o haqír samajhte, aur cháhte haiñ, ki un ke dilon par Masih kí saltanat qaím ho. Poshída na rahe, jin rozon men hamará K̤hudáwand is ná-páidár dunyá men guzrán kartá thá, tab apní yih dáwat i ám farmái; magar jab ki ásmán par tashrif farmá huá, tab us ne apne Hawárion ko hukm kiyá, ki is khushkhabarí kí manádi karen; aur wuh hukm yih thá, ki tum tamám álam men is injíl kí manádi karo; aur tum ne muft páyá hai, muft do.

Par sháyad báze jihálat se ittiráz karke kahen, ki agar yih dáwat i ám hai, to sab log is ko qabúl kyún nahín karte? Lekin is ká jawáb ásán hai; aur sabab is ká yih hai, ki insán ká dil bad hai; aur is muqaddame men kitáb i muqaddas farmátí hai, ki insán ká dil niháyat burá, aur aisá kharáb hai, ki kaun useján saktá hai? Us kí khássiyyat yih hai, ki K̤hudá aur us kí rahmat se dushmaní rakhtá. Dekho, jo log ki injíl i sharíf se munáir haiñ, we zurúr dushman i K̤hudá hokar yih cháhte haiñ, ki bilá muzáhimat ke zindagí basar karen; aur we hí log ámál i gunáh se khush hokar k̤hiyál karte haiñ, ki apní tabáh auqát aur apní daulat nafsání khwáhishon men basar o sarf karen; par Masih kí itáat o pákízagí se zindagí basar karná un ke takabbur o gurúr ke barḡhiláf hai. Pas, we is k̤hiyál se kitáb i Iláhí ke munkir haiñ; kyúñki jin logon ne daulat ke sabab se kuchh izzat páí, we to niháyat magrúr hokar nahín cháhte, ki be aqlon aur sáda dilon kí mánind halímí anr farotaní se Masih aur us kí naját kí bábat talím hásil karen; magar apne hí ámál o fiálon par takiya karke apní tahsín o áfrín kí khwáhish rakhte haiñ. Algaraz, un ká hál haqiqat men aisá hí hai, jaisá ki Púlús ne farmáyá hai, ki We apne taín aqlmand

samajh kar nádán ho gae. Aur yih bhí K̤hudá ke kalám se maḷúm hotá hai, ki aise hí log us táríkí meṇ dále jáenge, jahāṇ roná aur dánt písná hogá. Illá ummed hai, ki ham log jo is dāwat ko qabúl karke mutawajjih hoṇ, to K̤hudá Taālā aisoṇ ke haqq meṇ farmátá hai, ki agarchi hamáre gunāh shabānī hoṇ, par barf kí mánind sufed honge ; aur agarchi argawānī hoṇ, tis par bhí ún kí tarah ujle honge ; yaṇe, bilkull muáf kiye jáenge ; kyúunki Masíh is liye áyá, ki khoe húoṇ ko dhúndhe aur bacháwe.

III. Ab tísre hissa par tawajjuh lázim hai, ki *Masíh ká juá muláim, aur us ká bojh halká hai.*

Gaur karo, ki is júe se yih murád hai, yaṇe Masíh kí itáat o pai-rauí karná ; kyúunki farmátá hai, ki yih júá ásán hai. Is júe kí halkái Yahúd kí díní rasmoṇ par gaur karne se maḷúm hogí. K̤húb zâhir hai, ki Yahúd kí ibádat ke dastúr, jaisá ki Tauret meṇ mundarij haiṇ, bahut saḡht o dushwár haiṇ. Aur we rasúm, jo Yahúdoṇ par farz the, hamáre Naját-dihinda i mauúð ke ni-hán the. Pas, jab kí Masíh á chuká, aur wuh waða wafá ho chuká, to zurúr hai, ki wuh kámil ho-kar misl bojh ke ho gaú ; aur jis hâlat meṇ kámil ho chukíṇ, to kyá zurúr hai, ki Ádamzád un kí qaid meṇ rahe ? Is ke subút meṇ ham chand áyát injíl i muqaddas se istiḡhráj karke bayán karenge. Pat-tras ne ek majlis i Yahúd meṇ ilhám kí taqwíyat se yún farmáyá, “Pas, tum kyún K̤hudá ko ázmáte ho, aur shágirdoṇ kí gardan par júá rakhte ho, jis ke uṭhâne par na hamáre ábá qádir the, na ham haiṇ.” Ámál 15 : 10. Aur Púlús hawárí shahr Galatía ke Ísáioṇ ko nasíhat kartá hai, ki us se ázád rahen, jo baze jhúṭhe muállim un par rakhá cháhte ; aur yún likhá hai, “Pas, jo ázádagí Masíh ne tumheṇ baḡhshí, tum us par qáim raho, aur asírí ke júe tale do bára na juto.” Gal. 5 : 1.

Shaitán ek áqá i zálím hai, aur us ke tábidár apní jánoṇ meṇ kuchh chain o árám nahíṇ páte ; we roz o shab baří baří mihnaten o mashaqqaten uṭháte haiṇ, táki us áqá ko razámmand karen. We to kamál mihnát o sargarmi se talásh karte haiṇ, ki daulat ko paidá karen ; lekin kyá we aísí mihnatoṇ o mashaqqatoṇ se kuchh chain o árám hásil kar sakte haiṇ ? Hargiz nahíṇ. Kyá is ráh meṇ, ki jis ká safar darpesh hai, yib daulat i dunyawí misl káñṭoṇ ke nahíṇ ? Kyúunki jis hâlat meṇ kisi taur ká un ko árám is dunyá i fání meṇ há-sil na ho, to us álam meṇ, ki baqá hai, kyúunkar árám páwenge ? Kyá Shaitán ke tamám dawe bátíl nahíṇ ? Balki kitáb i muqaddas bhí is bát par gawáh i kámil hai :—“Tum apne báp Iblís se ho, aur pasand karte ho, ki apne báp kí khwáhish ke muwáfíq karo : wuh to ibtidá se qátíl thá, aur haqq par sábit na rahá ; kyúunki us meṇ haqq nahíṇ. Jab wuh jhúṭh kahtá hai, tab wuh apní kahtá hai ; kyúunki wuh jhúṭhá hai, aur us ká báp hai.” Yúh. 8 : 44.

Algaraz is bát ká bayán karná ham par niháyat farz hai, ki K̤hudáwand ká júá un donoṇ mazhaboṇ ke júe se niháyat muláim hai, jo is mulk i Hind meṇ murauwij haiṇ, yaṇe Hindú o Musalmán ke dín ; ki jin mazhaboṇ se is jahán meṇ tasallí baráe nám bhí nahíṇ hotí, to áqibat meṇ kyá hál hogá ? aur ham meṇ se kitne us júe ke bojh kí taklífát i sharáí ko

ikhtiyár bhí kar chuke haiṅ. Dekho qaum i Hunúd ko,—kitne deo-tāṅ kí parastish karke bahut sí rasúmát i díní bajá láte haiṅ. Aur waise hí dín i Mahammadí ke tábaín, ki az bas saḡht júe ke tale haiṅ. Afsos, sad afsos ! bhalá, batáo to ki kaun aisá Musalmán apne dín par qáim hogá, ki jo apne dil meṅ yih tasauwarát na kartá ho, ki jo Ramazán ká mahíná na hotá, to bihtar thá ; kyúinki is qadr dushwári na hotí, aur na is tarah ke hazárhá taklifát i sharáí, ki jin ká mazkúr is muḡhtasar meṅ mumkin nahín ; aur we taklifát namúna is saḡht júe ke haiṅ, ki jin kí bardásht karke gunáh aur Shaitán kí gulámí se ázád honá niháyat mushkil hai.

Pas, jo in mushkilát se riháí pá chuke haiṅ, un par farz hai, ki hazárhá hazár shukr aur taríf Janáb Rabb-il-álamín ko pahuncháweṅ, jo ki apne tamám o kamál fazl o karm se un ko Ḳhudáwand Ísá Masih ke muláim júe ke tale láyá. Aur yih bhí ummed rakhná cháhiye, ki jis ne apne bihtarín amúr ko un ke dilon meṅ paidá kiyá, be-shakk o shubha us ko tamám bhí karegá. Lekin jis dam ki yih kahá gayá, ki Masih ká júa muláim aur us ká bojh halká hai, to sháyad ki koí is sawál ká jawáb púchhe, ki Yih bojh, jo hamará mubáarak Naját-dihinda apne shágirdon par rakhtá hai, so kyá, aur halká kis tarah hai ? To jawáb us ká yih hogá, ki halká bojh is se murád hai, ki kamál Ḳhushí se un musíbaton o mushaqqaton ke tábi hon, jo ki is dunyá i fání meṅ us par ímán láne se ham par láhaqq hongé ; aur zurúr i mutlaq hai, ki Masíhí is bojh ko niháyat sabr o dilerí se uṡhá len ; kis wáste ki yih jagah ímándáron ke áram kí jagah nahín. Ham to musáfir haiṅ, aur bihisht hamará ghar hai ; us ghar ko mulk i dushman ke darmiyán guzar karke jáná hotá hai ; is liye is safar meṅ ham ko kamál mushkilát o taklifát darpesh hongí. Aur kitáb i muqaddas bhí aisá hí irshád kartí hai, jaisá ki Ámál 14 : 22 meṅ mazkúr huá, Shágirdon ke dilon ko taqwiyyat aur tákíd kí, ki ímán par sábit rahen ; aur kahá, ki ham par wájib hai, ki barí mashaqqaton se Ḳhudá kí mamlukat meṅ dáḡhil howen. Agarchi sádiq Masíhí Ḳhudáwand Masih ke ḡhún i mubarak se dhoyá gayá, aur Rúh-ul-Quds kí tásír i álá se pák o sáf kiyá gayá hai, tis par bhí jis dam tak ki wuh is álá-ish i dunyawí meṅ maujúd rahtá hai, us waqt tak gunáh o ḡharábí i aslí kí bunyád us meṅ baní rahtí hai ; is liye wuh gamgín hotá hai, ki jo us par farz haiṅ, adá nahín kar saktá ; qazá i kár wuhí us se wuqú meṅ áte, aur us kamzorí ke báis, jo nekián, ki wuh kiyá cháhtá hai, us se ho nahín saktín ; tab us dam wuh Púlús ke muwáfíq faryád kartá hai, Rúm. 7 : 21, 22, “ Garaz main ek qánún pátá hún, ki jab main achchhá kiyá cháhtá hún, tab mujh pás bad maujúd hotá hai ; ki main apní insániyat i mánawí meṅ Ḳhudá kí shará se rází hún, aur dúsrí shará ko apne band band meṅ dekhtá hún, jis ko merí ḡhirad kí shará se jang hai ; aur main gunáh kí shará ká, jo mere band band meṅ hai, asír hún.” Algaraz yih laráí gunáh aur pákízagí se hotí hai ; aur záhir meṅ, yaṅe dunyá ke logon se use taklíf pahunchegí. Lekin agar dunyá unheṅ satáwe, to kuchh muzáíqa nahín ; kyúinki Ḳhudá i Rahím un se barakat i ḡháss ká waḡda kartá hai. Matí 5 : 11, “ Nekbaḡht ho tum, jab ki log tumheṅ mere wáste malámat karen, aur dukh dewen, aur sab tarah kí jhúṡhí burí báten tumháre haqq

men kahen.” Un ko zurúr hai, ki har ek gunáh-ámez áish o isbrat, o suhbat i bad se hazr karen, aur apní ánkhoñ ko tamám lazzat i nafsání se band karke ásmání chizon par lagáwen. Aur niháyat zurúr hai, ki apní salih uþhákar dam ba dam us kí pairaui karen; aur un sazaon ko, jo kí Khudá Báp un par názil kartá hai, sabr se bardásht karen; kyúñki ha-árári abadí bihtari us men hai; jaisí kí Ibr. 12 : 6 men hai, ki “ Khudáwand, jise piyár kartá hai, use tambíh kartá hai; aur har ek beþe ko, jise wuh qabúl kartá hai, píttá hai.” Pas, halká bojh yih hai, ki jo Masih ne apne shágirdon par rakhá; aur us ká anjám hayát i abadí hai.

Aur yih bojh bhí banisbat aur bojhoñ ke niháyat ásan aur halká hai. Wuh gunáh, ki jis par abr i magfirat na barsá ho, wuh is dunyá aur uqbá men bhí bojh kí mánind hai; aur wuh gunahgár, ki apní nínl se bedár na húa, ek niháyat bhárá bojh rakhtá hai. Wuh jántá hai, ki Khudá ká gazab us par jhúm rahá hai; is liye wuh roz o shab áram nahin pátá. Chunáñchi Dáúð nabí bhí aise shakhs kí bábat men bayán kartá hai, Zab. 38 : 2—6, ki “ Tere tír mujhe chubte haiñ, aur terá háth mujh par thárá hai; main dukh bhartá hún, aur kamán ho gayá hún. Main din bhar royá kartá hún ” Dekho badon kí hálát bhí jahán i áinda men aisi hí kharáb hogí, ki qiyás men nahin átiñ. Badtarin taklifát kí Isái is dunyá men uþháte haiñ, hargiz hargiz us azáb se muqábil no hongí, jo kí uqbá men gunahgár jahannam men uþháwerge. Aur kalám i muqaddas bhí un hálátón ká bayán niháyat hí haibatnák taur par áshkár kartá hai, (Zab. 9 : 17; Matí 8 : 12; Mar. 9 : 46.) “ Gunahgár pátál men dále jáenge, aur we sári qaumen, jo Khudá ko farámosh karti haiñ.” “ Par is bádsháhat ke ye larke láhar andhere men dále jáenge : wahán roná aur dánt písná hogá.” “ Jahán un ká kírá ákhir nahin hotá, aur ág nahin bujhti.” Pas, badkároñ aur gunahgároñ ká hál jaisá kí marqúm húa, waisá hí hogá, aur bhí wuh bojh, jo bhárá kahá játa hai, yihí gunáh ká bojh hai, ki jis ke niche we dab gae. Ab samjhá játa hai, ki is hál men un ke dilon ko kyá chain milegá; kyúñki áram o tashaffi páne kí kyá ummed báqí hai? balki náummedí o azáb ke siwá aur kuchh nahin. Agarchi we log is dunyá men magrúr hokar Masih ke is halke bojh ko haqir jánte the, par is hálát i yás men us bojh ko páwen, to háthoñ se kyá, balki ánkhoñ se us bhárá bojh ke badle uþháwen, aur badil o ján qabúl kar len. Par us waqt husúl us niámat ká kamál námumkin hogá, aur un ko apni sakht dilí aur gardan kashí kí sazá zurúr uþháni hogí; aur yih sazá is qadr sakht aur badtar hogí, ki ek búnd pání bhí muyassar na hogá; us waqt daulatmand o Lázar kí tamsíl yád kí cháhiye, ki wuh daulatmand, jo is jahán men rahne ke waqt apní shán o shaukat, áish o ishrat men masrúf thá, bad marne ke kis qadr azáb i jahannam men pará, aur niháyat tang hokar árzú kí, ki wuhí Lázar, jis ko kí wuh us zindagí men haqir o náchíz jántá thá, us ke pás jáke us kí zubán ek qatra pání se seráb kare; phir yih bhí nasib na húa.

IV. Yih, ki Khudáwand ke júe ke mutahammil hone se gunahgároñ ko chain o áram hásil hotá hai; yane, ba sabab kasrat gunáh ke, ki

niháyat bhárí bojh hai, zurúr hai, ki we áráam ke muhtáj hon ; jaise ki nafsání ádmí daulat o aish o ishrat ke husúl karne ke liye, roz o shab mihnát khainchtá hai, aur kuchh bhí áráam nahín letá ; aur agarchi us mihnát i sháqqa se áráam páwe, to apne taín, kamál khush nasíb samajhtá hai ; magar yih námumkin mahz hai. Par is bát ká qiyás karná zurúr hai, ki hamáre Khudáwand Naját-dihinda ne kaun se aur kis tarah ke áráam ká wáda farmáyá hai ? ki yih áráam i dunyáwí aur jismání nahín, balki abadí rúhání hai ; aur hamará Naját-dihinda kháss yih áráam apne ímándároñ ko áta kar saktá hai, ki jis ne apná besh qímat khún bahákar us áráam ko kharída. Magar sachchá Ísáí is dunyá i fání meñ musáfir ke taur par hai ; par bihisht kí taraf, ki jo us ká watn i kháss, aur us ke Bap ká maskan hai, niháyat chálákí se safar kartá hai ; aur us safar ke tamám karne ke liye zurúr hai, ki har nau kí musibat o tarah tarah kí azíyat, ki jo is musáfirat kí ráh meñ pesh áweñ, un ká mutahammil hokar un kí mushkílát par gálib ákar fathmand ho, aur kusháda ráh ko tark karke tang ráh par qadam máre, Matí 7 : 13, 14. Aur is musáfir kí zindagí kí tamsil dauñe se bhí mushábih hai, aur lázim hai, ki jis dam tak is dunyá meñ zindagí kare, chaltá, balki daurtá hai, itná ki wuh nishán, jo us ke liye thaharáyá gayá hai, wahán tak pahunché ; aur jaisá ki Púlús Hawárí ne i hám se farmáyá hai, Fil. 3 : 14, “ Par itná hai, ki main un chízon ko, jo pable chhúñ, bhuláke, un ke liye jo áge haiñ, baghá húa sídhá nishán kí taraf pilá jatá húa ; táki main us gend ko, jis ke liye Khudá ne mujhí ko Masih Ísá kí marifat se úpar buláyá, páñ.” Pas, agar yihí hál hai, to záhír húa, ki sachche Ísáí ko, is nápáidár dunyá meñ, kis chíz par ummed ho saktí hai ; háñ, magar siwá us ke, ki us kí zíst ko laráí se tamsil dí hai ; is wáste us ko zurúr, ki jab tak fazl i Iláhí shámil i hál hokar apne tamám dushmanon, misl Shaitán o nafs i ammára par gálib na áwe, lartá, aur un par fathmand hone ke liye sargarm rahe ; aur usi ke bayán meñ Khudáwand ne Matí ke 5 : 29 meñ farmáyá, “ Pas, agar terí dahni ánkhi tere thokar kháne ká báñ ho, to use nikál dál, aur phenk de ; kyúñ tere azíon meñ se ek azí ká na honá tere liye us se bihtar hai, ki terá sára badan jahannam meñ dálá jáwe.” Dindár Ísáí ko zurúr hai, ki har taur kí nekokárí meñ kámil bane, aur apne nuqsán ke khauf se taiyár ho, balki apne hawá o hawas, o kibr o gurúr ká mutí na hokar apne Khudáwand kí tarah halím o farotan rahe ; aur apne hawás o khaslat i náqis ko maglúb karke apne jism o rúh ko un sab buráíon se, ki úpar mazkúr ho chukín, pák sáf kare ; kyúñki wuh Rúh-ul-Quds ká ghar hai ; aur usí ke wáste Púlús Hawárí bhí kahtá hai, 1 Kar. 6 : 17 meñ, “ Par wuh, jo Khudáwand ke sáth milá húa hai, so us ke sáth ek ján húa hai.” Aur yih bhí lázim hai, ki har tarah kí musibat o áfat ká mutahammil ho ; agarchi us ke qarib o rishtadár bhí use satáweñ, to satáe jáne kí iwaz koí khiyál i bad apne dil meñ na láwe, yahán tak ki koí dahne gál par tamácha máre, to báyan bhí us kí taraf pher de, jaisá ki marqúm hai, Matí 5 : 39 meñ. Pas, use cháhiye ki roz ba roz apní salíb apne úpar utháwe, aur apne Naját-dihinda ke píchhe chale. To sábit húa, ki yih sab mazkúr, jo likhá gayá, us kí bardásht se us ko kisí tarah ke áráam kí súrat mutasauwar nahín. Wuh un laz-

zát i nafásání o khatráti i jismání se ba nisbat jism ke ek murda hai, ki jin ko duniyawí log kamál sargarmí se just jú karte haiñ. Us kí khurramí o khushí un rúhání chízon meñ hai, kí firdaus meñ muqaddason ke liye maujúd kí gaíñ. Wuh apní sab musibatón aur dukhon meñ, faqat is bát par qináat karke tasallí pátá, jo kí Khudáwand ne wada kiyá, kí main duniyá ke ákhir tak tumháre sáth hún. Agarchi wuh barí barí áfatón meñ pare, tis par bhí Khudáwand, vane us ká ásmání Báp, apne fazl o karim se use sambháltá hai; aur alákhir Khudáwand Isá Masih kí madad se maut par fathiyáb hotá hai. Algaraz yih mukhtasar bayán un khushíón ká ho chuká, jo kí rúhání haiñ; aur mard i nafsání un ko nahíñ samajhtá, aur mard i dindár ko is khiyál se, kí us ke sab gunáh muáf kie gae, kyá hí áram o chain miltá hai. Jis waqt kí us par sábit ho chuká, kí wuh áish i rúhání, kí bihisht meñ maujúd hai, shámil húa, tab wuh rúhání taur par zindagí basar karta hai; aur is bát se wáqif hokar kamál khush hotá hai, kí Khudáwand ne us ke dil ko apná maskan banáyá, aur wada bhí kiyá, kí tum apní jánon meñ áram páoge. Yih ummed i qawí hai, kí jab ham farotání se us kí dawwat ko qabúl kar len, tab wuh biláshakk apne wada ko púrá karegá. Alhásil ham par farz hai, kí apne tamám zor o táqat ko, usí kí itáat meñ sarf karke apní sári mihnát o khwáhish i dilí ko us par rujú karen, yahán tak kí jo aisá ittifaq ho, to us ke nám o jalál záhir karne ke liye apní ján bhí dareg na karen, aur janáb Ahdiyát se duá mángkar dil se yih cháhen, kí wuh Púlús kí mánind ham ko un kamzoríón se chhuTkára deke táqatmand kare, khwáh jien yá mareñ, wg. Aur dindár log jis qadr lábayán khushí hásil karen, waisí hí izzat bhí un ká hissa hogí. Wuh chashma, kí jis se muqaddas maláik apne liye nekbakhti o khushí dhúndhte haiñ, usí chashme se we log, jo muqaddas haiñ, wuhí khushí, jo kí abadí hai, páwenge. Poshída na rahe, kí janáb Rabb-il-álamín ke farzand wuhí log kahláe jákar jalál i abadí ke táj se sarfaráz kiye jáenge, jo kí us ke azíz aur eklaute BeTe mubáarak Khudáwand par ímán láte haiñ, 1 Pat. 5: 4. Pas, wuh chain o áram, jo kí kháss ham gunahgarón ke liye wada húa hai, aur us ká mazkúr bhí úpar ho chuká, cháhiye kí apní tamám o kamál táqat o dars se us kí tahsíl meñ koshish karen; aur agarchi ham us daulat i naját ke tálib hon, to munásib yih hai, kí us Khudáwand Masih ke huzúr meñ házir hon, kí jis ká júá muláim, aur us ká bojh halká hai; aur apne ma'búdí kí ibádat gulámána mizáj se na bajá láwen, magar mahabbat i farzandána se; aur us ke adá meñ saí karen, kí us ká anjám jalál o hayát i abadí ho; aur is dawwat i haqiqí ko, kí Masih ne apní áli sarkár se ham gunáh ke zerbáron ko atá kí, aur bulátá hai, qabúl karen, aur apní tamán fikr us meñ sarf karen, jo kí Málík i hayát aur jalál ke Bádsháh ne irshád kíñ; aur jis ne apne pák khún aur Rúh-ul-Quds kí tásir se ham ko gunáh kí álúdagí se mubarra kiyá, niháyat zurúr hai, kí apní qudrat i rúhání o jismání us kí bandagí meñ kharch karen, kí jis ne apní mihrbaní se Shaitán kí gulámí se ázád karke rahmat i Iláhi ke shánil kiyá.

Ai azízo, lázim hai, kí tamám baní Ádam kyá Isáí, aur kyá Musalmán o Hindú, wagairah, jo kí is kháksár ne bayán kiyá, mutaffiq alaiha hokar ba gosh i dil suno, samjho; kyúnki waqt nazdík, aur maut

muntazir hai, kis dam ham ko apnī āgosh men le ; aur zāhir hai, ki baḍ us ke kuchh na ban āwegā ; kis wāste, ki yih najāt kī khush-khabarī ham tak pahunchī, aur bār bār is fazīlat ī behadd ka bayān, jo ki Khudā Bāp ne Rūh ul Quds kī maʾrifat ham par bahāyā, sunāyā gayā. Pas, taajjub hai, ki bāwajūd us mubārak khush-khabarī ke, jo ki mubārak Najāt-dihinda ne hamāre wāste aṭā kī, shinawā na hon, to yaqīn hai, ki kitāb ī muqaddas kī wuh āyat hamāre haqq men rāst hogī, jaisā ki Āmāl 7 : 51, “ Ai gardan kasho, aur ai dilon aur kānon ke nāmaḡhtūno, tum hamesha Rūh ul Quds kī muḡhālifat karte ho, jis tarah,” wg. To sābit hai, ki aisī saḡht-dilī kā ākhir kyā hūā ; iltijā hai, ki merī iltimās kamāl insāf o Khudā kā khauf karke suno, tāki wuh waḍa, jo Khudā ī rahīm ne apne eklaute Beṭe kī maʾrifat se tumhāre haqq men kiyā hai, hāsīl ho ; phir yih bhī ummed hai, ki Najāt-dihinda us mahabbat ī lāsānī se ham ko kahegā, ki Ai mere bāp ke saʿadatmand logo, āo, aur us bādshāhat ko mīrās men lo, jo binā ī ālam se tumhāre liye taiyār kī gāī ; aur tamām izzat aur shukr us ke pāk nām kā ho. Āmīn.

XXVII.

RUHĀNĪ DAUR DAURNE KĪ BĀBAT.

MUNSHI' MIRZA' JOHN BEG KĪ TASNĪF.

Pas, jab ki ham gawāhon ke itne bare abr se ghīre hūe hain, to āo, har ek bojh aur uljhānewāle gunāh ko utārke bardāsht ke sāth us rāh men, jo hamāre liye muqarrar kī gāī hai, dauren ; aur I'sā ko, jo imān kā shurū aur kāmīl karnewālā hai, takte rahen.—Ibr. 12 : 1, 2.

ALLĀH Taʿālā ne banī Ādam kī tabāhhālī par nazar karke apne kālām men apnī pahchān aur apne ilm kā taur is andāz par likhwāyā, ki banī Ādam kī aql, jo gunāh ke zor se nātawān ho gāī hai, ba saḡhūliyat tamām daryāft kar sake. Khusūsan jin shuglon aur duniyawī kār o bār men we ziyādatar mashḡūl rahte hain, unḡin kāmōn ko rūhānī ishāre kanāyon men bayān kiyā, tāki un ke dil unḡin ke kāmōn ke wasile razāmand hokar us kī mahabbat kī taraf rujū karen. Chunānchi injīl men dekho, ki hamāre Najāt-dihinda ne aksar āsmānī bādshāhat kā rāz tamsilon men bayān farmāyā ;—kahīn jāl kī tamsīl, kahīn kisān kī tamsīl, kahīn shādi, kahīn khamīr kī. Aisī aisī misālon se, jo qarīb ul fahm thīn, āsion ko samjhāyā. Usī naqsh ī qadam par Pūlūs rasūl ne bhī jab dekhā, ki Yūnānī Rūmion men laḍ o bāzī kā beshtar charchā hai ; to jis waqt un men injīl sunāī aur maktūb likhe, to kushtī o

ghūnse larne, aur daurne ká rúhání taur par bayán kiyá, táki wuh kalísiyá apne károbár ke wasile rúhání aur dilí muddá ko samajhkar hayát i abadí ke láiq ṭhaharen. Wáh, kalám i Iláhí men kyá hí shíríní hai ! Dáúid farmátá hai, kí “ Terá kalám shahd se shírín, balki us ke chhatte ke ṭapakne se shíríntar hai.” Chunánchi is áyat men bhí ek daur ká mazkúr hai, jo ḡháss díndáron kí daur hai, kí is zindagí se hayát i abadí hásil hone tak karte hai :—

Is áyat se tén báten nikaltí hai.

I. Hamári daur kis ráh men hai ?

II. Ham kyúinkar dauren ?

III. Ham kis ke liye dauren ?

Ab kyá ḡhúb hotá, agar ham tínon báton ká mufassal bayán karne se peshtar Yúnáníon o Rómíon kí daur ká dastúr, kí kab shurú húa, muḡhtasar bayán karte, aur is se yih fáida hotá, kí is áyat ká maqsad ham par sáf roshan ho játá, aur jo talím, o targíb o ibrat hamáre wáste nikaltí, us se ham baḡhúbí ágáh ho játe.

Yáwán, Yáfis ká beṭá, aur Núh ká potá qaum i Yúnán ká báp thá. Agarchi Yáfis Khudá i haqíqí kí shináḡht rakhtá thá, magar thoṛe arse men ilm i Iláhí us kí nasl se játá rahá ; aur áftáb o máhtáb kí parastish karne lage. Gumán i gálib hai, kí ek firqe ne, jo Misr se ákar Asína men basá, apná taríq i bátíl Yúnán men phailáyá. Bahar hál un men ek taríq i bátíl aisá riwáj páyá, jis men deotá deotan beshumar ban gáin ; aur yihí báis thá, kí báwajúde kí we adab o qáide men mashhúr the, aur hamesha ilm o hunar kí taraqqí men koshish karte the, aur aksar shujáat o ulú himmatí men namúd rakhte, tau-bhí berahmí aur lazzát i jismání men garq rahte the, garaz koí aubáshí aur fujúr aise na the, jo un ke ḡháss o áh men jarí na húa. Sach hai, kí husn i aḡhláq sirf dín i haqq se mutalliq hai ; wuh aql kí qúwat se hásil nahín ho saktá. Yúnání saltanat qadím se hai ; chunánchi, us ká zikr Ibráhím ke qabl, yane Masihí áhd ke do hazár baras pahle se hotá átá hai. Ab aur báten bahut sí hai, jin ká zikr yahán ábas hai, par jis maqsad par ham ne un ká hál likhá, so yih hai, kí un men kaí nau kí lab o bází un dínon men muqarrar kí gai thín ; magar barí bát yih thí, kí jab un báziyon ká waqt átá, to laṛáían mauqúf ho játín, aur sab log báham mile jule ittifáq se rahte the. Pas, yih báziáq un ke ittihád o mel ká sabab, aur muwáfiqat ke liye bahut hí muassir thín. Un men se Olimpiák kí ek tamáshagáh bahut namúd rakhtí thí, jo pánchwen baras saranjám dí játí thí ; aur hamesha us ká daur aisá ṭhík o barábar átá, kí Yúnání log us ko apní ibtidá i táriḡh jánte ; balki usí ke bamújib barson ká hisáb karte. Isí tamáshagáh men daurte the, jis ká ishára is áyat men hai ; aur kúdde aur kushti ḡhūnse bhí laṛte the, aur lohe ke sonṭe phenkte. Par un men is bát kí barí tákid thí, kí koí mujrim o badnám is tamáshagáh men áp ko harif o sharík na kare. Aláwa is ke ḡhoṛe gárfán dauráte, sháir apne shiār parhte, aur muarriḡh apní tawáriḡh, aur musauwar apní taswiren, o naqqásh sangin paikaren ḡhushtarásh láte. Agarchi un ko kuchh naqd i inám kí ummed o árzú na thí ; sirf zaitún kí pattíon ká táj miltá ; magar jo un men se gálib hotá, aisí izzat pátá, kí urába par sawár hokar jahán guzartá, log ba áwáz i buland tahsín o áfrín karte. Aur jab wuh

apne shahr meṇ pahunchtá, to pháṭak se nahín, par shahr-panáh kī diwár toṅkar dákhil hotá. Aur Yúnáníṇ hī ke dastúr par Róm meṇ bhī Qaisar Agustus ne ek tamáshagáh muqarrar kī thī, jis ká daur ádh koss ká thá, jis meṇ tīn lákh assí hazár ádmí baiṭhte the; aur bahut se kúḍte, pháṇḍte, daurte aur kushtí larṭe.

Khair; ab gaur kiyá cháhiye, ki is áyat meṇ, jo muqaddas Púlús ne daurne ko farmáyá hai, ki “Ham harek bojḥ aur uljhánewále gunáh ko utárke bardásht ke sáth us ráh meṇ, jo hamáre liye muqarrar kī gai hai, daureṇ; aur Ísá ko, jo ímán ká shurú aur kámil karnewálá hai, takte raheṇ,” kvá matlab hai?

Yahán muqaddas rasúl ká matlab us daur se, jo Yúnáníṇ meṇ thī, nahín hai; par us ká ek ishára o kanáya hai, táki múminṇ ke dil uskáe jáweṇ. Púlús farmáte haiṇ, ki “Pas, ham jo gawáhoṇ ke itne baṛe abr se ghire haiṇ,” yaṇe jo gyárahwēn báb meṇ ímándároṇ aur un ke ámalṇ aur jazá ká mazkúr ho guzrá, we sab itne bahut se gawáh haiṇ, ki goyá abr kī mánind ham ko ghère húe haiṇ. Jis tarah ki us tamáshagáh meṇ tīn lákh assí hazár ádmí kháss o áṃ un dawindoṇ aur kushtí ghúṇse larnewáloṇ ko ghère húe the; usí tarah jab ki ham bhī beshumár gawáhoṇ ke áge haiṇ, to lázim hai, ki ham daureṇ; aur is liye bhī, ki ham daurne ko taiyár hokar áe haiṇ. Jab ki we log faqat dunyawí námwarí o fathmandí o surkhrúí ke liye aisí koshish karte the, aur kaise qánún ke sáth, aur kis tarah ke log daurte the; to ham, jo na sírf is jahán, balki jahán i áyanda meṇ apne Khudáwand ká jalál o nám karne ko, aur ákhirat kī nekbaḥtí páne ko haiṇ, kitní ziyádatar jidd o jihd na karen, aur un se kitne bihtar o umda qánún ke páband hokar na daureṇ?

I. Ab pahlí bát ká bayán karen, ki *ham kis ráh meṇ daureṇ?*

Zurúr hai, jaisá un meṇ daurne kī ek ráh thī, ki Masíhíṇ meṇ bhī ek ráh howe. Chunánchi hámárá Naját-dihinda Ísá farmátá hai, ki “Ráh main hún, koí bagair mere wasíle ke Báp pás nahín já saktá;” aur phir farmáyá hai, ki “Darwáza main hún.” Pas, áo ázízo, ham log jo daurá cháheṇ, to Khudáwand Ísá Masíh meṇ daureṇ, ki haqí-qí aur zindá ráh wuhí hai. Aur sach hai, ki Shaitán o dil o dunyá ne hamárá ráh ko pháṭak lagá, aur diwáreṇ uṭhá, o káṇṭe bichhákár band kar rakhá thá, aur apní ráh ko, jo chaurí o kusháda hai, chhirkáo karke o sabza lagáke khol rakhá thá. Koí tadbír aisí na thī, na koí yár wafádár thá, ki ham ko us ráh meṇ daurne ká qábú baḥshstá, yá madad karke us meṇ hamárá hidáyat kartá. Par hazároṇ shukr Ísá Masíh ke hoṇ, ki us ne ek naí o zindá ráh apne parda i jism ko pháṭkar hamáre liye taiyár kī. Ab áo, bháío, chálák dil aur kámil ímán ke sath dil kī nájasatoṇ par chhirkáo karke daureṇ; aur aisá na daureṇ jaisá maqsúd i be sabát kī taraf, par is tarah ki jo kuchh píchhe hai, use chhoṅkar, jo kuchh áge hai, us kī koshish karke, har ek bojḥ aur uljhánewále gunáh ko utárke bardásht ke sáth us daur meṇ, jo hamáre liye muqarrar kī gai hai, daureṇ; aur Ísá ko, jo ímán ká shurú aur kámil karnewálá hai, takte raheṇ.

Phir, is se aur ek bát sochná cháhiye, ki ham meṇ daurne kī táqat bhī na thī; kyúñki jab ham taqsíroṇ aur khatáoṇ ke sabab murda

the, kahāñ táqat thí? Aur daurná kám un ká hai, jo zinda o tandu-rust, aur barhá dam rakhte haiñ; aur yih sifaten ham meñ na thín. Jaisá wuh langrá, jo arhtís baras se us hauz ke páś pará thá, aur yih bhí táqat na thí, kí us meñ utar sake; par jab Masíh ne us ko táqat o tawánái bakhshí, tab wuh khaṭolá lekar chal niklá. Aisá hí wuh lang-rá bhí, jo khushnumá darwáze par baiṭhá bhik mángtá thá, aur jo áp se kabhí wahāñ na á saká; par jab Patras hawáí ne Khudáwand i tawánái-bakhsh ke nám se us ko ek nai quwat bakhshí, to wuh langrá úchhaltá kúdtá daurne lagá. So, ai piyáre bháío, isí tarah ham bhí gunáh karke rúhání langrápan meñ giriftár, aur daurne se mah-rúm the. Par jab us ke fazl i bepáyāñ aur karam i bekarāñ ne ham ko zinda kiyá, tad ham meñ ek nai tawánái paidá húi, aur yúñ ham ne daurne kí ráh pái. Pas, ham ko lázim hai, kí husn i taqaddus aur ihsán i firáwāñ ke zor se Rúh i Quds kí barakaton ká dam barháke har ek bojh aur uljhánewále gunáh ko utárke bardásht ke sáth us ráh meñ, jo hamáre liye muqarrar kí gaí hai, daúreñ. Is maqám par Pú-lús ká muddá yih nahíñ hai, kí ham páñw se daureñ par us ká matlab dil o aql, aur aql kí tamám quwaton se hai; is wáste, kí jaisá badan meñ páñw sab ázuon se zoráwar, waise bátin meñ dil o aql sab se qawí aur zabardast haiñ; kyúñki aql o dil, aur imán jahāñ pahunch saken, wahāñ páñw ká kyá daḡhl? Dil to imán ke, aur imán aql ke wasíle dozaḡh aur bihisht tak sair kar sakte; par jism i zaíf meñ yih táqat kahāñ? Badan kí quwat dunyawí chízon kí ziyádatí se nuqsán uṭhátí hai, jaisá kí súraj kí chamak bahut dekhne se áñkh ko khalal hotá; magar rúh umda chízon meñ jis qadr mashgúl rahe, utní hí kámil hotí hai. Ázizo, quwat i jismání faqat un chí/on ke kám átí, jo ek ja-gah yá zamáne meñ mahdúud haiñ; par rúh, teḡhadd aur abadí chízon ke kḡhiyál meñ mashgúl rahtí hai. Aur likhá bhí hai, kí hamáí kushtí gosht aur khún ke sáth nahíñ, par sardáron, aur sáhib i ikhtiyar, aur is dunyá kí táriki ke qudratwálon ke sáth, aur sharír rúhon ke, jo bu-land makánon meñ haiñ. Kyúñki hamáí laráí ke hathyár jismání na-híñ, par Khudá kí madad se qílaon ke dhá dene par qádir haiñ; kí ham mubáhason aur har ek bulandí ko, jo Khudá kí pahcháñ ke barḡhi-láf áp ko buland kartí hai, girá dete haiñ; aur har ek kḡhiyál ko qaid karke Masíh ká farmánbardár karte haiñ. Pas, ham ko kitná batariq i aulá lázim o wájib hai, kí har ek bojh aur uljhánewále gunáh ko utár-ke, bardásht ke sáth, us ráh meñ, jo hamáre liye muqarrar kí gaí hai, daureñ.

II. Ham kyúnkar daureñ?

Púlús ne farmáyá hai, kí “ Us ráh meñ, jo hamáre liye muqarrar kí gaí hai, bardásht ke sáth daureñ; aur Isá ko, jo íman ká shurú aur kámil karnewálá hai, takte rahen;” yāne, kí ham sabhon kí daur thík nishán kí taraf howe; ba ján o dil o ba ishtiyáq i kámil; aur us ráh meñ jo azl se muqarrar húi; par hamáí daur kí shart Masíh howe; kí ham usí ko bázigáh i náját ká nishán samjheñ. Chunáñchi Yúnání bhí jab daúrte, to apní shart o nishán kí taraf. Aur is kí bábat rasúl ne ek maqám meñ aur farmáyá hai, kí Main un chízon ko, jo pichhe chhúṭíñ, bhulákar, un ke liye, jo áge haiñ, barhá húá, sídhá nishán kí

taraf pilá chalá jātá hūn ; aur jis shart ke liye Kḥudá ne mujhe Isá Masīh kī marīfat buláyá, usī ke páne ko muqarrarī ráh meṇ daurṭá hūn. Is se kaisá sarīh wázih hotá hai, ki yih nishán, yaṇe Isá Masīh, hámári daur ká kḥáss sabab hai.

Pahle is ká mazkúr ho chuká, ki Yúnáníon meṇ is bát kī barī hí tá-kíd thī, ki koī mujrim o badnám un kī lab o bází meṇ sharík na howe ; to phir aise maqám meṇ kisí langre aur zaíf ul ázá ká kahán guzar hai ? Aglab hai, ki aisí án bán ke báis we sálhá sál se us marika i námwar ke wáste kasrat baham pahuncháte, aur áp ko dunyawí áláish o burái se, jo táqat o dam barhne kī mání haiṇ, báz rakhte honge ; kyúnki har ek kushtígír sab báton meṇ parhezgár hotá hai. Phir un qawáid ko, jo fathyábí ke wáste wahán ke zafar paikaron se tḥaharáe gae honge, hifz karke dil par naqsh karte honge. Aur yih bhí qiyás qabúl kartá hai, ki we áp ko har nau kī subuk kḥurishon aur poshishon se árasta karke, har ek bojh, aur uljhánewále asbáb se dúr o pák rahkar, bilánága un wasílon ko kám meṇ láte honge, jo phurtí aur tez-gámí ke liye mufid hote honge ; aur har tarah ke bojh, aur uljháwe se dilí nang o ár rakhte honge, is kḥiyál se ki dawinde ko in se siwá mahrúmí aur ruswái ke aur kuchh husúl nahín hogá.

To kyá, ai ázíz bháío, ham, jo aisí páktarín ráh meṇ daurṭe haiṇ, jise Kḥudá ke farzand ne apná pák lahú bahákar hamáre liye taiyár kī, yá jis kī fathyábí ke qáidon ko muqaddas rasúlon, aur nabíon, aur shahídon ne bayán kiyá, balki apne lahú se muhr karke us kī rástí par dast-khatt kī, yá har ek bojh se, jo nafsání asbáb hai, subuksár, aur har ek gunah se, jo dil ko uljháte, yaṇe shahwat o harámkárí, badnazarí o tamá, shekḥí o gazab o dáḥ se apne taín pák na karen, aur jí ján se nae bankar naí kḥú ko, jo Kḥudá ke muwáfíq neki o haqq kī pákízagí meṇ paidá húi, ikhtiyár na karen ? Hán, ba taríq i aulá har ek tahárat o mahabbat ko lung banákar, páedári o burdbári, ummed o parhezgári par kaske bándhen, aur rástbázána qánún se nekoí, aur nekoí kī chálakí ke sáth dauren. Sad haif ki Yúnání daurnewále ke muqábale meṇ Masíhí dawinda gairatmand na ho, aur áp ko subuksár na kar ke dunyawí áláish, o bojh, aur anwá uljháwe meṇ phans jáwe.

Yúnání, báwasf is ke, ki ilm i Iláhí se jábil i mutlaq the, par taubhí dilí shariát ká, jise Kḥudá Taālá ne har ek bashar ke dil kī lauhon par kanda kiyá hai, un meṇ ek nishán báqí o záhir thá, ki we log apní lab o bází meṇ kisí badnám o mujrim ko sharik o harif na hone dete the. Wáh ! gunáh kī kaisí tásir o burái hai, ki gunahgáron ko bhí, jo shariát se be ilm hokar use pámal karte, nápasand maḷúm hotí ! Is muqaddame meṇ Púlús farmátá hai, ki “ Jin ko shariát nahín milí, jab we tabíat se shariát ke kám karte haiṇ, to we shariát na pákar apne liye áp shariát haiṇ. We shariát ká kḥulása apne dilon meṇ likhá húa dikháte haiṇ, aur un kī tamíz bhí gawáhí detí, aur un ke kḥiyál ápas meṇ ilzám yá uzr karte haiṇ.” Pas, jis hálát meṇ ham ne shariát, balki takmila i shariát ko páyá, to kyá ham is bát ko tákídan dost na rakhen, ki tum harámkár, o but parast, o lálachí, o gálí baknewále, aur zálím se mel na rakhná ? Ek aur bát gaur talab hai, ki Yúnání log badnám o mujrim se qátibatan mel na rakhte the ; par o Masíhí achchhí kḥaslaton ke páband haiṇ, un ko aisá nahín lázim

hai; par yih wájib hai, kí har ek mujrim o baduám ke liye duá o minnat karná, aur jis wasíle se ho nek khúí o khush khulqí ke zor se Khudá-wand tak us ko khainch láná, táki us ke fazl i lá intihá ke wasíle hamári tarah un ko bhí naját aur hamesha kí zindagí ká inám mile.

III. Tisrí bát, ki ham kis liye dauren?

Azízo, tum ne suná, ki we log sirf jismání námwarí anr táj i fání ke wáste, aur zaitún kí pattí ke, jo murjhá játí, aur us shuhtrat ke pás se, jo magrúrí aur látáil kھیál kí khushwaqtí o tahsín i bátíl aur taríf i láhásil se talluq rakhtí hai, daurte the; par Masíhí dawinda gairfání táj aur hár ke liye. Kyúnki líkhá hai, ki Mubáarak wuh hai jo imti-hánon men sabr kartá hai, ki wuh imtihán ke bád zindagí ká táj páwegá, jis ká Khudáwand ne apne piyár karnewálon ke wáste wáda kiyá hai. Khusúsan ham is liye dauren, ki Isá ko, jo ímán ká shurú aur kámil karnewálá hai, takte rahen; yáne, jis tarah we log tamáshagáh men apní shart ke nishán ko takte húe pesh nazar rakhkar daurte; waisá hí Masíhí is dunyá kí tamáshagáh men daurte húe apní shart aur nishán, yáne Khudáwand Isá Masíh ko taktá rahe, aur ánkhoñ se ojhal na hone de; aur wuh peshtar se ásmán par is wáste gayá, táki ahl i kalisiyá kí daur ko, jo is tamáshagáh se daurkar ásmán tak jáyá cháhte, muláhaza farmáwe; ki wuh khud farmá-átá hai, ki Main tere kámon aur mahabbat, aur khidmat, o sabr ko jántá hún. Pas hamári naját kí bázigáh ká wuhí nishán aur shart hai.

Sháyad yih kalám parhkar ham men se koí sust raftár dil kí tarafdári se aisá dawá kare, ki Main bhí daurtá hún; to us ká dawá kyúnkar sábit hogá? Kyúnki daurne, aur áhista chalne men bará faraq hai. Kyá mumkin thá, ki Yúnáníon kí tamáshagáh men koí aisá dawá kartá? Kyá us ko yih liház ná hotá, ki Agarchi main apní nazar men áp ko daurtá jánúñ, par tén lákh assí hazár házirán kyá gumán karenge? Yún hí kalisiyá men bhí har ek apne dil ke fareb se wáqif ho, aur áp ko jánche; agar koí áp ko báwájúd sust raftári ke samjhe, ki Main daurtá hún; to wuh yih yád kare, ki jab ham gawáhoñ ke itne bare abr se ghire húe hain, yáne ágáz i áfrínish se jitne muqddas o bu-zurg o shahíd húe, sab ásmán par maujúd hokar, saf ba saf baithkar ahl i kalisiyá kí mashaqqat o mihnát ká liház kar rahe hain; pas main in ko kyúnkar fareb de sakúngá, jo daurnewálon ko nazar daurákar dekh rahe hain! Wuh kyúnkar lákhoñ muqddason aur firishton se tahsín o áfrín ke láiq thahare? Khabardár, áfrín ke badle nafrín ho. Aur agar koí anwá hawas aur áláish i dunyawí kí zanjíren pahinkar, aur sir par dunyá ke behúda o befáida asbáb ká bojh ládkar kahne lage, ki Main bhí daurúngá; to kyá wuh us sust raftár se ziyádatar bewaqúf na giná jáégá? Haqq to yih hai, ki sust raftár aur dawinde men itná faraq hai, jitná roshní aur táríkí men. Kyá bojhal aur subuksár ek hí ho sakte hain? Kyá bhaṭkaṭaiye ko angúr, aur bharbhár ko anjír qarár de sakte hain? Rástí o nárástí se kyá munásibat; aur roshní o táríkí se kyá mel hai? Aur Masíh ko Bál ke sáth kaun sí dostí, aur ímándár ká beímán ke sáth kyá hissa hai? Khudá kí ibádatgáh ko buton se kaun sí muwáfíqat hai? Par daurnewále ká andáz hí nirálá hai; Khudá us ko farmátá hai, ki Tú to zindá Khudá

kī ibādatgāh hai ; chunānchī likhā hai, kī Main un men rahūngā, aur un men chalūngā, aur main un kā Ḳhudā hoūngā, aur we mere log honge. Pas, aisā wāda pāne se ham ko lāzim hai, kī har tarah kī badanī o rūhī nāpākī se apne taīn sáf karen, aur Ḳhudā-tarsī se kāmīl hokar rāh i rāst ke daurnewālon kī mánind subuksār, o parhezgār, aur har ek bojh o uljhānewāle gunāh se pák bankar, sirf Ḳhudāwand Ísá ko, jo ímán kā shurú aur kāmīl karnewálá hai, takte hūe bardásht ke sáth dauren.

Phir, agar koi kahne lage, kī Ham to kīsī ko daurtā nahīn dekhte ; aur ahl i kalisiyā sab kah sakte, kī Ham sab daurte haiñ ; to Púlús farmāte haiñ, kī Daurte to sab haiñ, par bāzī ek hī pātā hai. Phir, jo kahtā, kī Main Ísá Masīn men hūñ, aur us kī rāh tārīkī men hai, wuh jhúthā hai—daurnewálá nahīñ ; aur jo apne bhái ko piyār nahīñ kartā, wuh bhī jhúthā hai ; kī jis ko wuh dekhtā hai, jab usī ko piyār nahīñ kartā, to wuh, jo poshída hai, use kyā piyār karegā ? Phir, hukm hai, kī tum us men har tarah kī koshsih karke, ímán par nekī, aur nekī par irfān, aur irfān par parhezgārī, aur parhezgārī par sabr, aur sabr par dīndārī, aur dīndārī par birádarāna ulfat, aur ulfat par mahabbat barhāo ; kī agar yih chízen tum men hon, aur taraqqí ke sáth, to tum ko hamāre Ḳhudāwand Ísá Masīh kī pachhān men gáfil aur be phal na hone denge ; par jis ke pás yih chízen nahīñ, wuh andhā hai, aur ánkhen mūndtā hai, aur apne agle gunāhon ke dhoe jáne ko bhúl gayā ; yāne, kī aisā shakhs daurnewālon ke shumār men nahīñ, balki khārij hai.

Aur na faqat muqaddason, aur rasúlon, aur nabíon, anr firishton kī ánkhen hamará daurnā dekhtīñ, par ḡhusúsan wuh ánkhen, jo ág ke shuāla se mushābihat dí gaí haiñ ; jo dil aur gurde ko jánchtī haiñ ; aur jo tashakḡhus ko kabhī nahīñ púchhtīñ ; to jab ham aisī nazar ke rú ba rú haiñ, kī koí maḡhlúq us se poshída nahīñ, par us kī nazaron men, jis ke rú ba rú hamárá daur hai, sári chízen zāhir o uriyāñ haiñ ; in ánkhon ko kaun fareb de sake ? Aur yih us kī ánkhen haiñ, jo hamāre ímán kā shurú aur kāmīl karnewálá hai ; jis ko cháhiye kī bāzīgāh i nájat kā dáwinda taktā rahe. Yūñ injil i muqaddas se faisala hotā hai, kī daurnewálá, aur sust raftār, bojhal aur subuksār kalisiyā men kaun haiñ, aur un ke kyā nishān haiñ ?

Pesh-tar mazkúr ho chuká, kī Yúnání tamāshagāh men daurne, aur kushtī larnewālon ko kuchh zar i naqd kī ummed na thī, magar zaitún kī pattī páte ; waisá bī ham ko Hāshá, zar i naqd kī árzú o tamānná na cháhiye. Hamará ganj o ḡhazāna to ásmán par hai. Un ko zaitún kī pattī bebunyád fath ke nishān kī ḡhushwaqtī dikhlátī ; chunānchī jis tarah wuh murjhátī thī, usī tarah un kī fathyābī kī ḡhushī pazhmurda ho jātī hogí. Par Ḳhudāwand farmátā hai, kī “ Wuh, jo gálib hotā hai, main use zindagí ke daraḡht se, jo firdaus i Ilāhí ke bích o bích hai, phal khāne ko dúngá, aur wuh dúsrí maut se nuqsán na uṡhāwegá.” Filhaqqat duniyáwí námwarí, aur fathyābī, o galbá se barí ḡhushí o ḡhurramí hásil hotí hai, yahāñ tak kī log aksar us kī kasrat aur wufúr se mar mar gae hain ; jis ko is mulk wāle shādí i marg kahte haiñ ; par dúsrí maut se Yúnání fathmand aur bahádur na bache, go kī unhon ne is jahān men bará nám páyá.

Yúnáníon kī tamáshagáh ká daur dēṛh hī koss ká thá, par hamáří tamáshagáh ká daur o muhít pachís hazár mail ká hai, jis ko Sarwar i álam, yaṇe Kalmatulláh ne tamír karke kḥulú meṇ laṭkáyá; aur is tamáshagáh i ájib ká daurnewálá Masíhí rástbáz hai, jis ko dunyá Yúnáníon kī mánind izzat nahín baḥshtí. Wáh! Yúnání pahlawán fath-yáb hokar apne shahr men pháṭak se dáḳhil na hote the, par shahr panáh kī díwár torkar dáḳhil hote. Lekin Masíhí gálib fathmand hone par, shahr i kḥudí o gunáh kī shahr panáh aur ṇásir kī chár díwáří ko dhákar, us pháṭak se dáḳhil hote, jo ráh, aur haqq aur hayát hai; is liye ki jo us pháṭak se dáḳhil nahín hotá, wuh chor aur ráhzan hai.

Un ke galba kī taswír musauwar khainchte, aur naqqásh us kī saṅgín paikareṇ taráshte, muarriḳḥ us ká tazkira tawáriḳḥ meṇ, sháir us ká hál nazm karte. Par Masíhí gálib ko daftar i hayát meṇ qalam band karte haiṇ, aur us ko sufed patthar dete, jis par ek nayá nám likhá hotá, jise us ke siwá, ki jis ne páyá, aur koí nahín jántá. Us ko subh ká sitará baḥshá játá, aur ek sufed poshák se mulabbas karte, aur Sháhansháh i kaun o makán ke huzúr us ke nám ká iqrár kiyá játá hai; háu, Masíhí gálib haikal ká sitún banáyá játá, jo phir kabhí báhar nahín nikaltá; aur us par Kḥudá ká nám, aur Kḥudá ke shahr, yaṇe nae Aurshalím ká nám, jo Kḥudá ke huzúr se ásmán par se utartá hai, aur ek nayá nám us par likhá játá, aur áḳhír ko bádsháhí taḳht par baiṭhtá hai, jis meṇ zawál o tabdil ne ráh nahín paí.

Ázizo, laḳht i jigar bháío, zarra gaur karo, ki Yúnání aur Masíhí tamáshagáh ke daurnewáloṇ ke inámoṇ aur niāmaton meṇ kitná faraq hai. Yih, jo Púlús ne un kī rasm o dastúr ká bayán kiyá, so isí garaz par, ki Masíhíon ko un kī niāmaton, aur apne inám o niāmaton ká muqábala karke uskáwe, aur gairat diláwe, ki ahl i kalísiyá kis darja meṇ haiṇ.

To áo, ham bhí báham hokar apne dilon se istifsár karen, ki ham kin meṇ haiṇ? Áyá ham sachche daurnewáloṇ meṇ haiṇ, ki nahín? Yá Yunáníon kī mánind faqat jismání aur fání pahlawání karne ke mushtáq haiṇ, aur táj i fání aur inám i nafsání kī tamanná aur árzú rakhte haiṇ? Yá sust raftár haiṇ, aur daurnewáloṇ meṇ áp ko shumár karte haiṇ? Yá sir par dunyawí áláish ko rakhkar, aur páoṇ meṇ behúda chízon ká uljháo dāḳkar gáfil haiṇ? Agar aisá hai, to bará hī afsos hai; kyúunki jab hamen gawáhoṇ ke itne bare abr ne á gherá hai, to áo, ham bhí har ek bojḥ aur uljhánewále gunáh ko utárke bardásht ke sáth, us ráh meṇ, jo hámáre liye muqarrar kī gaí hai, dauren; aur Isá ko, jo ímán ká shurú aur kámil karnewálá hai, takte raheṇ; aur aisá dauren, ki ham hī jíteṇ.

XXVIII.

CHAURÁSIWÁN ZABUR.

REV. J. OWEN KÍ TASNÍ'F.

Sardár muganní ke liye, baní Qurah ká Zabúr. Al Gittíth.

Ai lashkaron ke Yahowáh, terí bárgáheñ kyá hí dílkash hain. Merí rúh Yahowáh kí bárgáheñ kí mushtáq aur árzumánd hai; merá man aur merá tan K̲hudá i hayát ke liye lalkúrtá hai. Gaurá bhí apná ghonslá aur abábíl apná áshiyána to pátá, jahán we apne bachche rakheñ: so main terí qurbángáheñ ko apní pandhgáh ke liye hásil karne cháhtá hun, ai lashkaron ke Yahowáh, mere bádsháh, aur mere K̲hudá! Nekbakht we hain, jo tere ghar meñ baste hain, aur sadá terá shukr karte hain. Silá. Mubárah wuh insán, jis meñ qúwat tujh se hai; un ke dil meñ ráheñ hain, jo tujh tak pahunchátí hain. We nesheb i baká meñ guzar karte húe use purchashma banáte; meñh bhí unheñ barakaton se chhá detá hai. We taraqqí karte hain, ki ek qúwat se dúsrí qúwat ko pahunchte chale játe hain, yahán tak ki K̲hudá ke áge Saihún meñ házir hote hain. Ai Yahowáh, lashkaron ke K̲hudá, merí duá qabúl kar; ai Yaqúb ke K̲hudá, kán dhar. Silá. Ai K̲hudá, ai merí sipar, nazar kar, aur apne masíh ke munh par tawajjuh kar. Ki ek din, jo tere huzúr meñ kaṭe, ek huzár se bihtar hai; mere liye K̲hudá ke ghar kí darbání sharárat ke khaimon meñ rahne se bihtar hai. Yahowáh K̲hudá ek áftáb hai, aur sipar hai; Yahowáh taufíq aur jalál bakhshnewálá hai; logon se, jo bahut rástkúr hain, neki dareq na karegá. Ai lashkaron ke Yahowáh, nekbakht wuh insán hai, jise terá bharosá hai.—Zab. 84: 1—12.

Is zabúr meñ us jagah kí taríf hai, jis meñ K̲hudá kí parastish kí játi hai, 1—3. Us jagah ke rahnewále nekbakht hain, 4—7. Minnat K̲hudá se, ki dindáron kí rakhwáli kare, aur un kí nekbakhtí barháwe, 8—12.

“Sardár muganní ke liye, baní Qurah ká Zabúr. Al Gittíth.”

“Sardár muganní” wuh shakhs thá, jo ki khímagáh aur haikal meñ báje aur gít kí nigahbání kartá thá. Jab koí Zabúr likhá játá, to us ke supurd kiyá játá thá, táki use gawáwe. Tirpan Zabúron ke sarnáme aise hí hain, aur Habaqqúq nabí ke 3: 19 meñ *sardár muganní* mazkúr hai. “Al Gittíth” ek Ibrí lafz hai, jo báje ká nám thá; aur yih nám is liye rakhá gayá, ki us kí súrat kuchh gol thí; yá ki wuh Gáth shahr se liyá gayá. “Baní Qurah” Lewí ke firqe meñ se the, jo ki ibádatgáh meñ hamesha rahte. Un meñ se kisi ne is Zabúr ko likhá.

A. 1. “*Ai lashkaron ke Yahowáh, terí bárgáheñ kyá hí dilkash haiñ.*”

Is Zabúr ká musannif kamál ishtiyáq se us makán kí taríf kartá, jis meñ *Khudá* apná fazl dikhátá. Wuh apní kamzorí se wáqif hoke cháhtá hai, ki har ek wasílone se, jo *Khudá Taálá* ne *ṭṭaharáe* haiñ, fáida uṭháwe. Wuh jagah, jis meñ *Khudá Taálá* apne huzúr kí nisháníñ dikhláne ká waḍa kartá, sári jagahon se dilkash aur dilchasp hai. Kyúñ? Is liye, ki *Khudá* sári *ḡhushí* aur barakaton ká chashma hai; insán bizzáthí láchár aur gunáh ke báis se shikastahál hai, aur us kí ihtiyájeñ bahut baḡh gaíñ. Is wáste wuh makán, jise *Khudá* muqarrar kartá, ki us meñ muhtájon ko niámat baḡhshe, sáre aur mahallon se dilpazír hai. Waháñ *Khudá* apná jalál bandon par áshkárá kartá; waháñ dikhátá, ki naját kí tadbír meñ us kí sifateñ kaisí hamd aur saná ke láiq haiñ; waháñ muntaziron ko aisí *ḡhushí* o *ḡhurramí* bhí baḡhshtá, jo ki bayán se báhar hai. *Khudá* ke huzúr meñ Masíh ke wasíle se náummed gunahgár bihisht ke ummedwár ban játe; pashán aur pashemán *ḡhatákár* mutmainn *ṭṭaharte*; aur we, jo sirisht, aur *ḡhawás*, aur ámal ke sabab se maláun haiñ, sádiq gine játe, aur *Khudá* ke gharáne meñ maqbúl ho játe haiñ. Taájjub to nahíñ, ki musannif kahtá, *Ai lashkaron ke Yahowáh, terí bárgáheñ kyá hí dilkash haiñ!* Is lafz ke mañe *lashkaron ke Yahowáh* yih, kí ásmání aur zamíní *lashkaron* ká Málik aur Maḡbúd, Rabb-ul-álamín hai. *Terí bárgáheñ*: —Agle zamánon meñ *ḡhaimagáh* aur haikal we jagahon thíñ, jin meñ *Khudá* ne muqarrar kiya thá, ki apne bandon kí árzen sun lewe, aur fazl un par dikháwe. Lekin is zamáne meñ, jab kí Masíh á chuká hai, wuh har jagah apne logon kí munáját, aur taríf, aur duá sunne ke liye taiyár hai. Jaháñ do ya tén Masíh ká nám leke ikatṭhe húe haiñ, wuh un ke darmiyán házir o názir hotá hai. Har jagah, jo kí us kí bandagí ke liye alag kí gai hai, dilchasp aur dilkash hai. Is se malúm hotá hai, ki we, jo gaflat se *Khudá* ke ghar se gair házir rahte haiñ, niháyat bewaḡfí karte haiñ; aur apní táqat se sirhí banáne cháhte, jis se kí we ásmán par chaḡh jáñ.

A. 2. *Merí rúh Yahowáh kí bárgáheñ kí mushtáq aur árzúmand hai; merá man aur merá tan Khudá í hayát ke liye lalkártá hai.*

Khudá kí bárgáheñ musannif bahut cháhtá, is qadr, kí us ká jí zaif aur mánda ho gayá. Na sirf bárgáheñ ká mushtáq hai, balki zinda *Khudá* ká árzúmand hai. Usí ko cháhtá, jo kí múrat nahíñ hai, lekin haiy qaiyúm aur haiy-lá-yamút. Butparaston ke maḡbúd rúpá, aur soná, aur pítal, aur patthar, aur miṭṭí haiñ; ádmion kí dastkáríñ. “We muñh rakhte haiñ, par bolte nahíñ; we áñkheñ rakhte haiñ, par dekhte nahíñ; we kán rakhte haiñ, par sunte nahíñ; we páñw rakhte haiñ, par chalte nahíñ; we háth rakhte haiñ, par pakarte nahíñ; un kí nákeñ bhí haiñ, lekin súñghte nahíñ; we apne gale se bhí áwáz nahíñ nikálte. We, jo unheñ banáte haiñ; aur we sab, jo un ká bharosá rakhte haiñ, unhíñ kí mánind haiñ.” Zabúr 115 : 5—8. Par zinda aur gairfání *Khudá*, jis ká mushtáq musannif i mazkúr thá, ásmán par hai; us ne jo kuchh cháhá, so kiya; wuhí apne talibon ká madadgár aur un kí sipar hai; aur we, jo kí use *ḡhúñḡhte* haiñ,

kadhí sharminda na honge. *Khudá* ke farzand dil o ján se use cháhte hai. Jab ki wuh un kí dúāon se chashmposhí kartá hai, we gamgín rahte, jab tak ki wuh apne ko unhen phir nahín dikhlátá. *Khudá* kí bārgáhon ke árzúmand we hai is wáste, ki *Khudá* wahán rahtá, aur wahán se ímándáron ko niāmat baḡhshtá. Har ek díndár kahtá, “jis tarah se ki hirní pání ke chashmon kí niháyat piyásí hotí hai, waisá hí merí rúh, ai Yahowáh, terí niháyat piyásí hai. Merí rúh *Khudá* ke liye, jo zinda hai, tarastí hai : aisá kaun sá din hogá, ki main jáún, aur *Khudá* ke áge hoúg ?” Zab. 42 : 1, 2. *Merá man aur merá tan*, yañe, merá tamám dil zinda *Khudá* ke liye lalkártá hai.

A. 3. Gaurá bhí apná ghonslá, aur abábíl apná áshiyána to pátá, jahán we apne bachche rakhen : so main terí qurbángáhon ko apní panáh-gáh ke liye hásil karne cháhtá hún, ai lshkkaron ke Yahowáh, mere bádsháh, aur mere Khudá !

Jis tarah kí gaurá aur abábíl biná ghonslá yá áshiyána nákhush rahte, usí tarah díndár, yañe *Khudá* ke farzand, jab ki apne ásmání Báp se dúr rahte, aur us se fazl ká koí nishán nahín páte, hasratzadá, balki hasratálúda hote hai. Bagair *Khudá* ke koí dúsrá itmínán i ḡhátir nahín kar saktá. Insán kí rúh *Khudá* se baní ; aur sirf *Khudá* us ko ḡhushí kí bharpúrí de saktá hai. Jis tarah kí kabútrí ne sailáb ke úpar panjá ṭekne kí jagah na páí, aur Núh ke pás kishtí men phir áí ; usí tarah insán rú i zamín par idhar udhar ḡhúnḡhtá phirtá, aur árám na pátá, jab tak ki apne *Khudá* ke pás na átá, aur us kí ináyat aur chihra kí roshní nahín pátá. Musannif kahtá, ‘Main terí qurbángáhon ke nazdík rahne cháhtá ; wuh merá dilchasp makán hogá ; kyúнки wahán merá *Khudá* hai.’ Dáúd bhí kahtá, “Main ne Yahowáh se ek bár sawál kiyá, aur main us ká tálib húá, ki main umr bhar Yahowáh ke ghar men rahúg, aur Yahowáh kí ḡhushnúdí dekhúg, aur us kí haikal men use ḡhúnḡhúg. Kyúнки musibat ke waqt wuh mujh ko apne ḡhaima men chhipá legá ; apne ḡdere ke parde men mujhe pinhán karegá ; wuh mujhe chaṭán par chaṭhawegá. So ab main apne sáre dushmanon men, jo mere ás pás hai, sarbuland hún ; main us kí haikal men ḡhushí se qurbáníg karúngá, aur main Yahowáh kí madh aur saná ḡáúngá ; zurúr main Yahowáh kí shukrguzá-ríag karúngá.” Zab. 27 : 4—6.

*Ai mere bádsháh, aur ai mere Khudá :—*Iblís kí tasallut ko chhorke, aur sáre jhúṭhe maḡbúdon ko tark karke, musannif ne Alláh kí ḡhidmat ko qabúl kiyá, aur sachche Maḡbúd kí parastish karne lagá.

A. 4. Nekbakht we hai, jo tere ghar men baste hai, aur sadá terá shukr karte hai. Silá.

Un kí nekbakhtí is men hai, kí *Khudá* ke nazdík rahte, aur us kí niāmat se ḡhushnúd aur shádmán rahte hai. ḡháliq se alag koí maḡhlúq mubárák nahín ho saktá. Jo kí agle dinon men sadá *Khudá* ke ghar men baste the, so káhin the ; aur jab we ḡhushdílí se wahán *Khudá* kí ḡhidmat karte rahe, un kí qismat suthrí aur tuhfa thí. In dinon men Masíh ke ḡhádím, jo kí dil o ján se pák nawish-ton ko parhte, un ke mutábíq logon ko talím aur nasíhat dete, aur

apne Kháwind kí taraf se ádmíon ko bihisht kí ráh dikháte, nekbaḡht haiṁ. We sadá Khudá ká shukr karte haiṁ. Par zurúr nahíṁ, kí hamesha ek hí jagah meṁ raheṁ, táki Khudá ká shukr karen, aur nekbaḡht howeṁ. Púlús hawárí kahtá, “Merí marzí yih hai, kí mard har jagah meṁ dúá mángeṁ.” Jahán kahíṁ howeṁ, Khudá házir o názir hai, duá ká sunnewálá; aur tálibon ko qabúl karne ke liye taiyár hai. Dindár shakhs ká dil us kí haikal hai; us meṁ Rúh i Quds rahtá hai. Nekbaḡht haiṁ we, jin ke dilon meṁ us kí haikal hai; jin meṁ wuh hamesha bastá, aur jo sadá us ká shukr karte haiṁ. *Silá.* Gáne yá bajáne ká nishán, jis ká kháss maṇí ṭhaharná hai, yaṇe *is bāt par socho.* Mubárák haiṁ we, jo kí Khudá ke ásmání ghar meṁ sadá baste haiṁ.

A. 5. Mubárák wuh insán, jis meṁ qu’wat tujh se hai; un ke dil meṁ ráheṁ haiṁ, jo tujh tak pahunchátí haiṁ.

Makkár, jo kí faqat záhír meṁ Khudá kí parastish karte, mubárák nahíṁ haiṁ, balki jo kí dil se us par tawakkul karte so mubárák haiṁ. Mubárák hai, wuh jis ká burj Yahowáh hai. Khusháhál wuh insán, jo Yahowáh par apná bharosá rakhtá hai. Jo kí apní qu’wat se nahíṁ, balki Isá Masíh kí qu’wat se qadam barhátá hai, so haqíqat meṁ nekbaḡht hai. Jab Masíh, jis kí tawánái láintihá hai, imándáron ko táqat aur miazbútí baḡhshtá, we sab kuchh kar sakte haiṁ. Sáre rúhání dushman, Iblís aur us ke sab lashkar, un par gálib nahíṁ ho sakte haiṁ. Imándáron kí laṛáí “jism aur khún se nahíṁ, balki riyásaton se, aur qudraton se, aur dunyá kí táríki ke sháhansháhon se, aur sharír rúháníon se hai, jo buland makán meṁ haiṁ.” Afs. 6: 12. Is wáste zurúr hai, kí we himmat bándheṁ, aur Khudá se madad mángeṁ, aur us ke sáre hathyár uṭhá leweṁ, aur us kí dastgírí dhúndheṁ.

Un ke dilon meṁ ráheṁ haiṁ, jo tujh tak pahunchátí haiṁ.

Riyákáron aur imándáron meṁ yih farq hai, kí un ke dilon meṁ Khudá kí ráheṁ nahíṁ haiṁ, hálánki us ke ghar meṁ we házir hote haiṁ; par ye, yaṇe imándár, rástí aur íkhlás se us kí bandagí bajá láte haiṁ. Jab kí sachche imándár apne Khudá ke ghar se gair házir rahte, aur bímárí, yá kamzorí yá dúrí ke báis se wahán nahíṁ pahunch sakte, we apne dilon meṁ ráheṁ banáte, jin se rúh meṁ apne Báp ke pás pahunchen. Khudá kí ráhon ko we bahut pasand karte haiṁ.

A. 6. We nasheb i baká meṁ guzar karte húe use purchashma bandé; menḡ bhí unheṁ tarakaton se chhá detá hai.

Beriyá parashtish karnewále dushwáríon aur ishkálon se Khudá kí ibádatgáh se báz nahíṁ rakhe játe haiṁ. Is áyat se yih bhí maḡlúm hotá hai, kí Khudá kí ibádat sáre kámon se dilchasp hai; aur aisí dīlpazír hai, kí dindár musíbaton aur dukhon ko, balki súkhe jangalon ko sahal jánte haiṁ, jab kí us kí ibádagáh kí taraf chale játe haiṁ. *Nasheb i baká*, rone yá musíbat ká nasheb. Jab kí Khudá ke farzand shor zamín aur súkhe bayábán meṁ, jahán ká safar niháyat mushkil hai, apne Báp kí taraf játe, yá us kí ibádatkháne kí taraf qadam barháte haiṁ, aur tishnagí kí hálát meṁ paṛte, lekin ba sabab is ke kí we Khudá ke ishq meṁ aise mubtalá haiṁ, kí goyá we usí ke ishq ke na-

sheb men kúe khodte, aur us se apní piyás bujháte, to yúnhín sárí mushkilát un ke nazdik ásan ho játí hai᳚. K᳚hudá ke áshiq k᳚hushí aur dil kí taiyárí se us kí taraf chale játe hai᳚, hálánki raston men ba-hut sí thokaren aur ishkál howen. Gáfíl log sustí, nínđ, duniyawí aish o ishrat aur shaukat o shán, lálach, khel aur tamásha ko aisá pa-sand karte, kí K᳚hudá ke ghar men jáne kí fursat nahín páte hai᳚. Jo kí haqíqat men K᳚hudá ke dhúndhnewále hai᳚, us ke ghar kí ráh par chalne men bare chálák hai᳚. Is duniyá i fání men K᳚hudá ke sá-re farzand musáfir hai᳚ ; waqt ba waqt we to musíbaton men parte ; par un ká Báp unhen apne hí háth se sambháltá, aur un ko k᳚hush-waqtí aur dil kí tázagí detá hai.

Men᳚ bhí unhen barakaton se chhá detá hai. K᳚hudá unhen pání aur tar o tázagí ba᳚hshtá, báwajúde kí we registán aur jangal men musáfir hai᳚. “Wuh bārán kí mánind muqatta margzár par názil hota hai, aur phúhí kí me᳚h kí tarah, jo zamín ko seráb kartá hai.” Zab. 72 : 6. Us ke pairau rúhání taur par mewadár hote, aur un kí salámati kámil hoti hai.

A. 7. We taraqqí karte hai᳚, kí ek qúwat se dúsrí qúwat ko pahunchte chale játe hai᳚, yahán tak kí K᳚hudá ke áge Saihún men házir hote hai᳚.

“Sádíqon kí rawish us chamaknewále naiyir kí mánind hai, jo púre din tak roshan hotá chalá játá hai,” Amsál, 4 : 18 ; sadá K᳚hudá kí ráh men taraqqí karte chale játe hai᳚. Jo kí ibádatgáh kí taraf játá, aur tamám dil se K᳚hudá ko dhúndhtá hai, raste men derí nahín kartá, idhar udhar tamásha kí taraf nigáh nahín kartá, álas, káhilí, áskat nahín kartá, par sídhá girje kí taraf chalá játá hai. Ásmán ke wáris jab kí is duniyá i musáfarat men rahte, apne ásmání makán ke mushtáq hai᳚, aur us kí taraf rujú hote hai᳚. We “jánte hai᳚, kí agar hamá-rí sukúnat ká k᳚hákí makán ujar jáwe, to ham ek imárat K᳚hudá se pá-wenge ; wuh ek maskan hai, jo háthon se nahín baná, aur abadí hai, ásmán par hai.” 2 Kar. 5 : 1. We “ummedwár hai᳚, kí aise shahr men jáwen, jis ke liye bunyád hai, jis ká banánewálá aur basánewálá K᳚hudá hai.” Ibr. 11 : 10. Us shahr kí taraf taraqqí karte hai᳚, kí ek qúwat se dúsrí qúwat ko pahunchte chale játe hai᳚, yahán tak kí K᳚hudá ke áge Saihún men házir hote hai᳚. Saihún wuh pahár thá, jis par K᳚hudá kí k᳚haimagáh dharí thí. Misál ke taur par bihisht bhí pák nawishton ke chand maqámon men Saihún kahlátí hai. Ásmání Saihún kí taraf K᳚hudá ke sáre farzand chale játe hai᳚. “Fazl aur un ke K᳚hudáwand aur Bachánewále Ísá Masíh kí shinákht men taraqqí karte rahte hai᳚.” 2 Pat. 3 : 18. “Rúh kí kumak se we jism kí ádaton ko márte, tákí hayát páwen.” Rúm. 8 : 13. “Har ek boj᳚ aur uljhánewále gunáh ko phenkke us musábaqe men, jo un ke liye muqarrar kiyá gayá hai, istiqlál se daurte ; aur Ísá ko, jo imán ká pesh-wá aur mutammim hai, dekh rahte hai᳚.” Ibr. 12 : 1, 2. We K᳚hu-dá kí ráh men chálákí se daurte hai᳚ ; aur “aise nahín daurte, jaise maqsúd i besabát kí taraf daurte hai᳚ ; we ghúnse lar᳚te hai᳚, aur ha-wá ko nahín márte ; balki apne badan ko píse dál᳚te hai᳚, aur bándhke ghasíte liye phir᳚te hai᳚, na howe kí fazíhat men pare᳚.” 1 Kar. 9 : 26, 27. K᳚hudá kí hidáyat aur dastgírí se we taraqqí karte hai᳚, yahán tak

ki Alláh ke áge ásmání Aurshalím meñ házir hote haiñ. “We, jo Yahowáh kí ráh takte haiñ, sar i nau zor paidá kareñge; we uqábon kí mánind bulandparwází kareñge, we daureñge, aur na thakenge, we chalenge, aur sust na ho jáenge.” Yas. 40 : 31.” We fazl par fazl páte haiñ; aur “be parda K̲hudáwand ke áks ko áina meñ dekhke us kí súrat ke mutábiq bane játe haiñ, aur wajd se wajd par taraqqí karte haiñ.” 2 Kar. 3 : 18.

A. 8. 9. Ai Yahowáh lashkaron ke K̲hudá, merí duá qabul kar; ai Yaqúb ke K̲hudá, kán dhar. Silá. Ai K̲hudá, ai merí sipar, nazar kar, aur apne masíh ke munh par tawajjuh kar.

In áyaton se musannif kí sargarmí sábit hotí hai. Mujh par nigáh kar, aur merí ihtiyáj ke mutábiq mujh par mihrbán ho. *Lashkaron ká K̲hudá*, k̲hilqat aur maujúdát ká K̲hudá, jo sárí maḡhlúqát kí parastish ke láiq hai. *Yaqúb ká K̲hudá*, jo áhd ke mutábiq Yaqúb kí rúhání aulád ká Maḡbúd aur Háfiz hai. *Hamárí sipar*, kalisiye ká rakhwál, aur hámi, aur pushtibán. *Hamárí*, na sirf merí, balki sáre ímándáron kí panáh. “Yahowáh ká nám ek bará burj hai; sádiq us meñ daur-tá hai, aur amn meñ rahtá hai.” Amsál, 18 : 10.

Apne masíh ke munh par tawajjuh kar. ‘Aur-halím ke bádsháh, yá ahl i áhd ke bádsháh kí taraf mutawajjih ho.’ Jab bádsháh apne kám ke liye alag kie gae, mamsúh the. 1 Sam. 16 : 12. Yih dastúr áne-wále Masíh kí álamát thí. Isá Masíh abl i áhd ke bádsháhon ká bádsháh hai, aur biláshakk is áyat meñ us kí ek ishárat hai. Faqat usí ke nám ke wasile se barakaten K̲hudá kí taraf se hamen mil saktí haiñ. Jab ki K̲hudá us ke munh par tawajjuh kartá, tab gunahgáron ko, jo us par iátiqád rakhte haiñ, un kí k̲hatáon kí magfirat kar saktá hai.

A. 10. Ki ek din, jo tere huzu’r meñ kaṭe, ek hazár se bihtar hai; mere liye K̲hudá ke ghar kí darbání sharárat ke k̲haimon meñ rahne se bihtar hai.

Dunyá ke aksar báshinde be murád zindagání basar karte haiñ; par we, jo sar i nau paidá húe haiñ, apne K̲hálíq aur Naját-dihinde ká jalál záhir karne ke liye, jíte rahte haiñ, aur har ek bát meñ dhúndhte, kí us kí marzí par chaleñ. Ek din, jo us kí parastish karne meñ kaṭe, hazár aur dinon yá barason se bihtar hai. Insán kí paidáish se auwal garaz yih thí, kí Allán ká jalál záhir kare, aur us se k̲hushí hásil kare, aur wájib hai, kí sadá us ke nazdík rahe. K̲hudá sárí barakaton ká sotá hai, aur wuhí akelá taskin aur dil kí k̲hushí de saktá hai. “Ásmán par kaun hai, magar tú? aur zamín par koí nahíñ, jis ká main mushtáq hún, magar tú. Aur merá jism aur merá dil ghaṭá játa hai; par K̲hudá mere dil ká búta hai, aur merá abadí hissa hai.” Zab. 73 : 25, 26.

Mere liye K̲hudá ke ghar kí darbání sharárat ke k̲haimon meñ rahne se bihtar hai. K̲hudá kí bandagí karná hamárí barí izzat hai. We, jo us ke ghar meñ adná kám karte, sáre dunyawí sardáron yá mansabdáron se izzatdár haiñ. Jo kí farotaní aur ájizí ke sáth K̲hudá ke huzu’r meñ áte, so maqbúl hongé, aur apne Báp se besh az besh niqámaten páwenge.

A. 11. *Yahowáh Kḥudá ek áftáb hai, aur sipar hai; Yahowáh tau-fiq aur jalál baḵshnewálá hai: logon se, jo bahut rástkár haiṁ, nekí dareg na karegá.*

Áftáb apní roshní se jahán ko tázagí detá; *áftáb* i sadáqat ímán-dáron ko tar o táza kartá, balki unheṁ zindagí aur hidáyat baḵshstá hai. *Sipar* se kifázat aur panáh hotí hai; Yahowáh, jo áp se maujúd aur maujúdát ká Kḥáliq hai, apne ḵháss burguzídon ká ghernewálá aur Háfíz hai. Rát dín, har waqt unheṁ beshumár ḵhatron aur dushmanon se ártá aur bachátá hai.

Taufiq—sárí niāmaten, jin ke gunáhgár muhtáj haiṁ, Kḥudá unheṁ baḵshshegá—gunáhon kí muáfí, dil ká árám, bihisht kí ummaid, aur abadí ḵhushí kí bunyád. *Jalál*—Kḥudá ke farzand na faqat fazl páte, balki izzat, na sirf muáf-kie játe, balki Kḥudá ke gharáne meṁ maqbúl ho játe, aur us ká nám un par likhá gayá. “Dekho, kyá mahabbat Báp ne ham se kí, ki ham Kḥudá ke farzand kahláwen!” 1 Yúh. 3: 1. Aqibat meṁ un ká jalál kámil ho jáegá. Us pák jagah meṁ, jahán Kḥudá áp rahtá, jahán sáre pák frishte bhí rahte, abad tak rahenge. “Yih to hanoz záhir nahín hotá, ki ham kyá honge; par ham jánte haiṁ, ki jab wuh záhir hogá, ham us jaise honge; kyúinki tab ham use waisá, jaisá wuh hai, dekh lenge.” 1 Yúh. 3: 2. Jab Isá Masih insáf karne ko áwegá, apne síre pairaon par bebayán aur láintihá jalál áshkára karegá. Dunyá kí sárí qaumeṁ aur firqe jamá hoke ímándáron ká jalál dekhenge. Kḥudá apne logon ko taufig detá, aur taufig ká anjám jalál hogá.

Logon se, jo bahut rástkár haiṁ, nekí dareg na karegá. Jo un kí bihtarí ke liye achchhá hai, so un se dareg nahín karegá. Un kí hálat se sadá ḵhúb agáh rahtá, aur jab ki we use bhúlte, yá us kí ibádat se gháfil ho játe, wuh un ko tambíh detá; aur agarchi “har ek tádíḥ bilfiál farhatbaḵsh nahín, balki gamafzá nazar áti, par áge ko wuh unheṁ, jo us ke sabab se mihnatkash húe haiṁ, sadáqat ke ráhatafzá mewe degí.” Ibr. 12: 11. Kḥudá ke aksar logon ke liye dhan daulat achchhí chíz nahín; kyúinki is se jál bante haiṁ, jin meṁ phans játe, aur dín kí ráh par achchhí tarah se dauṛ nahín sakte haiṁ. Is wáste Kḥudá aksar muqarrar kartá hai, ki un ká mál thorá howe, táki ásmání chízon se dil lagáwen, na un chízon se, jo zamín par haiṁ. Par rúhání niāmaten un ko baḵshstá, jin se un kí shádmání bayán se báhar hai.

A. 12. *Ai lashkaron ke Yahowáh, nekbáht wuh insán hai, jise terá bharosá hai.*

Beshumár log is tát par gawáhi de sakte haiṁ. Musibat, tanghálí, yá iqbálmándí, har waqt meṁ, nekbáht hai wuh insán, jise Kḥudá Taálá ká bharosá hai.

XXIX.

RUHANI GAM KI MUBARAKBADI.

REV. A. KREISS KI' TASNI'F.

Mubarak we hain, jo gamgin hain; is waste ki we tasalli pawenge.—
Matí 5 : 4.

GAM do tarah ke hain, duniawi aur Ilahi. Agar koi kisi duniawi chiz ke barbad hone ke sabab gamgin hota, to duniawi gam khata hai. Agarchi yih gunah nahin hai, ki jab hamara kuchh bara nuqsan ho, maslan koi piyara dost mar jaye, to ham gamgin hoke rowen; kyunki hamara Khudawand bhi Lazar ki qabr par khara hoke roya; lekin chahiye ki un ki manind, jo na ummed hain, gam na khawen; balki bawar karen, ki hamare Khudawand ne apni dani aur mahabbat se use le liya; aur Aiyub ki tarah kahen, ki Khudawand ne diya, Khudawand ne phir le liya, Khudawand ke nam ki tarif ho.

Duniawi gam maut ko paida karti hai; aur jo us ke khanevale hain, un se Khudawand ne wada nahin kiya, ki we tasalli pawenge; lekin Ilahi gam, jaisa Pulus hawari ne likha hai, tauba paida karti hai, jis se najat milti hai, aur pashemani nahin hoti; is tarah ke gamginon se Khudawand ne wada kiya hai, ki we tasalli pawenge.

Pas, jis waqt ham ko ghar, aur panah, aur khana pina, aur kapre hain, aur ham tandurust hain, aur bahut se dost ham ko piyar karte hain, kyus waqt bhi hamen gamgin hona chahiye? Jawaab yih hai, ki jo gamgin nahin hain, we tasalli na pawenge. Aur gamgin hone ka sabab yih hai, ki ham gunahgar hain; so chahiye ki ham apne gunahon ke sabab gam khawen, aur apni buraiyon par afsos karen. Jo log gaffat se apne dilon ko nahin janchte, aur Khudawand ko muqaddas Khuda, jo gunah se nafrat rakhta, aur jo gunahgaron ke liye bhasam banewali ag hai, nahin jante, so gunah ke liye gamgin nahin hote hain. Lekin jis ne apne dil ko janchke daryaf kiya hai, ki main lachar gunahgar hun, aur roz roz asman ke barqhilaf, aur Khuda ke huzur gunah karti hun, wuh jab tak yih bat apne dil mein na jane, ki Ai bete, tere gunah muaf kie gae, khushi na karega, balki nihayat gamgin rahega; kis waste, ki us ne apne Khudawand ke gazab ko bharkaya, aur Ruh-ul-Quds ko, jis ke wasile se ham apne Khudawand Isa Masih ke din ke liye muhr kie gae hain, gamgin kiya hai. Jis tarah achche larke, jo apne ma bap ko piyar karte hain, agar un ko gam dilawen, to ap bhi gamgin hote hain; isi tarah sab, jo Khuda ko piyar karte hain, gamgin howen; is liye ki unhon ne apne asmani Bap ko, jo unhen piyar karti, aur har tarah ki barakaten baqshati hai,

gamgín kiyá hai. Dáúd ne apne gunáh ke sabab gamgín hoke duá mángí, kí “Ai Ğhudá, apne kamál karam se mujh par rahm kar, aur apne rahmon kí firáwání se mere gunáh miṭá de. Mujhe meri burái se Ğhúb dho, aur mujhe mere gunáh se pák kar; ki main apne gunáhon ko pahchántá hún, aur merá gunáh hamesha mere sámhne hai. Main ne faqat terá hí gunáh kiyá hai, aur tere hí huzúr badí kí hai; táki tú apní báton meñ rastkár ṭhahare; aur jab tú hukúmat kare, to tú pák záhir ho.” Aur Patras ne, jab apne Ğhudáwand ká inkár kiyá thá, tab wuh báhar jákar zár zár royá. Aur us bájdár ne, jo duá mángne ke liye haikal meñ gayá thá, apne gunáhon ke sabab itná bhí ná cháhá, kí ánkñ utháke ásmán kí taraf dekhe; balki yih kahte húe apní chhátí piṭṭá thá, kí Ai Ğhudáwand, mujh gunahgár par mihrbání kar. So sab ke sab, jo Ğhudá se milá cháhte haiñ, gunáh se gamgín hoke us kí muáfi mángte haiñ. We`roz roz Ğhudá ke áge ghuṭhne ṭekke farotaní se duá karte haiñ, kí Ai Ğhudáwand, ham ne Ğhiyál, aur bát, aur kám se terá gunáh kiyá hai, aur is láiq nahíñ, kí tere beṭe kahláweñ; lekin tú apní barí mihrbání o rahmat se muáf kar, aur hamen aisá faẓl baẓsh, kí áge ko hoshyárí se chaleñ, aur tere pák hukmon par ámal karen.

Phir, gunáh ke sabab is liye bhí gamgín honá cháhiye, kí wuh ádmíon kí halákí hai. Agar kisi ká sára mál barbád ho jáwe, taubhí use aisá bará nuqsán, jáisá gunáh se hotá hai, nahíñ pahunchtá; kyúñki gunáh ke sabab Ğhudá kí súrat, jis par ádmí banáyá gayá thá, bigar gai, aur wuh jahannam ke láiq húa hai. So is liye kí ham gamgín hoke tauba karen, Isá Masíh ne kahá, kí Un se, jo badan ko márte haiñ, aur ján ko nahíñ már sakte mat ḍaro; balki usí se ḍaro, jo ján o badan donon ko jahannam meñ halák kar saktá hai. Jab tak ádmí begunáh thá, wuh niháyat nekbaẓht aur saádatmand hoke árám aur chain se auqát káṭṭá thá; kyúñki beḍar thá, kí koí chíz use nuqsán pahuncháwe. Lekin jab se us ne gunáh kiyá, har tarah ke dukh dard aur maut bhí duayá meñ dáẓhil húi; aur marne ke bád ádalát hogí, jab we, jinhon ne tauba nahíñ kí, us jhil meñ, jo ág aur gandhak se jaltí hai, ḍále jáenge; aur yih dúsrí maut hai. Is se záhir hai, kí gunáh ádmíon kí halákí hai; so gunáh ke sabab gamgín honá cháhiye.

Par na faqat is wáste, kí ádmíon kí halákí hai, balki Ğháss kar is liye, kí wuh Ğhudá ko náráz kartá hai.

Lekin gam i Iláhi meñ yih sifat bhí cháhiye, kí ham Masíh par, jo gunahgáron ká bachánewálá hai, bharosá rakhen; aur yaqín karen, kí wuhí hamáre gunáhon ko muáf karegá; kyúñki Yahúdá Iskaryúti, jis ne apne Ğhudáwand ko pakarwáyá thá, us ne bhí apní badkárí se tauba kí, aur sardár káhin pás jáke kahá, kí Main ne begunáh ko pakarwáke gunáh kiyá. Par agarchi us ne tauba kí, taubhí halák ho gayá; kis wáste, kí us ne Ğhudá par bharosá na rakhá, aur báwar na kiyá, kí wuh merá gunáh muáf karegá. So, jo koí apne gunáhon se gamgín howe, us ko wájb o lázim hai, kí Masíh kí taraf, jo gunáhon ká kafára hai, mutawajjih hoke yaqín jáne, kí wuh, jis ne gunáhon kí muáfi ke liye aprá lahú bahayá, mujh par bhí rahm karke mere gunáhon ko miṭá dálegá. Aisá shaẓhs náummed na rahegá, balki us

pás, jo gunahgáron ke bacháne ko dunyá meñ áyá thá, árám páwegá, aur us ká gam khushí ho jáegá.

Lekin hameñ na faqat apne, balki auron ke gunáhon se bhí gamgín honá cháhiye ; kyúñki hamáre Khudáwand ne farmáyá hai, ki Tú apne parosí ko aisá piyár kar, jaisááp ko kartá hai. Aur dekh, sab ke sab nikamme haiñ ; koí nekoár nahín, ek bhí nahín ; un meñ se bahut haiñ, jo apní jáñ bacháne kí fikr nahín karte, balki gunáh se khush hote, aur gafilat se kusháda rásta par, jo halákat ko pahunchátá hai, chalte haiñ ; aur we na faqat áp ko, balki auron ko bhí fareb dekar halák karte haiñ.

Un kí gafilat, aur ranj, aur tasdía par, jo gunáh ke phal haiñ, gamgín honá cháhiye. Injíl meñ likhá hai, ki jab Isá Masíh Aurshalím ke nazdík áyá, aur us kí nigáh us shahr par pari, to us par rokar kahá, Kyá khúb hotá, ki tú us din in báton ko, jo terí salámatí kí haiñ, jáñti ; par ab we terí áñkhon se chhipí haiñ ; kyúñki tujh par we din áwenge ; tere dushman terí cháron taraf khaí khodenge, aur tere ás pás muhásara karenge, aur har taraf se tujhe gher lenge, aur tujhe tere larkon ke sath, jo tujh meñ haiñ, miñti se barábar karenge ; aur we tujh meñ ek patthar ko patthar par na chhorenge ; is wáste, ki tú ne apní salámatí ke waqt ko nahín pahcháñá. Pas cháhiye, ki ham bhí auron ke gunáhon par rowen, aur un ko nasíhat karen, ki we tauba karke Khudáwand kí taraf, jo un ká bhí Khudá hai, phiren ; aur un ke liye duá mángen, ki Khudá un ko táríki ke iñhtiyár se churáke apne piyáre Beṭe kí bádsháhat meñ dákhil kare. Garaz, jo log is tarah gamgín hote haiñ, un ke haqq meñ Khudáwand ne kahá, ki We mubáarak haiñ. Aur Dáúid ne bhí Zabúr meñ likhá hai, ki Mubáarak hai wuh, jis ká gunáh bañshá gayá, aur khatáen dhámpí gain. Mubáarak hai wuh mard, jis ko Khudá badkár nahín thaharatá, aur jis ke dil meñ dagá nahín.

Lekin gamgín kyúñkar mubáarak ho sakte haiñ ? Is liye, ki we tasallí páwenge. So hamáre Khudáwand ne apne shágirdon se kahá, ki Tum rooge aur nála karoge, par dunyá khush hogí ; tum gamgín hoge ; lekin tumhárá gam khushí ho jáegá. Tum ab gamgín ho, par main tumhen phir dekhúngá, aur tumhárá dil khush hogá ; aur tumhári khushí tum se koí chhín nahín legá. Main ne tumhen ye báten kahín, táki tum mujh meñ árám páo. Tum dunyá meñ tangí dekhoge ; lekin khátir janá rakho, ki main ne dunyá ko fath kiyá hai. Jo Isá Masíh ke shágird hoke us kí pairaui karte haiñ, so dunyá meñ tangí aur gam páte haiñ ; par yih bát, ki tumhárá gam khushí ho jáegá, roz roz un kí tasallí ke liye púrí hotí hai ; kyúñki we, jo ánsúon meñ bote haiñ, khush hoke dirau karenge. Wuh, jo báhar játá hai, aur rotá húá beshqímat bíj le játá hai, beshakk phir áwegá, aur apní púlián khushí ke sáth hamráh legá. Gunáh aur us ke phal un ke gam ká sabab haiñ ; is liye Khudáwand is bát se unhen tasallí bañshatá hai, ki Ai mere beṭe, khátir jamá rakh ; ki tere gunáh muáf kie gae. Aur wuh unhen Rúh-ul-Quds bhí bañshatá hai, jo tasallí denewála hoke sab gam meñ unhen tasallí detá, aur un ke dilon ko árám aur khushí se bhar detá, aur un ká gawáh hotá hai, ki un ke gunáh muáf kie gae. Lekin jahán gunáhon kí muáfí hai, wahán gam nahín, balki zindagí

aur naját hai ; is tarah we is dunyá men bhí bahut tasallí páte hain. Aur agarchi kabhí kabhí rowen, aur Dáúd kí mánind kahen, ki Main thandi sánsen bharte bharte thak gayá ; main ánsú baháke sárí rát apná bistar aisá bhigotá hún, ki jaisá pání men bhíg játá hai : lekin áqibat men we aisí khushí karenge, jo dunyá se báhar, aur jalál se bharí hai ; kyúinki Khudá un kí ánkhoñ se sab ánsú ponchhegá, aur phir maut ná hogí, aur na gam, na nála, na phir dukh hogá ; ki agli chízeñ guzar gain.

So ai piyáro, agar ham kisí dunyáwí chíz ke barbád ho jáne se gam kháwen, taubhí yád karná cháhiye, ki ham sab se ziyáda gunáh ke sabab gamgín howen, táki hamáre gunáhoñ ke sabab gam áwe, aur naját ke liye ham men aisí taubá paidá kare, jis se koí pashemán nahín hotá. Hamáre Khudáwand ne kahá, ki Mubárák we hain, jo gamgín hain ; ki we tasallí páwenge. So ham ko cháhiye, ki gamgín hoke apne kapron ko nahín, balki apne dilon ko chák karen, aur apne Khudáwand Khudá kí taraf phiren ; kyúinki wuh mihrbán aur rahmán hai, aur jald gussa nahín hotá, aur bará dardmand hai, aur kharábí pahunchne se malúl hotá hai. Ámín.

XXX.

ISA MASÍH KÁ IQRÁR I WAJIB KARNA.

REV. A. KREISS KÍ TASNÍF.

Aur Isá ne Qaisariya Filipí kí sarhadd men ákar apne shágirdon se púchhá, ki Log kyá kahte hain, ki main, jo Ibn i Ádam hún, kaun hún ? We bole, ki Baze kahte hain, ki Yúhanná baptismánewálá ; baze Iliyá, aur baze Yaramiyáh, yá nabíon men se ek. Phir un se púchhá, Par tum kyá kahte ho, ki main kaun hún ? Shamaún Patras ne jawáb men kahá, ki Tú wuh Masíh, zinda Khudá ká Beṭá hai. Isá ne juwáb men use kahá, ki Ai Shamaún Bar Yúnáh, tú mubárák hai ! ki gosht aur khún ne nahín, balki mere ásmání Báp ne yih tujh par záhir kiyá hai.—Matí, 16 : 13—17.

Isá Masíh ká nám tamám Yahúdíá men mashhúr thá, na faqat un muajazon ke sabab se, jo us ne dikhláe, balki us ne apne shágirdon ko bhí do do karke bhejá thá, ki khush-khabarí sunáwen, aur is tarah bahut logon ne us kí khabar suní. Jab shágird safar se laṭe, to us ne un se púchhá, ki Log kyá kahte hain, ki Ibn i Ádam kaun hai ? Us ko maḥlum thá, ki we kyá kahte, aur kyá samajhte hain. Lekin us ne shágirdon se is liye púchhá, ki we áp sochen, ki Ibn i Ádam kaun hai,

tāki we apne imān par qāim rahen ; kyūnki bahut ādmī, jo Masīh kī khabar sunte haiñ, kabhī nahīñ pūchhte, aur daryāft nahīñ karte haiñ, ki wuh kaun hai ; balki jaisā aur log use jānte haiñ, waisā hī we bhī samajhte haiñ. Lekin tāki shāgird aisā na karen, us ne pūchhā, ki Log kyā kahte haiñ, ki Ibn i Ādam kaun hai ? Tab unhon ne pahle auron kā k̥hiyāl zāhir karke kahā, ki Bāze kahte haiñ, ki tū Yūhannā Bāptismānewalā hai, aur bāze Iliyā, aur bāze Yaramiyāh, yā ek paigambaron meñ se. So agarchi Isā Masīh Yahūdion ke darmiyān thā, lekin we use nahīñ jānte the ; jaisā Yūhannā ne bhī kahā thā, ki Main pānī se istibāg detā hūñ ; par tum meñ ek shaḥs, jise tum nahīñ jānte, wuh hai, jo mere pīchhe ātā hai, aur mujh se āge thā, jis kī jūtī kā tasma main kholne ke lāiq nahīñ. Pas, kis wāste Yahūdion ne use nahīñ jānā ? Is wāste, ki we K̥hudā kī chizon kā nahīñ, balki ādmion kī chizon kā k̥hiyāl karte the ; kyūnki we samajhte the, ki Masīh dunyā meñ shān o shaukat se ākar barā mulkgir hogā, aur ham ko Rūmion ke qabze se churāwegā. Lekin wuh barī garibī se zāhir hūā ; is liye unhon ne us se thokar khākar us ko qabūl na kiyā. So bāze kahte the, ki wuh Yūhannā Bāptismānewalā hai ; kyūnki unhon ne k̥hiyal kiyā, ki wuh murdon meñ se jī uthā hai, aur is liye aisī barī karāmaten dikhlātā hai. Jaisā maslan Herodīs bādshāh apne naukaron se bolā, ki Yūhannā Bāptismānewalā hai, ki marke jī uthā hai, aur is liye us se karāmaten zāhir hotī haiñ. Phir bāze kahte the, ki Wuh Iliyā yā Yaramiyāh hai ; kyūnki Yahūdī un ko barē nabī jānke k̥hiyāl karte the, ki un meñ se ek Masīh ke āne ke peshtar zāhir hogā, aur us ke liye rāh taiyār karegā. Lekin bāze kahte the, Ham ko malūm nahīñ, ki wuh Iliyā yā Yaramiyāh hai ; par us kī karāmaton se zāhir hotā hai, ki agle nabion meñ se ek hai, jo marke jī uthā hai. So jinhon ne us kī tarīf kī, we bole, ki Wuh barā paigambar hai. Lekin bāzon ne dushmanī ke sabab se us ke haqq meñ burī bāten kahīñ, ki Kyā ham ne sach nahīñ kahā, ki wuh Samaryūnī hai, aur us ke sāth deo hai ? So tarah tarah kī baten us ke haqq meñ kahī gāīñ. Aur jaisā un dinon meñ thā, waisā hī ab bhī hai, ki log us kī bābat achchhī burī bāten kahte haiñ. Lekin jo Isā Masīh ko aisā qabūl nahīñ kartā, jaisā wuh K̥hudā se hamāre liye hikmat, aur nekī, aur pākīzagī, aur āzādagī hai, so halāk ho jāegā. Is liye kisī dūsre meñ salāmatī nahīñ ; kyūnki āsmān ke tale aisā dūsarā nām logon ko nahīñ baḥshā gayā, jis se ham najāt pā saken. So is liye, ki shāgird, logon ke kahne se, us ke haqq meñ kisī bhūl meñ na phans jāwen, us ne un se puchhā, Par tum kyā kahte ho, main kaun hūñ ? Us ne yih sawāl sab shāgirdon se kiyā ; so Patras ne sab kī taraf se jawāb diyā, ki Tū zinda K̥hudā kā Beṭā Masīh hai. Aur yih kaisā achchhā iqrār hai. Yihī sawāl Isā Masīh ne Farisyon se bhī kiyā, aur kahā, ki Masīh ke haqq meñ tumhārā kyā gumān hai ? wuh kis kā Beṭā hai ? Tab we bole, Dāūd kā. So un ke aur Patras ke jawāb meñ barā farq hai. Unhon ne kahā, ki Masīh Dāūd kā beṭā, yāne sirf ādmī hai ; lekin Patras ne khulā khulī iqrār kiyā, ki Tū zinda K̥hudā kā Beṭā Masīh hai. Agar koī shaḥs ādmī kī yā firishton kī zubān bole, yā nabūwat kī bāten kahe, aur gaib kī sārī bāton aur sāre ilmon ko jāne, par na pahchāne, ki Ibn i Ādam kī un hai, us ko kuchh fāidā nahīñ. Jo chāhtā hai,

ki naját páwe, us ko jánná cháhiye, ki wuh kaun hai. Yih iqrár, ki Tú zinda Kḥudá ká beṭá Masíh hai, hawáriṇ kī nasíhaton ká kḥulása hai. Isá Masíh zinda Kḥudá ká Beṭá hai; kyúнки Kḥudá ne ap us ko aisá kahá hai; ki jab Isí Yúhanná se bápṭismá pá chuká, tab nágáh ásmán se ek áwáz áí, ki Yih merá piyára Beṭá hai, jis se main rází hún. Aur Baibal ke kái maqámṇ meṇ sáf sáf likhá hai, ki wuh Kḥudá ká Beṭá, yaṇe Báp ke sáth Kḥudá hai; aur jis buzurgí ke láiq Báp hai, wuh bhí us ke láiq hai; lekin wuh na faqat Kḥudá, balki ádmí bhí hai; kyúнки wuh bande kī súrat pakarke ádmí kī mánind húa; aur is liye us ne apne taṇ Ibn i Ádam kahá. So Patras hawári ne un báton se, ki Tú zinda Kḥudá ká Beṭá Masíh hai, yih iqrár kiyá, ki tú sachchá ádmí aur wuh Masíh hai, jo dunyá meṇ áne par thá, aur jis ká Kḥudá ne nabíṇ kī marifat wáda kiyá thá, ki apne logon ko un ke gunáḥon se bacháwegá; lekin tú na sirf ádmí, balki Kḥudá bhí hai, jo sab chizon ká Bání aur Nigabbán hai, aur dunyá kī paidáish se áge Báp ke pás hashmat rakhtá thá. So Patras ne use na faqat nabi jáná, balki yaqín máná, ki wuh zinda Kḥudá ká Beṭá hai; aur aise ímán ke bagair koí naját nahín pá saktá.

Isá Masíh ne Patras se kahá, ki Ai Shamaún, Yúnas ke beṭe, tú mubáarak hai; jis ko wuh mubáarak kahe, so beshakk mubáarak hai. Lekin Patras is liye bhí mubáarak thá, ki us ne us ko jáná, aur us par ímán láyá, jo gunáhgáron ke bacháne ke liye dunyá meṇ áyá thá. Aur wuh is sabab se bhí mubáarak thá, ki us ne us ká ádmíṇ ke áge iqrár kiyá; chunánchi likhá hai, ki Jo koí dil se ímán láwe, so nek thaharegá; aur jo zubán se iqrár karegá, so naját páwegá. Isí tarah Isá Masíh ne bhí kahá, Jo koí, ki logon ke áge mujhe qabúl karegá, main bhí apne Báp ke áge, jo ásmán par hai, use qabúl karúngá. So tum meṇ se we bhí, jo dil se Isá Masíh par ímán láte, aur Patras kī mánind iqrár karte haiṇ, ki tú zinda Kḥudá ká Beṭá Masíh hai, mubáarak haiṇ; is wáste ki un ke liye ek Naját denewálá hai, jo un ko halákat se bacháwegá, aur ásmání bádsháhat meṇ dákhil karegá.

Lekin sachche ímán ko, jo Isá Masíh par hai, koí apní táqat se hásil nahín kar saktá; magar Kḥudá se use baḥshá játá hai; jaisá hamáre Kḥudáwand ne Patras se kahá, ki Yih tujhe gosht aur lahú ne nahín, magar mere Báp ne, jo ásmán par hai, záhir kiyá. Is se záhir hai, ki koí ádmí aql, aur dánái, aur qudrat se ján nahín saktá, ki Ibn i Ádam zinda Kḥudá ká Beṭá Masíh hai, sirf Rúh-ul-Quds ke wasile se ham ko maḷúm hai, ki Isá Masíh kaun hai. Is par taajjub na karo, ki faqat thore se us par ímán láte haiṇ. Ádmí ke dil paidáish se tárík haiṇ; kyúнки is dunyá ke sardár ne un ke dilon aur aqlon ko andhá kiyá, ki roshní se ziyáda andhere ko piyár karen. Pas Rúh-ul-Quds un ko kyúnkar roshan kare, aur tálím dewe, táki we Masíh ko jánen, aur us par ímán láwen. Jo Rúh-ul-Quds ká sámhná karte, so us kī tálím aur roshní nahín pá sakte, balki andhere meṇ rahenge, aur Isá ko zinda Kḥudá ká Beṭá Masíh qabúl na karenge. Aur is wáste ki wuh garíbí se dunyá meṇ áyá, aur us ne ákḥir ko bahut dukh uṭháke salíb par apní ján di, táki hamáre liye naját hásil kare, wuh un ke liye thokar khilánewálá patthar, aur girne ká sabab, aur kḥiláf kahne ká nishán rahegá; kyúнки jaisá andhá ádmí súraj ko dekh nahín

saktá, waisá hí we, jin kī aqlon ko is dunyá ke sardár ne andhá kar diyá hai, Ísá Masíh kī buzurgí aur hashmat ko dekh nahín sakte haiñ. Pas, agar kisí se púchhá jáwe, ki Ibn i Ádam kaun hai? aur wuh Patras kī mánind, aur sacháí se, jawáb meñ iqrár kare, ki Wuh zinda Kḥudá ká Beṭá Masíh hai, to sach jáno, ki Rūh-ul-Quds us meñ hai; kyúнки us ká kám yih hai, ki Ísá Masíh kī pahchán hamen dewe, aur us par ímán láne, aur ádmíon ke áge us ká iqrár karne kī qudrat baḥshe. Aise logon ke haqq meñ likhá hai, ki We laḥú se nahín, na insán kī ḵhwáhish, na mard kī ḵhwáhish se, balki Kḥudá se paidá hue haiñ; kyúнки har ek ádmí, jo iqrár kartá hai, ki Ísá Masíh jism meñ záhir húa, Kḥudá se hai; aur aise ádmí bahut mubáarak haiñ; kyúнки un-hon ne aisí chíz, yañe Masíh ká ímán páyá, jo dunyá kī sárí buzurgí aur daulat se bará hai; aur ádálát ke dín Ísá Masíh un se kahegá, ki Ai mere Báp ke mubáarak logo, idhar áo, aur wuh bádsháhat, jo dunyá se áge tumháre liye taiyár kī gaí hai, mírás meñ lo.

Is liye, ai piyáro, jo log Ísá Masíh ko sirf paigambar jánte haiñ, tum un kī báteñ na máno; balki us ko aisá qabúl karo, jaisá Kḥudá Báp ne use záhir kiyá hai, táki tum par yih masl sádiq na áwe, ki Agar andhá andhe ká rahnumá ho, to we donon garhe meñ gir parenge. So tum ap us kī chalan aur us ke kámon se daryáft karo, ki wuh kaun hai; aur Kḥudá se bhí duá mángo, ki jo báteñ laḥú aur gosht se záhir nahín ho saktiñ, wuh un ko tum par záhir kare, yañe tumhen samjháwe, ki Ísá Masíh kaun hai. Agar tum aisá karoge, to tum beshakk us kī pahchán páoge, aur Patras kī mánind dilerí se iqrár karoge, ki hamára Kḥudáwand zinda Kḥudá ká Beṭá Masíh hai; aur tum mubáarak hoge.

XXXI.

RUHÁNÍ ZINDAGÍ.

REV. A. KREIES KÍ TASNÍF.

Agar tum Masíh ke sáth jí uṭhe ho, to u'par kī chízon kī talúsh karo, jahán Masíh Kḥudá ke dahíne baithá hai.—Kal. 3: 1.

HAM is bát ko tén hisson par taqsím karke,

I. Yih záhir karenge, ki ham apní zát se murde haiñ, yañe rúhání zindagí ham meñ nahín.

II. Yih zurúr hai, ki ham aisí hálát meñ na rahen, balki rúhání maut se naí zindagí ke liye jí uṭhen. Aur

III. Bayán karenge, ki kis tarah naí zindagí hamárí chalan se zá-hir hotí hai.

I. Ham apní zát se murde haiñ ; yañe, K̤hudá kí zindagí ham men nahíñ. Ibtidá men aisá thá ; kyúñki K̤hudá ne ádmí ko apní súrat par banáyá thá ; aur jaisá wuh zindagí hai, waisá hí us ne ádmí ko bhí paidá kiya, ki hamesha zinda rahe. Lekin gunáh ke sabab ádmí kí aslí súrat bigar gaí ; kyúñki maut dunyá men áí, aur hamará badan fání ho gayá. Lekin na faqat yih, balki rúhání zindagí bhí, jo sirf K̤hudá ke miláp se hásil hotí hai, barbád húi ; kyúñki gunáh ke sabab K̤hudá ne ádmí ko apne huzúr se dúr kiya. So ham paidáish se murdon kí mánind haiñ ; is liye ki badaní aur rúhání maut ham par gálib húi ; balki ham apní insání tabíat se goyá lách kí mánind haiñ ; jaisá wuh na phir saktí, na kuchh kám kar saktí hai, waisá hí ham bhí apní qudrat se aisá kám nahíñ kar sakte, jis se K̤hudá ko rází karen. Is liye wuh sabhon ko, jo sachchí tauba nahíñ karte, aur us kí taraf nahíñ phirte, murda thaharátá hai ; jaisá likhá hai, ki Ai sone-wále, jág, aur murdon men se uth, ki Masíh tujhe roshan karegá. K̤hudá ne tumhen bhí, jo taqsíron aur gunáhon ke sabab murde the, zinda kiya.

Par na faqat K̤hudá ká kalám, balki hamáre kám bhí, jab tak ham nayá janam na páwen, gawáhi dete haiñ, ki K̤hudá kí zindagí ham men nahíñ ; kyúñki ham us ko dil o ján se piyár nahíñ karte, balki sirf dunyawí chízon ko mánte, aur un ko dhúndhte ; aur tárikí ke kám, jo maut ko pahuncháte, karte haiñ. So jab tak ham gunáh men haiñ, maut men bhí rahte haiñ.

II. Is wáste zurúr hai, ki ham Ísá Masíh ke sáth jí uthen, ki jaisá wuh salíb par marke phir jí uthá, waisá hí hamen cháhiye, ki gunáh kí maut men na rahen, balki rúhání zindagí ke liye jí uthen, aur naí waza se guzrán karen. K̤hudá ká kalám dil kí is tabdilí ko nayá janam aur jí uthná záhir kartá hai. So aisí tabdilí hamen zurúr hai ; is liye ki ham is ke siwá K̤hudá kí bádsháhat men dákhil nahíñ ho sakte haiñ ; kyúñki gunahgáron ko K̤hudá ke sáth, jo nek aur pák hai, kuchh mel nahíñ. Is liye agar ham cháhen, ki Ísá Masíh ke sáth us jahán men jíwen, to lázim hai, ki ham is dunyá men us ke sáth jí uthen, aur marne ke liye gunáh ke bande na ho rahen. Aur K̤hudá cháhtá hai, ki ham aisá karen, jaisá Kalasíon ke maktúb men likhá hai, ki Tum apne azú, jo zamín par haiñ, [un ke kámon ko,] yañe harámkárí, aur hápákí, aur shahwat, aur burí k̤hwáhish, aur lálach, jo butparasti hai, halák karo. Ek dúse se jhúth na bolo ; balki purání k̤ho ko us ke kám samet phenko ; aur naí k̤ho ko, jo dánái men us ke Bání kí súrat par baní hai, pahino. Aur Afsíon ke k̤hatt men bhí likhá hai, ki Garaz, ai bháío, jo kuchh sach hai, aur jo kuchh munásib hai, aur jo kuchh nek hai, aur jo kuchh pák hai, aur jo kuchh dil ke pasand hai, aur jo kuchh námi hai ; aur agar aur koí nekí, yá aur koí k̤húbí hai, sab men gaur karo. Jab aisí tabdilí ham men sabit húi, to ham dunyá ke liye marke Masíh ke sáth jí uthen haiñ. Púrání chízen guzar gaín, aur sab kuchh nayá ho gayá.

Lekin ham kis tarah gunáh kí maut se jí uṭhen? Yih apní hí qudrat se nahín ho saktá; kyúunki jaisá murde apne taín jilá nahín sakte, waisá hí ham bhí apní qudrat se Ísá ke sáth jí nahín uṭh sakte. Sirf Kḥudá is kám ko, jo naí paidáish hai, kartá hai; kyúunki wuh apní marzí ke muwáfíq hameñ cháhne aur karne kí tásir detá hai. So agar ham cháhen, ki Masíh ke sáth jí uṭhen, to cháhiye ki ham Kḥudá kí minnat karen, ki hamáre andar pák dil paidá kare, aur ek mustaqím rúh hamáre bátin meñ dále, táki ham gunáh se ázád hoke nekí ke bande ho rahen. Kḥudá yaqínan aísí duá ko qabúl karegá; kyúunki wuh nahín cháhtá, ki koí gunáhgár mare; balki cháhtá hai, ki wuh gunáh se báz áwe, aur jíwe; aur jo aísí duá meñ sust na howen, Kḥudá kí Rúh ke wasíle apní bétiní kḥo meñ baṛe zoráwar ho jáenge, aur kámil insán, yañe Masíh ke kamál qadd tak paunchenge.

III. Jab koí Masíh meñ nayá maḥlúq ho gayá, wuh dunyawí chízon kí nahín, balki ásmání chízon kí talásh kartá hai; chunánchi Púlús hawári ne likhá hai, ki Agar tum Masíh ke sáth jí uṭhe ho, to úpar kí chízon kí talásh karo, jahán Masíh Kḥudá ke dahine baiṭhá hai. Jaisá ham phal se jánte haiñ, ki daraḥt achchhá hai, ki nahín, waisá hí ádmí ke kámon se záhir hotá hai, ki wuh gunáhon meñ murdá, yá Masíh ke sáth zinda hai. We, jo gunáhon meñ murde hoke jismání haiñ, sirf jismání chízon, yañe daulat, izzat o hurmat, áish o ishrat, wagaira ko cháhte haiñ. Lekin jo zinde haiñ; so rúhání hoke in chízon ko náchíz jánte, aur kámil chízon kí, jo ásmán par haiñ, talásh karte haiñ; aur Ísá Masíh kí nasíhat par ámal karte, jis ne farmáyá hai, ki Mál apne wáste zamín par jamá na karo, jahán kírá aur zang kḥaráb kartá hai, aur chor sendh deke churáte haiñ. Lekin mál apne liye ásmán par jamá karo, jahán na kírá, na zang kḥaráb kartá hai, aur na chor sendh deke churáte haiñ. Lekin aísí qímatí chízen is dunyá meñ nahín haiñ, balki úpar se miltí haiñ; jaisá Yaqúb hawári ne likhá, ki Har ek nek baḥshish aur har kámil inám úpar hí se hai, aur núron ke Báp se utartí hai. Is liye we log, jo Masíh ke sáth jí uṭhe haiñ, rúhání chízon ko dhúndhte haiñ, aur apne Kḥudawand Ísá Masíh kí taraf, jo Kḥudá ke dahine baiṭhá hai, phirke usí se duá mángte haiñ, ki Ham ko har chíz, yañe har tarah kí ibrat aur dánái se daulatmand kar, táki hamáre dil imán, aur mahabbat, aur ummed se bhar jáwen, aur ham har ek nek kám meñ kámil howen. Aur kḥáss kar we Kḥudá se yih duá mángte haiñ, ki wuh apne waḍa ke mutábíq Rub-ul-Quds, jo sab niámaton se achchhí aur baṛí niámat aur hamári mírás páne ká baiṭna hai, hameñ inám dewe.

Aísí chízon kí we, jo Ísá Masíh ke sáth jí uṭhe haiñ, talásh karte haiñ. Wuh, jo un ko nahín dhúndhtá, agarchi is dunyá meñ baṛá máldár hotá, aur mihín poshák pahintá, aur roz roz shán o shaukat se áish kartá, lekin wuh niháyat garíb hai; is liye ki jab maregá, sab chízon ko chhor jáegá, aur láchar hoke Kḥudá kí ádálát ke taḥt ke huzúr khará kiyá jáegá. Lekin wuh, jis ne úpar kí chízon ko páyá hai, agarchi is dunyá meñ máldár nahín hotá, taubhí baṛá daulatmand hai; kyúunki wuh aísí chízon aur kḥazánon ká málik hai, jin ko chor nahín churáwegá, aur jinhen maut bhí us se judá na karegí. So us ke kḥa-

zāne báqí rahenge, aur wuh un se árasta hoke adálat ke roz sharminda na hogá.

Is liye, ai piyáro, dunyawí chízon kí, jo sab guzar jáengí, talásh na karo; balki Púlús hawári kí nasíhat mánke úpar kí chízen dhúndho, jahán Masíh Kḥudá ke daihne baiṭhá hai. Úpar kí chízon par dil lagáo; na un chízon par, jo zamín par hai; kyúnki dunyá guzartí hai, aur us kí hirs bhí; lekin jo Kḥudá kí marzí par chaltá, wuhí hamesha rahtá hai.

XXXII.

SHARI'AT KÁ KHULÁSA.

REV. A. KREISS KÍ TASNÍF.

Jab Farísion ne suná, ki Isá ne Zádúqion ko lájawáb kiyá, we ek jagah jama hue, aur ek ne un men se, jo kátib thá, us kí ázmáish ke liye sawál karke kahá, ki Ai ustád, shari'at men bará hukm kaun sá hai? Isá, ne use kahá, ki Kḥudáwand ko, jo terá Kḥudá hai, apne sáre dil se, aur apní sáríján se, aur apní sárí aql se piyár kar. Pahlá aur bará hukm yih hai; aur दूसrá, jo us kí mánind hai, yih hai, ki Tú apne pa-rosí ko aisá piyár kar, jaisá ap ko kartá hai. Yihí do hukm sárí shari'at, aur sab nabion ká khulása hai.—Matí 22: 34—40.

HAMA'RE Kḥudáwand Isá Masíh ne is bát se záhir kiyá, ki shari'at men bará hukm kaun sá hai. Is nasíhat ká sabab yih thá, ki Farísion men se ek ne áke us se puchhá, ki Shari'at men bará hukm kaun sá hai? Kátib, jo shari'at ko sikháthe the, hukmon men farq karte—ek ko bará, ek ko chhoṭá záhir karte the; lekin is par ki sab hukmon se bará kaun sá hai, muttafiq na the. Pas, unhon ne jab yih suná, ki Isá ne Zádúqion ko, jo qiyámat ke munkir the, lájawáb kiyá, to us kí dánái par ta'ajjub karke chéhá, ki wuh batáwe, ki shari'at men kaun sá hukm bará hai. Tab Isá ne jawáb men kahá, ki Kḥudáwand ko jo terá Kḥudá hai, apne sáre dil se, aur apní sáríján se, aur apní sárí aql se piyár kar. Farísí ne is jawáb ko achchhá aur barmahal jánkar Isá se kahá, ki Kyá khúb, ai ustád, tú ne sach kahá; kyúnki Kḥudá ko sáre dil se, aur sáríján se, aur sárí aql se piyár karná, aur apne pa-rosí ko apní mánind ázíz rakhná, sárí sokhtaní qurbání aur zabáih se bihtar hai.

Pahle hukm men farmáyá hai, ki Tú Kḥudáwand ko, jo terá Kḥudá hai, apní sárí quwat se piyár kar. Har ádmí kisi chíz ko piyár kartá hai; aur hamen cháliye, ki mahabbat rakhen aur mahbúb howen; par pahle hukm men yih farmáyá hai, ki ham Kḥudáwand ko, jo hamará

Khudá hai, sab chízon se ziyáda piyár karen; isí sabab wuh, jis ká dil na Khudá kí, balki sirf maḡhlúqát kí taraf máil ho, gunáh kartá hai. So hamen zurúr hai, ki Khudá ko sab chízon se ziyáda piyár karen; kyúнки wuhí is láiq hai, is liye ki wuh sári chízon ká ḡhálíq aur nigah-bán hai, aur hamen har chíz us kí mihrbání se miltí hai; kyúнки wuh sab nek aur kámil niámaton ká baḡhshnewálá hai; aur har kisi ko, jo us se duá mánge, detá hai. Ham sab us ke háth se kapre aur ḡhurák, aur har chíz, jo badan ke wáste zurúr hai, páte hain; par wuh na faqat hamári jismání, balki rúhání zurúriyát kí bhí ḡhabardári kartá hai; kyúнки jab tauba karen, gunáhon kí muáfi baḡhshatá, aur apná Pák Rúh hamen detá hai, táki wuh hamári rahnumái aur madad kare. So is taur par ham roz roz jismání aur rúhání niámaton páte hain; aur jis súrat men ham un ko, jo ham se dostí rakhte, aur hamen achchhí chízen dete, piyár karte hain, to wájib o lázim hai, ki Khudá ko, jo harek chíz, jis ke ham muhtáj hain, kyá ján, kyá badan ke liye marahmat kartá hai, un se bahut ziyáda piyár karen.

So ham apní mahabbat kis taur par záhír karen? Faqat záhírí tarah se nahín, balki sáre dil se. Dil hamári aql, aur andeshon aur ḡhwá-hishon kí jagah hai; lekin we bure hain; kis wáste, ki hamáre dil ná-pák hain; jaisá Isá Masíh ne kahá, ki Bure ḡhiyál, aur ḡhún, aur ziná, aur harámkaríán, aur choríán, aur jhúthí gawáhián, aur kufr dil se nikalte hain. Aise dil men Khudá kí mahabbat nahín; is liye zurúr hai, ki ham az sar i nau paidá hoke Khudá kí taraf rujú howen; kyúнки wuh hamáre dil pák sáf kar saktá hai. Jab hamará dil gunáh se pák sáf hoke sirf usí kí taraf máil ho, aur ham yih iráda rakhen, ki ham sab chízon se ziyáda usí ko piyár karen, tab ham dil se use piyár karte hain; aur jab hamáre sáre ḡhiyál aur fikr Khudá kí taraf muta-wajjih howen, tab sári ján se us ko piyár karte hain. Ján goyá andeshon ká chashma aur ádat ká maḡám hai; is liye agar ham Khudá ko tamám koshish aur mahabbat se piyár karen, to ham apní sári ján se us ko piyár karte hain, aur Dáud kí tarah kah sakte hain, ki “Jis tarah se hirani chashme ke pání kí niháyat piyási hotí hai, waisá hí merí ján terí niháyat piyási hai.” Jab aql kí sab qúwatan Khudá kí buzurgí aur taríf karne men mashḡúl rahen, aur ham sab kuchh, jo karte hain, Khudá ke nám se karen, tab ham apní sári aql se Khudá ko piyár karte hain. Pas, hamen munásib hai, ki use is tarah piyár karen; kyúнки us ne farmáyá, ki ham aisá karen; aur wuh is láiq hai, is liye ki wuh bhí hamen piyár kartá hai.

Aur us ne apní barí mahabbat is se záhír kí, ki apne eklaute Beṭe ko dunyá men bhejá, táki us ke wasile se naját páwen. Dáúd bádsháh aisá shaḡhs thá, ki jis ne Khudá ko dil, o ján, aur aql se piyár kiyá. Us ne Zabúr men likhá hai, ki “Ai Khudáwand, ásmán par kaun hai, jo merá hai, magar tú? aur zamín par koí nahín, jis ká main mushtáq hún, magar tú. Jab merá jism aur merá dil ghaṭ jáwe, to tú, ai Khudá, mere dil ká bútá, anr merá abadí hissa hai. Tú merí qúwat hai; main tujhe dil se piyár kartá hún.” Yún hí Púlús hawári ne bhí Khudá ko piyár kiyá hai; jaisá ki us ne Rómíon ke maktúb men likhá hai, ki Mujhe yaqín hai, ki na maut, na zindagí, na firishte, na sardár aur zoráwar rúhen, na hál, na áyanda ke májare, na bulandí, na

pastī, na aur koī chīz ham ko Khudā kī us mahabbat se, jo hamāre Khudāwand Isā Masīh meṅ hai, judā kar sakegī. So aisī mahabbat Masīh ke sachche shāgirdon meṅ hai; kyūnki Khudā kī mahabbat Rūh-ul-Quds ke wasīle se un ke dilon meṅ bhar jātī hai; aur Khudā kī mahabbat yih hai, ki ham us ke hukmon par amal karen; aur us ke hukm kuchh bhārī nahīn haiḡ. So jab tak ham us ke hukmon ko na māneḡ, us kī mahabbat ham meṅ nahīn; aur ham ko chāhiye, ki us se duā māngeṅ, ki wuh apnī Rūh ke wasīle se hamāre dilon ko mahabbat se bhar dewe, aur hamen us meṅ kāmīl kare.

Dúsrā hukm, jo pahle kī mánind hai, yih hai, ki Apne paṛosī ko aisā piyār kar, jaisā ap ko piyār kartā hai. Yih donon hukm aise báham mile haiṅ, ki ek dústre se judā nahīn ho saktā; kyūnki mumkin nahīn ki ham Khudā ko piyār karen, aur paṛosī se dushmanī rakheṅ; is liye ki jis ke dil meṅ Khudā kī mahabbat hai, wuh apne paṛosī ko bhī piyār kartā hai. Ab zurūr parā, ki jaisā Khudā ne barī mahabbat se ham par rahm kiya, aur kartā hai, waisā hī ham bhī un par, jo hamārī madad ke muhtāj haiḡ, khushī se rahm karen; chunānchi Yūhannā hawārī ne likhā hai, ki Agar koī kahe, ki main Khudā ko piyār kartā hūṅ, aur apne bhāī se dushmanī rakhe, to jhūṭhā hai; ki agar wuh apne bhāī ko, jis ko dekhtā hai, piyār nahīn kartā, to Khudā ko, jise nahīn dekhtā, kyūnkar piyār kar saktā hai? Ham ne us se yih hukm páyā hai, ki jo koī Khudā ko piyār kartā hai, so apne bhāī ko bhī piyār kare. Jab ham Khudā ko piyār karte, aur us ke hukmon par chalte haiṅ, to yaqīnan us ke farzandon ko bhī piyār karte haiṅ; is se zāhir hai, ki wuh, jo Khudā se mahabbat rakhtā hai, apne paṛosī ko bhī piyār kartā hai; aur hamāre paṛosī na faqat rishtadār, aur dost áshná, aur we, jo ham se nekī karte haiṅ, balki har ádmī, kyā dost, kyā dushman, jo musibat meṅ giriftār hoke hamārī madad ká muhtāj ho, hamará paṛosī hai. So hamāre Khudāwand Isā Masīh ne is ko sábit kiya, aur kahā, ki Agar tum unheḡ, jo tumheṅ piyār karte haiṅ, piyār karo, to tumhārī kyā fazīlat hai? Gunahgār bhī apne doston ko piyār karte haiṅ. Aur agar tum un se, jo tum se nekī karte haiṅ, nekī karo, to tumhārī kyā fazīlat hai? Gunahgār bhī aisā hī karte haiṅ. Aur agar tum unheṅ, jin se phir páne kī ummed hai, qarz do, to tumhārī kyā fazīlat hai? Gunahgār bhī gunahgáron ko qarz dete haiṅ, táki us ká badla páweṅ. Lekin tum apne dushmanon ko piyār aur un kī minnat karo; aur phir páne kī ummed na rakhke qarz do, to tumheṅ bahut phal hogā, aur tum Allāh Taālā ke farzand hoge; kyūnki wuh náshukrguzáron aur badkáron par mihrbán hai; is wáste jaisā tumhára Báp rahīm hai, tum bhī rahīm ho. Wuh sab ke liye bhalā, aur us kī rahmat sári khilqat par hai. Wuh apne sūraj ko badon aur nekon par tālī kartā, aur rástbázon aur náráston par meḡh barsátā hai.

Ham ko zurūr hai, ki har kisī se dostī o mahabbat rakheṅ, aur jab koī musibat meṅ pare, to yih na púchheṅ, ki Áyá wuh dost hai, yá dushman? balki jaisā Khudā sabhon par rahm kartā hai, waisā hī ham bhī us par rahm karen. Chunānchi us ne farmáyā hai, ki Tú apne paṛosī ko aisā piyār kar, jaisā ap ko kartā hai. Zāhir hai, ki koī apná dushman nahīn; kyūnki jab hamára bhalā hotā, khush hote; aur jab

tasdíq páte gamgín hoke cháhte haiñ, ki auron se tasallí o madad páwen; lekin jaisá ham cháhte haiñ, ki log ham se karen, ham ko bhí waisá hí un se karná munásib hai. Is liye ham ko cháhiye, ki na faqat apne pařosí ká nuqsán na karen, balki us ke liye bihtarí cháheñ. Par aisí mahabbat un ke siwá, jo Rúh-ul-Quds ke wasíle us se bhare haiñ, kisí meñ nahíñ; we hí Masíh ke sachche shágird haiñ, jaisá ki us ne kahá, Agar tum ápas meñ piyár karo, to us se sab jánenge, ki tum mere shágird ho. Jo is dunyá meñ har ádmí ko K̲hudá kí mahabbat hotí, aur har ek apne pařosí ko aisá piyár kartá, jaisá áp ko kartá hai, to kyá k̲húb hotá! Us waqt ham dunyá ko aisí jagah se tashbíh de sakte, jo wíráñ aur újar maqám thá; phir k̲hushnumá bág banáyá gayá. Par we, jo is hukm ko mánte, thore haiñ, ki Tú apne K̲hudáwand ko, jo terá K̲hudá hai, apne sáre dil se, aur apní sárí jáñ se, aur apní sárí aql se piyár kar; aur apne pařosí ko aisá piyár kar, jaisá áp ko kartá hai. So kis wáste ádálát ke roz bahut log halák ho jáenge? Jawáb yih hai, ki Unhon ne mahabbat nahíñ rakhí. Sach hai, ki jinhon ne sakht-dilí se rahm aur mahabbat nahíñ kí, we bhí rahmat na páwenge; chunánchi likhá hai, ki “Jis paimáne se tum ne paimáish kí, usí se tumháre liye bhí paimáish kí jáegí.” Is se zálhir hai, ki faqat we, jo mahabbat rakhte haiñ, fazl ke waqt ke liye achchhá bij bote haiñ; kis wáste, ki we shariát ko púra karte haiñ; kyúñki yihí do hukm, yañe K̲hudá ko, aur apne pařosí ko piyár karná, sárí shariát aur sab nabíon kí kitábon ká k̲hulása hai.

Is liye hamen munásib hai, ki ham na lafzí aur zubání, balki haqíqí aur tahqíqí mahabbat rakheñ; aur yih bát bhí máneñ, ki mahabbat ke siwá kisí ke qarazdár na raho. Jo dústre se mahabbat rakhtá, wuh shariát ko púra kartá hai; kyúñki yih hukm jo haiñ, ki tú ziná na kar, qatl na kar, j̲húthí gawáhi na de, lálach na kar, yá jo koí aur hukm hai, sab ká k̲hulása is bát meñ hai, ki tú jaisá áp ko waisá pařosí ko piyár kar. Mahabbat pařosí se kuchh badí nahíñ, kartí; is liye shariát mahabbat se púrí hotí hai; aur wuh jo mahabbat meñ rahtá, K̲hudá meñ rahtá hai, aur K̲hudá us meñ. Faqat.

XXXIII.

SABAB KI JIN SE DUNYÁ MASÍHI MAZHAB SE

DUSHMANÍ RAKHTÍ HAI.

REV. J. WILSON KI' TASNÍF.

Aur sárí qaumen tum se mere nám ke wáste dushmaní rakhenge.—Matí 24 : 9.

Kor', jo Masíh ke ahwál ko Injíl meñ paře, aur k̲húb us par gaur

kare, albatta apne dil meñ samjhegá, ki sab koí us kí sári báton aur kámon se khush honge, aur us ke sáre pairaon ko mubárakbád kahenge; aur we pahchánenge, ki Masíh pák aur be aib aur gunáh aur badí se mubarra thá, aur har kisí se nekí aur bhalái karke phirá kartá thá. Jahán kahín játá, tahán baní Ádam kí bihtarí hí meñ mashgúl rahtá thá, aur kisí ek shaḡhs kí badí yá bad khwáhí hargiz na kí. Us kí har ek bát mihr, aur mahabbat, aur shafaqat, aur muláimat se bharí thí, aur us ká har ek kám rástí aur bhalái ká thá. To kaun apne dil meñ kھیál karegá, ki koí insán us se ádáwat rakhegá, yá us kí khátir us ke pairaon se dushmaní rakhegá?

Lekin Masíh ne, jo shurú se ákhir tak dekhtá hai, jo insán ke dil se waqíf hai, aur ihtiyáj nahín rakhtá, ki koí insán ke hál yá mansúbón par gawáhí de, áge se apne shagird aur pairaon ko is bát par muttala kiyá. Us ko achchhá nahín lagá, ki we is haqíqat se bekhábar raheñ; kyúнки wuh jántá thá, ki we apne tajríba i talḡh se maḡlúm karenge, ki dunyá un se dostí yá miláp kar nahín sáktí. Aur us ne us ká *sabab* bhi bayán kiyá, jo thorí der bað mazkúr meñ áwegá. Bahut log apne apne dil meñ Yahúdíon ke káhin aur sardáron kí, jinhon ne us se ádáwat rakhí, aur use maslúb kiyá, shikáyat karte; aur kھیál karte haiñ, ki agar main us waqt házir hotá, to un ká sharík nahín hotá; taubhí agar we apne apne dil ko aur thorá sá jánch lete, to apne hí dil meñ usí ádáwat kí jar ko páte.

Ab zará sá daryáft kiyá cháhiye, ki *sabab* kyá hai, ki Yahúdíon ne Masíh se aisí dushmaní rakhí, aur dunyá áj tak us ke pairaon se dushmaní kartí játí hai.

1. *Pahlá* aur bará *sabab* wuhí hai, jo Masíh ne áp apne shágirdon se bayán kiyá, yañe “Agar dunyá tum se dushmaní kare, to tum jáno, ki us ne tum se áge mujh se dushmaní kí. Agar tum dunyá ke hote, to dunyá apnon ko piyár kartí; par is liye ki tum dunyá ke nahín, balki main ne tumheñ dunyá se intíkháb kiyá, is wáste dunyá tum se dushmaní kartí hai.” Masíh ne, jab Yahúdíyá meñ zuhúr kiyá, tab un ke diní aur dunyáwí sardáron ko zálím, aur zar dost aur khud garaz, aur bahuterí nafsání aur burí ádaton par ámal karte páyá. Unhon ne sári diní aur dunyáwí izzat, aur martabat, aur manfaát bhí apne hí háthon meñ rakhí, aur auron par bhárí bhárí boj láde, jin ke uṡháne meñ we áp apní ek unglí bhí nahín lagáte the. Unhon ne Tauret ko apne pás rakhá, lekin apní aur bápdádon kí hadíson se us ke mazmún ko chhipáyá, aur aisí tadbír ṡhahráí thí, ki áwámm jitní mihnat aur kharch karen, apne apne gunáhon ke dafaiye ke liye, itná nafa sardáron aur izzatdáron ko howe. Masíh rástí aur sachái kí rúh se un kí dagábází aur hílon hawálon, aur hadíson kí batálat aur bahánon ko bayán karke haqíqat i hál ko áshkárá kartá thá; aur sáf sáf sábit kiyá, ki aise hílon aur bahánon se we ásmání báðsháhat ke darwáze ko band karte, aur na áp us meñ dákhil hote, na auron ko us meñ dákhil hone dete the. We rafta rafta ján gae, ki agar yih shaḡhs jítá rahe, aur sab kahín is taur par ṡalím detá rahe, to hamárá nafa aur neknámí, hamárá izzat aur martabat jaldí játí rahengí. Zurúr se zurúr ham kisí tadbir se us ko rú i zamín par se uṡhá dálen, us se peshtar kí dunyá us kí pairawí íkḡhtiyár kare. Apne nafa, aur

neknámí, aur izzat ke fikr se un kí ánkhen mund gaín, yahán tak ki we us kí chál chalan, aur namúna, aur talím kí haqíqat ko daryáft nahín kar sakte the. So unhon ne áram yá ráhat ko qabúl nahín kiyá, jab tak ki kisi tadbír yá baháne se use salib par khínchwá na liyá.

Aur bád us ke maslúb hone ke, us ke hawárin us ke naqsh i qadam par chalte the. We rástí aur sacháí se talím dekar chhoton baron ke áge gunáh kí áin badí aur sharárat ko záhir karte rahe ; aur sabhon ke liye naját kí ek hí ráh aur ek hí tadbír batáte rahe ; yane, har ek qism aur har ek darja ke gunáh ko chhorná, aur Masih ke kafáre par bharosá rakhná. Ahli dunyá is tadbír ko saḡht aur mushkil samajhte haiñ, aur us kí bardásht kar nahín sakte.

Masíhí mazhab dunyá men akelá, aur sab mazhabon se alag rahtá hai. Jitne mazhab, ki dunyá men jári húe, yá jári ab haiñ, un sabhon men kisé tarah kí tadbír húi, jis se un ke pairau nafsáni khwáhishon men rahne páwen ;—aisí koí tadbír, ki kisi tarah ká jarimána dene se, yane pandá logon ko paisá kaurí dene, yá khairát dene, yá hajj yá tírath men mihnát aur kharch karne se, yá naháne se, yá kisé tarah ke rít aur rasm ke bajálane se, ádmí apní nafsáni khwáhish par chalne páwe.

Aur un kí kitábon men Khudá kí sifaten, jo mazkúr men áti haiñ, ádmíon kí sifaton ke muwáfíq banáí játí haiñ. Yane un men bhalí burí, pákízagí aur nápákí, qúwat aur kamzorí sachchi aur jhúthí milí húi haiñ.

Lekin dín i Masíhí un sabhon se alag hai. Us men koí tadbír nahín hai, ki jis se koí ádmí apní nafsáni khwáhishon ke uzr karne, yá un par chalne páwe. Sabhon ke liye ek hí hukm hai, yane “ bagair dilí, bátiní pákízagí ke námumkin hai, ki koí Khudá ko dekh sake ”—aur “ Tum pák hoo, kyúinki main pák hún, Yahowáh tumhárá Khudá farmátá hai. ” Aur yún kisi darje yá kisi tarah kí nafsáni nápák khwáhish ká uzr yá ijázat hargiz háth nahín áti. Isí liye ahl i dunyá us se bezár hote haiñ, aur use ek mazhab i saḡht aur anmel ṭhahráte haiñ.

Hawárin ke waqt se leke tén sau baras ke arse tak Masíhí mazhab púrab pachchhim, uttar dakkhin ke mulkon men barhtá phailtá chalá gayá. Un sab mulkon ke rájá, bádáháh, umará, ahl i iqtidár sab ke sab us se ádáwat rakhte the, aur use dabáne aur miṭáne cháhte the. Un kí raíyat sab kí sab butparast hokar ek ek mulk yá zilá men apní apní khushí par dewtá aur devían banátí thí, aur jis tarah kí rít aur rasmon se cháhtí, un kí pújá kartí thí. Aur jahán jahán Injil aur Masíh ke pairau phailte aur maujúd hote the, logon ne unhen kahá, ki “ Tum hamáre dewton ko máno, aur un kí pújá men sharík hoo, to ham bhí tumháre mánenge, aur tumhári pújá men sharík honge. Dunyá mazhabon, aur dewton, aur mabúdon se bharí húi hai. Tum log káhe ko un sabhon se alag rahte ho, aur un sabhon kí nindá karte ho ? ” Masíhíon ko faqat ek hí tarah ká jawáb dene kí ijázat thí, yane “ Ham aisá kar nahín sakte haiñ. Pákízagí nápákí se kyá mel rakhtí hai ? Sach aur jhúth men kyá miláp hai ? Bhale bure men kyá muwáfaqat hai ? Ham Khudáwand ke aur dewon ke piyále kis

tarah pñenge? Tum apne dewton aur devion ko chhoṛo; hamáre Kḥudá kī sifaton ko ádmion kī banáí hūí chizon par lagáne se báz áo; apní be mauṇá rít aur rasmon ko chhoṛo; apne apne sáre gunáhoṇ, aur bad cháli, bad kḥwáhí, nafsání, ghinaune kámon se, jo tumhári dewton kī pújá meṇ mustámal haig, pachhtáo, aur dil kī sidhái aur durustí se hamáre fidákár Masíh par imán láo; to ham tumháre sáth Kḥudá hí kī ibádat aur hukmbardári meṇ sharík hongé,”

Lekin butparast hargiz aisi sharton ko qabúl kar nahíṇ sakte. We bezár hoke kahte the, “Kyá ham apne bápádáon ke mazhab ko chhorenge, aur apne buzurgoṇ ke taríqe ko behurmat karenge? Kyá ham apne dewton kī ráh se, jo sahaj hai, aur un kī pújá se, jo hamáre dil ke muwáfíq hai, báz ávenge, aur tumháre taríqon ko, jo saḡht mushkil haig, iḡhtiyár karenge? Nahíṇ! agar tum hamáre dewton ko máno, aur hamári pújá meṇ shámil ho, to bhalá; aur nahíṇ, to ham tumheṇ sazá denge, aur tang karenge, yahán tak ki tum unheṇ qabúl karne cháhoge.” Aur Masíhion kī chál chalan bhí unheṇ shar-mátí thí. Kyúunki butparaston ke darmiyán shahwat, lálach, chori, jhúṭhí qasam, jhúṭhí gawáhí, gálián, bad kḥwáhí, bad goí, kíná, dáh, jhagre, qaziye—har ek burí bát aur burá kám jáiz aur jári bhí thá. Aur Masíhí aise sab kámon se pare rahte, aur unheṇ tádíḅ aur ilzáṁ dete the. Pas, isí ṣabab se ahl i Masíh jis mulk meṇ maujúd the, satáe játe, aur jitní tarah ke haulnák dukh aur ízá aur taklifon se, ki un ke dushman íjád kar sakte, hazáron aur lákhon ján se máre játe the. Lekin we injíl se aur Masíh hí ke namúne se sabr aur bardásht karná síkhte, aur maut ke dukhon meṇ sambhále játe the. Aur jahán do chár, yá das bís ádmí, itne hazáron ke rú ba rú ázmáe játe, aur ján se máre játe, tahán un kī nek cháli, aur sabr, aur safái, aur imán kī qú-wat maut ke kḥatron meṇ saikaron ke dilon ko qáíl kartí thí, ki yih dín sachchá hai, aur Kḥudá kī taraf se; aur unhon ne bhí us mazhab ko iḡhtiyár kiyá. Aur yún hí yih kaháwat jári ho gaí, ki “Dindáron ká kḥún kalísiyá ká tukhm hai.”

Aur qaríb tén sau baras ke áirse meṇ, jab mulkon ke rájá, aur bád-sháh, aur umará, aur ahl i iqtidár, sab ke sab mutaffíq hokar Masíhí mazhab ko satáne, aur dabáne, aur nest nábud karne kī koshish meṇ the, yih satáyá aur dabáyá húa mazhab yahán tak barhá, aur phail gayá, ki Kanṣtántín sháhansháh i Rúm ne pahcháná, ki Masíhí log un ke dushmanon se shumár meṇ ziyáda ho gae haig, aur mere liye nafa hogá, ki maig bhí un kī kḥátir Masíhí ho jáún.

Us waqt se leke áj tak dín i Masíhí Yúrap ke mulkon meṇ phailta aur jári hotá chalá játa hai. Lekin har waqt dín i Masíhí ádmion se pák aur kamál matábiat ká ḍawá kartá hai, aur kisí tarah kī nápákí yá nafsání aur náqis tábidári ká uzr nahíṇ mántá, balki har ek qism ke nuqs aur nápákí ko maṇa kartá, aur mújib i halákat ṭhakarátá hai; isí liye har ek ádmí, jab tak apní zátí hálát meṇ rahtá hai, us se áḍawat rakhtá hai. Har ek laṛká, jo dunyá meṇ paidá hotá, so gunáh se haml meṇ liyá játa, aur gunáh hí meṇ paidá hotá, aur jab tak zátí hálát meṇ rahtá, aur nauzáda na hotá, tab tak zurúr wuh Injil aur Masíhí dín ko apná dushman aur ilzáṁ denewálá samjhegá, aur us kī taraf píṭh pherkar kisí mazhab, yá taríqe ko dhúndhegá, jo us kī

kamzorí, aur nápakí, aur náqis tábidárí ká uzr karke use qabúl karegá.

Jab kisi ádmí ká dil K̲hudá kī taraf se is qadr raushan kiyá jāe, ki Injil kī haqíqat ko pahcháne, aur us kī salámatí aur naját ke liye laiq aur kámil taiyárí, jo Injil meñ hai, bújhe, aur Rúh i Pák ke wasíle se nauzáda howe, tab apní dushmaní chhorakar Injil kī dāwat ko qabúl kartá hai. Lekin wuh jántá hai, aur usí din se leke apne tajribe se pahchántá hai, ki dunyá kī dostí mujh se játí rahí hai, aur áge ko dunyá mujh se dushmaní rakhegí.

2. *Dúsrá* sabab ahl i dunyá kī dushmaní ká yih hai, ki Injil har ek ádmí ko zát hí se kulli nápak aur tabáh ṭhaharátí hai, aur kuchh nekí yá bhalái karne ke liye apne áp se be qúwat. Har chand ki bahut log zubán se is bāt ká iqrār karte haiñ, tau bhí jab tak dil zátí hálát meñ hai, is ko nápasand aur nágawár jántá hai.

Aur Injil sikhlátí hai, ki insán apne álmál se hargiz naját ko hásil kar nahíñ saktá : aur námumkin hai, ki koi áp se aisí nekí kare, yá sawáb hásil kare, ki jis-ke úpar takiya kar sake, yá K̲hudá ke nazdík us ká tazkira bhí kar sake ; kyúñki naját sarásar K̲hudá ke fazl hí se hai. Aur yih talím insán kī zátí k̲hudbiní, aur magrúrí ko jagah nahíñ detí, balki use ukhártí, aur urá detí hai. Isí liye jo log ki K̲hudá kī tadbír se náwáqif haiñ, aur apní rástí aur sadáqat ko sábit karne, aur usí par kifáyat karne cháhte haiñ, us se bezár howenge.

3. *Aur* ek sabab dunyá kī adāwat ká yih hai, ki dín i Masíhí istíā-mál meñ rúhání hai, aur har ek k̲hiyál aur fiál ko K̲hudá kī tábidárí meñ dabátá hai ; aur báhirí rít aur rasmon ko jagah thorí detá hai. Lekin zátí insán kī tabíyat báhirí rít aur rasmon ko barí aur bhárí jántí hai. Aur wuh naháne, aur dhone, aur tahárat, aur dán pun karne, aur k̲hairát zakát dene, aur buzurgon ke khiláne, cháhe, we zinde, cháhe murde howeñ—aur aisí aisí záhírí rasmon aur mihnaton kī k̲hwáhán hai, jin ke wasíle se we k̲hiyál karte haiñ, ki itná sawáb hásil howe, ki K̲hudá zurúr un ke gunáhon ko muáf karegá, aur unheñ ázíz aur izzatdár jánegá. Injil ke rú se qasd aur ummaid is qism kī K̲hudá ke nazdík aisí haiñ, jaise nák meñ dhúán. Injil kī tadbír yih hai, ki apne álmál ke sawáb par takiya karne se báz áweñ, aur Masíh kī rástí aur sawáb i kámil par bharosá rakheñ, aur apní chál chalan meñ us ímán ke láiq phal dikháweñ. Lekin zátí, nafsání insán, us nek chalan ke báb meñ, jo ímán ká samara yá phal hotá hai, kuchh nahíñ jántá. Wuh aisí rít aur rasmon ká mushtáq hai, ki jin ke bajá láne se wuh apne liye pun yá sawáb jamá kar sake ; aur apní wahmí nekí aur sawáb par takiya karke Masíh ke fidá aur kafáre ko haqír jántá hai.

4. *Ek aur* sabab dunyá kī dushmaní ká yih hai, ki har ek ádmí apne taín kisú tarah ke mat yá mazhab meñ shámil hote samajhtá hai. Aur dunyá ke logon ne, jo jhúṭhe aur bátíl mazhabon meñ shámil haiñ, bhale bure kī imtiyáz karne kī táqat ko kho diyá hai. Un ke zihn aur tamíz un kitábon se, jo bhale bure ká faraq nahíñ kartí haiñ, aur K̲hudá hí kī sifaton meñ bhalái burái ko milá detí haiñ, yahán tak madhosh ho gae haiñ, ki Injil ke pañhne sunne meñ, un ke liye, na maza na lazzat hai. Pas, we us se dúr rahte haiñ, aur us kī pák aur k̲hális karnewáli talím se náwáqif rahte haiñ. Yá ki jo we use kuchh kuchh sunen, pañheñ, tau bhí un kī rúhání samajh Shástron aur Purá-

non, aur Qurán, aur Hadíson ke sunne se kund ho gáí hai, yahán tak ki we Injíl kí khássiyyat aur fazílat ko pahchánte nahín. Aur agar us kí khássiyyat aur fazílat ko zará pahcháne, tau bhí un ke dil me, jahán laṛkái se jismání, nafsání khwáhishen rájj ho rahí hai, Injíl kí khássiyyat nágawár maḷúm hotí hai. Yih khiláf i tabá hai, ki koí us kitáb ko, yá us mazhab ko pasand kare, jo us ke dil aur hál, aur chál ko ilzám detá hai. Isí sabab se bahutere Injíl se náváqif aur dúr rahte hai. Masih ne un ke hál ko kaisá khúb bayán kiya, jab farmáyá, ki “Jo koí burá kartá hai núr se dushmaní rakhtá hai, aur núr ke nazdík nahín áta, na howe, ki us ke kám záhir howe; par jo koí bhalá kartá hai, núr ke pás áta hai, táki us ke kám záhir howe, ki we Khudá me kie gae hai.” Injíl har ek ádmí ke kám par roshní chamkátí hai; aur kuchh taajjub nahín, ki we, jo burá karte, aur apne dil kí cháh par chalte hai, us se ádawat rakhte hai.

5. *Aur* ek sabab dunyá kí ádawat ká yih hai, ki ahl i dunyá aksar samajhte hai, ki naját kí ráh chaurí hai, aur sahaj se pái játí; par Injíl kahtí hai, ki tang hai, aur mushkil se pái játí, aur thore hai we, jo us me chalte hai. Ahl i dunyá aksar samajhte hai, ki har kisi mazhab par chalne se ákhir ko ek hí ásmán me pahunch játe hai. Aur kahte hai, ki “sab nahr aur nadián samundar me bahtí hai—kyá púrab, yá pachhim, kyá uttar yá dakhin kí taraf se;—jidhar se bahe, sab kí sab samundar me ákhir ko já milte hai.—Aur usí tarah se ek mazhab ek mulk ke wáste achchhá hai, aur दूसrá mazhab दूसरे mulk ke wáste, par jitne mazhab hai, un ke pairau ek hí ásmán me ákhir ko pahunch játe hai.” Yih butparaston ká dawá aur bahána i khássa hai. Lekin Injíl kí har ek áyat use jhúthlátí, aur urátí hai. Yih shara i khilqat hai, ki sab nadiyon ke pání niche ko bahte jáwe, aur samundar me já mile. Aur tabái rahe bahut hai, aur chaurí hai, aur sahaj se pái játí hai; aur sab ke sab jo un me játe hai, niche ko bahte chale játe, aur jis taraf se áte *jahannam* me já milte hai. Aur ek hí ráh hai, jo ásmán kí taraf játí hai; aur wuh chaurí nahín, balki tang hai; aur niche, pání ke muwáfiq, utartí nahín; aur jo jo us par chalne cháhe, to ahl i dunyá ke sáth niche ko bahne nahín pátá, balki úpar úpar akelá ek tang aur mushkil aur kanṭila rasta par mihnát karní partí hai. Aur yih jism aur ján ke liye mushkil aur nápasand hai. Aur ahl i dunyá us se bezár hokar kahte hai, ki chaurí, rangín ráhon me dil-khush sáthion ke sáth, niche niche bahte jáná hame achchhá lagtá hai.

6. *Aur* ek sabab jis se dunyá ke log dín i Masíhí se dushmaní rakhte hai, so yih hai, yane we khyál karte hai, ki gunáh faqat báhirí, zahirí sharárat me hai; maslan zinákárí, zulm, aur chori, qaziye, jhagre, jhúth bolne me, wagaira. Aur samajhte hai, ki in ká dafiya aur safái sahaj hai. Lekin Injíl dil kí safái bhí talab kartí hai; aur batiní burí khwáhish ko bhí, jo hargiz amal me láí nahín gai, gunáh thahrátí. Par we, jo Khudá kí shariát ke dawae se náváqif hai, aisi taftish kí bardásht kar nahín sakte. We bezár ho játe jab un ke batiní khyál zahir me lée játe, aur maut ke sazawár thaharée játe hai.

7. *Aur* ek sabab, jis se dín i Masíhí Hindustán me námaqbul hai,

so yih hai. Hindustán ke log aksar Masíh ke nám se wáqif hai; aur samajhte hai, ki Masíhí mazhab faqat ek mazhab hai, mánind un ke, jo áge Hindustán men maujúd the. Hunúd samajhte hai, ki Masih faqat un ke Vishnu ke samán hai, jis ke báb men bahut sí katháen hai, ki us ne bhí dunyá men autár liyá. Aur ahl i Mahammad samajhte hai, ki wuh faqat ek nabí thá Mahammad kí mánind, yá us se bhí adná. Is liye we áge hí se, aur biná daryáft kiye apne apne d'il men thaharáte hai, ki apne dín ko chhorná, aur is nae dín ko qabúl karná, kuchh fáida na karegá. Aur isí liye we Injíl aur dín i Masíhí kí haqíqat ko daryáft karne se báz rahte, aur us kí khássiyaat aur fazílat se náwáqif rahte hai.

S. Ahl i dunyá kí bezárí ká aur ek sabab yih hai, ki Angrezon kí chál par thokar kháte hai. Un ko malúm nahín—aur jab malúm bhí hotá hai, us par kھیال nahín karte—ki Angrezon men bahutere hai, jo díndárí yá Khudáparastí ká fikr nahín karte, lekin apne apne dil kí cháh par chalte hai, aur náhaqq aur galatí se Masíhí kahláte hai. Agar Injil par gaur karte, to pahchánte, ki faqat we hí, jo Masíh ke naqsh i qadam par chalte hai, Masíhí hai. Lekin jis tarah ki we Hindú aur Mahammadíon ko un ke kapre kí kiswat se pahchánte hai, usí tarah Angrezon ko bhí un ke rang aur kapre kí kiswat se Masíhí thaharáte hai. Injíl ká qánún yih hai, ki “daraht apne phal se pahcháná játá hai.” Insán apní chál se jáná játá hai, ki Masíhí hai, yá nahín. Lekin dunyá ká dastúr hai, ki us ke kapre kí súrat se us kí haqíqat i hál ko thaharáwe. Angrezon men bahutere hai, jo Injíl ke rú se ahl i nifáq hí thaharte hai. Aur un ká kuchh uzr nahín hai. Un ke hál men Injil kí ek kaháwat purí hotí hai, yane “Buri suhbateng achchhí ádaton ko bigártí hai.” Unho ne bahut dinon se Hindú aur Musalmin, aur aison kí suhbat kí hai, aur un kí suhbat ne Injil ke asar ko un ke dilon men se dafa kiyá hai. Aise Angrezon par wuhí ilzám hai, jo agle zamánon men Khudá ne Yahúdíon ke haqq men kahá, jab we gair qaumon men phail gae; yane “Jab we gair qaumon men, jahán we rawána hue the, dákhil hue, tab mere muqaddas nám ko nápák kiyá, jab un se kahte the, ki ye Khudáwand ke log hai, aur usí kí zamín se nikal áe hai.” Usí tarah se aise Angrezon ke sabab se Khudá ke pák nám aur Injíl kí, gair qaumon ke nazdík, tahqír kí játí hai. Aur Khudá hí un se is bát ká hisáb kar legá. Lekin jo jo Injíl ko chhor un kí chál par thokar kháte hai, so ján bújhke shikárí ke dām men daurte hai; to un ká kyá uzr hai?

Aur dunyá ke log nae aur dákhilí Ísáíon kí chál par thokar kháte hai. Yih bhi barí sharm aur afsos kí bát hai. Bahut bahut log Injíl ko parhte, aur sunte, aur qabúl bhí karte hai, aur muddat tak us ke muwáfíq chalte hai; lekin bad us ke we rafta rafta apne pahle hál se gáfil ho játe, aur duá mángne men sust ho játe; apní chál chalan men barábar aur bedár rahná bhúl játe. Aur bad us ke ziyáda talab ke khwáhán, aur náshukrguzár aur nákhush ho játe. Aur jab un ká koi dostdár, yá Kalísiyá ke ámil, un ko saláh dene cháhe, to bezár hote, aur kurkuróná aur shikáyat karná shurú karte. Tab apne kھیال men áne dete, ki Kalísiyá ke ámil hamáre shákir hone ke iwaz

ham ko niche rakhne, aur dabane chahate hai. Aur apni sari haqiqi barakaton aur niमतों par dhyan karne ke badle, we apni wahmi, aur khud banai hui mushkil, aur taklifon par dhyan karte, aur unhen barhate hai. Aur yih bezari hote hote yahin tak barh jati, ki unhen tadbir dena lazim ata. Tab we khafa ho karke Masih din ko chhor dete, aur Kalisiya ki badgoi karke apne din iqrar ko, aur ahd o paiman ko latarte, aur dunya ke jangal mein phirke awara ho jate hai. Us halat mein we Injil aur din i Masih ki sachai aur fazilat ke bab mein itna jante hai, ki us se juda hoke hargiz apne dil mein aram ya rahat pa nahin sakte; tau bhi un ke dil Masihon se karwahat aur zahr se yahin tak bhare hue hai, ki un ki badgoi karne se baz a nahin sakte. Aur yun apne se, aur Kalisiya se, Injil se, aur Masih se, bezar hokar we dunya mein awara hote, par hargiz kahin aram ya rahat nahin pate hai. Is halat mein ahl i dunya, jo nihayat thokar khane par mustaid hai, kahte hai, ki "Isai mazhab ka yih phal hai. Masih hona nihayat mushkil hai, aur nikala jana sahaaj. Main apne din mein raha karunga, jahan dil ki taftish kam hai, aur man ke bhavne par chalna jais hai." Kaun bata sakti hai, ki abhi Hindustan mein kitne aise bagi aur bargashta Masih awara hote hai? —aur Masih un ke wasile se kitne bar "apne doston ke ghar mein zakhmi hota hai?"

Yih to wajib nahin, ki nae aur dakhili Masihon ki chal mein kamaliyat jaldi se dekhne ke muntazar howen; ya ki we har tarah ke thokar khane se azad howen. Balki un ki kamzori ko yad rakhtai, aur un par sabr karna, aur ruh i mulimat se unhen talim aur tadbir dena, aur un ki dastgiri karke sambhalna aur rahnumai karna wajib hai.

Lekin is ke muntazar rakhna wajib hai, ki we ilm aur dindari aur nek chali, aur Injil ki waqifiyat mein taraqqi karen, aur apas mein ulfat, aur mahabbat, aur ham-dili, aur biradarana nigahbani mein taraqqi karen. Kyunki ye batein ain dindari ke pahle aur zururi phal hai.

Agle zamanon mein jab Masih shumār mein kam hue, aur dushmanon se ghire rahe, to dushmanon ne mutajjib hokar apas mein kaha, ki "Dekho, ye Masih apas mein kaisi ulfat rakhte hai!" Aur jab un ki chal aisi thi, tab Shaitan, aur insān sab milke Masih din ko phailne aur barhne se rok nahin sakte the. Aur agar Hindustan mein Masih apas mein aisi ulfat rakhte, to un ka mazhab phir aisi quwat se barhta aur phailta jata, ki Shaitan aur sare dushman milkar use rok nahin sakte.

Ab is ke khatm mein meri arzū aur iltimas is ke har ek parhnewale se yih hai, ki apne hal, aur apni chal par khub gaur kare, ta malum kare, ki dunya us se dushmani rakhti hai, ya nahin? Agar dushmani rakhti hai, aur use saf zahir kiyi hai, to sabab kyā hua? Kyā Masih ke nam ki khatir hua, ya nahin? Masih ne apne shagirdon ko chitakar khabar di, ki "sari qaumen mere nam ki khatir tum se dushmani karengein"—aur isi sabab se ki we dunya ke nahin, balki us ne unhen dunya mein se chun liya tha. Aur Pulus ne injil mein saf khabar di hai, ki "sab ko, jo Masih Isai mein dindari se guzran kiyi chahate

hain, satāe jāenge.” Lekin Patras ne usī injīl meṃ shāgirdon ko chitāyā, ki bāze apne gunāh aur khatāon ke māre tasdiq pāte, aur is meṃ na fazīlat, na fāida hai. Us ne kahā, ki “Agar tum gunāh karke ṭhonke gae, aur sabr kiyā, to kaun sā faḡhr hai? Lekin agar nekī karke dukh pāte ho, aur sabr karte ho, to is meṃ Khudā ke nazdik fazīlat hai; kyūnki tum isī ke liye bulāe gae ho.” Pas, har ek Masīhi ko lāzim hai, ki khabardār rahe, na ho ki wuh apnī khatā, aur bhūl chūkon ke liye tasdiq pāwe; lekin agar pāwe, to Masīh ke naqsh i qadam par chalne kī khatīr pāwe. Agar tum apnī khatāon aur bhūl chūkon ke māre tasdiq pāo, to ruswāī aur sharm, aur harj aur nuqsān hī honge. Lekin agar bhalāī karke Masīh kī pairawī kī khatīr tasdiq uṭhāte ho, to Injīl hī tumhārī tasallī yūn kartī hai:—“Agar tum Masīh ke nām ke sabab se ruswā ho, to tumhārī saʿdat hai; kyūnki jalāl kī aur Kḥudā kī rūh tum par rahtī hai; wuh un ke—yaṇe satānewālon ke bāis se maurid i takfīr hai, lekin tumhāre sabab se mahmūd hai. Aur khabardār, tum meṃ se koī qātil, yā chor, yā badkār, yā harzagard kā sā dukh na pāwe. Par agar koī Masīhī hone ke sabab se dukh pāwe, to na sharmāwe, balki us sabab se Kḥudā kā shukr kare. Kyūnki ab waqt ā pahunchā, jis meṃ Kḥudā ke kḥāndān par qahr kī ibtidā hogī; pas, agar ham se shurū hai, to un kā, jo Kḥudā kī injīl ke mahkūm nahīn, kyā anjām hogā? Aur agar sādīq mushkil se bachāyā jāe, to bedīn aur gunahgār kā ṭhikhānā kahān? Pas, jo Kḥudā kī marzī se dukh pāte hain, so us ko Kḥāliq i amīn jānke nekokārī karte hūe apnī jānon ko us ke supurd karen.”—“Aur Kḥudā wafādār hai, ki wuh tum ko aise imtīhān meṃ, jo tumhārī tāqat se bāhar ho, parne na degā; balki wuh imtīhān ke sāth nikalne kī rāh bhī banāwega, ki tum us kī bardāsht kar sako.”

XXXIV.

MASIH KI BHEREN KAUN HAIN?

REV. P. HERNLE KI TASNIF.

Merī bheren merī dūdz pahchāntī hain, aur main unhen jāntā hūn, aur we mere pīchhe pīchhe chaltī hain, aur main un ko hayāt i abadī bakhshtā hūn; aur we abad tak halāk na howengi, aur koī unhen mere hāth se chhīn na legā.—Yūh. 10 : 27, 28

Ar āzizo, jab tak ādmī tauba na kare, aur Isā Masīh ke nām par imān lāke Kḥudā se na mile, tab tak gunāh, aur us ke sabab abadī halākat, us kī haqīqi hālat hai.

Is wāste we gunahgār, jo tauba nahīn karte, Injīl meṃ bhaṭkī hūi bheren, jo halāk hone ke baṛe khatre aur ḍar meṃ hain, kahlāte hain.

Ysá Masíh ne Matí kí injíl ke 10 : 6 men apne shágirdon ko yún farmáyá hai, Tum chalo, Isráíl ke ghar kí gumráh bheron ke pás jáo, aur chalte húsé khushkhabarí do, aur kaho, Tauba karo, kyúinki ásmán kí bádsháhat nazdík áí. Aur Patras hawárí ne yún likhá hai, ki Ham sab bhaṭkí húsí bheron ke muwáfíq the, lekin tauba karke apne achche garariye ke pás áe hain; aur yih sachchá garariyá Masíh hai, jo ásmán se áyá, aur apní ján apní bheron, yane gunahgáron ke liye dí. So sab gunahgár jab tak tauba na karen, bhaṭkí húsí bheron kí mánind hain. Par un ke galle men se baze aise hain, jinhen Ysá Masíh apní bheren kahtá hai. Aur mubáarak we hain, jo us kí hain. Lekin afsos un par, jo us kí nahín hain. Is wáste main tén sawál kartá hún, jin ká jawáb koshish se dená cháhiye :—

I. Masíh kí bheren kaun hain ?

II. Un kí ummed kis se hai ?

III. Ham log kyá karen, jis se Masíh kí bheren banen ?

I. Masíh kí bheren kaun hain ?

Jawáb yih hai, ki we sab, jo Ysá Masíh ke nám par púre dil se ímán lákar aur us ke pák hukmon ko mánke us kí pairawí karte hain, we Masíh kí bheren aur us ke sachche shágird hain; kyúinki Ysá Masíh ká sachchá shágird na faqat nám aur zubán se Ysái hai, aur is se rází nahín, ki Khudáwand ká nám us par hai, aur wuh Ysái kahlátá hai; Ysá Masíh ká sachchá shágird is bát se bhí rází nahín, ki us ne istibág páyá, aur nasihat sunne ko girje men játá hai; balki Masíh ká sachchá shágird jántá hai, ki injíl men yún likhá hai, ki Na har ádmí, jo mujhe Khudáwand, Khudáwand, kahtá hai, ásmán kí bádsháhat men dákhil hone páwegá; balki faqat wuhí, jo Báp ke iráde ke muwáfíq amal kartá hai.

Aur yih kám khud ádmí ke zor se nahín, balki ímán láne se miltá hai; is wáste sachchá shágird sab se ziyáda yih cháhtá hai, ki púre dil se apne ásmání Ustád, yane Masíh ke nám par ímán láwe, aur us ke kalám ko girje men na faqat sun le, balki tauba karke us ko dil men rakhe, máne, aur us ke muwáfíq chale; so us ko roz roz ziyáda maḷúm hotá hai, ki main bará gunahgár, aur is wáste Khudá ke gazab aur jahannam ke láiq hún. Aur us ko yih bhí yaqín hai, ki wuh apní kamzorí ke sabab apne taín bachá nahín saktá, balki ek achchhá zoráwar, aur nihrbán, aur ásmání bachánewálá zurúr hai; aur yih, ki wuh ásmání bachánewálá faqat Ysá Masíh Khudá ká Beṭá hai, jo gunahgáron ko bacháne ke liye dunyá men áyá.

So wuh Masíh kí taraf rujú hoke koshish se us par, aur us ke sab kámon par, jinhen wuh hamein bacháne ke liye amal men láyá, ímán látá; aur ímán kí marifat nae sir se paidá hotá hai; kyúinki naí paidáish ke bagair koí naját nahín pá saktá; jaisá ki likhá hai, ki jab tak ádmí nae sir se paidá na howe, wuh Khudá kí bádsháhat nahín dekh saktá. Aur wuh, jo sachchá ímán láke nae sir se paidá húa, sach jántá aur yaqín kartá hai, ki main haqíqat men bará gunahgár aur halakat ke láiq hún; par is liye, ki main halák na hoún, balki naját aur hayát i abadí páún, Masíh áyá, apní ján dí mere liye, Khudá ke hukmon ko púra kiyá, aur salib par mar gayá, aur yih sab mujh

gunahgár ke liye húa ; kyúinki jo Masíh na átá, to sárí dunyá kharáb ho játi. So wuh Isá Masíh ko dil se piyár, aur us se dostí aur us kí shukrguzári kartá, par Iblís, aur dunyá, aur badí, aur gunáh se dushmaní karke kahtá hai, ki Yih kyúnkar ho sake, ki main gunáh karú ? Haa, main kabhi gunáh na karungá ! Balki Masíh ko piyár aur us kí shukrguzári karke rástbázi aur pákízagi se chalúngá, aur ímán láke dilerí se Kḥudá kí pairaui karúngá.

So Masíh ká sachchá shágird yún kahtá, aur is tarah se chaltá hai ; aur jis ká yih chalan hai, wuhí Masíh kí bher aur us galle men se hai, jis ká garariyá kḥud Masíh hai. Tum bhí koshish se socho, aur Kḥudá ke sámhne apne apne dilon se púchho, ki Main kis ká hún ? Ayá Kḥudá ká, yá Shaitán ká ? Dekho, agar tum log aise aise kám karte ho, jin ká bayán húa, to tum beshakk Masíh kí bheren ho. Agar nahín, to tum log na us kí bheren ho sakte, aur na wuh tumhárá garariyá aur khabardári karnewálá hai ; aur tum ko yih bará khauf hai, ki bheriyá, jo Shaitán hai, tum ko khá jáwe.

II. Is wáste, ai ázizo, bahut zurúr hai, ki ham sab dil se koshish karen, ki Masíh ke sachche shágird howen ; aur jaisá bher garariyá kí, waisá hí ham us kí pairawí karen ; kyúinki hamen isí se zamín par, aur kḥáss karke ásmán par, bará fáida hogá. Masíh ne kahá hai, ki Merí bheren merí áwáz pachchántí hain, aur main un ko jántá hún. Kḥudá kare, ki ham sab ko bakhúbí malúm ho jáwe, ki yih kyá hí achchhí bát, aur hamáre liye zurúri aur káfi hai. Agar Masíh tujh ko jántá, aur apná kahtá, aur qabúl kartá hai, to sach much yih tere liye bas hai ; aur tú zamín o ásmán par mubáarak aur nekbaht hogá. Dekh, jo Kḥudá tujh ko jáne, to terí sab zurúriyát bhí jántá hai ; aur us ne wáda karke kahá, ki “ Dúá mángo, aur minnat karo, to tumhen diyá jáegá ; dhúndho to tum páoge ; khaṭkhaṭáo, to tumháre liye kholá jáegá. Kyúinki jo mángtá, so letá ; aur jo dhúndhtá, so pátá hai ; aur jo khaṭkhaṭátá, us ke wáste kholá jáegá.” So ai ázizo, dúá mángo, Kḥudá kí minnat karo, to tum jo kuchh zurúr, aur darkár, aur badan aur ján ke liye achchhá aur fáidámand ho, páoge. Agar tum dukh men ho, to Kḥudá tumhárá hákim aur tasallí denewálá hai. Agar kangál ho, to Kḥudá Masíh ke wasíle se tumhárá ásmání Báp hai. Jo tum ko sachchá dost zurúr ho, to Masíh ke pás jáo, aur apní sab zurúriyát us se bayán karo, jo zamín aur ásmán ká malík hai. Aur main sach kahtá hún, ki tum, jo kuchh tumháre liye achchhá aur darkár hai, jis men tumhárá bhalá ho, páoge. Aur jo koí nahín pátá, us kí nisbat malúm hotá, ki wuh ímán se dúá nahín mángtá, aur Kḥudá ko nahín dhúndhtá hai. Aur jo Kḥudá kí yih marzí ho, ki jo kuchh tú ne us se mángá, tujhe na baḥshe, balki tujh ko dukh men rahne de, to Masíh ká yih wáda sun le, aur yád rakh, us ne farmáyá hai, ki Merí bheren mere píchhe píchhe chaltí hain, aur main un ko hamesha kí zindagi baḥshtá hún, aur we kabhi halák na howengí, aur koí unhen mere háth se chhín nahín le saktá. Suno, Masíh kí bheren, jo dil se us kí pairawí kartí hain, hamesha kí zindagi páwengí ; aur jis men dukh, kambaḥtí, roná, bímári, aur mar jáná, wagaira na hogá ; kyúinki ásmán men gunáh nahín ; aur jabán gunáh nahín, ta-

hain dukh bhí nahin ; balki ásmání khushí aur shádmání Kḥudá ke sárahne hamesha hogí.

III. Dekho, yih Masíh ke shágirdon kí ummed hai ; aur jo koí un men se hai, so yihí khushwaqtí hásil karegá. Is liye púchhná cháhiye. ki Ham log kyá karen, ki Isá Masíh kí bheren, yane us ke sachche shágird howen. Main bahut sá kah chuká ; aur jo kuchh rahá, so bhí bayán kartá hún. Masíh kahtá hai, ki Merí bheren merí áwáz, yane merí bát suntí hain. So us kí áwáz kyá hai ? Jawáb—us kí áwáz bahut tarah se malúm hotí hai. Ham log use apne dilon, aur sárí maujúdát, aur kitáb i muqaddas men sunte hain. Dekho, jo tú bad kám aur gunáh karne par ho, aur terá dilí munsif tujh ko mana kare, ki yih kám mat kar ; yih Kḥudá ke kalám ke barkhiláf, aur is wáste gunáh hai ; to yád kar, ki yihí Kḥudá kí áwáz hai, jo Rúh-ul-Quds se dil men nasihat kartí hai. Yá jo koí bímár yá dukh men, yá barí taklif men pará ho, to yih bhí us kí áwáz hai, jo yún kahke tum ko nasihat kartí hai, ki “ Ai beṭe, ai beṭí, apná dil mujhe somp, aur merí ráhon se khush ho.” Am. 22 : 26. Aur isí tarah roz roz hamáre sab kámon men us kí áwáz malúm hotí hai ; aur jo ham khabardár hain, to sunenge, aur pahchánenge, ki wuh Isá Masíh kí áwáz hai. Par kháss kar Masíh pák injil men ham se boltá hai, jis men us ke sáre hukm aur báten ham se bayán kí gai hain ; aur jis waqt ham us ko parhen, to goyá Masih ham se boltá, aur bát chít kartá hai ; aur jo tum log us kí bát, kyá dil, kyá maujúdát, kyá muqaddas kalám, kyá girje men sunte aur mánte, aur us ke muwáfíq chalte ho, to tum Masíh kí bheren ho.

Par ek aur chíz cháhiye, jis kí bábat Masih ne injil men yún farmáyá hai, ki Koí mere pás á nahin saktá, jab tak Báp, yane Kḥudá us ko mere pás na láwe ; aur siwá Rúh-ul-Quds ke fazl ke koí mujh ko Kḥudáwand nahin kah saktá. Is bát se malúm hotá, ki ham log apní táqat se Masih ke shágird nahin ho sakte. Zurúr hai, ki Kḥudá Báp Rúh-ul-Quds kí hidáyat se ham ko Isá ke pás le awe, nahin, to ham garariye ke pás na áwenge ; balki khoí húi bher kí mánind kharáb ho jáwenge. Aur jo Kḥudá kí madad darkár hai, to ham ko yih duá mángná cháhiye, ki Ai Kḥudáwand, yih mujh se nahin ho saktá, ki terá shágird banún ; tú madad karke mujh ko apná shágird baná.

Ab main púchhtá hún, ki kyá tú Masíh kí bher hai, yá Shaitán kí ? Tú us ká shágird hai, yá Shaitán ká ? Tú Masih kí áwáz pahchántá, us ke hukmon ko mántá, aur yád rakhtá, us kí pairawí kartá hai, yá Iblis ke píchhe píchhe ho letá hai ? Aur jo girje men áta, to kis iráde se áta hai ? Kyá is liye, ki Isá kí áwáz sunkar us kí pák báton ko máne, aur un ke muwáfíq chale ? Yá kis wáste áta hai ? Phir tum se yih kahtá hún, ki jo koí faqat nám aur zubán se Isá kí bandagí kartá hai, so sachchá Masihí nahin ; balki wuh ek bheriyá hai, jo bher kí poshák apne úpar pahine hai. Par yih riyákárí ákhirí roz malúm hogí ; kyúnki yún likhá hai, ki Masíh insáf karne ko áwegá ; aur jis tarah garariyá bheron ko bakríon se, waisá hí wuh achchhe ádmion ko bure admion se judá karegá ; aur wuh bheron ko dahní taraf, lekin bakríon ko báin taraf rakhegá. Tab we, jo dahní taraf hain,

ásmán aur us kí abadí khushí men jāenge, aur Iśá Masīh ke sáth hame-sha tak rahenge ; lekin we, jo báin taraf hai, jahannam aur us kí ág men phānsenge, aur abad tak dukh men rahenge. Khudá cháhe, kí ham sab us roz dahní taraf jagah páwen ; Iśá Masīh ke wasile se howe. Ámín.

XXXV.

IMAN KI ZURURAT.

REV. P. HERNLE KÍ TASNÍF.

Main kyá karún, kí naját páún ? Khudáwand Iśá Masih par ímán lá, kí tú aur terá gharáná naját páwegá.—Am. 16 : 30, 31.

AI mere ázizo, har ek ádmí kyá bará, kyá chhoṭá, khush huá cháhtá hai ; isí wáste chaltá phirtá, aur roz roz mihnát, aur talásh, aur púchh páchh kartá hai, táki kis tarah se dunyá ká mál asbáb, bahut sá rupáyá, zindagí kí áish o ishrat, náfis kháná píná, latif kapre, wagaira páwe ; aur jo sháyad koí apní murád ko pahunchke dhaní, máldár ho jáwe, tau bhí rází aur khush nahín rahtá. Kis wáste nahín ? Is liye, kí wuh apní khushí sachchí ráh, yāne rúhání báton men nahín dhúndhtá, aur hargiz nahín púchhtá hai, kí Main kyá karún, kí abadí khushí páún ?

Háe, afsos ! Agarchi bahut bakbak, púchh páchh, behúda bát-chít ádmíon ke darmiyán hai, par thore, balki niháyat thore, yih sawál, jo sab se zurúr aur munásib hai, karte hai ; niháyat thore us khushí kí talásh, jo sárí dunyá kí sab áish o ishrat se bihtar hai, karte hai. Lekin jo koí tum men se áj kí bandagí men, dil o ján se púchhe, kí Main kyá karún, táki na sirf dunyá kí, balki kháss kar ásmán kí khushí, yāne naját páún ? us ká Púlús yih jawáb detá hai, kí “ Khudáwand Iśá Masih par ímán lá, kí tú aur terá gharáná naját páwegá.” So ímán láná zurúr hai, aur jo koí ímán láwe, wuh bachegá. Lekin sach máno, kí haqíqí aur sachchá ímán cháhiye ; kyúnkí jo koí riyákár aur sust hoke sirf nám se, bát se, zubán se ímán láwe, par dil o ján se nahín, wuh kabhí kuchh na páwegá ; aur sachchá ímándár tén báten āmal men láke,

I. Apne gunáhoṅ ká iqrár karke farotaní ke sáth un se tauba kartá hai.

II. Kisí dúsre ke pás nahín, magar faqat Iśá Masīh pás jáke us se naját cháhtá hai.

III. Rúh-ul-Quds kí madad ke wáste sadá duá mángtá hai.

Aur in báton ko ab Khudá kí madad se ziyáda bayán karengé.

I. Suno—Khudá ne ádmí ko achchhá aur gunáh se pák sáf banáyá ;

lekin ádmí Shaitán ke bahkáne se gunahgár aur khatákár huá. Us waqt se áj talak sab ádmí guná'h ke sáth paidá hoke tabíqat se bure haiñ; aur ham log bhí sab ke sab aise haiñ; roz roz kám, aur bát, aur khyál se bahut gunáh karte haiñ; aur jaisá kí likhá hai, ham logon meñ kuchh durustí aur rástí nahíñ hai.

So jo koí ímándár huá cháhe, us ko sab se peshtar yih zurúr hai, kí apne gunahgár hál ko pahcháñke us se khub wáqif howe, aur jáñe, kí main haqíqat meñ Kḥudá ke áge gunahgár, aur is sabab se halákat ke láiq hún; aur is bát ko pahcháñke cháhiye, kí apne gunáh ke sabab dilgír ho, aur mátam kare, aur miskíní, aur garíbí, aur farotaní ke sáth apne gunáhon ká muqirr howe, aur dil o ján se tauba kare, aur phir jáke jo jo wájib hai, use bajá láwe. Jo koí aisá kare, so apní ján bacháwegá; nahíñ, to us kí tauba sachchí nahíñ; balki riyákári se hai, aur wuh nahíñ bachegá. Afsos karná, aur duá mángke c'il se púchhná cháhiye, kí ham kyá karen, tá kí naját páwen? Aur yih sawál sab ko, balki har ek ko zurúr hai; tujh ko, aur tum ko, tum larñon, aur larñion ko, mardon, aur auraton ko. Aur sach máno, kí Kḥudáwand, jo bará karím aur mihrbán hai, jab ham aisí aisí duá mángen, sunegá. Ai mere piyáro, Kḥudá tum sab ko yih fazl baḥshe, kí tum hayát kí sachchí ráh ko talásh karke páo, aur us meñ hoshiyári aur koshish se chalte raho; táki tum sab burái se naját hásil karke ákhir ko ásmán kí khushí meñ dákhil ho.

II. Phir ímándáron ko, jo bachne ká iráda rakhte haiñ, cháhiye, kí apní murád ko pahunchne ke wáste Masíh pás áwen, aur kisí दूसरे pás na jáwen; usí par ímán láwen; kyúñki us ne farmáyá hai, kí “Ráh aur haqíqat, aur hayát main hún; koí Báp ke pás á nahíñ saktá, magar mere wasíle se.” Aur yih bhí likhá hai, kí kisí aur se naját nahíñ hai, magar Masíh se; kyúñki ásmán ke tale ádmíon ko koí दूसrá nám nahíñ baḥshá gayá, jis se ham naját páwen. Pas, zurúr aur munásib hai, kí ham log naját ke wáste Isá Masíh ke pás áwen, jaisá kí Púlús hawárí kahtá hai, kí “Kḥudáwand Isá Masíh par ímán lá, kí tú aur terá gharáná naját páwegá.” Isá Masíh Kḥudá kí marzi ke muwáfíq Naját-denewálá thaharáyá gayá, aur दूसrá koí nahíñ; wuhí hamará baḥshnewálá, aur shafí, aur wásita hai, jo un sab ko, jo us par ímán láke apná bharosá rakhte haiñ, piyár aur qabúl kartá, aur kisí ko láchár nahíñ chhortá hai. Isá Masíh barí mihrbání se gunahgáron ke bacháne ke wáste ásmán se utrá; us ne apní ján dí, aur salib par bahut dukh sahkar mar gayá; táki ham ko gunáh kí sazá se bacháke Kḥudá ke farzand aur naját ke wáris banáwe. Isá Masíh bacháne kí khwáhish aur qúwat rakhtá hai, yane bacháne cháhtá, aur bachá saktá hai; aur ab bhí taiyár hai, kí tum meñ se un sab ko, jo dil se ímán lánewále haiñ, apní barakat aur ruhání fazl baḥshe; kyúñki wuh mátam dilon kí áh aur gamgínon kí árzú ko haqír nahíñ jántá, balki un kí duñon ko rahmat se suntá hai.

Suno—Masíh in sab niqmaton ko baḥshstá hai; is liye, ímándáron ko munásib hai, kí shukrguzár howen. Jo tum meñ se koí bhúkhá ho, aur koí dost us ko roti dewe; yá jo piyásá ho, use pání dewe; yá jo bare khauf, aur khatre, aur dukh, aur taklif meñ ho, mihrbání se use

bacháwe ; aur jo kuchh darkár hai, dewe ; to kyá wuh khush o khurram nahín hogá ? Albata hogá, aur apne dost kí shukrguzárfi karegá. Ab dekho, Ísá Masíh in sab chizon ko, hán, un se bahut ziyáda ham ko baḡhstá hai ; kyúnci jaisá ki injíl meñ likhá hai, wuh zindagí kí roṭí hoke ham ko na sirf dunyawí, balki ásmání roṭí detá hai ; aur zindagí ká pání hoke un ko, jo rástí ke bhúkhe aur piyáse haiñ, pilátá hai ; jaisá ki khud us ne farmáyá hai, ki “ Jo koí yih, yane is dunyá ká pání pitá hai, so phir piyásá hogá ; par jo koí wuh pání, jo main use dúngá, pitá hai, so kabhí piyásá na hogá ; balki jo pání main use dúngá, us meñ pání ká ek sotá ho jáegá, jo hamesha kí zindagí tak bahtá rahegá.” Aur yih bhí likhá hai, ki Ísá ne khare hoke kahá, ki “ Agar koí piyásá ho, to mere pás áwe, aur píe ; aur jo mujh par ímán látá hai, us meñ se jíte pání kí nadíáñ bahengí.”

So ai mere yáro, dekho, Masíh ásmání roṭí aur zindagí ká pání detá hai ; aur wuh na faqat is zindagí ke khauf, aur dukh, aur khatre se bachátá hai, balki gunáh ke khatre aur hamesha kí halákat, yane Shaitán aur jahannam se bhí chhurátá hai. Naját-denewálá sirf wuh hai, aur sachchá wasíla nuke hamáre aur Khudá ke, hamárfi jánoñ aur hamesha kí maut ke bích meñ khará húá ; aur apní ján dene, aur maut ká dukh uṭháne ke sabab hamen Khudá se miláyá ; is wáste cháhiye, ki bilkull us par ímán láweñ, aur us kí shukrguzárfi aur us ke pák nám kí baṛáfi karen.

III. Sachche ímán láne ke wáste cháhiye, ki ham log sadá dil lagá-ke duá mángew, ki Masíh apná wáda purá karke hamáre dilon meñ Rúh-ul-Quds bheje ; ki wuh jo sachái ká Rúh hai, madad karke ímán kí sab báton meñ hamárfi hidáyat kare ; aur fazl baḡhshe, ki ham sáre dil o ján se Masíh ko piyár karke sab hukmon ko bajá láweñ. Rúh-ul-Quds kí madad ham sab ko bahut zurúr hai ; kyúnci us ká kám yih hai, ki hamáre dilon ko sab buráifon aur zabúnifon se pák aur sáf kare ; aur hamen narm dilí, aur farotaní, aur miskíní baḡhshe ; aur burí khwáhishon aur bad andeshon se bacháwe ; aur gunáh ká zor aur táqat miṭá dále. Phir Rúh-ul-Quds ká kám yih hai, ki ham meñ nayá pák dil páidá kare, ki wuh apne fazl se hamáre dilon ko gunáh se alag karke Ísá Masíh kí taraf rujú kartá, aur táqat baḡhshtá hai, ki ham khushi se duá mángew, aur achchhí tarah máng sakeñ : aur injíl meñ har ek barakat ká wáda us ko, jo dil se mángtá, diyá hai. So ai mere ázizo, mardánagí aur jurat karke Rúh-ul-Quds kí roshní aur hidáyat ke liye duá mángo, ki tum sab buráfi se bach jáo.

Ab tum ko sachche ímán aur naját páne kí bábat main ne kaí ek báteñ kahí ; aur yih merá kám hai, ki in sab báton ko tum se kahí, aur Khudá aur naját kí ráh sikhláw ; par mánná, aur dil meñ naqsh karná tumhárá kám hai. Aur main bahut cháhtá, aur isi liye duá mángtá hún, ki Khudá, jo sab ká Málik aur Parwardigár hai, tum ko apná bahut sá fazl baḡhshe, ki tum log na sirf nám aur zubán se, aur ádmifon ke huzur meñ ; balki sachái se aur Khudá ke áge rástbáz bano. Bahut cháhtá hún, ki áj tum meñ se ek bhí gunáh ke wáste

dilgír hoke dil se púchhe, ki Main kyá karún, táki naját páún ?
 K̄hudá cháhe, ki na faqat ek, balki bahut, hán, tum sab ke sab yih
 sawál karo, dil se ímán láo, aur naját aur hamesha kí k̄hushí páo,
 Isá Masih ke wasíle se, jis ko, aur Báp ko, Rúh-ul-Quds samet sab
 jalál aur buzurgí abad tak hújíyo. Ámín.

XXXVI.

DIL KI PAKIZAGI KIS TARAH HÁSIL HO SAKTÍ HAI ?

REV. P. HÖERNLE KI TASNÍF.

Nekbakht we hain, jo dil ke pák hain ; is liye, ki we K̄hudá ko dekhenge.
 Matí 5 : 8.

Ar mere piyáro, ádmí tabíyat se gunahgár, aur is sabab se K̄hudá ke
 huzúr nápák hai. Us ká dil ek táláb kí mánind har tarah kí nápákí
 aur mail se bhará hai. Yih bát to sach hai ; lekin bahut ádmíon se
 poshída hai ; ki we apní nádání aur beímání se samajhte hain, ki ha-
 máre dil achhe hain, bure nahín. Par we is bát ko mánen, yá na
 mánen, ádmí ká dil to tabíyat se burá hai. Us ke sab kám is bát par
 gawáhi dete hain ; aur K̄hudá ke kalám se bhí sábit hotá hai. Kyún-
 ki bure k̄hiyál, aur k̄húnrezi, aur ziná, aur harámkárián, aur chorián,
 aur kufr, wagaira dil se nikalte, aur ádmí ko nápák karte hain, jaisá
 ki Matí 15 : 19 में likhá hai. Aur jáná cháhiye, ki yih nápákí ba-
 dan kí nahín, balki dil kí hai. Dil burá aur nápák hai, aur jo jo us se
 nikaltá, so so ádmí ko nápák kartá hai ; aur ádmí jitná ziyáda gunáh
 kartá, utná hí ziyáda us ká dil nápák aur láchár hotá hai. Tum log
 is bát ke subút ke wáste thorí der apne butparast aur tárík dil paro-
 sion par nazar karo. Itná un ko málúm hai, ki ham gunáh ke sabab
 K̄hudá ke áge dil se nápák hain, aur cháhiye, ki phir pák banen ; na-
 hín, to K̄hudá ko nahín dekh sakte. Lekin K̄hudá ke kalám ke na
 jánne ke sabab har tarah ke náqis aur behúda kám karke aur bure
 dastúron ko mánke apne taín bacháyá cháhte hain. Dúr dúr se dar-
 yá naháne ko áte hain ; aur nahín sochte, aur báwar nahín karte, ki
 aise námunásib aur riyákári ke kámon se koí K̄hudá ke áge pák nahín
 thahar saktá hai ; kyúinki na Gangá, na Jamná, na kisí दूसरे दार्या
 ká pání dil kí nápákí ko dúr kar saktá hai. So is liye, ki ham sab dil
 se nápák hain, aur is hálát में yaqínan koí K̄hudá ko nahín dekh
 saktá, ham ko k̄húb daryáft karná cháhiye, ki hamáre nápák dil kis
 tarah pák sáf banen ?

I. Jawáb—hamáre dilon ke pák hone ke wáste pahle yih zurúr hai, ki ham log dil o ján se jí kholke ímán láweñ; kyúinki jo chíz sab se pahle zurúr aur darkár hai, so dilí ímán hai. Ham sabhon ko cháhiye, ki Isá Masíh ke nám par sachchá ímán láke apne gunáhon kí muáfí páweñ; aur zurúr hai, ki Naját-denewále Masíh ká qímatí lahú, jo hamáre liye baháyá gayá, ímán kí marífat hamáre dilon ko lagáyá jáwe, aur un ko gunáh ke mail, aur burái, aur nápákí se sáf kare. Sirf is tarah ham log dil kí pákízagí pá sakte hain, ap se ap nahín; kyúinki záhír hai, ki rúhání nápákí faqat rúhání kámon aur báton se miţái jáegí. Jo shakhs bímár ho, us ko zurúr hai, ki hakím ko buláwe; aur jo dawá us kí bímárí ke mutábíq ho, us se leke lagáwe. Par jo dil ká bímár ho, use cháhiye, ki Isá Masíh ke pás áwe; aur jo rúhání dawá wuh de'á hai, dil ko lagáwe, ki zinda howe. Bagair Isá Masíh aur us ke pák karne kí qúwat ke, ham log roz ba roz ziyáda gunahgár aur gunáh ke sabab dil se nápák hokar ákhir ko halákat meñ parenge; par jo koí K̤hudáwand kí taraf, jis ne hamáre wáste apná qímatí lahú baháyá, rujú karke dil se us par ímán láwe, so dil se sáf pák banegá.

II. Dúsrí chíz, jo zurúr hai, so Rúh-ul-Quds ká fazl hai. Ham ko us kí marífat nae sir se paidá honá cháhiye, jaisá ki K̤hudáwand ne Injíl meñ farmáyá hai, ki Main tujhe sach sach kahtá hún, ki jab tak ádmí pání aur Rúh se paidá na howe, wuh Khudá kí bádsháhat meñ dákhil ho nahín saktá; kyúinki jo jism se paidá húa, so jism hai; aur jo Rúh se paidá húa ho, sirf wuh Rúh hai. Aur yih naí paidáish dil se honí cháhiye, táki sab bure k̤hiyál, aur nápák hawá o hawas, aur mansúbabázíán, aur insání tabíat kí k̤hwáhishen, jo nafsaniyat se hamáre dilon meñ rahtín, aur Shaitán se sambhálí játí hain, nikálí jáweñ; aur bajáe un ke achchhe k̤hiyál aur nek árzuén, jo K̤hudá ke láiq aur us kí bát ke muwáfíq hain, paidá kí jáweñ. Zurúr hai, ki hamáre dil girje ke muwáfíq banen, jis meñ K̤hudá ká Rúh sukúnat kartá hai. Par yih kám faqat K̤hudá kí k̤háss madad aur fazl se bantá hai; is liye ham ko Dáúid kí tarah yih duá mángná cháhiye, ki Ai mubáarak K̤hudá, tú mujh meñ ek pák dil paidá kar, aur ek naí rúh mujh ko ináyat farmá; kyúinki,

III. Tísre, har ek ko, jo dil kí pákízagí kí talásh meñ hai, duá mángná zurúr hai. So ai piyáro, kabhí gáfil mat ho, balki jágte ra-ho, aur yád karo, ki Shaitán garajte húe bágh kí mánind q̤húndhtá phirtá hai, ki kis ko khá jáwe. Lekin jo ham log duá mángne aur K̤huda ke áge hoshyárí se chalne meñ koshish karen, to ujíyále meñ hoke apne jání dushmanon ko dekhenge, aur K̤hudá ke fazl se zor páwenge, ki un ko satáweñ, aur muqábala karke un par gálib áweñ. Phir K̤hudá ke k̤háss fazl se, jise wuh duá mángnewálon ko bakhshtá hai, sab buráían aur nápákían pai dar pai kamzor ho hoke dil se nikaltí hain, aur nae k̤hiyál aur achchhí k̤hwáhishen un ká badlá letí hain. So Injíl ká likhá is tarah un par púra hotá hai, ki dekho, Rúh ke phal jo hain, so mahabbat, mihrbání, k̤hushí, salámatí, nekí, imándárí, parhezgárí, pákízagí aur mátamdilí, wagaira, hain.

So ai piyáro, jo tum duá mángne men sustí na karoge, balki us men lage, aur gunáh se dúr rahoge, to yih sab rúhání phal tumháre dilon men lagenge. So K̤hudá ko yád karo, aur us ke pák kámon ko apne dil men naqsh karo; kyúinki,

IV. Chauthí bát, jo dil kí pákízagí hásil karne ke wáste zurúr hai, so yih hai, ki ham gunáh karne kí fursat aur us ke imtihán se dúr rahen. Jo ham log yih na karen, balki gunáh ke sáth hanseñ kheleñ, gunahgáron kí ráh men chaleñ, un kí majlison men bait̤hke un se suhbat aur behúda bát chít karen, to sach máno, ki gunáh se na chhúteñge, balki hamesha us ke tábi rahenge. Yúsuf se, jis ká ahwál Taurer men bayán hai, síkho; ki jab wuh imtihán men dālā gayá, ki burá kám kare, to yún kalite húe bhág gayá, ki Yih kyúnkar ho saktá hai, ki main aise bure kám ká murtakib hoke K̤hudá ke huzúr gunáh karún? Yún Yúsuf ne kahá, aur us ke kám aur báten hamári tálím ke wáste likhí gaíñ. Is liye, jab bure ádmí tumhárá imtihán karke tum ko gunáh ke jál men pakarwáyá cháhen, tab tum Yúsuf kí pairaui karke duá mángo, aur kaho, ki Kyúnkar main gunáh karún? kyúnkar K̤hudá ke hukmon ko torún? Nahín, nahín! main K̤hudá kí ráhon men chalúngá, aur sirf usí kí báton ko mánúngá. Pas, bure ádmíon se alag hoke un kí majlison se dúr raho; un kí mat suno; un se behúda bát chít mat karo; un kí t̤hat̤thebází, jo bemunásib hai, mat suno; un kí nápák kitábon ke mazmúnon ko mat parho; aur burí chízon par nazar mat dālo; kyúinki in sab burí chízon se burí khwáhishen, hawá o hawasen, bure k̤hiyál dil men paidá hoke us ko nápák karte hain. Balki us kí iwaz K̤hudá ká kalám parho, us par dhíyán karo, aur us ke pák hukmon ko dil men rakho. Par gunáh ke nazdík mat jáo; is liye ki wuh sámp kí tarah mártá aur ádmí ko halák kartá hai.

Ab ai ázízo, dil kí pákízagí kí ráh in thorí báton se tumhen dikhái gaí. Pas, jo koí tábidár hoke hoshyári, aur koshish. aur dindári, aur ímán ke sáth is ráh men chalegá, wuh mubárák hai; aur jo sust na hoke qáim rahegá, to sach much apní murád ko pahunchegá; aur Rúh-ul Quds, jo pákízagí aur sachái ká Rúh hai, us ká dil pák karegá, aur us ko sári sachái men pahuncháwegá; aur wuh shakhs, jaisá ki K̤hudáwand ne farmáyá hai, K̤hudá ko dekhegá,—is dunyá men ímán se K̤hudá ke Beṭe Isá Masíh men, aur us dunyá men rú ba rú, jaisá ki Yúhanná hawári ne likhá hai, ki Abhí záhir nahín hotá, ki ham kyá honge; lekin ham yih jánte hain, ki jab wuh záhir hogá, to ham us kí, yañe Masíh kí mánind howenge; kyúinki jaisá ki wuh hai, waisá hí ham use dekhenge; aur jo koí yih ummed rakhtá hai, wuh apne dil ko pák kartá hai, jaisá ki wuh áp pák hai. Ámín.

XXXVII.

ISĀ MASĪH APNĪ UMMAT KĀ BACHĀNEWĀLĀ HAI.

REV. P. HÖERNLE KĪ TASNĪF.

Tú us ká nám Īsá rakhná, is wáste ki wuh apnĭ ummat ko un ke gunáhon se bacháegá.—Matí 1 : 28.

AI mere piyáro, jab ham log koshish se muqaddas kitáb meñ parhte haiñ, tab ham ko mañúm hotá hai, ki us meñ aksar ádmí aur makánon ke aise nám, jo kḥáss mañe aur matlab rakhte haiñ, páe játe haiñ. So Ádam ke nám ke mañe zamín se banáyá gayá; aur Hauwá ke mañe sab zindon kĭ má; Núh ke tasallí denewálá; Ibráhím ke bahut logon ká báp. Isí tarah be shumár aur nám Kḥudá ke kalám meñ haiñ, jo faqat nám hí nahíñ, balki ek mañe ek matlab rakhte haiñ.

Lekin un ke darmiyán koí nám nahíñ, jo hamáre Kḥudáwánd ke nám ke muwáfíq ho. Wuh, sab se achchhá, aur bará, aur maqbúl hai; kyúñki us ke mañe Bachánewálá, Naját-denewálá hai; jaisá ki Kḥudáwánd ke firishte ne Yúsuf ko kḥwáb meñ farmáyá thá, ki Ai Yúsuf Dáúid ke beṭe, tú apnĭ jorú Maryam ko apne pás rakhne se mat ḍar; kyúñki wuh, jo us meñ paidá huá, so Rúh-ul-Quds se hai; aur tú us ká nám Īsá rakhná, is wáste ki wuh apnĭ ummat ko un ke gunáhon se bacháegá. Hāñ, Īsá Masĭh bachánewálá hai, wuhí apne logon ko bachátá hai.

Ab thorí der sochke do báton ká dhiyán karte haiñ; yañe,

I. Kĭ Īsá bachánewálá kahlátá, yañe wuh bacháne cháhtá, aur bachá saktá hai.

II. Kĭ wuh apnĭ ummat, yañe apne logon ko bachátá hai.

I. Īsá Masĭh bachánewálá hai, wuh bacháne cháhtá, hāñ, bacháne se niháyat kḥush hai; kyúñki wuh mihrbán o karím hai, aur us kĭ rahmat, aur mihrbánĭ, aur mahabbat kĭ intihá nahíñ. Suno—jo ham log kĭsĭ Naját-denewále kĭ kḥaslat, aur kḥássiyať ko sochte haiñ, to albatťa us ko karím aur mihrbán samajhte haiñ; nahíñ, to wuh kyúñkar bacháne kĭ kḥwáhish rakh sakegá? kyúñkar kĭsĭ kĭ bḥalái karne se kḥush hogá? hāñ, jab tak us ke dil meñ rahmat aur hamdardĭ na ho, wuh bacháne kĭ tabdíř na karegá. Main is bát ko tam-síl se sábit karúngá.

Agar koí shaḁhs daryá meñ wahāñ gir pare, jahāñ pání bahut gahrá hai, aur dúbne aur halák hone par howe, aur tum kĭsĭ dústre ádmí ko apnĭ bḥi ján kḥatre meñ ḍálke pání meñ kúdtē, aur us láchár ko kanáre par kḥainchte dekho, to tum kyá kahoge? Yih kahoge, kĭ Afrĭñ! Yih kyá bát hai. Sach much yih bařĭ mihrbánĭ aur rahmat ká kám hai.

Pas, ham Másih ke haqq meñ kyá kahen, jis ne ásmán aur us kí khushí o shádmání, hán, apná jalál o hashmat aur shán o shaukat sab kuchh chhor diyá, aur is gunahgár dunyá meñ paidá húa? Us ne ranj aur taklíf aur barí barí musibat, aur har tarah ke tasdía uṭhāe, aur ákhir ko apní ján de dí, maut ká dukh páke salíb par mar gayá. Aur wuh yih sab faqat is liye ámal meñ láyá, aur púra kiyá, ki ham láchár gunahgáron ko hamáre gunáhon, aur un kí sazá, aur tambíh, aur lanat, aur Kḥudá ke gazab, aur Shaitán ke qabze, aur jahannam, aur hamesha kí halákat se bacháwe. Pas, ham us ke haqq meñ kyá kahen? Wuh haqíqat meñ sab se karím aur niháyat mihrbán hai. Us kí mahabbat aur piyár kí intihá nahín, balki hamáre sab kḥiyálon aur aqloñ se báhar hai.

Par Isá Masih na faqat bacháne se khush hai, balki wuh bachá bhí saktá hai. Suno—jo koí kisĩ bare aur achchhe kám ko púra kiyá cháhe, to us ko zurúr hai, ki na faqat us ke karne se khush ho, balki qudrat, aur zor, aur hikmat o dānīsh bhí rakhe. Yāne, zurúr hai, ki jaisá ki wuh mihrbán aur karím, waisá hí qádir, aur qábil, aur bahádur bhí howe. Zurúr hai, ki wuh na faqat kám karne se rázī howe, balki kám karne ke láiq bhí ho; nahín, to jo kuchh wuh kiyá cháhe, ámal meñ na lá sakegá. So bachānewálé ko na faqat bacháne kí khushí, aur marzí, aur mihrbānī cháhiye; lekin qúwat o qudrat bhí zurúr hai, aur yih sab Masih meñ hai. Wuh Qádir i Mutlaq Kḥudá ká Beṭá, aur áp bhí qudrat rakhnewálá hai. Wuh bádsháhon ká Bádsháh, aur hákimon ká Hákim, aur sab ádmíon par akelá hukúmat rakhnewálá hai. Ásmán o zamín par sab kuchh us ke qabze meñ hai; kyúñki sárí chízen us kí marifat banái gaín, jaisá ki Yúh. 1 meñ likhá hai, ki “Shurú men kalama thá, aur wuhí kalama Kḥudá ke sáth thá, aur wuhí kalama Kḥudá thá. Sárí chízen us se paidá kí gaín, aur paidáish meñ us ke biná koí chíz paidá na hui;” aur wuh jo cháhtá, so kartá hai; koí us ke zoráwar háth ko rok nahín saktá.

In báton se khúb maḷúm aur sábit hotá hai, ki Isá Masih meñ bacháne kí khushí, aur bacháne kí qudrat, donon maujúd haiñ. Is wáste us ne Ámmánúíl nám bhí páyá, jis ke mañe yih haiñ, ki Kḥudá hamáre sáth. Hán, wuh hamárí súrat par paidá hoke hamará Naját-denewálá húa, jo sab ko, jo dil se ímán láke us pás áte haiñ, bachátá, aur Kḥudá se milátá hai. Lekin yih sach máno, ki jo koí naját páná cháhe, us ko zurúr hai, ki Isá Masih ke pás áwe; kyúñki aur koí dúsrá nahín, na ásmán, na zamín par, ki bachá sake. Ádmí dúsre ko gunáh se chhurá nahín saktá; is liye, ki sab gunahgár haiñ. Aur ásmán ke firishte bhí ham ko nahín bachá sakte. We Kḥudá ke khádim to haiñ, aur Kḥudá ne unhen barí qudrat baḅhí; par bachānewálé nahín ṭaharāe gae. Aur kyúñkar but, jo lakrī, patthar, yá pítal, wagaira se bane, bachá saken? We sab murda chízen haiñ, jin meñ kuchh jí nahín hai; aur jin ke haqq meñ zabúr meñ likhá hai, ki Un ká munh hai, lekin bol nahín sakte; un ke kán hen, lekin nahín sunte; un kí ánkhen haiñ, par nahín dekhte; un ke háth haiñ, lekin kuchh nahín kar sakte; un ke pánw haiñ, par nahín chal sakte; aur we, jo unhen banáte haiñ, waise hí haiñ. Faqat Isá Masih

bachá saktá hai. Us biná aur koí nahín; jaisá ki Ám. 4 : 21 men hai, ki Kisí दूसरे se naját nahín; kyúunki ásmán ke tale ádmíon ko koí दूसrá nám nahín baḡhshá gayá, jis se ham naját páwen.

II. Lekin suno—ek aur bát hai, jis ká dhyán karná munásib hai. Dekho, yún likhá gayá hai, ki wuh apní ummat ko un ke gunáhon se bacháwegá. Pas, koshish se púchhná aur daryáft karná cháhiye, ki us kí ummat, us ke log, us ke ádmí kaun hain? Dunyádár ádmí aksar kahte hain, kí Ham sab ke sab Ḳhudá kí ummat aur Ḳhudá ke log hain; kyúunki us ne to ham sab ko paidá kiyá, yāne zindagí baḡhshí, aur is din tak hamárá rakhwáli kí hai. Yih bát agarchi sach hai, tau bhí us ke yih māne nahín, ki we sab naját páwenge; is liye, ki sab ímán nahín láte. Us ke log, jin ko wuh naját baḡhshá hai, na faqat we hain, jo Ísá Masíh ká nám lete hain; kyúunki bahutere us din áke Masíh ko apná Ḳhudáwand kahenge; par wuh un ke jawáb men kahegá, ki Main tum se sach sach kahtá hún, ki tum ko nahín pahchántá; mujh se dúr ho, ai badkáro. Balki ḡhás kar we Ísá kí ummat hain, jin ko haqíqat men maḡlúm húa, ki hān, ham sab ke sab bare láchār aur gunáhgār ádmí hoke sazá ke láiq hain. Us kí ummat ye hain, jo isí sabab se Masíh kí taraf rujú hoke aur us ko akelé Naját-denewálá qabúl karke dil o ján se us par ímán láte hain. Us kí ummat ye hain, jo tauba karke apne sab gunáhon se báz áte hain. Us kí ummat ye hain, jo har bát men Ísá kí paírawí karke us ko piyár, aur piyár se us kí shukrguzárá karte, aur shukrguzárá se us kí bát mánte hain, aur us ke hukmon ke muwáfíq chalte hain. Faqat ye Ísá ke log hain, aur Ísá un ká Ḳhudáwand hai; faqat ye naját páwenge.

Ab ai mere piyáro, ḡhúb socho, aur púchho, aur daryáft karo, ki tum us ke logon men se ho, ki nahín? Koshish aur sachái se daryáft karo, ki tum mátam-dílí, aur tauba, aur ímán, aur pákízagí rakhte ho, ki nahín? Dekho, yih chízen Ísá Masíh ke logon ke nishán hain, jin se we pahchāne játe hain, jaisá ki daraḡht apne phal se pahchānā játa hai. Agar tú un chízon men se kuchh rakhe, to tú us ká hai, aur naját páwegá; nahín, to apne taín fareb mat de, balki sach mán, ki tú us ká nahín, aur naját na páwegá; aur jab tak ki tú tauba na karegá, halák hone par ho rahegá. Jo nae sir se paidá na ho, wuh Ḳhudá kí bádsháhat men daḡhil na hogá. Kyúunki jo jism se paidá húa hai, so jism hai, aur jism ke sáth ḡharáb ho jáegá. Pas, apne dil saḡht mat karo; balki dil se duḡ mángo, ki we chízen, yāne tauba, ímán, aur pákízagí Rúh-ul-Quds ke fazl se tumhen mileg. Hān, naját baḡhshish hai; is liye yih ḡhiyál mat kar, ki tú apne taín áḡhiri roz báchá sakegá. Yih kabhí na hogá; kyúunki tujhe bachāne kí qudrat nahín; faqat Ísá Masíh Naját-denewálá ṡaharáyá gayá; sirf wuh bachāne cháhtá, aur bachá saktá hai; isí sabab se wuh kahtá hai, ki Ráh, aur Haqq, aur Zindagí main hún; mujh bagair koí Báp pás nahín já saktá. Ab ai piyáro, bare, aur chhoṡe, larke, aur laríkán, tum men jis ká ek kán sunne ke liye ho, sune, aur jis ká dil nánne ke liye ho, máne. Ámín.

XXXVIII.

PAHLÁ' ZABUR.

REV. J. OWEN KÍ' TASNÍ'F.

Kyá mubáarak wuh ádmí, jo sharíron kí mashwarat par nahín chaltá, aur khatákáron kí ráh par khará nahín rahtá, aur thattá karnewálon kí baiṭhak par nahín baiṭhtá; lekin Yahowáh kí shariát men us kí ishrat hai, aur dín rát us kí shariát men soch kartá hai. Aur wuh us darakht kí mánind hai, jo nahron ke pání ke Kanáre par lagáyá jáwe, aur apne waqt par mewe láwe, jis ke patte murjháte nahín, aur wuh apne har ek kám men kámyáb hogá. Sharír to aise nahín, balki bhú-se kí mánind hai, jise hawá urá le játí hai. Is wáste sharír ádálát men, aur khatákár sádiqon kí jamáat men khare na rahenge. Kyúnki Yahowáh sádiqon kí ráh pahchántá hai, par sharíron kí ráh nest o nábud hogí.—Zab. 1 : 1—6.

Is Zabúr ká khulása yih hai, kí we mubáarak hai, jo sachchí aur Iláhí dánái ko maqdúr bhar qabúl karte, aur us par amal karte hai; par ledín aur náfarmánbardár, agarchi chand baras tak we apne taín nekbakht samjhen, tau bhí niháyat khaufnák intihá tak pahunchenge.

Is Zabúr ki ibtidá men musannif sádiq ádmí ko nekbakht kahke us kí taríf kartá; yáne, kí wuh sharíron kí mashwaraton aur bandishon aur ráhon ko chhorke, á. 1. apne dil kí bunyád ko shariát i Iláhí par dáltá hai, á. 2.

Tab latíf aur dulpazír misál ke taur par us amn o salámatí aur khushhálát ká bayán kartá, jis men sádiq apní sárí rawishon men rahtá hai, á. 3. aur muqábale men is ke, us halákat ká zikr kartá, jo sharárat ká lázim o malzúm hamráh hotá hai, á. 4. Sádiq mubáarak hai, sharír malaún; in báton se, jo abad tak sachchí aur qáim rahengí, musannif iātiqád rakhtá, kí jo wáqiāt in ke barṭhíláf záhir men hotí hai, Khudá unheñ uṭhá legá; yáne, kí Khudá apní ádálát se sharíron ko, jin kí ádáwat ke báis se sádiq is dunyá men dukh uṭhánewále hai, ákhir ko tor girá degá, aur apní kalísiyá ko, jis men cháhiye kí sirf sádiq shámil howen, sharíron kí ámezish se ázád karegá; kyúnki jab á. 3, 4 men likhá hai, kí Khudá sádiqon kí kháss rakhwálí kartá, aur is liye unheñ bemadad chhor na saktá, aur halákat sharíron kí qismat hai, to zarúr wuh unheñ apní qismat degá, á. 5, 6.

Is Zabúr ke tén qitá jin ke ek ek men do do áyaten hai.

Is Zabúr kí khássiyyaten do, yáne nasíhat kí, aur tasallí kí khássiyyaten hai.

Zabúr se is taur se nasíhat miltí : chunánchi naját sadáqat kí aur halákat sharárat kí hamráh hai, cháhiye kí koshish karen, táki us kí pairaúf aur is ko radd karen. Tamám jahán ke kháss o ámm men

ek pursish o istifhám hai nekbakhtí ke haqq meñ, aur rú i zamín par koí insán nahín hai, jo na cháhtá ki nekbakht o khusshál rahe, aur bad-nasíbi se hasratzada na howe. Par is Zabúr ká musannif, jo ásmán se hamen pukártá, girá detá aur áibdár thaharatá us sab ko nekbakhtí kí bábat meñ, jise insáni khiyálát aur tasauwurát atkal yá daryáft kar saktí haiñ, aur salámatí ká ek hí mahz durust bayán detá, jis se ahl i dunyá bilkull náwáqif hote haiñ, yáñe, kí muláarak hai wuh, aur suthrí hai qismat us kí, jo Alláh kí shariát ká áshiq hai, aur us meñ shauq-zauq rakhtá. Yih bayán to mukhtasar hai, lekin filhaqíqat aisá kí jab sáre hiss o fahm ké baráhiláf hai, khusúsan baráks idrák i álimán o fázilán i dunyá. Matlab, musannif púchhtá, ‘Tum áge ko kaun sí mashwarat karoge ? Káhe ko tum befáida ashyá kí pairaui karne se báz na áoge ? Yihí ek niralá beshqímatí motí hai, jo koí use hásil kare, yáñe, kí Alláh kí shariát meñ masrúr rahe, aur apne taiñ badkároñ se alag rakhe, so hí íqbálmand rahegá. Lekin jo kí is motí se mahrúm rahe, báwujúde kí niháyat mihnát o mashaqqat ke sáth ráh i naját ko dhúñdhe, tis par bhí hargiz use na pakregá.’

Phir, is Zabúr se hamen nasíhat miltí, khashs karke pichhle qítá se záhir hotí hai : sádiq KHUDÁ ke fazl par mazbút bharosá rakhen, aur yaqín láwen, kí sáre hádisé, jo záhir meñ is bharosé ke baráhiláf haiñ, nibareñge, játe rahenge aur ákhir hongé, kí KHUDÁ kí ádalát uthá legí aur nest karegí sáre thokaroñ ko, jinhen sharíroñ kí dunyawí khurramí o farhat detí, jis farhat ke báis se un ke liye ziyáda áyanda áfat o balá taiyár ho játi haiñ.

Jis tarah kí yih Zabúr Wasíqa i Qadím ke waqt sachchá thá, waisá ab Wasíqa i Jadíd ke zamáne meñ haqq rahtá hai. Hamesha sach hai, kí gunáh halákat kí ráh hai, aur naját o khussháli sadáqat ká lázim o malzúm hamráh hotá hai. Dunyá meñ to bahut wáqíat haiñ, jo záhir meñ is qaul ke baráhiláf haiñ; magar yád kiyá cháhiye, kí aisá sádiq shakhs, jis ká bayán yahán hai, yáñe, jis ká behadd shauq-zauq Alláh kí shariát meñ hai, aur jis ká dín-khiyál aur rát-khwáb, yá jis kí tasauwurát shab o roz us meñ hai, sáre baní Ádam ke darmi-yán nahín miltá. Balki jad naját sadáqat se lázim taur par muttasíl hai, tis par is Zabúr ká wáda kisí ádmí ko láshart nibáh nahín ho saktá. Aláwa, jab kí díl kí bátini garaz sirf sadáqat kí taraf lagti, tau bhí kamzoriáñ aur gunáh aise bakasrat haiñ, kí tarah tarah ke ranj aur áfateñ hamen zurúr haiñ, na faqat azáb i mukáfát aur tambíh ke taur, par siwá táki dín kí ráh par taraqqí karne ke wasíle howen. Ye hádisé to is masla ká muqábala nahín karte, lekin mazbút aur mustahkam karte haiñ. Har ádmí jitná wuh sádiq hai, apní sadáqat ke andáze aur miqdár ke mutábíq har ek ámal meñ kámyáb aur bakhtiyár hogá; par hamári sadáqat kámil yá beaib nahín hai, is liye wáda kí sári barakaten hamen nahín miltí haiñ. Har waqt wuh tasallí kí bát sachchí rahti. “Sári chízen un kí bhalái ke liye, jo KHUDÁ ke muhibb haiñ, milke kám meñ mashgúl haiñ.” Jo insán kí kharábí se, aur naját hásil karne kí sachchi tadbír, yáñe, Masíh ke salíb se náwáqif rahte, unhín se is Zabúr ká ráz i latíf maikhí rahtá hai. Qiyás un ká yih hai, kí insán ká díl áp se neki kí taraf lagtá, par báhirí ahwál aur dunyawí iláqe ke báis se ádmí gunáh ke jál aur

phande meṇ phans játe haiṇ. Lekin Kalám Ulláh aur har ímándár ke tajribe se sábit hotá hai, ki baní Ádam ká dil áp bittabaḥ ḡharáb aur gunáh se álúda hai, aur Ḳhudá Taʿálá jahán ká Kháliq, Sambhálnewálá, aur Hákim, “har ek ko us ke kámoṇ ke muwáfíq mukáfát dewegá; unheṇ, jo nekí kí ráh meṇ páedár hoke majd, aur izzat, aur baqá ke tálib haiṇ, hayát i abadí degá: par un ke liye, jo fasádí, aur rástí ke mukháliḡ, aur nárástí ke tábi haiṇ, gussa aur gazaḡ hogá. Ki har nafs i bashar ko, jo burá kartá hai, siyásat aur aḡzáb hogá; aur har shaḡhs ko, jo bhalá kartá hai, buzurgí, aur izzat, aur árám milegá: is liye ki Ḳhudá kuchh záhirbín nahíṇ hai.” So jab ki ham musibatzade yá dukh uṡhánewále howeṇ, aur is Zabúr meṇ parhte, á. 3. “Wuh us daraḡht kí mánind hogá, jo nahroṇ ke pání ke kanáre par lagáyá jáwe, aur apne waqt par mewe láwe, jis ke patte murjháte nahíṇ, aur apne har ek kám meṇ kámyáb hogá,” na kurkuráweṇ yá Taʿála-lláh kí rást hukúmat ká inkár kareṇ, magar á. 1, 2 par liház i gaur karke taftísh kareṇ, kyá ham us kámil sádiq ádmí kí mánind haiṇ, jis ká bayán wahíṇ hai? aur apne aibon se ágáh hokar “yih kahke apní chhátí piṡeṇ, ki ‘Ai Ḳhudá, mujh gunahgár par rahím ho,” aur áge sargarmí se koshish kareṇ, ki hamáre dil kí garaz o murád Ḳhudá kí shariát ke mutábíq howe, aur bilkull us sádiq ádmí kí mánind banen. Beshakk wuh, jo aisá kartá, Ḳhudá kí naját ko dekhegá, apne ásmání Báp kí niyámat o madad se phúlte phalte daraḡht kí mánind hogá, us ko zindagání kí ráh záhir hogí, jis par wuh taraqqí kartá rahegá; Alláh ke huzúr ḡhushíon se ser hogá, aur us ke dahne háth abad tak aish o ishrat-afazá chakhegá, balki ásudá rahegá.

Yih Zabúr i auwal sáre Zabúr ká mukhtasar díbája sá ján partá hai. Sháyad agle zamánoṇ meṇ tamám kitáb kí peshání par díbája ke taur par thá, kyúnci Ám. 13: 33 wuh, jis ko ham ab dúsrá zabúr kahte haiṇ, pahlá kahlátá hai, aur kai qadím naqlon meṇ yih pahlá Zabúr misl díbája kí miltá hai, chunánci báze Masihí mufassir qiyás karte, ki Zabúr ke jamá karnewále aur muallif ne gaur karke, ki sáre Zabúr ká ḡhulása is pahle meṇ mundarj hai, use kitáb kí peshání par idḡhál ke taur par rakhá. Záhir hotá hai, ki yih pahlá Zabúr tamám kitáb ká iḡhtisár hai, kyúnci sáre Zabúr aur sáre nawishta i Iláhí kí garaz yih hai, ki Nekon ke liye naját, sharíron ke liye halákat, muqarrar húi hai.

1. *Mubárák wuh ádmí, jo sharíron kí mashwarat par nahíṇ chaltá, aur ḡhatákáron kí ráh par khará nahíṇ rahtá, aur ṡhaṡṡhá karnewálon kí baiṡhak par nahíṇ baiṡhtá.*

Sáre ádmí nekbakhtí aur ḡhushháli ke tálib haiṇ, lekin bagair az Ḳhudá kí barakat ke sab koí ḡhwár, tabáh, aur shikastahál haiṇ. Tamám dunyá meṇ aisí ḡharábí phail gaí hai, ki aksar ádmíon se nekbakhtí kí ráh gaib rahtí. Is liye nabí is ráh ko batátá, pahlá, bis-salb, dúsrá, bis-sabút. Insán bittabaḥ bedíní kí taraf máil hotá hai, aur jahán kí chál náfarmánbardár hotí hai. So zarúr ki wuh, jo mubárák hone cháhtá, dunyá kí badí se, jo cháron taraf nazar meṇ áttí hai, parhez kare, aur us se bilkul báz áwe; zarúr wuh sharíron ke dastúron ko chhoṇ dewe, táki bhar maqdúr Alláh kí ráh par chale. Jis tarah

das ahkám meñ Alláh farmátá, Jīn kharáb fīaḥon kī taraf terá kharáb dil máil hotá hai, un se tú parhez kar, waisá hī nabí yahán kahtá, Mubáarak hai wuh, jo bad k̥hiyál o fīal se bilkull báz átá hai. *Mashwarat* ke mañe is maqám meñ na sirf saláh, balki *tadbīr*, *bandish* hai. *Kisí kī mashwarat par chalná* yih hai, us kī tadbīron yá bandishon par chalná, yá un ke mutábīq kám káj karná. Wuh, jo gunahgáron kī mashwarat par chaltá, na sirf un kī pairaui kartá, balki ap apne dil meñ un kī k̥hiyálát aur tadbīren qabúl kartá, apne dil se buri bandishen kartá, wuh k̥hud gunahgár hotá hai. Us kī aur un kī zát ek hī hai. Yih to insán kī aslí zát hai, par mubáarak wuh ádmí, jo is se mutanaffir hokar Rūh i Quds kī niāmat se K̥hudá-zád baná hai. Wuh, jo gunahgáron kī mashwarat par chaltá, *k̥hatákáron kī ráh par bhí khará rahtá hai*, yañe, ap gunahgár aur k̥hatákár hai. Us ká dil badí kī taraf lagtá; na faqat auron ke bahkáne se wuh gunáh kartá, par usí ká dil gunáh se álúda hokar burái kī taraf máil hotá hai. Aisá kharáb shaḥs thí *ṭhaṭṭhá karnewálon kī baiṭhak par baiṭhtá*; wuhí Alláh, aur áqibat, aur sári dīndári se ṭhaṭṭhebázi kartá, K̥hudá se kuchh k̥hauf yá mahabbat nahīn rakhtá, lekin ahmaq bankar apne dil meñ kahtá, K̥hudá nahīn. Aksar baní Ádam yūñ hī beráh aur bigar gae, ruswá ho gae, aur apne kámon se ghinaune hote haiñ. Jo kisí shahr ke bázár meñ jáeñ, kitne bedīn aur ṭhaṭṭhebáz dekhenge, jo josh meñ haiñ, bátīl k̥hiyál aur K̥hudá ká sámhná karte, aur Masih ke muqábil mansúba bāndhte haiñ. Afsos kī is mulk meñ itne bakasrat log apne dilon meñ buri tadbīren aur bandishen banákar, yá qabúl karke un par amal karte haiñ, bad ráhon par khare hote, aur unhen pasand karte haiñ, aur ráh i naját se istihzá aur ihánat karte haiñ. Is mulk ke har ek bázár meñ is qadr ke ṭhaṭṭhá karnewále haiñ, kī Masih aur Islám i Masihí ko haqír jánte, Kalám Ulláh, aur K̥hudá kī shariát, ádálát, aur K̥hudá kī sári sifát par hañste, aur ṭhaṭṭhe máрте haiñ. Jab koí wáiz áqibat kī bábat unhen talīm yá nasíhat detá, we, agle Yahúdíon kī mánind, kahte, “Wuh jaldí kare, aur phurtí se apná kám kare, kī ham dekhen, nazdík ho, aur á pahunche, táki ham use jáneñ,” Yas. 5: 19; yá kahte haiñ, “Alláh ká kalám kahán hai? wuh abhí áwe,” Yar. 17: 15. Lekin un ke haqq meñ ek qadīm peshkhabarí púrí ho gai, yañe, “Ákhirí zamáne meñ mazhaka karnewále záhir honge, jo nafs kī pairaui karenge, aur kahenge, kī Us ke áne ká kyá wáda ho gayá?” 2 Pat. 3: 3. 4. Ab nabí kahtá, Mubáarak, kyá mubáarak! wuh ádmí, jo har tarah kī aisí buri chál ko chhor detá, jis ke dil kī garaz bilkull alag rahtí, jis ke kám aur kalám dunyá kī chál se judá rahte haiñ, jis ke dil kī cháh, háth aur pañw kī chál, aur munh kī bát-en mubaddal aur pák ho gai haiñ.

2. *Balki Yahowáh kī shariát meñ us kī ishrat hai, aur dīn rát us kī shariát meñ soch kartá hai.*

Sharíron kī sharákat ko chhorke sádiq ádmí Yahowáh aur us kī shariát ke sáth suhbat rakhtá hai. *Sharíat* kī mañí is jagah meñ *Tauret* hai, kyúñki Daúd ke waqt meñ faqát Músá kī páuch kitáben aur siwá tīn chár likhí gaīñ thīñ. Lekin ye báten tamám Iláhí nawishton ke muwáfīq haiñ. K̥hudá ká har ek banda Kalám Ulláh meñ

aish o ishq rakhtá hai, aur na sirf use parhtá, balki aisá sochtá, ki kálám kí tásir dil men rahtí. Chunánchi Músá ne baní Isráíl ko farmáyá: “ Aur ye báten, jo áj ke din main tujhe farmátá hún, tere dil men rahen. Aur tú ye báten taqaiyud se apne larcon ko sikhlá, aur tú apne ghar men baithé, aur ráh chalte, aur sote, aur jágte unhen wírd kar,” Istisná 6 : 6, 7. Alláh ke firishte ne bhí Yashú ko farmáyá: “ Is shariát kí kitáb ká zikr tere munh se chhút na jáwe, balki tú rát din us kí tiláwat kiyá kar, táki tú us sab par, jo us men likhá hai, dhiyán rakhke ámal kare; tab tú apní ráh men kámyáb aur mudabbir hogá,” Yas. 1 : 8. Phir, baní Isráíl ke bádsháh ke liye yún hukm hai: “ Wuh us ke sáth rahá kare, aur jab jie use parhá kare, táki wuh Yahowáh apne K̄hudá se ðarná sikhe, aur us Tauret kí sab bát-on kí muháfazat kare, aur in huqúq ko ámal men láwe,” Istisná 17 : 19. Sádiq ádmí, jis ká yahán zikr hai, na sirf parhtá aur Alláh ká nám letá, balki tamám kalám ko ámal men látá. Kalám us ke dil men mahfúz rahtá, us ke dil kí taḡhtí par likhá gayá, aur us ke man se wuh mil játá hai. Us kí dánist men Kalám Ulláh “ sone se, balki bahut kundán se beshqímat hai, aur shahd aur us ke chhatte ke ṭapaknewále se shiríntar hai.” Zabúr 19 : 10. Us ke sáre andeshe aur dil kí ḡhwáhishen shariát i iláhí ke ás pás haín, shab o roz wuh us ko mántá aur us men masrúr rahtá. Wuh parhtá aur sochtá, táki rakhe aur kare. Wuh shariát men ishrat rakhtá, na is liye ki us ko mánne se ajr hai, yá us ke udúl karne se ázáb hai, par is liye ki wuh pák, durust, achchhá hai. Shariát ke shauq ke báis se sádiq ádmí ke dil men aisí ḡhurramí hai, ki sári dunyá se yá az hákimán i dunyá nahín mil saktí, jise tamám jahán rok nahín saktá, jo ḡaribí, pasthálí, tanghálí, bímárí, shikanja, yá musíbat, yá qaht, yá waswás, yá maut ke waqt men mazbút aur qáim, balki afzá rahégí. Yihí sachchí díndárí hai. Is men aur dín i Mahammad, yá Brahmanon ke mantar jantar, yá Hindúon ke maton men itná farq ki ásmán aur pátál men hai. Har waqt, har ek kám men, K̄hudá ká banda, jo khátá yá pítá, yá khetíbárí, yá naukari, yá ḡharíd o faroḡht, yá jo kuchh kartá howe, sab shariát i iláhí ke mutábíq kartá, aur hamesha us men mashḡúl rahtá. Gaur kiyá cháhiye ki na bedilí yá kashídagí se sádiq ádmí sadáqat kartá, lekin dil o ján se, farmánbardárí men us kí kulli ḡhushí hai,—*Yahowáh kí shariát men us kí ishrat hai*, us kí marzí K̄hudá kí marzi ke mutábíq hotí hai. Dekhá cháhiye bhí, ki sachchí díndárí Kalám-ulláh ke mutábíq hai, yane Tauret, nabíon ke nawishte, Zabúr aur Injil, na Qurán yá Purán yá Bed yá Upa-bed, ya Bedáng yá Upáng, yá kisi insáni bandish ke mutábíq hai. Us sachche kalám ke muwáfiq Alláh kí ḡhidmat kiyá cháhiye, na jhúṭhe paigambaron yá gúrúon kí ḡhushí par. Pas, maḡlúm hotá, ki jo K̄hudá ke tálib aur áshiq haín, jhúṭhí kitábon aur rahnumáion ko chhorke sirf Iláhí nawishton kí pairaui karte, aur un men masrúr o mahzúz rahte haín. Jo ki pák nawishton men masrúr nahín rahtá, aur shab o roz un men soch nahín kartá, so K̄hudá kí kalisiyá, yane, us kí bádsháhat men shámil hone ke láiq nahín hotá hai. Sach kí rú i zamín par koí aisá kámil shaḡhs nahín, jis ká bayán yahán hai; kyúunki ḡunáh ke báis se sab koí nátáqat ho gae, aur har ek insán áib-

dár rahtá hai. Tau bhí jab Rúh i Quds se koí insán pherke paidá hotá, aur us ke dil kí tabdil ho játi, tab wuh Alláh kí shariát meḡ kuchh kuchh, balki bahut magan rahtá, agarchi beaib na howe, aur wuh hamesha koshish o mashaqqat kartá, kí bilkull shariát i Iláhi par chál chalan kare. Tajribe se us ko khúb malúm hotá hai, kí Púlús hawári kí báton ke kyá mane hain, jab kahtá: “Main apní insániyat i manawí meḡ Khudá kí shariát se rázi hún; par dúsri shariát ko apne band band meḡ dekhtá hún, jis ko merí khirad kí shariát se jang hai; aur main gunáh kí shariát ká, jo mere band band meḡ hai, asír hún.” Róm. 7: 22, 23. Ab sábit hotá hai, kí Yahowáh kí shariát meḡ ish-rat rakhná sahl nahín, balki dushwár kám hai, aur begair az Khudá kí madad ke koí insán yih kám nahín kar saktá. Wuh jo sar i nau paidá nahí húa hai, agarchi álim, yá dunyawí fázil shakhs howe, aur andak miqdár tak shariát kí pákizagí aur durustí dekhe, har chand us par chalne aur us meḡ mahzúz rahne ke liye kamqadr aur kamtaqat hai. Wuh apne badan kí ádaton se kushtí kar nahín saktá, yahán tak kí Yahowáh kí shariát meḡ ish-rat rakhe, kyúinki is rúhání larái aur jang meḡ Rúh i Quds kí kumak zarúr hai. Jis kí kámil ish-rat Alláh kí shariát meḡ hai, wuhí kámil shakhs hai, us ke dil meḡ se badí kí jar ukhári gaí; kyúinki jitní badí, shariát se itní karáhiyat hai, aur us kí cháh aur chál har ek bát meḡ durust aur pák hain. Par koí aisá shakhs dunyá meḡ nahí hai; so taajjub nahín, kí koí shakhs na miltá, jo hamesha kámyáb aur iqbálmand rahtá. Faqat ek hí beaib, begunáh ádmí kabhi dunyá meḡ thá, yane Isá Masih; aur agarchi wuh is barakat i mazkúr ká mustahiqq thá, tad bhí us ne sári dunyawí barkaton ko náchíz jáná, táki salib ká mutahammil howe. Pas, agarchi baní Ádam ke darmiyán koí beaib ádmí nahín hai, tau bhí har nek shakhs kí ish-rat shariát i Iláhi meḡ hai, aur “us ke liye yih shariát hazáron ashra-fion aur rupayon se bihtar hai.” Khudá ke “labon ke suḡhan ke sabab wuh apne taín halák karnewáli ráhon se nigáh rakhtá,” Zab. 17: 4. Yih suḡhan sadá us ke dil meḡ mahfúz rahtá, jab “sharír log bátíl khiyál kaite hain,” 2: 1. wuh *Yahowáh kí shariát meḡ soch kartá hai*, rát ko apne bistar par shariát ká khiyál karne se wuh khush hotá, aur din ko jab kí báhar bhítar áyá jáyá kartá hai, Khudá ká kalám us ke dil ká búta aur us kí chál ká qánún hai. Wuh na sirf Alláh aur Parameshwar ká nám bak bak kartá riyákáron ke taur par, lekin us ká dil kalám par aur Alláh kí taraf lagtá. Jab kí so rahtá, us ká dil shariát ke mutábíq durust rahtá; jab jág uṡhtá, tab bhí suḡhan i Iláhi ko ázíz jántá hai. Kabhi yih suḡhan us kí ánkhoḡ se ojhal na hotá, balki us ke dil kí chaukhaṡon aur darwázon par likhá rahtá; rát ko us kí ján Khudá ká shauq rakhti, wuh apne dil se har sahar Khudá kí talásh kartá hai. Dáúd nabí sá wuh kahtá, “Áh! main terí shariát se kaisí mahabbat rakhtá hún; merá tafakkur sáre din wuhí hai,” Zab. 119: 97.

3. *Aur wuh us daraḡht kí mánind hai, jo nahron ke pání ke kandre par lagáyá jáwe, aur apne waqt par mewe láwe, jis ke patte murjháte nahín, aur wuh apne har ek kám meḡ kámyáb hogá.*

Sádiq mubárák hai. Musannif ne pahlí áyat meḡ kahá, *Mubárák*

hai wuh ádmí, wg. Is áyat meñ batátá, kí nek ádmí *kaisá* mubáarak hai. Alláh kí taraf se us par beshumár barakateñ názil hotí haiñ. Musannif hasín aur fasíh misál kí madad se sádiq ádmí kí *khushháli* bayán kartá hai. Us kí *khushi* o salámatí ek dam kí nahíñ, balki qáim aur aṭal rahegí. Sharír kabhí kabhí bahut shándár haiñ, jo áp ko us hare daraḡht kí mánind, jo apne khet meñ uge, phailáte haiñ ; par káṭe játe, guzar játe, goyá the hí nahíñ. We to us sarfaráz daraḡht kí mánind haiñ, jo kí agarchi apní barí barí dālíoñ ko chároñ taraf phailáwe, tis par zamín meñ us kí kuchh jaṛ nahíñ ; yá jo jaṛ howe, tad bhí súkhe registán meñ rahtá. Basabab is ke we tar o táza rah nahíñ sakte, balki un kí shaukat guzar játi, we hí faná ho játe, aur un ká nám o nishán nest ho jáegá. Par sádiq ádmí phúlte phalte daraḡht kí mánind hai, jis kí jaṛ seráb khet meñ, balki bahte pání ke kanáre par lagti hai, jo mausim i mewa meñ mewadár hotá hai. Barakat i Iláhi ke báis se wuh aisá mubáarak hai, asl se wuh to janglí daraḡht thá, aur faqat ág ke láiq, par *Khudá* ke háth ne use aisí *khushhálat* meñ lagáyá. Wuh angúristán, jis meñ sáre sádiq ádmí lagáe játe haiñ, *Khudá* kí kalísiyá, yá bádsháhat hai, aur buzurg Bágbán ke fazl se, na ba sabab i liyáqat apní, we us meñ shámil hote haiñ. “We, jo Yahowáh ke ghar meñ lagáe gae haiñ, hamáre *Khudá* ke diyár meñ phúlenge,” Zab. 92 : 13. “Un kí dālíoñ phailengi, un ká jamál zaitún kí mánind, aur un kí *khushbú* Lubnán kí si hogí,” Húsíá 14 : 6. Un ke phaloñ se maḡlúm hogá, kí we *Khudá* ke tákistán meñ lagáe gae haiñ, kyúñki káñtoñ se angúr, yá bhaṭkaṭaiyoñ se anjír nahíñ milte haiñ, par har ek achchhá daraḡht achchhá phal látá hai. Mísl is áyat kí, Yar. 17 : 8 meñ likhá hai, kí “Mubáarak hai wuh ádmí, jo Yahowáh par bharosá rakhtá hai, aur jis kí ummedgáh Yahowáh hai : kyúñki wuh us daraḡht kí mánind hogá, jo pánioñ ke kanáre par lagáyá játa, aur dhárá ke pás apní jaṛ phailátá, aur garmí áne se beḡhabar rahtá, balki us ká pattá hará hogá ; aur *khushk-sáli* meñ beḡhatra hogá, aur phal láne se báz na áegá.” Yún sábit hotá hai, kí *Khudá* kí barakat ke phal kaise aḡl-árásta, *khirad-afroz*, dil-farcz, aur bilkull pasand ke láiq haiñ. “Sádiq *khurme* ke daraḡht kí mánind lahlaháegá, wuh Lubnán ke saro kí tarah sabz hogá,” Zab. 92 : 12. Sádiq shaḡhs apne waqt meñ mewe látá ; yāne, har waqt us kí nekí o *Khudátarsí* lahlahátí aur sabz rahtí ; us ke har ek kám se maḡlúm hotá hai, kí *Khudá* se *khauḡ* aur mahabbat rakhtá, aur usí mubáarak ummed ke, aur apne buzurg *Khudá*, yāne apne bachánewále Isá Masih ke zuhúr i jalál ká muntazir rahtá. Apne ásmání Báp kí niāmat i pinhán, aur ráz i latíf se nek ádmí har roz ábpásh bantá, aur táza rahtá hai ; sárí chízeñ us kí bhalái ke liye milke kám meñ mashgúl haiñ. Wuh barhtá, taraqqí kartá, aur apne Báp ke abadí tákistán meñ lagáyá jáne ke liye taiyár hotá chalá játa hai. Sadáqat ke phaloñ se, jo Isá Masih ke sabab se haiñ, wuh ladá rahtá, táki *Khudá* kí madh aur hamd kí jáwe. Ye phal jo haiñ, so mahabbat, aur surúr, aur árám, aur sabr, aur maḡláyamat, aur *khushḡhoi*, aur ímán, aur farotání, aur parhez haiñ. Jis ke dil meñ ye haiñ, so hasad, yá názebáf, yá badḡumání nahíñ kartá ; kíñawar, yá láfzan, yá magrúr, yá apne nafa ká tálib, yá *khud-garaz*, *khud-bín*, *khud-numá*, *khud-sar*, *khud-*

saná, k̄hud-pasand, yá k̄hud-parast nahín hotá; tund-k̄ho, tund-mizáj, yá tund-wazá nahín, badā'arí se k̄hush nahín, balki rástí se k̄hush hai. Kám men wuh sústí na kartá, rúh se chálák hotá, K̄hudáwand kí bandagí men rahtá; ummed men shádmán, balá men sábir, duq̄ men páedár, aur sáre ádmíon ká k̄hair-andesh aur k̄hair-k̄hwáh hai. Isi tarah sádiq *apne waqt men mewe látá*, us ke in kámon se sábit hotá, ki us kí nekí lahlahátí hai, ki us ke patte na murjháte aur us ke phúl na kumhláte hai. *Aur wuh apne har ek kám men kámyáb hogá.* Yāne, wuh sádiq ádmí, jo beaib hai, har waqt, har ek kám men baḡhtyār aur iqbálmand rahegá. K̄hudá us ke sáth hai, is wáste wuh sáhib i iqbál hai. Jab koí shaḡhs nákámyáb yá hasratzádá howe, wuh apne taín parakhe, aur dil men pursish kare, 'Kyá main wuh kámil ádmí hun, jis ká bayán pahlí aur dusrí áyáton men hai, jis kí tamám ishrat Alláh kí shariyat men hai?' aur apne gunáhon se wáqif hokar kamál farotaní aur aḡizí se taḡht í fazl ke pás jáke Masih ke wasile se gúnáhon kí magfirat mánge. Sádiq ádmí ke kám sadáqat ke mutábiq hai, aur marzi i Iláhi ke muwáfíq, is liye wuh un men kámyáb hogá. Wuh apne tamám matlab ko mukammal karegá.

4. *Sharír to aise nahín, balki bhúse kí mánind hai, jise hawá urá le játí hai.*

K̄hudá kí taraf se sharír ádmí kí qismat yihí hai; wuh gunahgáron ko jine nahín detá. We tamám ho jáenge, aur hamesha ke liye un ká zikr miṡ jāegá. Gunahgár pátál men dále jáenge; aur sárí qaum-en, jo K̄hudá ko farámosh kartí hai; we apne háthon ke kám ke phande men phans jáenge. Badí sharír ko halák karegí, ek án kí án men sharír na hogá, agarchi tú gaur karke us ká makám dhúndhe, wuh maujúd na hogá, kyúnci k̄hatákár sab ke sab halák ho jáenge, dhúán kí mánind játe rahenge, aur un ká anjám nestí hogá. Dekho, sádiqon aur sharíron ke anjám men kyá tafáwat hai! sádiq abad tak mubáarak, aur sharír abad tak malaún rahegá. "Agarchi gunahgár sau bár burái kare, aur umr daráz howe, tad bhí main jántá hún, ki un ká bhalá hogá, jo K̄hudátars hai, aur us ke huzúr darte hai. Lekin gunahgár ká bhalá kahín na hogá, aur sáya kí mánind wuh apne dinon ko na barhāwegá, is liye ki wuh K̄hudá ke áge nahín darta thá." Wáiz 8 : 12, 13. Sádiqon kí qismat suthrí hai, lekin sharíron ká hissa ánewálá gazab hogá. Sádiq apne har ek kám men kámyáb hogá, par sharír to aise nahín. Yunání, Rómí, aur Arabí tarjumon men yih talaffuz bazor do bára átá hai, *sharír to aise nahín, aise nahín*, Arabí ايس كذاك المنافقون ليس كذاك Un

ke ghamand kí báten, gustáḡhí aur takabbur, aur taish aur jhúthí sheḡhián nest ho jáengi. Sádiq abadí bunyád par qáim rahte hai, par sharíron kí kuchh jar nahín, is liye we to *bhúse kí mánind hai, jise hawá urá le játí hai.* "Un ká pahlwán san ho jáegá, aur us ká kám sharára, aur we donon báham jal jáenge, aur koí un kí ág na bujhāwegá." Yas. 1 : 30. We to us janglí pazhmurde per kí mánind honge, jo bhalái áne se beḡhabar hai, aur we bayábán kí tapishnák

jagahon men suktinat karenge, aisi khari zaman men jis men, ko bas-newala nahin hai." Yar. 17: 6. Agarchi ab we duniya mal o aish se asudai howen, un par wawaila! Kyunki is jahan men we apni tasalli pa chukte hain. Jahan i ayanda men we ruswa aur khajil honge; "jaisi bhisi hawa ke age hoti hai, waisa hi we honge, aur Yahowah ka firishta unhen hankega." Zab. 35: 5. Un par nagahani tabahi paregi, jab ki sadiqon ka ji Allah se khushwaqt rahega. "Khuda unhen dantege, aur we dur bhag jenge, aur us kure ki tarah, jo andhi se ulti phire, ya us patte ki tarah jo bagule men ghume, mare mare phirenge." Yas. 17: 13. Khuda gehun, yane sadiqon ko, gole men jama karega, par bhise, yane shariron ko us ag se, jo hargiz nahin bujhti jalawega. "We kitni bar bad ki manind barbad hote hain, aur bhisi ki manind bawandar se ure jate hain." Aiyub 21: 18. Ai parhnewale! jab ki tu aisi bat parhti, apne taig parakho, khabardar! aisa na howe, ki tu Khuda ke khaliyan par se bazor i girdbad i ilahi uray jawe. Har nek admi Khuda ki aisi darani baton se khauf rakhti, aur ziyada sargarmi se koshish karti, ki sadiqon ki suthri miras men hissa pawe.

5. Is waste sharir adalat men, aur khatakar sadiqon ki jamat men khare na rahenge.

Yih ayat 3 aur 4 ayaton se yun nisbat rakhti hai. Un men yih ain marqum hai, ki sadiq hamesha mubarak, aur apne har ek kam men kamyab hoga; sharir har waqt malun, aur bhise ki manind hanka jega. Is ayat men likha hai, ki us ain ke mutabiq har ek shaks apna hissa pawega; yane halanki sadiqon ke liye najat aur shariron ke liye halakat muqarrar hui hai, zurur Khuda ki adalat inhen gira degi, aur unhen apni wajib miras men qaim karegi. Agar-chi Khuda ka adl har waqt insan ke dekhne men nahin ata, tau bhi us ki adalat i mukafat harek shaks ke liye apna pura aur munasib kam karegi. Yahin har tarah ki adalat i azab ka ishara hai, khwah is jahan men, khwah jahan i ayanda men howe. Jahan i hal men Khuda kabhi kabhi tarah ba tarah apni adalat bani Adam par zahir karti hai, bawujude ki us ka insaf ab bilkul dekh nahin parta; lekin aqibat men adl i ilahi sare admion par bakhubi ashkara hoga. Tab sabhon ko malum hoga, ki Khuda insaf karnewala hai. "Khuda har ek fiail ko adalat men lawega, aur har ek makhfi kam ko, ky bhalai ky burai." Waz 12: 14. Aksar sharir admi to shekhi aur istihza karte, aur kahte, ki Insaf ke ane ka ky wada ho gaya? Jis tarah ki chor ya rahzan nale ya jangal men chhipke ummedwar hain, ki hakim hamen na pakrawega, waise hi gunahgar adalat i ilahi se makhfi hone ke khiyalat i la-tail karte hain. Par nek o badon ki amezish i hal adalat men na rahegi. Jis waqt ki Khuda insaf karne ke liye khar hoga, us ki kalisiya badkaron se pak ho jega. Tab har shaks, jaisa wuh hai, waisa hi zahir hoga; sadiqon ki sadaqat aur shariron ki shararat age ko chhip na rahegi, balki alam i ulwi aur alam i suffi ko ashkara hogi. "Khuda ne ek din muqarrar kiya hai, ki ek mard ki wasatat se, jise us ne muaiyan kiya hai, alam ki sachchi adalat karega." Yih mard to Khudawand Isa Masih hai, jis ek hi shaks men uluhiyat aur

insāniyat haiṇ ;” kyūnki ham sab ko zarūr hai, ki Masīh kī masnad i ṁdālat ke āge hāzir howeṇ, tāki har ek muwāfiq us ke, jo us ne kiyā, kyā bhalā kyā burā, apne badan ke kie ko pāe.” 2 Kar. 5 : 10. “Sab qaumeṇ us ke āge jamā kī jāengi, aur wuh un ko ek dūsre se jūdā karegā, jaisā charwāhā bheroṇ ko bakrioṇ se judā kartā hai. Tab wuh un se, jo bāeṇ haiṇ, farmāwegā, ki Dūr ho, ai malāuno ; us abadī āg meṇ jāo, jo Shaitān aur us ke frishtoṇ ke wāste taiyār kī gai hai. Aur ye āzāb i abadī meṇ jāenge, par sādiq hayāt i abadī meṇ,” Matī 25 : 32, 41, 46. *Ḳhatākār sādiqoṇ kī jamāat meṇ khare na rahenge* ; garaz we, jin ke dil Ḳhudā se berāh ho gae, aur jo bātin meṇ us kī bādshāhat se ḵhārij haiṇ, Ḳhudā kī rāst ṁdālat se haqīqat meṇ us meṇ se kāte aur hānke jāenge. Riyākāroṇ kī riyākārī aur badkāroṇ kī badkāri abad tak maḵhfi na rahegi, par zāhir hogī, aur un ke karnewāle mardūd honge. Faqat thoṛī muddat tak chūn hāl hai, Ḳhudā kī kalīsiya meṇ nek o bad bāham rahenge. Ḳhudā kā irādā hai, ki apnī ṁdālat se sādiqoṇ ko sharīroṇ kī āmezish se sáf o tāhir kare, aur yihī iftirāq aur tahārat ḵhāss taur par āqibat meṇ aur us muqarrar kie hūe āzīm roz i ṁdālat meṇ hogī. Ḳhudā kā irāda hai, ki us kī kalīsiya pāk howe, us ke is irāde se sābit hotā hai, ki sharīr log us kī jamāat meṇ se ḵhārij kie jāenge aur halāk honge. Tauret ke kaī maqāmoṇ meṇ yih qaul miltā shariāṭ i Ilāhī ke udūl karnewāle ke haqq meṇ, “Wuh shaḵhs apnī guroh meṇ se kaṭ jāegā.” Yih āyat us qaul se ishāra, imā o ramz kartī. Jo burāi kartā, so haqīqat meṇ aur bilfiāl Ḳhudā kī bādshāhat se kaṭ gayā hai ; aur jab ki Ḳhudā kī ṁdālat zāhir hogī, tab us kī hālat bittahqīq malūm hogī, tab ḵhatākār sādiqoṇ kī jamāat meṇ khare na rahenge. Jo sachchāi meṇ kalisiyā-wāle haiṇ, so hī sādiq haiṇ ; agarchi kaī sharīr banām aur zāhīran yahān kī bādshāhat i Ilāhī meṇ shāmil hūe haiṇ, tau bhī ṁdl i Ilāhī ke zuhūr ke waqt meṇ ḵhārij kie jāenge, aur Ḳhudā kī āsmānī kalīsiya meṇ dāḵhil na honge; pahlauṭhoṇ kī jamāat meṇ, jin ke nām āsmān par likhe haiṇ, khare na rahenge. Yūn malūm hotā, ki sādiqoṇ kī jamāat i mazkūr is āyat kī Ḳhudā ke qadīm ahl i āhd the, un kī ḵhāss taswīr ke mutābiq, yāne we, jo sachche bemakr Isráilī the ; chūnānchi banī Isráil aur maqāmoṇ meṇ *sādiq* kahlāte haiṇ, dekho Gintī 16 : 3, 23 : 10. Zab. 111 : 1, aur Ḳhudā ne unheṇ farmáyā, “Tum pāk bano, ki main pāk hūṇ.” Yasaiyāh nabī ne peshḵhabarī dí, ki is pāk taswīr ke mutābiq ahl i āhd sādiq ho jāenge, “Aur tere sab farzand Yahowāh se muḳallam honge, aur tere farzandoṇ kī salāmatī kāmīl hogī.” 54 : 13. So is āyat kā yih lafz *jamāat* Isráil kī jamāat se ālāqa o munāsabat rakhtā, chūnki we *sādiqoṇ kī jamāat* the. Hiz. 13 : 9 sab ahl i Isráil *sādiqoṇ kī jamāat* kahlāte haiṇ, “Aur merā hāth un nabīoṇ par, jo dhokhā dekhte haiṇ, aur jhūṭh ke peshgo haiṇ, phailegā. We *mere logoṇ kī jamāat* meṇ na rahne páwenge, na we *Isráil ke ḵhāndān ke daftar* meṇ likhe jāenge, aur na we Isráil ke mulk meṇ pahunchenge.” Is āyat ke masla ke mutābiq Qurāh aur us ke pairau sādiqoṇ kī jamāat meṇ khare na rahe, lekin zamīn, jo un ke niche thī, phaṭī, aur “we *jamāat ke darmiyān* se fanā ho gae.” Gintī 16 : 33. Is āin ke mutābiq Sāul aur us ke pairau, agarchi banām kalisiya meṇ the, *sādiqoṇ kī jamāat meṇ khare na rahe*, balki fanā ho gae. Aur yūn hī Ḳhu-

dá ke muqarrar waqt par har ek sharír yá riyákár sádiqon kí jamáat se kharíj kiyá jáegá. Kḥudá kí ánkhen sadá us kí kalásiya par nigáh kartí hain, aur us kí pákizagí ke liye tajwíz kartí hain, hálánki insán gáfil howen. Kḥudá kí ádalát ke waqt men sharír mardúd, aur sádiq maqbúl ho jáenge. Sára sádiqon kí sadáqat sirf Kḥudáwánd Ysá Masih kí taraf se áti hai : we to apní bigrí húi asl ke báis se gair sádiq hain, par “ wuh hamáre badal gunáh thahará, táki ham us ke sabab se sadáqat i Iláhi banen.” 2 Kar. 5 : 21.

6. *Kyúinki Yahowáh sádiqon kí ráh pahchántá hai, par sharíron kí ráh nest o nábúd hogí.*

Zabúr men ráh ke do maṇe milte hain ; pahlí chalan, tab anjám, hissa, qismat, hálát. Yih dúse maṇe aksariya milte ; dekho Zab. 37 : 5. “ Apní ráh Yahowáh par chhoṛ de,” yaṇe, apní qismat, hálát, Yahowáh par chhoṛ de.” Phir Yas. 40 : 27. “ Ai Yaqúb, tú kyún kahtá hai, aur ai Isráíl, tú kis liye boltá hai, kí merí ráh,” yaṇe merá anjám, merí qismat, “ Yahowáh se poshída hai,” wg. Is áyat ke dúse hisse se maḷúm hotá hai, kí yahán ráh ke maṇe chalan nahín, lekin muámala o ahwál ; “ Sharíron kí ráh,” muámala o ahwál, “ nest o nábúd hogí.” So pahle hisse men ráh se yihí múrád hai. Tísrí aur chauthí áyaton men sádiqon aur sharíron kí qismat, muámala o ahwál ká bayán hai ; sádiq mubáarak, sharír malaún, is wáste sharír ádalát men khare na rahenge. Sharír khare na rahenge, *kyúinki* sádiq mubáarak, par sharír malaún ; yaṇe, *Yahowáh sádiqon* kí ráh pahchántá hai, par sharíron kí ráh nest o nábúd hogí. Is áyat men tísrí aur chauthí áyaton ká kḥulása marqúm hai, páñchwín áyat ke subút ke taur par. Jyún yahán likhá hai, kí sharíron kí ráh nest o nábúd hogí, tyún aur kahín likhá hai, kí un kí ummed nest o nábúd hogí. Dekh Ayúb 8 : 13 ; Amsál 10 : 28. Kḥudá sádiqon kí qismat aur hálát, un ká muámala o ahwál pahchántá hai, *isi’ liye* un ko har tarah kí barakat milegí. Us kí ánkhen har waqt un par nigáh kartí, aur un kí rakhwáli kartí hain. Nekon kí ráh khabír i mutlaq, dáná o bíná, aur hama-dán Kḥudá Taálá ko maḷúm hai ; so zarúr sádiq ádmí us kí taraf se, jo sádiq-ul-qaul hai, mubáarak howen ; Kḥudá un ke “ dukh par nigáh kartá, aur un kí ján ko saḡhtion ke waqt pahchántá,” yaṇe, un kí ján kí khabardári kartá, Zab. 31 : 8. “ Yahowáh achchá hai, aur tangí ke waqt ek panáb hai ; wuh apne mutawakkilon ko pahchántá hai, yaṇe, un kí himáyat kartá hai, Naham. 1 : 7. “ Kḥudá kí bunyád ustawár hai, aur us par yih muhr hai, kí Kḥudáwánd unhen, jo us ke hain, pahchántá hai, 2 Tim. 2 : 19. Kḥudáwánd Ysá Masih, jis kí taraf se sádiqon kí sadáqat áti hai, apnon ko pahchántá, un kí rakhwáli, hifázat, aur hidáyat kartá, aur hamesha unhen har tarah kí barakat detá hai. Us ká qaul yih hai, “ Achchá charwáhá main hún, aur apnián jántá hún, aur apniön se jáná játá hún, aur main bheron, yaṇe, sádiqon ke liye, apní ján detá hún,” Yúh. 10 : 14, 15. Yahowáh hamesha sádiqon kí ráh pahchántá hai ; un ká anjám bihisht, aur un ká bhalá abad tak hogá ; par sharíron ká bhalá kahín na hogá, balki us kí ummed játi rahegi. In páñchwín aur chhaṭhwín áyaton kí peshkhabarí tamám álam par qáim hogí, aur dunyá ke ákḥir tak púrí

hotí rahegí, K̤hudá sádíqon ke liye waḍa-wafá hogá aur sharíron ko bhí apná qarz adá karegá.

Is Zabúr ke ákhir men parhnewále ko nasíhat kí ek bát detá hún main, ki jab tú Zabúr ko parhtá, yá gátá, k̤habardár kí terí garaz pák howe, aur kalám kí tásir tere dil men rahe, táki tú ziyáda roshan-ráe o zamír ban jáwe, terá ímán mazbútí pakre, aur har hálát men terí rúh k̤hush aur mustahkam howe. Yún Zabúr kí tamám kitáb tere pánw ke liye chirág, aur terí ráh kí roshní hogí.

THE OFFICES OF CHRIST

FROM

FLAVEL'S FOUNTAIN OF LIFE.

MASÍH KE MANSAB.

Rev. J. Warren se tarjuma kiyá gayá.

AṬHWAṆ BĀB.

MASÍH KÍ MIYA'NJÍ'GARÍ KÍ KHA'SSIYAT.

Is liye, ki Kḥudá ek hai, aur Kḥudá aur insán meṇ ek insán, yāne Masíh Ísá, wásita hai.—1 Tim. 2 : 5.

JAB kisi kām ke liye barí der se bahut sí taiyárí hotí hai, tab us se wuh kām bará aur aẓím maḷúm hotá hai. Agar koí shaḡhs soná chándí aur sab asbáb, jo Dāúd ne haikal banáne ke liye jama kie the, dekhtá, to sahaḡ se maḷúm kartá, ki yih barí imárat hogí. Aur dekho, yahán Kḥudá ke ek iráda ká zikr hai, jo us haikal ke iráda se aisá aẓímtar hai, jaisá ásmán zamín se; kyúнки haqíqatan wuh haikal faqat Masíh ká ek nishán thí; aur us rúhání aur zinda haikal kí, jo wuh banáne ko thá, peshkhabarí. Us haikal meṇ Kḥudá ká zuhúr thá; is meṇ Qádir i Mutlaq Alláh bastá hai. Us haikal kí taiyárí meṇ bárah baras lage; is kí taiyárí azal se hotí rahí. Aur jaisá dunyá kí paidáish se peshtar is kí taiyárí hone lagí; waisá hí jab dunyá nest o nabúd ho jáegi, tab bhí sadá tak yih hamd o taajjub ká sabab aur sháyán hogá. Úpar kí sanad se maḷúm hotá hai, ki yih jalálí kām kyá hai; yāne, Kḥudá aur insán ke darmiyán miyánjígari; aur yahán Ísá miyánjígari ká bayán hai.

1. Us ká zikr us ke kām se hotá hai. Wuh ek wásita, yá darmiyání hai.

2. Us ke zikr meṇ wahdáníyat mazkúr hai. Wuh ek miyánjígari hai; aur koí dúsrá nahín hai. Jaisá ek Kḥudá hai, waisá hí ek miyánjígari.

3. Us ke is zikr meṇ us kí ek kḥássiyaṭ maḡhsús kí gaí hait *Insán* kahlátá hai. Yih is maqám meṇ is wáste hai, ki us ne insániya. meṇ kafára kiyá. Aur is se yih fáida bhí hotá hai, ki gunahgár use aisá sardár káhin jáneṇ, jo hamará hamdard hai, aur hamará ranj jántá hai; táki us kí taraf khínche jáweṇ, aur imán láweṇ.

4. Wuh *apne námon* se mazkúr hai, *yāne* Masīh aur Iśá. Iśá se naját dihindā murád hai; aur *Masīh* se us kā niyáz honā. Pas, natija yih hai—

Iśá Masīh akelā sachchā miyāñjī Khudā aur insān meñ hai.

Wuh miyāñjī yā darmiyānī kahlātā hai, Ibr. 9 : 15, aur 12 : 24. Pas, ab taammul karnā chāhiye, ki

I. Miyāñjī kā matlab kyā hai?

II. s lafz se kyā murád hai, jab Masīh ke zikr meñ istīāmāl kiyā jātā?

III. Kis tarah sābit hotā hai, ki wuhī akelā miyāñjī hai?

IV. Kyā wuh insān hoke miyāñjigarī kartā hai, aur us meñ Ulūhiyat sharik nahīn?

I. *Miyāñjī ke matlab kī bābat.* Aslī Yúnānī lafz kā matlab darmiyānī, yā bichwaī hai; *yāne* ek, jo do shakhsōn ke bīch āke sulh un meñ karwātā hai. Zāt meñ bhī, aur kām meñ bhī Masīh aisā hī hai : zāt meñ; ki wuh Khudā kī, aur ādmī kī zāt meñ sharik hai; aur kām meñ; ki wuh Khudā aur hamāre bīch sulh karwātā hai. Aslī lafz ke kāī māne haiñ; *yāne* munsif, aur qāsid, aur tarjun ān, aur sulh karwānewālā. Masīh ye sab udhe rakhtā, aur ye sab kām kartā hai.

II. Is kā kyā matlab hai, *jab Masīh ke haqq meñ istīāmāl kiyā jātā hai? yā Masīh ke miyāñjī hone se kaun kaun bāt nisbat rakhtī haiñ?*

1. Is se yih bāt nisbat rakhtī hai, ki *Khudā se ham se nihāyat barā bigār hai*; nahīñ, to miyāñjī kuchh zurūr na hotā. Ek waqt Khudā se aur insān se nihāyat shērīn sulh aur mel thā; lekin basabab gunāh ke jaldī se judā ho gae; Khudā insān se nipāṭ bezār hūā, Zab. 5 : 5; aur insān Khudā se ājab tarah kī dushmanī rakhne lagā, Róm. 1 : 18, 32.

Koī na kahe, ki ek hī gunāh se, jo chhoṭā maḷum hotā hai, aisā barā bigār nahīñ ho saktā hai; aur Khudā aise adnā sabab se apne hī hāth ke kām se nārāz na hogā. Ādam kā gunāh chhoṭā na thā. Wuh kāmīl aur rāst thā; us kī aql meñ kuchh kamṭī na thī; us kā iḡhtiyār āzād thā; wuh imtihān kā sāmīnā kar saktā thā; us kī tamīz ālūda na thī; aur wuh jāntā thā, ki us kī aulād kā hāl usī ke kām ke muwāfiq hone ko thā. Wuh achchhī hālat meñ thā: kisi tarah kī hājat na thī, ki jis se imtihān zorāwar ho jāe; wuh rahmatōn se ghirā thā, aur Khudā hī se mulāqāt kiyā kartā:—aur is hālat meñ gunāh karne lagā. Jab aisī hālat thī, to sarīh nāfarmānbardārī aur behukmī kā kyā uzr ho saktā hai?

2. Is se maḷum hotā hai, ki *Khudā kā insāf zurūr badlā legā.* Masīh kī miyāñjigarī kā nīrā matlab yihī hai, ki insāf ko pūrā badlā deke sulh karwāwe. Beshakk ham Khudā kī rahmat ke sabab se bachte haiñ; lekin yih rahmat Iśá Masīh ke wasīle se hotī hai, Afs. 1 : 3—5. Ām. 4 : 12. Yūh. 6 : 40. Khudā ke dil meñ rahm jumbish kar rahā; lekin Masīh ke dil ke lahū ke wasīle se bah niklā. Ek buzurg ne achchhī tarah se kahā hai, ki “*Khudā ne na apne insāf kī saḡhtī rahm kī mulāimī meñ, aur na rahm kī mulāimī*

insáf kī saḡhtī meṇ, maglúb kī.” Agar ho saktá, kī Ḳhudá aur koī tadbír insán kī naját ke liye nikále, tau bhí bagair Masīh ke kisí ko ummaid nahīṇ ho saktí; kyúṇki wuh yihí ráh muqarrar kar chuká hai. Pas, agar koī ḡhiyál kare, kī maiṇ aur kisú tarah se sulh Ḳhudá ke sáth kar saktá, to yih kaisí bewaqúfī hogí. Kyá Ḳhudá kī dánái aur tadbír har ek insán kī ḡhwáhish aur aql ke muwáfiq badlegí? Jahán shariát hotí hai, waháṇ sazá zurúr hai; aur jahán sazá ká hukm hai, to us se kyá fáida hogá, agər hukm kabhí kám meṇ na áwe? Pas, maḡlúm húa, kī Masīh kī miyáñjigarí dunyá kī sári ummed hai.

3. Masīh ke miyáñjī hone se us ke laḡ kī beniháyat qímat maḡlúm hotí hai; kyúṇki wuhí akelá qádir thá, kī Ḳhudá ke insáf ká daur ro-ke, aur Ḳhudá ko un se, jo áge dushman the, rázī kare; jaisá likhá hai, Kal. 1:21, 22, “Aur tum ko, jo badkirdáron ke sabab aj-nabí, aur batin meṇ makrúh the, us ne ab wajúd i jismání meṇ mar jáne ke sabab se phiráyá, táki wuh tumheṇ apní nazar meṇ muqaqdas, aur beaib, aur bejurm ṡaharáe.” Beshakk wuh niháyat mufid aur latif chíz hai, jis se Ḳhudá i quddús, jab kī wuh insáf ke sáth gunah-gáron se náráz húa, apne gazab ko dhímá kare, aur apní god meṇ apne dushman ko lewe, aur us ke sáth abadí sulh ká áhd bándhe, aur us ke úpar gít ke sáth shádmání kare, Safaniyáh, 3: 17.

4. Masīh ke miyáñjī hone se *us ká behadd piyár láchár* gunahgáron kī taraf záhír hotá hai. Agar wuh hamáre wáste sirf minnat kartá, to us ká piyár o rahm sábit hotá; par siwáe is ke wuh hamára zámín ho gayá, aur hamáre qarz adá karne ko áyá. Jab kī us ne insáf ke háth ko, hameṇ halák karne ke liye uṡháe húa dekhá, tab us ke dil meṇ piyár ne kaisí jumbish kī, kī wuhí ap insáf kī talwár ká zarb sahtá, agarchi jántá thá, kī us ke sahne se qabr meṇ gurná hogá.

III. Kis tarah sábit hotá hai, kī *wuhí akelá miyáñjī hai?*

1. Kyúṇki wuhí, aur sirf wuhí Ḳhudá se *záhír kiyá gayá hai*. Agar Ḳhudá ne sirf usí ko záhír kiyá hai, to hameṇ use, aur na aur kisú ko, qabúl karná cháhiye. Pák nawishton ke do maqám sochná cháhiye: yāne 1 Kar. 8:5—kī but-parast “bahutere Ḳhudá aur bahutere Ḳhudáwand” mánte haiṇ. Is ká matlab yih hai, kī but-parast log bahut Ḳhudáon ko pújte the, aur bahut baháduron aur darmiyání Ḳhudáwandon ko mánte the: “Par (hawári kahtá hai) hamára ek Ḳhudá hai, jo Báp hai, jis se sári chízeṇ húíṇ, aur hamári báz gasht us tak hai;” yāne ek hí chashma i barakát o niāmát: “aur ek Ḳhudáwand hai, jo Isá Masīh hai, jis ke sabab se sári chízeṇ húíṇ, aur ham us ke wasíle se játe haiṇ;” yāne wuhí akelá hamára darmiyání hai, jis ke wasíle se Báp kī taraf se hameṇ sári niāmaten miltí, aur hamári sári minnaten Báp ke huzúr meṇ kī játi haiṇ. Waisá hí Ám. 4:12 meṇ, “Aur kisí dúsre se naját nahīṇ: kyúṇki ásmán ke tale ádmíon ko dús-rá nám nahīṇ baḡhshá gayá, jis se ham naját pá sakeṇ.” Is meṇ nám se shaḡhs murád hai—aur koī shaḡhs nahīṇ muqarrar kiyá gayá hai, jis ke wasíle se naját ho saktí hai. Ásmán ke tale se murád nahīṇ hai, kī sháyad ásmán ke úpar aur koī miyáñjī hai; kyúṇki ásmán meṇ aur zamín meṇ us ko sára iḡhtiyár diya gayá hai, aur wuhí akelá naját-dihinda hai. Yih faqat ek muḡáwara hai, jis ká matlab yih hai,

ki siwáe us ke aur koí mutlaq hai nahín. Èk súra j dunyá ke liye káfi hai; aur ek darmiyání sáre ádmíon ke liye.

2. Kyúнки wuhí akelá *is uhde ke láiq, aur is kám par qádir hai.* Us ke siwáe, jo Rabbání aur insání hai, kaun is ke láiq hai? Khudá ke siwáe kaun Khudá ke insáf ko badlá de saktá hai? Aur koí shakhs, kitná hí zoráwar aur buzurg kyúń na ho, agar gharí bhar Masíh ke us bojھ ko, jo bág meń us par thá, sambháltá, to wuh aisá nest ho játá, jaisá parwána, jo mashál ke shuale meń uthá hai.

3. Kyúńki us ká lahú har zamáne aur har ádmí ke liye káfi hai. Us ke kafáre ká fáida Ádam ke waqt se leke dunyá kí intihá tak jári hai. Wuh is meń súra j kí mánind hai, jis kí roshní pesh áti hai, aur dín us ke tulú hone se pahle hotá, aur us ke gurúb hone ke piche rahtá hai: waisá hí Masíh ke kafáre se har zamáne ko roshní milti hai. Wuh áj aur kal, aur az azl tá abad eksáń hai. Pas, us ko chhorke koí dúsrá muqarrar nahín kiyá gayá; koí dúsrá is kám ke qábil nahín hai; koí dúsrá darsár nahín hai.

IV. Pichhli bát yihí hai, ki *Kyá wuh insán hoke miyáńjígari kartá hai, aur us meń Ulúhiyat sharík nahín?* Aur ham yaqín karte haiń, ki wuh donon khashsiyat meń, Khudá-insán hoke, miyáńjígari kartá hai. Rúmi pápá ke pairau kahte haiń, ki wuh apní Rabbání khashsiyat ke mutábíq yih kám nahín kartá hai; lekin is kahne se we us kí miyáńjígari ko kamzor o beizzat thaharáte haiń; kyúńki us kí izzat o qadr sirf us kí Rabbání khashsiyat se hoti haiń. We kahte haiń, ki Púlús hawári is sanad meń, ki ek Khudá aur ek wásita hai, Darmiyání aur Khudá ke bích tafríq kartá hai; aur ham jawáb dete haiń, ki wuhí hawári Masíh aur insán ke bích tafríq, Gal. 1 : 1 meń, kartá hai, ki Na ádmí se, balki Isá Masíh ke farmúde se. Kyá is se murád hai, ki Isá haqíqatan insán nahín hai? yá ki us ne sirf apní Rabbání khashsiyat meń Púlús ko buláyá? Kabhí nahín. Matlab hai, ki Masíh ne, jo Khudá-insán hai, use buláyá. Masíh na sirf ádmí hai, na sirf Khudá hai; lekin Khudá-insán hai. Par is bát par derí karni kvá zurúr hai? Kyá Masíh, miyáńjí hoke, apní ján par, aur Rúh-ul-Qnds par, aur sári rúhání māmaton par, iqtidár o ikhtiyár nahín rakhtá thá? Kyá qiyámat usí se na hogí? To ve kám sirf us kí insániyat hí se nahín ho sakte haiń; aur agar sirf Ulúhiyat se húe hote, to káhe ko Khudá akele ko mansúb na hote? Sach yih hai, ki Masíh, Khudá-insán ye sab kám kartá hai.

HA'SIL I KALA'M.—1. *Isá Masíh ko, jo akelá Khudá aur insán ke bích wásita hai, radd karná khatarnák kám hai.* Afsos tujھ par! kyúńki aur koí tujhe abadí shualon se bachá nahín saktá hai. “Jite Khudá ke háthon meń girištár honá haibatnák hai.” Aur tú us ke háthon meń girištár hogá, agar Masíh meń panáh na leke mar jáegá! Alí kí báten, jo 1 Sam. 2 : 25 meń likhí haiń, yahan yád áti haiń. Jab ki us ke beṭon kí badcháli se Isráíli log qurbáníon se nafrat karne lage, tab us ne unhen kahá, “Agar insán insán ká gunáh kare, to qází us ká insáf kartá hai; lekin agar insán Khudáwánd ká gunáh kare, to us kí shafáat kaun kar saktá hai?” Jab unhon ne qurbáníon kí bábat

gunáh kiyá, aur un ke gunáh ke sabab log haikal men bandagí karne se nafrat karne lage, to un ke gunáh bahut bare ho gae. Ye qurbánín Masíh kí nishánín thin; aur jab unhon ne un kí tahqír kí, to Masíh kí tahqír kí. Pas, un ke báp Alí kí bátoṁ ká matlab yih hai, kí agar koí is tarah se Najat-dihinda i maúd kí nishánín haqír jáne, to us ke liye shafáat báqi nahín hai. Aur agar un ká gunáh aisá bhárí húa, to kyá un ká gunáh halká hai, jo Masíh ko abhí haqír jánte haiñ?—Beshakk jaisá kí Alí ke beṭe halák hue, waisáhi Masíh ke dushman aur bisránewále halákat i abadí men mátam karenge. Bagair wásita ke koí Kḥudá ke huzúr nahín á saktá hai. Shaitán aur us ke pairaṁ kyún nahín bach játe haiñ? Kyúunki un ká koí wásita nahín hai. Kyá tum apne tañ un kí hálát men dál doge?

2. Jáno, kí Masíh ke sáth aur kisú ko miyáñjī samajhná niháyat bará gunáh hai. Jáno, kí jab Rúmí Qátúlik Maryam ko miyáñjī ṭaharáte haiñ, to bará gunáh karte haiñ. Aur buzurgoñ, aur hawá-ríoñ, aur muqaddasoñ, aur firishtoñ ko is tarah se mánná aisá hí hai. We hamáří sun nahín sakte haiñ; aur unhon ne aisá kuchh nahín kiyá hai, kí jis se we hamáří madad kar sakeñ. Aur jab kí Masíh hamáre wáste kámil shafi hai, to is kám men auroñ ko us ke madad-gár samajhná us kí beizzatí karní hai.

3. Agar Masíh akelá miyáñjī hai, to munásib hai, kí ham sárí niá-maten o barakatñ us ke wasile se mángeñ; aur us ke wasile se apná shukr bhejeñ; aur un ke liye us ko piyár karen; aur us kí kḥidmat men mashgúl rahn. Hamesha yád rakhá cháhiye, kí har ek barakat ke liye Kḥudá Báp kí mihrbání ká, aur Kḥudá Beṭe kí shafáat ká shukr karen.

Jab Ádam ne gunáh kiyá, tab fauran rahm ká darwáza band ho gayá; aur agar Masíh use na kholtá, to hamen árám, balki us kí um-maid bhí na hotí. Abhí rahm us ke toṛe hue jism ke darwáza se ham gunahgároñ tak átá hai, Ibr. 10 : 20. Pas, dilí mahabbat se us kí yád kí cháhiye. Kásh kí tum apne Kḥudáwand Isá ká, apní hál kí tassallí aur bihisht kí um-maid ke liye, nit shukr karo!

4. Un ká hál kaisí salámatí ká hai, jo aise miyáñjī par bhorosá rakhte haiñ! Kḥudá rázī ho chuká hai. Hameñ use rázī karná nahín partá hai; aur jo ham Masíh ke wasile se us ke sáth sulh karen, to us men khatá nahín ho saktí hai. Aur wuh ásmán men iqtidár rakh-tá hai, kí is sulh ko qáim aur abadí kare, Ibr. 9 : 24.

5. Isá ne hamáre liye Kḥudá ke insáf kí már sahí; apne ko hamáří sipr kiyá; aur kyá ham us ke liye khatra aur badnámi qabúl na karen? Cháhiye kí ham us kí izzat ke liye bol uṭheñ, aur us kí nisbat men apní izzat náchíz jáneñ, aur apne tañ sipar ṭaharáweñ, kí us ke nám ká jalál aur us kí bádsháhet nuqsán na páweñ. Hazár ádmíoñ ke nám, us ke nám kí banisbat, hech haiñ. Kisí ne us kí izzat ke liye nuqsán qabúl na kiyá, jis ne niháyat bará ajr na páyá.

NAWÂN BÂB.

MASÍH KÍ NABU'WAT KA' PAHLA' HISSA.

KHUDA' KÍ MARZÍ KO ZA'HIR KARNÁ.

Khudáwand tumhárá Khudá tumháre bháíon men se merí mánind ek nabí tumháre wáste uṭhāwegá: tum sab báton ke, jo wuh tum se kahe, shinawá ho.—Am. 3: 22.

KHUDA' Báp aur Beṭe ne iráda i mubáarak kiyá, ki hamáre wáste Masíh kí qábil miyánjigari ke wasile se naját kí ráh khol dewe. Ham ne us miyánjigari kí khássiyaṭ aur sifaten sochín. Ab bayán karná hai, ki Masíh kis tarah apní miyánjigari, apne nabí, aur káhin, aur bádsháh ke mansabon men, kartá hai.

Us ká mansab i nabúwat yá nabúwat ke kám, ke do hisse hai; ek záhirí, yane insán par Khudá kí marzí ká sachchá aur púrā zuhūr karná; jaisá ki Yúh. 17: 6 men likhá hai;—dúsrá batiní, yane aql ko raushan karná, aur dil ko Rabbání marzí o tarbiyat ke daḡhl ke wáste kholná. Yih pahlá hissá hamári sanad men hai, ki “Khudáwand tumhárá Khudá,” wg.

Ye Músá kí báten hai, jo Istisná, 18: 15 men likhí gai hai; aur Patthras Hawári ne, beíman Yahúdíon ko yaqín diláne ke liye, ki Isá hí akelá sachchá Masíh hai, apne us waz men unhen mundarj kiyá, jo Am. 3 báb men mazkúr hai; aur unhen Masíh se mansúb kiyá. Us ne Yahúdíon ko is tarah se sikháya, ki Isá kalisiyá ká wuh bará Nabí hai, jis ke kalám kí tahqir karní bahut khatarnák hai. Agarchi wuh kalám past aur miskín shakhson kí marifat se, jaise ki hawári the, kahá jáwe, tau bhí us kí na sunná bará gunáh hai.

1. Is sanad men *Masíh ká, us ke mansab i Nabúwat kí bábat, bayán hai*: “Ek Nabí uṭhāwegá,” wg. Nabí ká kám Khudá kí marzí záhir karní hai; aur is ke siwáe shariyat ká matlab batláná, aur pesh-khabari dená us ke zimme men hai. Dekho, Yúh. 1: 18. Matí 5: 21, wg. 1 Pat 1: 11.

Ek Nabí Músá kí mánind, jo Masíh ká pesh-nishán thá. Sháyad koi kahegá, ki Istisná, 34: 10 men likhá hai, ki “Ab tak Baní Isráíl men Músá kí mánind koi nabí qáim nahín húa, jis se Khudáwand ámhne sámhne muláqát kartá;” aur púchhegá, ki Masíh kis kis bát men Músá kí mánind húa. Músá Masíh kí banisbat aisá hai, jaisá ek sitará súraj ke muqábale men; tau bhí kai ek bát men un men muwáfíqat hai; yane, Músá Khudá aur logon ke darmiyan áyá jáyá karta thá, aur Khudá kí marzí unhen sikhái, aur un kí khwáhish Khudá ke huzúr men záhir kí; kyúunki we Khudá hí kí áwáz, khauf ke sabab se, nahín sun sakte the, Is. 18: 16. Phir Músá ímándár aur wafádár nabí thá, aur har bát men, balki ahd ke khime kí mekh banáne men, farmánbardár thá, Ibr. 3: 5, 6. Músá ne apní talím ko, muajizon se, jinhen munkiron ke sámhne dikhláya, yahan tak ki we

qáil húa, sábit kiyá. Phir Músá ne K̄hudá ke Isráíl ko dunyáwí Misr se chhuráyá, aur gulámí ke ghar se nikál láyá. In sab báton meñ Masih us kí mánind hai, balki us se álá : wuh darmiyání hai ; wuh maut talak farmánbardár húa ; us ne aise muájize dikhláe, ki jin se apne taiñ Qádir i mutlaq záhir kiyá ; aur imándáron ko, jo haqíqí Isráíl haiñ, Shaitán kí tasallut se, aur gunáh kí gulámí se, jis ká Misrí gulámí sirf nishán thí, chhurá liyá.

Phir is meñ *wuh asl*, jis se Masih húa hai, mazkúr hai ; ýane wuh, jis se jism yá insániyat kí nisbat se Masih húa—“Tumháre bháton meñ se.” (Rúm. 9 : 5. Ibr. 7 : 14). Mahammadí is sanad kí bábat dāwa karte haiñ, ki Mahammad kí peshkhabarí hai ; aur kahte haiñ, ki “tumháre bháton meñ se” murád haiñ Arabí log, jo Isráíliñ ke bhái haiñ ; lekin Ísáíon ke liye kuchh zurúr nahín hai, ki is bát kí námuwáfiqat záhir karen. Faqat yih kahná cháhiye, ki Peshkhabarí aur us kí tafsír donoñ ek hí tarah se mánná cháhiye. Agar kitab barhaqq hai, ki jis se peshkhabarí ko sach jánná ham par farz howe, to usí se us kí tafsír ko bhí sach jánná zurúr hai. Agar Mahammadí hamári kitáb se ek bát kí bábat dalil láwenge, to na cháhiye ki ham unheñ aur báton ko, jo usí kitáb meñ haiñ, galat thaharáne dewen. Agar we kitáb ko galat thaharáwen, to bhalá, we us se kuchh madad nahín pá sakte haiñ ; aur agar galat nahín thaharáwen, to peshkhabarí us kí tafsír se áláhida na karná cháhiye.

2. Is sanad meñ sáf hukm hai, ki Tum sab báton ke, jo wuh tum se kahe, shinawá ho. Shinawá hone se tábidár honá murád hai. Yih tábidári sirf is hí Nabí ká haqq hai ; aur sabhon ko us ke tábidár honá munásib hai ; aur náfarmánbardári par barí dhamkíñ kí gai haiñ. Us ke hukmon ke tábi honá cháhiye ; un kí bábat hujjat karní nahín. Daryáft karná lázim hai, ki us kí marzí kyá hai, Rúm. 12 : 2 ; lewin jab us kí marzí mañlúm hui, tab hamára iktiyár nahín hai, ki us se gáfil rahen, yá kisú farz ko, kitná hí mushkíl kyúñ na ho, tál dewen ; yá kisú gunáh ko, kitná hí shurín kyúñ na ho, karen. Aur is bát par ek barí dhamkí yih hai, ki Jo na sunegá, main us se mutálaba karúngá. Aur jab K̄hudá gunáh ká mutálaba karegá, to us ke huzúr kaun khará rah ságegá ? Natíja is ká yih hai—

Ísá Masih K̄hudá se muqarrar kiyá gayá hai, ki kalísiyá ká bará Nabí aur ustád howe.

K̄hushkhabarí detá hai, Yas. 61 : 1.

Báp ko záhir kartá hai, Mat. 11 : 27.

Wuh áftáb i sadáqat hai, Mal. 4 : 2. Yúh. 1 : 9.

I. Daryáft karná cháhiye, ki *Masih ke kalísiyá ká Nabí hone se kaun kaun bát nisbat rakhtí haiñ.*

1. Is se mañlúm hotá hai, ki *insán asl se K̄hudá kí bábat nádín aur andhiyáre meñ haiñ.* Jab kí Ádam gunáh meñ girftár nahín húa thá, tab wuh K̄hudá ko pahchántá thá ; lekin ab us kí raushní bujh gai hai, aur insán rúhání bátog ko qabúl nahín kar sakte, balki unheñ nahín ján sakte haiñ. Fazl, aur Masih kí tálím, aur Rúh i Pák kí tásir o tarbiyat zurúr haiñ, ki ádmí K̄hudá ká jalál dekhen, aur us kí bábat koi wájibi khiyál karen.

2. Is se ma'lúm hotá hai, ki *Masíh men haqíqatan Ulúhiyat hai*; kyúinki aur koí Khudá ke bhed nahín batá sakte haiñ. "Iklaute Beṭe ne, jo Báp kí god meñ hai, usí ne us ko záhir kiyá," Yúh. 1 : 18. "Tumáre ábá kaháñ ? aur ambiyá, kyá we sadá jíte haiñ ?" Zak. 1 : 5. Par Masíh qáim aur abadí áftáb hai; kyúinki wuh áj, aur kal, aur abad tak eksáñ hai. Us ke dushmanon ne us ke kámon ko dekhke qabúl kiyá, ki insán ne us kí mánind kabhí talím na dí. Yúh. 7 : 46.

3. Masíh *us sab raushní ká sotá hai*, jo insán ke wasíle se dí játí hai. Khádim i dín faqat saiyáre haiñ, jo usí áftáb i sadáqat kí dí huf raushní se chamakte haiñ. Unheñ, jo ádmíon ko sikháte haiñ, zurúr hai, ki pahle Masíh se sikháe jáweñ. Jo Púlús ne páyá, so us ne kalísiyá ko diyá, 1 Kar. 11 : 23. Isá Masíh Sardár Chárwáhá hai, aur sab charwáhe usí se muḡhtarí páte haiñ.

II. Phir daryáft karenge, ki *wuh kis tarah se apní nabúwat kartá hai*, aur ádmíon ko kyúinkar Khudá kí marzí sikhátá hai ?

1. Hamará buzurg Nabi *tarah tarah se* Báp kí marzí ko batlátá hai, Ibr. 1 : 1. Kabhi kabhí wuhí áp záhir hoke sikhlatá thá, Yúh. 18 : 20. Kabhi kabhí apne khádimon ke wasíle se; jáisá lihká hai, ki us ne Núh ke wasíle se un rúhon ko, jo nazarband thiñ, jáke waz kahá; yañe un ko jo tufán se peshtar jíte the, 1 Pat. 3 : 19. Aur Masíh bayábán meñ Isráíliyon ko Harún aur Músá kí marifat se sikhlatá rahá, Ám. 7 : 37, 38; aur isí tarah se us ne apne logon ko, apne ásmán par urúj farmáne ke baḍ, sikhlayá hai; aur is wáste khádimon ko kalísiyá meñ muqarrar kiyá hai, Áfs. 4 : 11, 12.

2. Us ne apní kalísiyá ko apní mubáarak raushní *rafta rafta* baḡhshí hai. Agle zamáne meñ wáde kie; phir peshkhabriáñ, jo rafta rafta sáf se sáftar ho gáñ; aur ákhir ko apne hí zuhúr se kámil dín ká jalál. Koí nahín kah saktá hai, ki pahle hí se sab kuchh kyún záhir nahín kiyá; lekin ham ko munásib hai, ki us ke shákir howeñ, ki hamáre auqát is manauwar zamáne meñ haiñ.

3. Us kí talím *sáf aur salís* hai. Us ko naját talak samjhne ke liye barí aql aur ilm zurúr nahín haiñ. Agar zurúr hote, to aksar ádmí naját nahín pá sakte. Aur jab kí pák nawishton ke mazmún aise álá aur buzurg haiñ, kí sab se bare frishte mutaajjib hoke us kí gahráí daryáft karte haiñ, tab bhí miskín aur beilm us meñ bhúlte nahín; aur koí, jo us ke pate dhúndte haiñ, kabhi láhásil na rahenge.

4. Wuh *qudrat ke sáth* kalám kartá hai. Us ká kalám zinda aur do dhárá talwár se tez tar hai, Ibr. 4 : 12. Kitáb-ul-Quds sab gunah-gáron ko, jo tauba nahín karte haiñ, nákhush kartí hai; is se us kí qudrat záhir hotí hai. Aur jab wuh apní Rúh ke wasíle se sikhlatá hai, to gunahgár us ke mahkúm ho játe haiñ; hán, dushman us ke níche dab játe haiñ. Us ke tír' us ke dushmanon ke díl meñ tez haiñ.

5. Us ne *púra kalám* kiyá—naját ke liye aur kuchh darkár nahín hai.

HA'SIL I KALÁ'M.—1. Agar Masíh hamará bará ustád hai, to sáf ma'lúm hotá hai, ki un kí sunná cháhiye, jo us ká nám leke áte haiñ.

Kyúñki wuh áp ham ko abhí nahín sikhátá hai, jis tarah kí apne shá-girdon ko sikháyá. Us ne apne shagirdon ko muqarrar kiyá hai, kí har zamáne meñ us kí marzí ko kholen. Waz karnewálon ká haqq nahín hai, kí koí naí bát kholen yá síaháwen. Aur tum ko cháhiye, kí jo bát suno, use kalám i K̄hudá se parkho. Lekin usí kalám ko kholne aur bayán karne ke liye álim aur ustád zurúr haiñ ; aur jo koí un kí, jab we pák nawishton ke muwáfíq bolte haiñ, nahín suntá hai, so Masíh ká kalám radd kartá hai.

2. Agar Masíh kalísiyá ká bará ustad hai, to sab se miskín aur nádán ímándár ko dārná aur apní nádání se hairán honá kuchh zurúr nahín hai ; kyúñki us ke kalám meñ, aur us kí Rúh kí talím meñ sab kuchh aisá salís hai, kí ahm. q ko bhí bhúlná aur bhaṭakná zurúr nahín hai. Aur Masíh magrúr ustád nahín hai, jo kamtarín ko haqír jáne.

3. Agar Masíh hamará sikhlanewálá hai, to duá ke wasile se us kí talím dhúndhní cháhiye. Wuh ásmán par gayá hai, aur ham zamín par haiñ ; aur agar ham na mángen, to kyúñkar milegá?

4. Cháhiye kí k̄hádím i dín usí kí mánind howen : kí we us kí mánind jánfishání se apne kám meñ mashgúl rahen, garíbon ko dhúndhen, miskínon ko tasallí dewen ; aur nit koshish karen, kí Masíh ke galle ko táza charágáh aur sáf pání ke soton ke pás le jáwen.

DASWÁN BÁB.

MASÍH KÍ NABU'WAT KA' DU'SRA' HISSA.

AQL KO RAUSHAN KARNA'.

Tab us ne un ká zihn kholá, kí kitábon ko samjhen.—Lúká, 24 : 45.

RÚHA'NÍ báton kí pahchán do tarah kí hai—aqlí aur kárgar yá muassir ;—pahlí ká maqám sirf aql hai—dúsrí ká, dil. Is dúsrí kí bábat ulama kahte haiñ, kí wuh k̄háss karke muqaddason meñ páí játi hai ; aur Púlús hawári us ko “ Masíh kí pahchán kí k̄húbí ” kahtá hai, Fil. 3 : 8. Aur haqíqatan un sab báton meñ, jin kí bábat zubáneñ bolti haiñ, kuchh fáida nahín hai, magar jab we tamíz aur k̄hwáhišhon ko Masíh kí tabidárí meñ, ek quwatwar kashish se, k̄hínch láwen. Dil kí bibishti aur shirín kashishon se pahle aql meñ raushní zurúr hai : kyúñki jitní dúr kí koí sachcháí kí raushní se rahtá, wuh sachchí ibádat, aur dilí k̄hidmat aur mahabbat se utní hí dúr rahtá hai. Jab áftáb i sadáqat aql ko sachcháí kí jot baṭhshtá hai, tab rúh meñ ásmáni k̄hiyál o mahabbat paidá hote haiñ ; tau bhí agarchi injil kí sári raushní aql meñ chamaati rahe, wuh kabhi dil ko changá na kar sakegí, agar Masíh wuh kám na kare, jis ká bayán hamári sanad meñ hai ; yane aql ko kholná, kí ham kitábon ko samjhen.

In báton meñ yih mazmún hai :

1. Masíh ká kám aql meñ : wuh aql ko kholtá hai. Aql se yahán

sirf samajh murád nahín hai : marzī aur dil ke sáre ásar murád haiḡ. Aql dil ká darwáza hai : jo dil men áta hai, so aql kí ráh se áta hai. Kabhí kabhí sachcháí darwáze par thaharke dil men paith nahín játi hai ; lekin jab kahá gayá, ki Masíh aql ko kholtá hai, to beshakk murád hai, ki sachcháí dil hí men jagah páti hai.

Mufasssír is sanad ko us ke muwáfíq samajhte haiḡ, jo *Am.* 16 : 14 men hai ; yane “ *Ludiyá—us ke dil ko Khudáwand ne kholá.*”—Pák kitábon ko kholná, yá tafsír karná, jaisá kí Púlús ne kiyá, *Am.* 28 : 23 men, aur bát hai ; aur aql yá dil ko kholná aur bát hai. Ek álim ne achchhí tarah se kahá hai, ki Rúh ke do darwáze haiḡ, jo Masíh ke zidd band kive gae haiḡ ; yane aqlí darwáza, nádání se band kiyá húa hai ; aur dilí darwázá, sakhtí se : in donoḡ ko Masíh kholtá hai. Pahlá injil kí manádí ke wasíle se kholá játá hai ; dúsrá Rúh-ul-Quds kí batiní hidáyat o tásír se. Pahlá Masíh kí nabúwat ke pahle hisse se, jo is se pahle waz men bayán húa hai, nisbat rakhtá hai ; dúsrá us nabúwat ke us batiní hisse se, jo is waz ká mazmún hai, nisbat rakhtá hai.

Záhir hai, ki un kí aql kholná, sirf un kí samajh ko raushan karná nahín thá ; balki un ke dil par asar húe ; kyúнки 52, aur 53 men likhá hai, “ *Aur we us kí parastish karke barí khushi se Yarúsalam ko phire ; aur hamesha haikal men Khudá kí sitáish aur saná karte rahe.*” Farz kiyá gayá hai, ki us waqt se pahle Masíh ne un ke dil ko nae janam ke wasíle se kholá thá ; aur yih kholná, jo sanad men mazkúr hai, un kháss haqíqaton se nisbat rakhtá hai, jinhen we us waqt talak na jánte the, aur isí sabab se un ke dil par un se wájibí asar nahín húe. We Masíh kí maut aur jí uthne kí bábat andhiyáre men the ; aur is sabab se we us waqt ke wáqiát se bahut gamgín ho gae. Lekin jab us ne Pák nawishton, aur un kí samajh ko báham kholá, tab un ke nazdík sab báton kí aur súraḥ ho gaí, aur we Khudá ká shukr o tárif karte húe laṭe.

2. Phir samajhná cháhiye, ki is kám ká iráda kyá thá, yane, ki “ *kitábon ko samjheḡ.*” Is se máluḡ hotá hai, ki jab Masíh kí Rúh ádmíon ko sikháti hai, to iráda nahín hai, ki we pák kitábon ko parhne se báz áwen ; aur agar kóí aisá khiyál kare, to barí galatí karegá. Pák nawishton ko parhná, sochná, hán, gayá un men khodke talásh karná niháyat lázim hai ; aur we bidatí aur jáhil haiḡ, jo unhen haqír jánte haiḡ ; aur we ahmaq haiḡ, jo apne taín un ká muhtáj nahín jánte haiḡ. Pas, máluḡ hai—

Dil aur zihn ko kholná, ki Rabbání sachcháí us men khúb díkhil hoke tásír kare, Masíh hí ká kám hai, aur aur kisi se nahín hotá.

Gunagár insán kí musíbaton men rúhání nábínái ek musíbat í garán hai. Faqat Masíh wuh surmá de saktá hai, jis se wuh bíná ho jáwe, *Mush.* 3: 18. Jin ko Rúh í Quds ne yih inám diyá hai, we kah sakte haiḡ, ki “ *Ham jánte haiḡ, ki Khudá ká Betá áyá, aur hamen yih fahmíd bakhshí, ki us ko, jo haqq hai, jánen ; ham to us men, jo sach hai, rahte haiḡ, yane Isá Masíh men, jo us ká Betá hai. Khudá í haqíqí aur hayát í abadí yihí hai,*” 1 Yúh. 5: 20.

Insán ko rúhání taur par raushan karne ke liye káfi nahín hai, ki use ilhám kí báten sikháwen, yá us kí aql durust howe ; balki zurúr

hai, ki Ruh i Quds use sikháwe, aur us ká dil khol karke muláim kare, aur use rúhání báton ká mazá chakháwe, aur un kí khwáhish dil meñ paidá karáwe.

Masih kí nabúwat ke is hisse ke bayán karne meñ main bayán karúngá, ki un ká zihn kholná kyá hai, aur Masih kis tarah se yih kám kartá hai.

I. Insán ke zihn ko kholne meñ kaun kaun bát páí játí haiñ ?

1. Is se mañlúm hotá hai, ki *rúhání báten sab chizon se afzal haiñ*, aur insání aql kí táqat se niháyat álá aur dúr. Agar Isá Masih, apne Rúh ke wasíle se, ádmí ká zihn na kholtá, to we kabhí aisá bhed na samajhte. Baze ádmí bare tez-fahm haiñ, aur khilqat ke bhed achchhí tarah se daryáft karte hañ. Kaun Yunání failsúfon se ziyádatar aqlmand haiñ ? Tau bhí un ke nazdik injil himáqat thí, 1 Kar. 1 : 18. Agastín ek námwar buzurg ne iqrár kiyá, ki jab main Isái na húa thá, tab main injil kí barí tahqír kartá thá, aur kaí bár kahá, ki main phir laṛká nahíñ hone ká. Háb, mumkin hai, ki álim pák nawishton ko parhte parhte, síkhte síkhte, un ká matlab bayán karne meñ aisá hoshyár ho jáwe, ki aur logon ko raushan karne ká wasíla thahare, jaisá ki (Matí, 7 : 22) kátib aur farúsi Tauret se khúub wáqif the ; tau bhí Masih unhen andhe rahnumá kahtá hai, Matí, 23 : 16. “Nafsání ádmí Khudá ke Rúh ki báton ko qabúl nahíñ kartá, ki we us ke áge himáqateñ haiñ ; aur na wuh un ko ján saktá hai, kyúnki we rúhání taur par daryáft kí játí haiñ. Par wuh, jo rúhání hai, sab kuchh daryáft kartá hai,” 1 Kar. 2 : 14, 15.

2. Jab zurúr hai, ki Masih insán ke zihn ko khole, to mañlúm hotá hai, ki *manádí, aur qur sab záhírí báten is kám ke liye káfí nahíñ haiñ*. Jab Masih dil ko khol detá hai, tab diní záhírí barakateñ aur rasúmát fáidamand hoti haiñ. Yasaiyáh Nabí kahtá hai, ki “Hamári khabar par kaun imán láyá, aur Khudáwand ká háth kis par záhír húa ?” Yas. 53 : 1. Yaramiyáh kahtá hai, “We sab ke sab niháyat sarkash haiñ,” Yar. 6 : 28. In áyaton se mañlúm hotá hai, ki agarchi we nabi the, aur logon ko achchhí tarah se síkhláyá, tau bhí un kí qaum meñ bahut thore imán láe. Aur dekho, Masih ke jíte jí, aur Hawaríon ke dinon meñ kitne Yahudí beímán rahe.

Is ká sabab yihí hai, ki Khudá ká kalám aur diní rasúm maujudát ke wasílat kí mánind nahíñ haiñ. Jab maujudát meñ koí sabab hotá hai, tab us ká hásil, agar koí aur chiz báhar se na rok rakhe, píchhe zurúr ho letá hai ; lekin rúhání báton meñ sab wasílat ke hásil Khudá ke Rúh i Quds kí tásír par mauqúf haiñ. Jaisá súraj maujudát meñ hai, waisá hí Rúh i Quds rúhání báton meñ hai. Agarchi zamin meñ bíj dálá jáwe, aur kisan sawere se rát tak us kí khabar lewe, aur sab kuchh taiyár howe, magar súraj us par na chamake, to na ugegá ; isí tarah se agar Masih, jo áttáb i sadáqat hai, dil par na chamake, to kalám ká bíj, jo dil meñ boyá jáwe, zurúr be phal rahegá.

3. Is se mañlúm hai, ki *insán lúchár hai*. Wuh apne taíñ Shaitání kho khaslat se phirá nahíñ saktá. Jab kí Khudá kahtá, ki Unjiyálá ho ! to ho játá. Gunahgár insán apná dil, bagair Iláhí madad ke, khol nahíñ saktá hai, balki na rúhání báten ján saktá, 1 Kar. 2 : 14,

na ímán lá saktá, Yúh. 6 : 44, na tábidárí kar saktá, Rúm. 8 : 7, na ek nek kám kar saktá, Yúh. 15 : 5, na ek durust bát bol saktá, Matí, 12 : 34, na ek nek khiyál kar saktá, 2 Kar. 3 : 5. Is wáste phiráyá jáná, yāne dil ká khul jáná, yá sachchá Isáí ho jáná, naí paidáish, Yúh. 3 : 3, aur hashr, Afs. 2 : 5, aur fath, 2 Kar. 10 : 5, kahlátá hai.

4. Jab kí Masíh ke mansab meṅ insán ke dil ko kholná hai, to is se *us kí Rabbání qúdrat áshkára hai*. Kḥudá ke siwá kaun dil ko jántá hai? Us ke siwá kaun use apní marzí ke mutábíq khol aur band kar saktá hai? Na ádmí, na firishte is kám ke qábil haiṅ? Agar ham ádmí ke dil ke darwáze par khare hoke khaṭkhaṭáweṅ jab tak kí hamáre hí dil ranjida ho jáweṅ, tau bhí na khulegá, jab tak kí Masíh use na khole. Agar dil ko qufl ke muwáfíq samajheṅ, aur wuh nafs, aur badparhezí, aur kufr, aur shekḥí, aur sarkashí se kitne hí zor se band howe, tau bhí Masíh us ko chábí de saktá hai, kí wuh saḥaj se khul jáwe.

II. Phir daryáft karen, kí Masíh *kis tarah* se dil ko khol detá hai.

1. Apne *kalám* se. Púlús is wáste bhejá gayá thá, kí ádmí kí ánkheṅ khol deṅ waz karne se, Am. 16 : 18. Kḥudáwand yih kám bagair wasile ke kar saktá hai; lekin yih us ká dastúr nahín hai. Jab Ludiyá ko bacháne cháhtá thá, to us ká dil khol diyá, kí ímán láwe. Jab kí Karnilius ko bacháne cháhtá thá, to hukm kiyá, kí ek rasúl ko buláwe, aur us kí sune. Kḥudá use bagair Patthras ke wasile ke bachá saktá thá; lekin Patthras ko bulána pará. Agar Kḥudá cháhtá, to dunyá kí paidáish ke waqt ke muwáfíq zamín se, be bíj boe, sab qism ke mewe aur anáj ugá saktá hai; lekin boná partá hai: aur jo fásíl kí ummaid be boe, rakhtá hai, aur jo naját kí ummaid be wasílát ke istiāmal kiye, rakhtá hai, donoṅ ek hí sáth jihálat aur bewaqúfí karte haiṅ.

2. Iekin *kalám* aur *rasúm* akele yih kám nahín kar sakte haiṅ. *Rúh i Pák zurúr hai*. Jab us ke tásír hoti hai, to ádmí kí kḥudgarazí aur shekḥí tút játí, aur wuh kḥushí se Masíh ko qabúl kartá hai. Jab yih húa, tab dil khul gayá, aur *rúh Kḥudáwand* meṅ raushan húi.

HA'SIL I KALA'M.—1. Is se *un kí bad hálát* maḥlúm hotí hai, jin ká zihn Masíh ne nahín kholá hai. Dekho, injil un kí hálát ká kaisá kḥaufnák zikr kartí hai: “Aur hamárí kḥushkḥbarí agar kísi par poshída howe, to unhín par, jo halák hote haiṅ, poshída hai: kí is jahán ke maḥbúd ne un ke fahmoṅ ko, jo beímán haiṅ, andhá kar diyá hai, tá na howe, kí kḥushkḥbarí kí raushní un par pare,” 2 Kar. 4 : 3. 4. Jab yih kísi insán ke haqq meṅ húa, to wuh kabhí injil ko qabúl nahín kar saktá. To us kí kaisí hálát hai? Abadí haláwat kí muhr us par kí gaí hai. Wuh goyá andhiyáre meṅ hai, aur ánkḥ nahín rakhtá hai, kí jis se roshní ko maḥlúm kare. Yih burí hálát beímání aur injil ko haqír jáne se hotí hai. To bháío, kḥabardár! na ho kí tumháre fahmí *rúhání bátoṅ* meṅ andhiyáre ho jáweṅ aur tum mahrúm ho jáo.

2. Phir kitná hí muṇásib hai, kí we, jinheṅ Masíh ne apní naját-baḥsh pahchán dí hai, us kí tábidárí aur ijlál karen. Kásh kí tum

háth aur dil uṭháke Masíh ke faẓl í kasír kí ṭaríf karte ! Kitne bahut haiñ, tumhári cháron taraf, jin kí ánkheñ bigarín, aur dil band hai ! Kitne bahut andhiyáre meñ haiñ, aur us meñ ráhá karenge jab tak kí jahannam kí abadí táríkí kí siyáhí un par chhá jáwe. Agar tum Masíh kí roshní dil o rúh se dekhte ho, to mubáarak ho. Jaisi khushí jism ko súrañ kí roshní se hotí hai,—jaisí tandurustí us kí roshní se tamám dunyá ko hotí hai,—waisí hí khushí aur bhaláí ádmí kí rúh ko Masíh kí roshní aur pahcháñ se hotí hai.

To aur roshní cháho, aur dhúndho. Roshní se tábidárí hotí, aur tábidárí se roshní bhí barhtí hai.

GYÁRAHWÁN BÁB.

MASÍH KÍ KAHÁNAT KÍ QISM AUR ZURÚRAT.

So zurúr thá, kí ásmání chízon ke utáre aisi chízon se, aur ásmání chízen áp aisi qurbáníon se, jo un se afzal haiñ, pák kí jáweñ.—Ibr. 9 : 23.

MASÍH nabí hoke naját ko zahir kartá, aur káhin hoke use taiyár karwátá, aur bádsháh hoke use detá hai. Us ke zahir kie jáne ká taur mazkúr húa hai; aur ab ham Masíh kí, jis ne hamará káhin hoke hamáre wáste naját kharídí hai, kahánat ká zikr karenge. Sirf Masíh ke is uḥda aur kám meñ wuh dil, jo gunáh se ranjída o mazlúm hai, maḡhlasí pátá hai. Jab kí aur sab tadbíreñ chúktíñ, to is káhin ke lahú ke chhirkáo se dil ká bukhár miṭ játá hai. Is wáste, kí is uḥda ke kám par aisi bhári bát mauqúf hai, Púlús is khatt, aur kháss karke us ke 9 báab meñ, baṛí khabardárí se us ká zikr aur ṭaríf kartá hai; aur zábir kartá hai, kí kis tarah se dunyá ko us kí pesh-khabarí qurbáníon se kí gaí thí; aur áp sári qurbáníon se kaisá afzal hai; aur un qurbáníon se sirf ásmání chízon ke utáre pák kie játe the, par is se ásmání chízen áp, jo utáron se áshkára haiñ.

In báton meñ Masíh kí is baṛí qurbání kí zurúrat kí ek dalíl hai, yañe ásmání chízon aur un ke utáron kí nisbat. Agar ibádatgáh, aur rahmat ke takht aur ibádatgáh ke sáre asbáb ko lahú se muqaddas karná zurúr thá, to kitná zurúr kí ásmání chízen, jin ká ye chízen faqat sáya thín, us se afzal lahú se muqaddas kí jáweñ.

Pas, is meñ do báteñ yád karní chahiye; yañe, 1. Masíh kí maut aur tasdíq kí khássiyaṭ, jo qurbání kí khássiyaṭ aur matlab hai; aur 2. us ko guzránne kí zurúrat. Wuh zurúr thá, táki puráne aḥd ke nishánon aur sáyon se mel kare; aur kháss karke zurúr thá, táki gunáh ká kafára howe, aur Khudá rází ho jáwe, aur hamáre wáste us ke pás jáne kí ráh khul jáwe. Pas,

Masíh hamáre bare káhin kí qurbání bahut muftd hai, aur hamáre liye niháyat zurúr.

Merá iráda hai, kí Masíh kí kahánat kí qism bayán karúñ; aur sábit

karún, ki wuh har tarah se zurúr hai, táki hám apní hálat i ranjídagí o gunáh se khalásí páwen.

I. Ham daryáft karen, ki *Masíh kí qurbání se kaun kaun bát jatái játí hai?*

1. Masíh kí qurbání se ma'lúm hotá hai, ki *insán Kḥudá se sarkashí karke gir gayá*. Agar yih hál na hotá, to kafára kuchh zurúr na thá. Jab ek sab ke wáste muá, to sab murda ṭahare, 2 Kar. 5 : 14,—sharíat ke rú se murda ṭahare, aur abadí maut ká hukm un par guzar chuká thá. Adam ke áhd se leke Masíh ke waqt tak jitní qurbáníán guzrání gaí thín, sab kí sab yihí talím detí thín, ki Kḥudá aur insán ke darmiyán kḥaufnák judái húi hai; aur is wáste insáf hamará kḥún cháhtá hai. Aur mazbah kí ág us gazab ká nishán thí, jo muḥálifoṅ ko khá letá hai. Kháss karke jab Masíh qurbán huá, tab ham ko sab se sáf raushní mili, jis meṅ ham apne gunáhoṅ kí badí, aur Kḥudá kí gunáh se narází, aur ádmí kí judái, jo gunáh ke sabab húi, baḥhúbí dekh leweṅ.

2. Masíh kí kahánat se ma'lúm hotá hai, ki *Kḥudá ká iráda i betab-díl yih hai, ki gunáh ká intiqám lewe*. Main nahín kah saktá hún, ki Kḥudá kaun si tadbír kar saktá hai; so sháavad wuh gunahgároṅ ko aur kisú tarah se bachá saktá thá; lekin aglab hai, ki kḥud gunahgár se yá us ke zámín se intiqám lená zurúr thá. Jo dalíl karte haiṅ, ki Kḥudá mahabbat se muáf kar saktá hai, so us ká insáf yád nahín karte haiṅ. Beshakk Kḥudá kí khássiyaṭ aur sachcháí ke sabab us ko gunáh ká intiqám lená zurúr hai. Khássiyaṭ us kí is bát se ma'lúm hotí hai, ki “Ánkheṅ terí pák haiṅ, kí tú badí ko dekh nahín saktá,” Hab. 1 : 13; aur aláwa is ke us ke muṅh se fatwá nikal chuká hai, ki gunah-gár mar jáegá.

3. Masíh kí kahánat se ma'lúm hotá hai, ki *ádmí bilkull lúchár hai*, aur Kḥudá ko na apne kám se, na apne tasdíq se, kabhí rází kar saktá hai. Beshakk agar hamárá muḥlasí aur kisú tarah se ho saktí, to Kḥudá kabhí mujassam hoke hamáre liye qurbán na bantá; aur kisí tarah se ádmí ko bachána aur Kḥudá ko rází karná muḥál thá.

4. Masíh kí kahánat se ma'lúm hotá hai, ki *us ká Kḥudá-insán honá zurúr thá*. Us ká insán honá zurúr thá, kí wuh tasdíq pá sake, aur us kí sadáqat aur pákízagí ham ko mahsúb howe. Agar wuh ádmí na hotá, to na qurbán ho saktá, aur na us ká badan, na us kí rúh hotí, jis meṅ tasdíq ho sake; kyúнки Ulúhiyaṭ amar hai, aur aise tasdíq aur dukhoṅ se, jaise Masíh ne hamáre liye sahe, niháyat dúr hai. Tau bhí zurúr thá, kí hamará Sardár Káhin Kḥudá ho; kyúнки isí se us ke qurbán kí qadr aur zor hotá hai.

5. Is kahánat se sábit hai, ki *Kḥudá ká iráda rahm karná hai*. Jis gunáh ke liye qurbán muqarrar ná huá, so niháyat burá gunáh hai, aur gunahgár kí hálat ummaíd se kḥálí; lekin jab Kḥudá ne aisá qurbán taiyár kiya, to beshakk us ká iráda thá, kí rahm kare.

Masíh káhin hoke hamáre nám aur jagah meṅ áyá, aur Kḥudá ke huzúr apne taín qurbán karke hamáre liye kafára kiya; aur apní sifá-rish se hamesha us qurbán ke fáide un ko, jin ke liye wuh qurbán kiya gayá thá, dilátá hai. Yih sab Ibr. 10 : 7—14 se murád hai. Bad is

ke us kí kahánat ke hisson aur phalon ká zikr karenge; so yahán kuchh zurúr nahín hai, kí bayán túl karen.

II. *Masíh ká káhin honá zurúr thá.* Pák nawishton se zurúr malúm hotá hai, kí aisá káhin howe, jo aisá qurbán karke hamáre liye Kḥudá ke huzúr men dákhlil howe. Yih bát do hálon se sábit hai; yane, Kḥudá kí kḥássiyat se záhir hai, kí wuh gunáh ká púra intiqám lenewálá hai; aur gunahgár insán Kḥudá ko gunáh ke badle men kuchh nahín de saktá hai: is wáste agar Masíh se rihái na hotí, to ham zurúr halák ho játe.

1. Kḥudá gunáh ká púra badlá letá hai, aur bagair us ke ek gunáh nahín bakhshatá. Yih bát gunáh kí kḥássiyat, aur Kḥudá kí sachcháí aur dánái se sábit hotí hai.

Gunáh kí kḥássiyat aisí hai, kí sazá wájibí hai. Cháhiye kí dukh kí badí sharárat kí badí ká pichhá kare.

Kḥudá kí sachcháí se munásib hai, kí gunáh, be badlá lie, muáf na kiyá jáwe. Us ke munh se yih bát nikli hai, “Jis din tú us se kḥáegá, to zurúr maregá,” Paid. 2: 17. Usí dam se insán jismání aur rúhání maut ke kḥatre men pará. Shariát se wuh, jo us ke sáre hukmon ko har waqt nahín mántá hai, lanatí hai, Gal. 3: 10. Admíon kí dhamkián bárhá bátíl aur haqír hai; lekin Kḥudá kí kabhí nahín: na ek shosha, na ek nuqta shariát se tal jáegá, jab tak kí wuh sab púrí na kí jáe, Matí 5: 18. Kḥudá apní báton ká sachchá rahegá, agar beshumár admí halák howen.

Kḥudá kí hikmat, jis se dunyá ká intizám hotá hai, admí kí hikmat se ziyáda hai; aur sab admí jánte hai, kí na dhamkiyon, na qánún se kuchh fáida hogá, agar ye sachcháí se kḥálí hon. To Kḥudá kí dhamkián haqíqí hai.

Sháyad koí kahégá, kí agar Kḥudá biná badlá lie gunáh muáf nahín kartá, to us ká fazl kahán? aur is talím se malúm hotá hai, hamáre nazdík Kḥudá bakhshne men ázád nahín hai, kí be intiqám lie qusúr muáf kare, jaisá kí admí kar saktá hai. Jawáb yih, kí hamein, biná hamáre badlá die, muáf karná, aur Isá Masíh se hamáre liye púra badlá lená, ye do báton ápas men mel kartí hai. Aur admí admí ke barábar hai; is wáste admí se admí ká aisá qusúr nahín ho saktá hai, jaisá admí Kḥudá ká kar saktá. Admí ká nuqsán karná, aur Kḥudá ká gunáh karná niháyat farq hai. Aláwa is ke admí sirif aisá qusúr muáf kar saktá hai, kí jis se faqat us hí ká nuqsán húa hai; aur jab wuh hákim yá munsif hotá hai, to cháhiye kí púra insáf kare. Agar munsif kisi ke qarzdar ko muáf kartá, to kaisá tamásha hotá! aur agar chor yá kḥúni ko muáf kartá, to mulk ke intizám men kaisá fasád hotá! To kyá Kḥudá munsif hoke bemunsifí karegá?

2. Admí bizzátihí Kḥudá ko apne qusúron ká koí badlá nahín de saktá hai,—na karne se, na sahne se.

Na karne se; kyúnáí sáf záhir hai, kí hamáre sab se tuhfa kám najis hai:—Hamári sári sadáqat gandí dhajjí kí sí hai,” Yas. 64: 6. Bare taajjub kí bát hai, kí koí shakhs ek gunáh se दूसरे gunáh ká badlá dená mumkin jántá. Aur jo hamáre kámon men achchhá hai, so Kḥudá ká haqq hai; aur jab ham kisi bát men Kḥudá ká haqq adá

karte hai, to aur báton kí kamí us ke sabab se kyúnkar adá hotí? Ham har tarah se K̤hudá ke qarzdár hai; aur ek bát meñ chūk kareñ, aur दूसरी ko adá kareñ, to pahlí kí chūk se kyúnkar muáf ho saktí? Yaqín hai, kí Púlús ham sab se pák o muqaddas thá; lekin us ne kahá, kí Merá nafs kisé bát meñ mujhe malámat nahín kartá; par mañ us se kuchh sádiq nahín thahartá, 1 Kar. 4; 4. Kyún? Is waste kí wuh jántá thá, kí merí sadáqat aisi nahín hai, kí us meñ koí aib na páyá jáwe.

Admí apne gunáhoñ kí sazá *sahne* se K̤hudá ko rází nahín kar saktá hai; kyúnki K̤hudá gunahgár ke dukh se razí nahín ho saktá, jab tak kí dukh qusúr ke barábar na ho. Jab yih hál hai, to malúm hotá hai, kí gunáh kí sazá behadd hogí; kyúnki gunáh behadd sharárat hai. K̤hudá behadd hai; gunáh behadd badí hai, is wáste kí us behadd Málík kí nafarmání hai; aur sazá us kí behadd hogí. Sazá kyúnkar behadd ho saktí hai? Do tarah se; ek to yih, kí niháyat saht ho—sab hisáb aur andáz se báhar—K̤hudá kí behadd táqat ke barábar—us ká behadd gussa aur qahr sahná;—aur दूसरी yih, kí sazá waqt kí bábat beintihá ho—kabhí tamám na ho. Pahlí tarah se koí maḡhlúq nahín sah saktá hai—táqat nahín hai. दूसरी tarah se jahannamí sahte hai—aur jab kí un kí sazá kabhí tamám nahín hogí, to we K̤hudá ko us se rází kyúnkar kar sakeñ? Pas, na karne se, na sahne se K̤hudá ko rází kar sakte haiñ. Is se Masih kí kahánat kí zurúrat sáf záhir o raushan hotí hai.

HA'SIL I KALA'M.—1. Is mazmún se *Masihí mazhab kí ḡhubí o fazílat záhir* hotí hai. Jo aur sab Mazhab talab karte haiñ, so Masihí mazhab páke záhir kartá hai, yañe dilí árám aur sulh i tamíz kí sachchí bunyád. Jab Yahúdí shariát ke kámoñ se, aur Musalmán apne sawáb se, aur Hindú apní pújá páť se, aur Rómí Qátúlik apne aur buzurgoñ ke sawáb se, yihí dhúñ dhte haiñ, tab imándár Masih ke ḡhún se páte haiñ; aur sirf yihí ḡhún bárbardároñ ko riháí de saktá hai. Tamíz hamesha púchhti hai, *kyá K̤hudá rází hai, kí nahín?* Aur jab ḡhub bharosá ho, kí K̤hudá rází hai, tab tamíz bhi rází hai: aur jis chiz se K̤hudá rází nahín hai, us se tamíz bhi kabhí rází na hogí. K̤hauf-nák hai us ká hál, jis ke dil ko tamíz ká kirá khátá játá hai, aur jise kámil bacháo kí bunyád nazar nahín áti; goyá us ke dil meñ K̤hudá ká niháyat gazab asar kartá hai, aur koí iláj nahín, jis se us ká jalan miť jáe. Suno, tum, jo aisi báton ko ḡhiyáli aur udási samajhke fikr nahín karte ho. Agar tum faqat ek dín gunáh kí badí pahchánke is dilí bímárí ko malúm karte—agar wuh sharm, aur ḡar, aur ghabráhāť, aur náummaidí, jo gunáh kí pahchán se hotí hai, pahchánte, to kaisí ḡhushi o ḡhurramí se riháí kí ḡhabar sunte. To jáno, kí riháí sirf is hí ḡhún se hotí hai.

2. Is se *imán kí zurúrat záhir* hotí hai. Masih ká ḡhún ham ko kuchh fáida nahín pahunchá saktá hai, jab tak kí wuh goyá ham ko lagáyá na jáe. Aur yih imán se hotá hai. Yahúdíoñ ke áhid meñ, jab koí shaḡhs qurbán látá, to apná háth jánwar ke sir par rakhtá, jis se wuh usí ká qurbán thaharke us ke kafára karne ke liye maḡbúl hotá, aur us ke gunáh goyá jánwar par utar ke mazbah kí ág se jaláe játe.

Isí tarah se tum bhí ímán ká háth Masíh ke sir par rakho, aur use apná hí qurbán ṭhaharáo ; tab tumháre gunáh us ke sabab tumhen mahsúb na hongé.

Tamám injil yihí síkhátí hai ; yañe, ki ham Masíh aur us ká ḵhún apní dilí bímárí ká iláj banáwen. “Jis tarah Musá ne bayábán men sámp ko buland kiyá, usí tarah zurúr hai, ki ínsán ká Beṭá buland kiyá jáwe, táki jo koí us par ímán láwe, halák na howe, balki hayát i abadí páwe,” Yúh. 3 : 14, 15. Is men gunáh káñnewále sámpon ke dánton se murád hai, aur barinjí sámp se Masih. Músá ne barinjí sámp ko bulandí par rakhá, ki jo koí us par nigáh kare, sámpon ke nesh se na mare ; aur usí tarah se jab ham Masíh par ímán ke wasíle nigáh karte haiñ, to hamárí rúhon kí bímárí játí rahtí hai. Jo koí us sámp ko na dekhtá, zurúr mar játá ; aur jo koí Masíh ko na dekhtá, so abadí halákat men par játá. Kásh ki tum shariát ká ḍank mañum karte! Kásh ki tumhare dilon men ranj kí rát aur gam ká ḍin gunáh ke sabab guzarte ; tab tum zurúr is bare iláj kí nit talásh karte.

3. Munásib hai, ki tum apní kamzorí aur lachárí iqrár karte. Agar Masíh ká ḵhún zurúr hai, to beshakk tum bilkull láchár ho. Aur jab is láchárí ko farotaní ke sáth qabúl karoge, aur Masíh ko apní naját kí sárí ṭarif o jalál deoge, tab tumhárá dil us ke nazdik áne ko taiyár hogá.

4. Phir, main bahut cháhtá hún, ki tum sab is bare Káhin kí zurúrat se wáqif ho jáo. Tum men se sab se achchhá jo hai, so ek tabíyat, jo gunáh se zahrdár hai, rakhtá hai ; aur is tabíyat ko yih qurbání zurúr hai ; agar is ḵhún se tum sáf o muáf kie na jáo, to hamesha mulzim rahoge. Agar tum is ḵhún se pák ná kie jáoge, to bihtar thá ki tum haiwán paidá hote. Haiwán kí tabíyat past hai, lekin tumhárí tabíyat ke muwáfíq gunáh se álúda nahín.

Aláwa is ke, is burí tabíyat ke sabab se tum ne bahut se gunáh kie, jinhen tum kisú tarah se miṭá nahín sakte. Pas, zurúr hai, ki tum us ke pás áo. Apne taíñ bímár samajhke us se shifá mángo. Apne taíñ murda jánke us se jíne kí táqat talab karo. Agar tumháre gunáh utáre na jáwen, to tumháre liye Khudá bhasam karnewáli ág ṭhaharegá, jis kí bardásht na kar sakoge.

BÁRAHWÁN BĀB.

HAMA'RE SARDA'R KA'HIN KI' QURBA'NI' KI' KHU'BI'.

US KI' KAHA'NAT KA' PAHLA' HISSA.

Kyúñki us ne ek bár qurbán dene se unhen, jo muqaddas hote játe haiñ, abad ke liye mukammal kiyá.—Ibr. 10 : 14.

MASÍH kí kahánat thorí sí daryáft húi hai ; ab us ke hisson par gaur karná cháhiye. Us ke do hisse haiñ ; qurbání, aur sífárish. Jis tarah

ki sardár káhin haikal meṇ qurbání karke lógon ke liye sifárish kartá thá, usí tarah se Masih ne hamáre wáste kiyá hai; aur sardár káhin ke sáre kám Masih ke kám ke nishán the.

Is waqt hamen Masih kí qurbání pargaur karná hai. Kitáb ul Quds ke us maqám meṇ, jis se yih sanad lí gai hai, is kí kámgarí aur fazílat sáf bayán o áyán hai; kháss karke us kí khúbí is qaul se, *ek bár qurbán dene se, záhir hotí hai*. Wuh ek hí qurbán hai; ek hí bár guzráná gayá; aur kabhí nahín duhráyá jáegá; kyúinki maut Masih par phir musallit na hogí, Róm. 6 : 9. Us kí kámgarí kí taríf bhí is meṇ hotí hai : us ne *mukammal* kiyá—ímándáron ke liye kámil sadáqat taiyár kí—kafára kámil kiyá, yabhán tak kí kuchh báqí nahín hai—kámil naját kharidí. Aláwa is ke, us kí taríf meṇ yih bát bhí hai, kí wuh sirf thore logon ke liye nahín, balki tamám dunyá aur har zamáne ke ímándáron ke liye káfí hai. Phir, us kí taríf meṇ yih bhí hai, kí wuh abad tak rahegá—us ká phal aur tásir zamánon aur muddaton ke guzarne se nahín ghaṭne ke. In báton ká yih latif natíja nikaltá hai—

Masih kí qurbání niháyat beshqímat hai, anr un sabhon ko, jo dunyá kí intihá tak muqaddas kie jáenge, mukammal karne ko qádir hai.

Is chashma se sárí barakaten, jo ímándár rakhte haiṇ, aur jin ke ummedwár haiṇ, bahtí haiṇ. Agar yih na hotá, to na sádiq gine jáná, na lepálak honá, na naját, na Kḥudá ke sáth miláp, na jalál kí ummaid, na gunáh kí muáfí, aur na Kḥudá ke nazdík maqbúl honá hotá. Jab yih bát aísí bhárí hai, to cháhiye kí ham achchhí tarah se is umda káhin ko, jo Kḥudá ke áge hamáre liye átá hai; aur us ká qurbán; aur us ko, jis ke huzúr meṇ wuh use guzrántá hai; aur un ko, jin ke liye guzrántá hai; aur us ke guzránne ká iráda, gaur karen.

I. *Wuh káhin, jo Kḥudá ke áge hamáre liye hadia guzrántá hai, Isá Masih hai—Kḥudá-insán; jis kí shaḡhsíyat kí fazílat se us kí qurbání kí qadr beniháyat hotí hai*. Aur káhinon ko zurúr thá, kí pahle apne hí gunáhon ke liye, tab logon ke liye, hadia láwen, Ibr. 5 : 3—lekin wuh “pák, betaqsír, námulaawas, aur gunahgáron se judá thá,” Ibr. 7 : 26. Wuh, jáisá beqíb barra, Kḥudá ke insáf ke áge khará ho saktá thá. Yahúdíon ke káhin marnewále insán the, Ibr. 7 : 23; par Masih abad tak káhin hai, Zab. 110 : 4.

II. *Us ká qurbán haiwán ká lahú na thá, balki usí ká lahú*, Ibr. 9 : 12. Aur is meṇ wuh aur káhinon se afzal thá, kí us ká kuchh thá, jo guzrán sake. Aur káhin Kḥudá ke mál se leke qurbánín guzránte haiṇ; magar us ne gunáh na karke apne badan ká íkhtiyár rakhá, aur us ko, Ibr. 10 : 10, balki apní ján ko, Yas. 53 : 10, gunáh ke liye qurbán kiyá. Ham gunáh ke sabab se ázád na the; so agar qurbání meṇ guzráne játe, tau bhí us qurbání se kuchh fáida na hotá. Jab Masih hamára káhin húa, tab hamára iwazí bhí húa, aur ázád hoke ham gulámon ke badle meṇ apne taín diyá. Is wáste yih hadia

1. *Niháyat beshqímat hai*. Ek hawári kahtá hai, kí tum ne Masih ke beshqímat lahú se, jo bedág aur beqíb barre kí mánind hai, naját páí, 1 Pat. 1 : 18. 19. Yih lahú aísá beshqímat thá, kí

2. *Us ká qurbání honá* un sabhon ke gunáhon ke liye, jin ke wáste wuh guzráná gayá thá, *kámil kafára* ho saktá hai. We imándár, jo us ke mujassam hone se peshtar jíte the; we, jo usí waqt us par imán láe; aur we, jo roz i hashr tak imán láwenge, sab ke sab, basabab us kí maut ke, maut ke band se chhút gae haiñ. Yih bát Ibr. 11 : 40 se murád hai :—Ki *Ḳhudá* ne peshbíní karke ham par tafazzul i *ḳháss* kiyá, táki we hamáre bagair mukammal na howen. Is ká matlab yih hai : ‘*Ḳhudá* ne Masíh ká áná pichhle zamáne meñ muqarrar kiyá, ki we, jo Masíh ke waqt se peshtar the, mukammal na howen, yañe sádiq kie aur bacháe na jáwen, kisi kám se, jo unhín ke áhd meñ húa, balki hamáre zamáne kí taraf rujú láne se, yañe ánewále kámil kafára kí taraf; jis kafára se we aur ham mukammal hote haiñ.’

3. Jab yih qurbán aisá beshqímat hai, aur gunáh kátne ke liye aisá kámgar, to zurúr wuh *Ḳhudá ke nazdík bahut hí pasandída* hai. Aur likhá hai, ki Masíh ne apne taiñ *Ḳhudá* ke áge charháwá aur qurbán kiyá, táki use *ḳhushbú* mañlúm ho, Afs. 5 : 2. Beshak *Ḳhudá* Masíh kí niháyat tasdíq se *ḳhush* na thá, magar is sabab se, kí wuh hamáre ázádagí aur naját ke wáste thá;—isí sabab se *ḳhush* thá,—na sirf us ke dukh se, lekin us dukh ke anjám aur iráda se. Aur jab kahá gayá hai, ki Masíh ká dukh aur maut *Ḳhudá* ko *ḳhushbú* mañlúm hue, to matlab hai, ki jis tarah badbú se ádmí ghin karte haiñ, usí tarah se *Ḳhudá* gunáh se;—aur jis tarah badbú ke bad *ḳhushbúdár* átr bahut *ḳhush* mañlúm hotá hai, usí tarah se Masíh ká kafára *Ḳhudá* ko *ḳhush* áta hai.

III. Masíh ne yih hadia *Ḳhudá* ke áge láke guzráná. Púlús hawári yihí kahtá hai :—“apní taiñ beaibí ke sáth Rúh i abadí se *Ḳhudá* ke áge qurbání kiyá,” Ibr. 9 : 14. Masíh zámín ṭhahará; *Ḳhudá* Báp qarz *ḳhwáh*, jis ne zámín se badlá cháhá;—aur jab wuh hamára zámín ṭhahará, to Báp ne us se hamáre *ḳhatáon* ká intiqám liyá. To *Ḳhudá* se aur Masíh se kám thá; aur is kám ká sabab hamára gunáh thá, jis se *Ḳhudá* niháyat náráz hoke hamáre zámín par us sáre qahr ká bojh, jo hamen sahná thá, dälá. Isí bhasam karnewáli ág meñ Masíh ne apní qurbání dáli;—yañe áp hamáre wáste us meñ bhasam húa.

IV. Jo use Báp se die gae the, un ke liye us ne apne taiñ *Ḳhudá* ke áge qurbání kiyá; yañe un sab ke liye, jo us par imán láne ko the. Us ne apní jáñ apní bheñon ke liye dí, Yúh. 10 : 15; kalisiya ke liye, Am. 20 : 28; *Ḳhudá* ke farzandon ke liye, Yúh. 11 : 50—52. Farz kiyá gayá hai, ki is qurbání meñ itní táqat hai, ki jis se tamám dunyá bach sake; aur is sabab se wuh dunyá ká Naját-dihinda kahlátá hai, Yúh. 4 : 42, wg.; lekin koí inkár nahín kar saktá hai, kí wuh sirf imándáron ke bacháne meñ qádir hai : yih bát pák nawishton se sáf sábit hai, Afs. 5 : 23; Yúh. 17 : 2, 9, 19, 20; 10 : 26—28; 1 Tim. 4 : 10.

V. Is qurbán ká iráda yih thá, ki *Ḳhudá* ke insáf ko hamáre gunáhon ká púra badlá mile : is tarah likhá hai,—“Aur us *ḳhún* ke sa-

bab, 'jo salíb par bahá, sulh karke," wg., Kal. 1 : 20 ; aur " *Khudá ne Masíh ke sabab dunyá ko yún milá liyá,*" wg., 2 Kar. 5 : 19. Ab milá lená yih hai, yāne us judái ko, jo gunáh ke sabab húi, nest karná ; aur yih bhárá kám Masíh kí qurbání se húa. Isí wáste Masíh ne apne taín *Khudá* ke áge qurbání kiyá.

HA'SIL I KALA'M.—1. Is mazmún se yih natíja nikaltá hai, ki ímándár apne gunáhon kí sazá ke khatre se kámil rihái páte haiñ, aur *un par phir koí ilzám nahín*, Róm. 8 : 1. Wuh qarz, jo gunáh se húa thá, hamáre zámín se bilkull adá ho gayá. Jab Masíh hamára qurbán húa, to hamáre gunáhon ko uṭháýá, aur le bhí gayá. We pahle us par dhare gae ; tab us ne un ká kafára kiyá : itná to in báton se murád hai, " Masíh ek bár qurbání hokar, táki wuh bahuton ke gunáhon ko uṭháwe," wg., Ibr. 9 : 28. " Uṭháná," is maqám men, barí bát hai, jis ká matlab hai, *uṭháná*, aur *le jáná* ; chunánchi Yúh. 1 : 29 men likhá hai, Dekho, *Khudá* ká barra, jo dunyá ke gunáh ko uṭhá le játá hai. Kaisí tasallí kí bát hai, ki us ke wasíle se un sab báton se, jin se Músá kí shariát men sádiq ho na sakte the, har ek, jo ímán lá-tá hai, sádiq hotá hai, Ám. 13 : 39. Mubárák hai wuh, jis ká gunáh baḡhshá gayá, aur khatá ḡhampí gaí, Zab, 32 : 1. Ai dost, agar tú muáf kie húa men ká ek hai, to main terí minnat kartá hún, ki us qarz ke bojh ko, jis se tú ne rihái páí hai, bárhá mutála kare : sháyad terá zikr us siyáh fihrist men thá, jo 1 Kar. 6 : 9, 10 men hai : aur agar aisá húa ho, to tujhe shukrguzári aur taríf karne ká kaisá sabab hai ! Pas, Isá kí qadam-bosi karke apne taín us ke liye zinda qurbání guzrán ; kyúнки us ne tujhe apní ján dene se yih barí muḡh-lasí baḡhshí.

2. Is mazmún se ham síkhte haiñ, ki *Khudí ká insáf badaltá nahín*. Agar Masíh ne apne taín pesh na kiyá hotá, to insáf hamen kabhí na chhortá : aur jab ki wuh *Khudá* ke áge hamára zámín húa, to insáf ne use kabhí na chhorá, balki use maut talak dabáyá. Agar kisi se rahm páne kí ummaid í qawí hotí, to beshakk *Khudá* se hotí ; lekin *Khudá* ne use na chhorá. Agar koí rahm kí ummaid rakh saktá, to beshakk Masíh apne Báp se yih ummaid kar saktá ; lekin Báp ne apne Beṭe ko na chhorá. Agarchi wuh bág men girá, aur us ká pasína lahu sá ho gayá ; aur us ne salíb par pukará, ki Ai mere *Khudá*, tú ne mujhe kyún chhor diyá ? tau bhí insáf ne use kuchh ḡhíl na diyá.

Agar *Khudá* ke Beṭe ká yih hál húa, to ai merí ján, terá kyá hál hogá ? Agar tú panáh na le, to insáf tujhe kyá karegá ? Are, Masíh ke pás á ! us men chhip já, ki insáf kí ág tujhe bhasam na kare.

3. Jab Masíh ne apne taín tumháre liye qurbán kiyá hai, to koshish karo, ki tumháre dil is bare bhed se kḡhúb wáqif hoke ímán ke wasíle se use qabúl karen. Kásh ki hamáre dil narm hoke gunáh se pachhtáte ; aur us par ímán lāne se har dukh aur ranj ke waqt tasallí aur zor páte.

Khudá ká nám Isá ke liye mubárák howe !

TERAHWAN BĀB.

MASI'H KI' SIFA'RISH KARNI'.

US KI' KAHANAT KA' DU'SRA' HISSA.

Is liye wuh unhen, jo us ke wasile se Khudā ke pās āte haiṁ, intihā tak bachā saktā hai; kyūnki wuh un kī shafāat ke wāste hamesha jītā hai.—Ibr. 7 : 25.

MASI'H kī kahānat kā pahlā kām, yaṇe us kī qurbānī, gaur karke, ab-hī us kā dusrā kām, yaṇe us kī sifārish yā shafāat, daryāft karenge; aur yih kām sirf us kī qurbānī kā tamām karnā hai.

Us kī kahānat ke is dūsre hisse kā pesh-nishān sardār kāhin kā quds ul aqdas meṁ laḥū aur ḡhushbū ke sāth dāḡhil honā thā : jaisā kī Ah-bār ke 16 : 12—24 meṁ liḡhā hai. Qurbān ko bāhar mārne se Ma-sih kā apne taiṁ zamīn par qurbānī karnā murād hai; aur sardār kāhin ke quds ul aqdas meṁ laḥū aur ḡhushbū ke sāth dāḡhil hone se Masih kā āsmān meṁ shafāat karne ko jānā murād hai. Pas, yih Masih kī kahānat kā ek zurūrī hissa hai, yahāṁ tak kī agar yih na ho-tā, to us kā sārā kām zamīn par befāida aur ābas hotā. Aur agar wuh zamīn par rahtā, to wuh hamāre liye kāmīl kāhin na ho saktā; kyūnki us ke apne laḥū ko zamīn par bahā dene kā irāda yihī thā, kī use Khudā ke sāmḡne āsmān meṁ guzrāne. Is liye is hisse se us kī ka-hānat kāmīl hotī hai. Us kā pahlā hissa pastī aur zillat meṁ hūā : yih hissa jalāl meṁ hotā hai, kī hamārī najāt kāmīl howe. Yih sab is qaul se murād hai, kī “Wuh intihā tak bachā saktā hai.”

Ye bāteṁ imāndāroṁ ko Khudā ke pās imān ke wasile se āne kī tar-gīb detī haiṁ. Ummaid Masih kī shafāat se qawī hotī hai. Is meṁ

1. Un logoṁ kī qism mazkūr hai, jinheṁ targīb dī jāti hai; yaṇe, we Khudā ke pās imān ke wasile se āte haiṁ, aur apne taiṁ bilkul nālāiq jānte haiṁ.

2. Imāndāroṁ kī tasallī, jo Masih kī qudrat se hotī hai, jis ke nām se we Bāp ke pās āte haiṁ. Wuh qādir hai, kī unhen “intihā tak” bachāwe, yaṇe unhen pūrī, kullī, kāmīl najāt dewe.

3. Us kī qudrat kī bunyād : “wuh un kī shafāat ke liye hamesha jītā hai;” yaṇe us ne sirf qurbānī na kī, balkī maujūd hai, kī apnī qurbānī ke fāida apne imāndāroṁ ko pahunchāwe. Pas,

Isā hamārā sardār kāhin hamesha jītā hai, aur apne imāndāroṁ ke liye āsmān meṁ shafī qādir hai.

Yahāṁ daryāft karnā hai, kī Masih kā shafī honā kyā hai? aur wuh kis tarah se apnī shafāat āsmān meṁ kartā hai? aur kis bāt meṁ us shafāat kī qudrat aur galaba hotā hai?

I. *Masih kā hamāre liye shafī honā kyā hai?* Shafāat karnā do shakhḡs kā darmiyān honā hai, kī ek se dūsre ke liye minnat kare. Jab ek dīndār dūsre ke liye Khudā se minnat kartā hai, yih ek tarah kī shafāat hai, 1 Tim. 2 : 1; aur jab Masih hamāre liye Bāp se min-

nat kartá hai, to yih aur tarah kí hai. In donoñ shafáat meñ bará farq hai. Ham K̄hudá se apne nám meñ kuchh nahín máng sakte haiñ; par sab Masíh ke nám meñ mángná cháhiye, Yúh. 16 : 23; lekin jab Masíh Báp se hamáre liye kuchh mángtá hai, to apne hí nám meñ, aur apne hí sawáb ke sabab se mángtá hai. Hamará shafáat karná faqat mahabbat ká ek kám hai; Masíh kí shafáat us ke uhde ká kám hai. Wuh K̄hudá ke darbár meñ hamará Wakil hai, jaisá ki Shaitán tuhmatí hai. Shaitán K̄hudá ke sámhne ham par tuhmat lagátá hai, 1 Pat. 5 : 8; aur Masíh hamáre liye minnat kartá hai, ki K̄hudá aur hamáre bich sulh howe, 1 Yúh. 2 : 1.

Pas, shafáat karná k̄háss karke Masíh ká kám aur uhda hai, jo aur kisi ko diyá nahín játá hai: koí K̄hudá ke pás já nahín saktá hai, magar us ke nám meñ. Jis tarah kí pháṭak, Hiz. 44 : 2, 3, sardár ke liye maḥsús kiya gayá, usí tarah se hamará Sardár Káhin apne hí pháṭak se, yane apne nám aur sawáb se, áyá jáyá kartá hai; aur aur sab log aur pháṭakon se áke mazbah kí taraf, yane us sardár kí qurbání kí taraf rujú láte haiñ.

Agarchi K̄hudá ne yih pháṭak band kar diyá, tau bhí bahutere cháhte haiñ, ki use torke dákhil howeñ; maslan apne nám se áne cháhte haiñ;—pir paigambar aur muqaddason ke nám se áne cháhte haiñ;—lekin yih sab láhásil hogá; kyúinki K̄hudá ne apne pás áne kí ráh ko band kar diyá hai, aur sirf Masíh use khol saktá hai.

II. Ab daryáft karná hai, ki Masíh kí shafáat ásmán meñ *kis kis bát meñ* hotí hai, aur wuh *kis kis kám se* apná jaláli uhda púra kartá hai. Pák nawishton se maḥlúm hotá hai, ki yih tén kámon meñ taqsím ho saktá hai.

1. *Us ká hamáre nám meñ aur hamáre liye K̄hudá ke áge házir honá.* Ibr. 9 : 24 meñ likhá hai, ki “Wuh K̄hudá ke huzúr hamáre wáste házir howe.” Yih aisá hai, jaisá Sardár Káhin ká apní chhátí par Baní Isráil ke bárah firqon ke nám leke K̄hudá ke huzúr haikal ke bích házir honá, K̄hur. 28 : 9, 12, 28, 29. Jab K̄hudá Masíh ko dekhá hai, wuh rahm ke sáth hameñ yád kartá hai; jaisá ki dhanuk ko dekhke zamín par rahm farmátá hai, aur use pání ke túfán se gárat nahín kartá hai, Paid. 9 : 13.

2. Masíh hamáre liye shafáat karne meñ K̄hudá ke áge sirf házir nahín hotá, balki *apná lahú aur tasdúq mazkúr karke* un kí k̄hátir hamáre liye minnat kartá hai. Us ká k̄hún goya boltá hai. Ibr. 12 : 24 meñ likhá hai, ki us ká k̄hún Hábil ke k̄hún se bihtar báteñ boltá hai; yane Hábil ká k̄hún intiqaím mángtá—Masíh ká k̄hún muáfí cháhtá hai. Ek naql hai, ki do bhái the; ek ne apne mulk ke liye barí bahádurí kí thí, aur larái meñ apne ek háth meñ zaḥm kháke ṭundá húá. Dústre ne koí qusúr kiya, jis ke sabab se wuh ádalat meñ láyá gayá, aur ján ke k̄hatre meñ thá. Us ká bhái áyá, aur us ke liye minnat karne cháhá; lekin báteñ na kíñ; sirf apná ṭundá háth utháyá. Sab logon ne us ká bará sawáb yád karke us ke bhái ko rihái dí. Isí tarah se Masíh ká lahú hamáre liye minnat kar saktá hai. Aur Mush. 5 : 6 meñ Masíh zabh kiye húe barre kí misál se mazkúr hai; yane, wuh apne jaláli jism meñ apní maut ke nishán rakhtá hai; goya

we zaḡhm, jo zamín par hamáre gunáhoṇ ke sabab se páe, abhí tak laḡú luhán haiṇ, aur us rahmat kí baṛí dalíl haiṇ, jo wuh Báp se hamáre wáste mángtá hai.

3. Aur wuh *muqaddason kí duḡeṇ* *Ḳhudá ke áge házir kartá hai*, aur apní hí ḡhátir se darkhwást kartá hai, kí Ḳhudá unheṇ pasand kare. Is tarah se goyá ḡhushbú Ḳhudá ke huzúr uṡhtí raḡtí hai, Mush. 8 : 3. Sardár Káhin ká ḡhushbú ke sáth maqdis meṇ jáná is ká pesh-nishán thá, jaisá kí Ibr 7 aur 9 báb meṇ mazkúr hai.

III. Masíh kí yih shafáat bahut, balki bilkull *kám átí hai*.

1. Hamára shafí har tarah se *apne is kám ke qábil o qádir hai*. Jo kuchh shafí meṇ darkár hai, so ḡhusúsan usí meṇ hai. Jo auroṇ ke liye minnat o shafáat kare, us ko dáná, aur wafádár, aur narm-dil, aur jánfishán honá zurúr hai. Hamára shafí dánish meṇ kam nahíṇ hai, balki wuh dánish i Iláhí, háṇ, akelá dánishmand hai, Yahúdáḡ, 25. Wuh wafádár bhí hai : chunánchi wafádár Sardár Káhin kahlátá hai, Ibr. 2 : 17. Aur us ke barábar narm-dilí meṇ koí nahíṇ hai ; chunánchi wuh hamári mánind ázmáyá gayá thá, Ibr. 4 : 15. Aur jánfishání us kí is se maḡlúm hotí hai, kí hamári naját us kí garaz hai ; us ne is ke liye apní ján dí ; aur jis ke wáste aisí baṛí qímat dí, us ke wáste zurúr jánfishání ke sáth minnat karegá.

2. Báp ke nazdík wuh *kaisá mahbúb hai*. Masíh us ká piyára beṡá hai, Kel. 1 : 13 ; us kí ján ká piyára, Afs. 1 : 6. Wuh aur Báp na sirf asl meṇ, balki marzí meṇ ek haiṇ ; is wáste Báp hamesha us kí suntá hai, Yúh. 11 : 42. Háṇ, us ne Beṡe ko kahá hai, kí Mujh se máng, aur main dúngá, Zab. 2 : 8.

3. Yád karná cháhiye, kí *kin ke liye yih shafáat kí játlí hai*. We Ḳhudá ke dost aur farzand haiṇ, jinheṇ Báp áp piyár kartá hai, Yuh. 16 : 27. Sári rahmatoṇ kí bunyád Báp hí ke iráda i fazl haiṇ. Us ne apná Beṡá bhí baḡhshá hamáre wáste ; aur us ke sáth hamen kyúṇ sab chízeṇ kasrat se na degá ? Rúm. 8 : 32. So kuchh shakk nahíṇ hai, kí Masíh kí shafáat bilkull phaldár hogí.

HA'SIL I KALA'M.—1. Kyá Masíh hamesha bihisht meṇ zinda raḡtá hai, kí apná laḡú Ḳhudá ke áge guzrán ke ímándároṇ ke liye shafáat kare ? To *un ká kaisá bad hál hai*, jous meṇ kúchh baḡhra nahíṇ rakhte haiṇ ! Wuh un ke liye minnat nahíṇ kartá, balki Ḳhudá ko intiqám lene ke liye pukártá hai ; kyúṇki we use haqír karte haiṇ. Har ek beímán ádmí use haqír jáṅke páemál kartá hai. Ádmí ke ḡhún ke liye mulzim honá haulnák bát hai ; aur Masíh ke ḡhún kí tabqír karná kaisá ziyáda ḡḡhaufnák hogá ! Beshakk jab Ḳhudá ke intiqám ká dín áwegá, to sáf záhir hogá, kí aise gunáhgár se badlá liyá jáegá, aur wuh use jahannam ke sab se niche gahráo tak hánkegá. Ah ! jab insán Masíh ke fazl kí dawát tark karte haiṇ, tab kyá karte haiṇ ! Afsos us par, jis ke zidd meṇ yih laḡú pukártá hai !

2. Kyá Masíh hamesha zinda ho ke shafáat kartá hai ? To Masíhí apne sab ḡar aur imtihánoṇ ke waqt *és se tasallí leweṇ* ; kyúṇki yih bát har marz ká iláj hai.

Jab kí kamzorí se gunáh meṇ giriftár hote haiṇ, to is bát se tasallí

lewen. Tumháre gunáh niháyat badí to hain; we K̄hudá kí Rúh kó ranjída, aur tumháre dilon ko udás, aur tumhári maqbúliyat kí gawáhi ko kamzor karte hain; lekin jab tumhárá aisá Sardár Káhin hai, to náummedí men phans jáne kí zurúrat nahín. “Ai mere bachcho, main tumhen ye báten likhtá hún, táki tum gunáh na karo; aur agar koí gunáh kare, to Isá Masih, jo ádil hai, Báp ke pás hamára Shafi hai; aur wuh hamáre gunáhon ká kafára hai; faqat hamáre gunáhon ká nahín, balkí tamám dunyá ke gunáhon ká, 1 Yúh. 2 : 1. 2. Jab lar-ke log pahle páñw páñw chalne lagte, tab har chhoṭí chíz se thokar kháte hain; aur wasáhi nae Masihí bahut sahaj se gamgín hote hain. Munásib nahín hai, ki koí Masih kí shafáat se gunáh karne men himmat pakre; lekin agar ittífáqan gunáh men girifár howe, to bilkull náummed na honá cháhiye; Masihí shafi hai, aur apne gire húon ko utháne jántá hai. Aur jab koí tauba karnewálá Báp kí k̄hafagí se d̄artá hai, to yád kare, ki agarchi Báp gunáh se k̄hafá hai, tau bhí us ká piyára Betá us ke áge minnát kartá hai, aur gamgín táib ke liye muáfí hásil karne ko kullí qádir hai.

Jab duá karne men sust ho, to náummed mat ho. Tum apne dil kí bábat shikáyat karte ho, ki wuh murda, aur sun, aur bhaṭaknewálá hai; lekin yád karo, ki Masih ká k̄hún boltá hai, jab tum apne munh khol nahín sakte ho. Masihíon kí duáen K̄hudá ke áge gunáh ke báis najis áti hain, lekin Masih unhen murr se k̄hushbúdár kar detá hai; aur us ke sabab se tumhárá chik̄hen márná, jab tum kuchh nahín bol sakte, duá i qawí ho játá hai.

Masih kí shafáat un ká iláj hai, jo K̄hudá ke insáf se burá aur gulá-mí k̄hauf rakhte hain. Us shafáat par imán lāne se adab ká d̄ar barh-tá, aur beímán náummedí ghaṭti hai; aur is kám ke liye aur koí chíz aisí qawí o qádir nahín. “Pas, a bháio, jab ki ham ko ijázat milí,” wg., Ibr. 10 : 19—21.

Agar Masihí is shafáat ko yád kartá, to kabhí dín se ṭal jáne ke k̄hatre men na partá. Ai mere dosto, yihí tumhári salámati hai. Masih ne isí bát se Patthras hawári ko tasallí dí. “Ai Samáun, dekh, Shaitán ne cháhá hai, ki tumhen gehún kí tarah phat̄ke; lekin main ne tere wáste duá mángí, ki terá imán náqis na ho,” Lúká, 22 : 31, 32.

Ham jánte hain, ki ham sab imán, aur mahabbat aur nek-mizájí, aur farotaní, aur gyán men kam hain. Tau bhí agar fazl ká shurú húa, to zurúr Masih kí shafáat se wuh barhegá, aur kámil ho jáegá. Wuh na sirf hamáre imán ká baní hai, balki us ká kámil karnewálá, Ibr. 12 : 2. Wuh har waqt hamáre liye naí aur táza rahmaten mángá kartá hai; aur k̄hatam na karegá, jab tak ki hamári sári hájaten rafa na ho jáwen.

3. Kyá Masihí hamesha shafáat kartá hai? To *ye farz farámosh* na karo :—

Masih ko mat bhúlo. Wuh apne jalál men tumhen farámo h nahín kartá hai. Wuh apne sáre bháion ko yád kartá hai. Lekin afsos hai, ki bárhá ham sukh ke sabab se use bhúl játe hain. Bahut Isái hain, ki agar unhen sukh kabhí na miltá, to un ke liye bihtar hotá; kyúunki jab Masih se gáfil ho gae, to apní k̄hushí kí bunyád se phisal gae, aur aise nuqsán men giriftár hue, ki tamám dunyá us ká iláj nahín ho saktí.

Khudá kī pairaúī meṇ qāim raho. “Pas, az baski hamáre liye ek bará sardár káhin, jo ásmán se pár guzar gayá, yaṇe *Khudá ká Beṭá Isá* hai, apne iqrár ko tháme rahan,” *Ibr. 4: 14.* Wuh hamará sir hai; aur jab sir bihisht meṇ pahunchá hai, to wuh apná badan, yaṇe apne log, zurúr us meṇ láwegá. Aur wuh hamáre liye minnat kartá hai; is wáste ham bhaṭakke paráganda nahín ho sakte.

Masíh kī shafáat se himmat hásil karo, kī duá meṇ nit mashgúl raho. Jab kī wuh tumháre liye minnat kartá hai, tab tum kýúṇ nahín apne liye? Hawáí isí natíja ko is bát se nikáltá hai: “Is wáste áo, ham fazl ke takht ke pás beparwá áweṇ, táki ham par rahmat howe, aur niámat, jo waqt par madadgár ho, páweṇ,” *Ibr. 4: 16.*

Masíh ke liye dunyá meṇ minnat karo, jáisá kī wuh tumháre liye bihisht meṇ kartá hai. Agar Shaitán tum par tuhmat kare, to Masíh maujúd hai, kī tumháre liye minnat karé; aur agar koí zamín par use behurmat karne cháhe, to *ḡhabardár!* tum us kī izzat ke liye koshish karo; us ke liye bolo; us ke liye gunahgáron ke sáth minnat karo, kī we apní dushmaní se tauba karke us ke dost ho jáweṇ, aur us kī shafáat ke muhásil meṇ sharík howeṇ.

Khudá ká nám Isá ke liye mubáarak howe!

CHAUDAHWÁN BĀB.

MASÍH KĀ HAMA'RE LIYE BADLA' DENA'.

US KĪ KAHA'NAT KĀ PAHLA' HĀ'SIL.

Masíh ne hamen mol lek'r shara kī lanat se chhuráyá, kī wuh hamáre badle maurid í lan húa.—*Gal. 3: 13.*

AB Masíh kī kahánat kī qism, aur zurúrat, aur hisse, yaṇe qurbání aur shafáat, bayán ho chuke hain. Jab kī is mazmún ko na chhoreṇ munásib hai, kī us ke muhásil sochen, jo ye hain, yaṇe gunáh ká ká-mil badlá dená, aur ek abadí mírás apne logon ke liye hásil karná. Wuh badlá, jo us ke *ḡhún* baháne se húa hai, záhiran hamárá sanad meṇ mazkúr hai, jis meṇ hawáí 10 áyat meṇ bayán kar karke, kī “Har ek shaḡhs, jo un báton ke karne par, jo shara kī kitáb meṇ likhí hain, páedár nahín rahtá, malaún hai,” farmátá hai, kī kis tarah se ímándár shara kī lanat se chhút játá hai; yaṇe, Masíh ke hamáre liye wuh lanat sahne se, aur is tarah se *Khudá* ke insáf ko badlá dene se, aur ímándár ko sazá kī liyáqat se ázád karne se.

Kháss karke is áyat meṇ Masíhí ká chhuṭkára shara kī lanat se; aur us ká taur, mazkúr hain.

1. Ímándár ká chhuṭkára: “Masíh ne hamen shara kī lanat se mol lekar chhuráyá.” Shara í Iláhí ke tén hisse hain—hukm, waḡde, aur dhamkián yá lanaten. Shara kī lanat us ká ilzám dene ká fatwá hai,

jis se gunahgár ján aur badan kí maut ke band meñ á játá hai. Zanjír, jis se wuh use bándhtá hai, so gunáh kí náláiqí hai; jis se Masíh ke siwáe koí chhurá nahín saktá. Shará kí yih lanat haulnák chíz hai; kyúñki wuh us kí rúh ko már dáltí hai; aur wah kabhí dhímí nahín hone kí—na ápsúon, na tauba, na chál ke sudhárne se gunahgár ko chhórne kí. Masíh is lanat se ímándár ko chhurátá hai; aur wuh us se abad tak aur kuchh kám nahín rakhtá.

2. Is ká taur mazkúr hai; yáñe púrá dám diyá gayá hai, aur gunahgár kí jagah diyá gayá, jis se kámil badlá húa. Aur jaisá kí dám púrá thá, waisá hí hamáre badle meñ diyá gayá hai;—aur hamári sanad yihí kahtí hai: “wuh hamáre badle maurid i lan húa;” jis ká matlab nahín hai, kí Masíh áp lanatí húa; jaisá kí jab kahá gayá hai, kí “Kalima mujassam húa,” tab matlab nahín hai, kí Ulúhiyat jism húi. Ulúhiyat ne jism liyá; aur Masíh ne lanat apne úpar lí;—is wáste likhá gayá hai, kí “Ús ne us ko, jo gunáh se wáqif na thá, hamáre badal gunáh thaharáyá.” Is ká matlab yih hai, kí hamáre gunáh us ko mahsúb húa, kí wuh hamará zámín hoke un ká kafára dewe, aur sazá utháwe, hamáre badle meñ. Is se yih natíja nikaltá hai:—

Masíh kí maut se ímándároñ ke sáre gunáhoñ ká kámil badlá húa; aur Kḥudá ká insáf phir un kí bábat kuchh dawa nahín karegá.

I. *Masíh ká badlá dená kyá hai?* Jawáb yih, kí badlá dená Masíh ká wuh kám hai, jo us ne, hamará zámín hoke, Kḥudá kí tábidárfi se, aur hamáre piyár se, kiya; yáñe, Kḥudá-insán ne apne taín házir kiya, kí sab kuchh kare, aur sab kuchh sahe, jo hameñ shará se karná aur sahná thá; jis kám se us ne hameñ us gazab aur lanat se, jo gunáh ke sabab wájibí the, rihái baḡhshí.

1. Yih Kḥudá-insán ká kám hai; aur koí is qábil na thá, kí Kḥudá ko gunáh kí beniháyat badí ká badlá dewe. Basabab donoñ ḡhássiyaton ke ek hí ájib shaḡhsiyat meñ báham hone ke wuh yih kám kar saktá thá, balki kiya hai. Insániyat se jo kuchh ho saktá, so húa—wuh qurbáni ká mádda húa: Ulúhiyat se us kí aisí qadr húi, kí wuh kámil badlá thá. Is tarah se wuh kám Kḥudá-insán ká kám thá; lekin aisá kí har ek ḡhássiyat apní apní sifaten rakhtí thí, agarchi donoñ is kám meñ báham hún. Agar sab firishte ján dete, aur sáre ádmíon ká ḡhún baháyá játá, to bas na hotá. Kḥudá ne apne ḡhún se, Am. 20 : 28, kalísiyá ko mol liyá.

2. Agar wuh Kḥudá ke insáf ko hamáre liye rází kare, to zurúr hai, kí hamará zámín hoke Kḥudá ke áge hamáre liye házir howe; nahín, to us kí tábidárfi se ham ko kuchh fáida nahín pahunchtá. Is anjám ke liye wuh shará ká mahkúm húa, Gal. 4 : 4; yáñe aise hí faráiz ká mahkúm húa, jaise kí hameñ farmáe gae,—aur is meñ hamará zámín húa; chunáñchi wuh zámín kahlátá hai, Ibr. 7 : 22. Haqíqat meñ aur kisú sabab se wuh tábidár aur ranjída nahín ho saktá thá. Wuh apne kisí kám ke sabab se maurid i lan nahín húa. Us kí bábat ek peshíngói húi, “Masíh munqata kiya jáegá, aur us ká kuchh nahín;” yáñe, apne wáste nahín, Dán. 9 : 26; aur pák nawish-te sáf sáf kahte haiñ, kí hamáre wáste,—Masíh, jaisá kí nabíon kí kitábon meñ likhá gayá hai, hamáre gunáhoñ ke wáste múá, 1 Kar. 15 : 3.

Yád karná cháhiye, ki Masih hamará badlá húa. Bāze kahte haiñ, ki Masih hamáre fáida ke wáste múá, lekin hamáre badle meñ nahín. Par us ká hamará zámín aur badlá honá hamáre sádiq gine jáne kí bunyád hai, balki us ke kone ká sirá. Agar wuh hamará badlá na húa, to hamáre gunáh us par kyúnkar láde gae? Yas. 53 : 6. Agar wuh hamáre badle meñ sádiq na hotá, to kyúnkar “*Khudáwánd hamári sadáqat*” kahlá saktá? Yar. 33 : 16. Agar hamará badlá na hotá, to us se hamen kyá fáida hotá?

3. Masih *Khudá ká tábidár* thá, aur *hamen piyár* kiyá; isí sabab se hamáre liye insáf ko rází kiyá. Fil. 2 : 8 se sáf zálir hai, ki us ká kám tábidárí se thá; “*maut tak, salíbi maut tak farmánbardár rahá.*” Farmánbardárí hotí hai sirf jab hukm húa hai; aur Masih áp kahtá hai, ki aisá hukm húa,—“*Us ká dená (yañe ján ká dená) mere iḡhtiyár meñ hai, aur us ká phir lená mere iḡhtiyár meñ hai; yih hukm main ne apne Báp se páyá, Yúh. 10 : 16.* So wuh is meñ *Khudá ká tábidár* thá; tau bhí apní hí marzí se sab kuchh kiyá; aur mihrbání aur mahabbat se kiyá; kyúnki “*Masih ne ham se mahabbat kí, aur apne taín Khudá ke áge chaḡhává aur qurbán kiyá, táki use khushbú maḡlúm ho,*” Afs. 5 : 2. Jaisá ki us ke hamará badlá hone ká sabab i báharí hamári shikasta-hálí thí, waisá hí sabab i bátiní us kí mahabbat thí.

4. Masih ne insáf ko rází kiyá *sahne se*, aur *karne se*; yañe jo kuchh *Khudá kí sharaḡ* ke mutábíq ham ko karná aur sahná thá, so us ne kiyá aur sahá. Masih ká yih duhrá kám ádmí ke duhre farz ke mutábíq hai; yañe us ne sab kuchh kiyá, jo *Khudá ádmí se cháhtá* hai; aur wuh sazá sahí, jo *Khudá ne hamári náfarmábardárí* ke liye ṡhaharáí. In do báton se wuh kámil tábidárí húi, jis se *Khudá rází* hai, aur ham ko sadáqat mahsúb hotí hai.

5. Us ke hamáre badle hone ká hásil aur phal yih hai, ki ham us gazab aur lanat se, jo hamáre gunáhon ke liye wájibí the, chhút játe haiñ. Masih ke kafára kí qadr, aur qímat, aur kamáliyat aisi thín, ki hamári ázádagí aur kámil chhuṡkárá us ká wajibí phal thá; us se hamári naját sirf mumkin nahín, balki munásib húi. Agar wuh hamáre badle meñ maurid i lan húa, to zurúr ham ne lanat se rihái páí; aur isí tarah hawári bhí dalíl kartá hai:—“*Alláh ne us ke taín aisá zálir kiyá, ki wuh un ke liye, jo us ke lahu par ímán láwen, sulh ká sabab ho, táki wuh apní sadáqat zuhúr meñ láwe; is wáste ki Khudá pable gunáhon se muhlat ke dinon meñ guzar gayá, so us ne yih kuchh kiyá, ki wuh is zamáne meñ apní sadáqat zuhúr meñ láwe, ki wuh áp hí sádiq ṡhahare, aur us ko, jo Isá Masih par ímán látá hai, sádiq ṡhaharáwe,*” Rúm. 3 : 25, 26. Jab *Khudá ne Masih se gunáh ká intiḡám* liyá, tab us ká matlab kyá thá? Is mazmún par dhiyán karná cháhiye. Us ká matlab thá, ki apní sadáqat ko gunáh kí baḡh-shish meñ zálir kare; aur yih bát aisi bhárí hai, ki Hawári ne use duhráyá: wuh cháhtá thá, ki ham baḡhúbí yád karen, ki na sirf rahmat, balki insáf aur sadáqat bhí gunahgáron ke baḡhshne meñ zuhúr meñ átí hai. Yih kaisí tasallí kí bát hai! *Khudá ne Masih ko hamáre kafára ke liye zálir kiyá* hai. Kyá insáf ko zálir aur rází karná zurúr hai? Wuh Masih kí maut se aisá zálir aur rází kiyá gayá hai, ki

jaisá tumhári halákat se kabhí nahín ho saktá. Is tarah se Masíh ke insáf ko rázī karne ká muḡhtasar bayán húa.

II. Masíh ká insáf ko rázī karná haqíqí hai ; ḡhiyáli nahín. Is kí subút meṅ jo kuchh ham kah chuke haiṅ, so kám átá hai. Bazon ne samajhá hai, ki wuh misálí hai ; lekin wuh sach, púra aur maḡbúl hai. Us ká lahú ek zámín ká lahú hai, Ibr. 7 : 22, jo sharaḡ ke faráíz meṅ thá, Gal. 4 : 4 ; aur agarchi usí ká kuchh gunáh nahín thá, tau bhí Ḳhudá ke áge hamará zámín hoke hamári badkáríáṅ us par ládín, Yas. 53 : 6 ; aur usí se Ḳhudá ne hamáre gunáhoṅ ká intiqám liyá, Rúm. 8 : 32, us kí ján kí tasdīq meṅ, Matí, 27 : 46, aur badan kí, Ám. 2 : 23 ; aur apne Beṭe kí is tábidári se wuh bilkull ḡhush aur rázī hai, Afs. 5 : 2, aur is liye use murdoṅ meṅ se jiláyá, aur apne dabne háth biṭháyá, Afs. 1 : 20 ; aur us kí sadáqat kí ḡhátir se ímán-dároṅ ko sádiq aur ázád kiyá, yaháṅ tak ki we phir kabhí mulzim na honge, Rúm. 8 : 1, 34. Yih sab pák nawishtoṅ se sáf zálhir hai : ham-úra ímán is kafára kí bábat ádmíoṅ kí tajwíz kí húi bátoṅ par nahín, lekin Ḳhudá kí muhr kí húi sachchái par qáim hai ; lekin insán kí tabíyat aisí nádurust hai, aur us ke dil ká aisá gurúr hai, ki wuh Ḳhudá ke fazl kí, jo hamáre liye aisí muḡhlaśi baḡhshne se áshkára húa, taṛif na karke, aur sári iṭtirázeṅ, jo us ká ḡharáb dil Shaitán kí madad se nikál saktá hai, pesh láke nit koshish meṅ rahtá hai, ki us bunyád i mubáراك ko, jis par Ḳhudá ne apní izzat o jalál, aur apne logoṅ kí naját muḡar-rar kí hai, ḡhá ḡále !

HA'SIL I KALA'M.—1. Agar Masíh kí maut wuhí hai, ki jis ke sabab Ḳhudá ham se rázī húa, to *gunáh niháyat badí hai* ; kyúнки us ká beniháyat intiqám liyá gayá hai. Ahmaq gunáh se ṭhaṭṭhá karte haiṅ ; aur ádmíoṅ meṅ bahut thore haiṅ, jo us kí badí kí tháh páte haiṅ. Gunáh aisí ḡharábí hai, ki agar Ḳhudá tumháre ek bad ḡhiyál ke badle meṅ hamesha ká ázáb detá, to sazá ḡair wájibí na hotí. Sháyad tum gumán karte ho, ki Ḳhudá ká gunáh ke badle aisí sazá dená, aur kabhí gunáhgár se rázī na honá, barí saḡhtí hai ; lekin gaur karo, ki wuh, jis ke gunáh karte ho, pák aur mubáراك Ḳhudá hai, jis ká haqq kámil hai, aur jis ká insáf badaltá nahín ; tab sháyad aur tarah ká gumán karoge. Afsos ! gunáh kí badí kí ḡahrái kaisí ! Agar tum us kí badí pahchánne cháhte, to Ḳhudá kí sífateṅ socho, jis ke ḡhiláf meṅ gunáh karte ho ; yá Masíh kí tasdīq o maut se us kí ḡahrái nápo: tab tum sáf sáf dekhoge, ki wuh kaisí burí aur karwí chíz hai. Masíh kí maut ek áíná hai, jis meṅ insán apne gunáh kí bebayán o behadd badí dekh saktá hai.

2. Admíoṅ kí *rúheṅ beshḡímat* haiṅ. Yih us dám se, jo un kí naját ke liye diyá gayá, maḡlúm hotá hai. Masíh ke ḡhún se afzal kyá ! “ Kyúнки tum yih jánte ho, ki tum ne jo apní maurúsi ádat i behúda se naját páf, yih kuchh fání chízoṅ ke, yaṅe rúpe sone ke sabab se nahín, balki us ke, jo bedág aur beaib barre kí mánind hai, yaṅe Masíh ke beshḡímat lahú ke sabab se hai,” 1 Pat. 1 : 18, 19. Sirf Masíh ká ḡhún insán kí rúhoṅ ke kafára karne kí liyáqat rakhtá hai. Sone rúpe se dunyawí ázádagí ho saktí hai, lekin rúh ká chuṭkára jahannami

band se nahín. *Khudá* kí sárí *khilqat* ek hí *rúh* ke barábar nahín hai ; jis ne un kí naját *kharídí*, us ne yih bát *ba^{kh}húbí* jání; lekin afsos, hazár afsos ! *gunahgár* apní *rúheñ* kaisí *sastí* bechte haiñ ! Agar tum apní *rúheñ* *sastí* becho, to *pachhtáwá* mahangá *kharídoge*.

3. Is mazmún se wuh *mahabbat*, jo *Masíh* ne ham se kí, *bahut afzal* málúm hotí hai. Ek naql hai, ki ek bádsháh ne hukm kiyá thá, ki jo koí *zinákárí* meñ *pakrá* jáegá, us kí donoñ *ánkheñ* *nikálí* jáweñ. *Kuchh* ársa guzrá, aur usí ká *beṭá* isí *gunáh* meñ *pakrá*, aur us ke sámhne *láyá* gayá. Bádsháh us kí *ádálat* karne lagá, aur bát *sábit* húi. Tab sab log kahne lage, ki Wuh hazrat ká *akelá* *beṭá* hai : afsos kí bát hai, ki wuh andhá kiyá jáwe : aur bádsháh se minnat karne lage, ki use *muáf* kíjiye. *Akhir* ko bádsháh ne apní ek *ánk*h, aur apne *beṭe* kí ek, *nikálí*; aur is tarah se sab logoñ ke áge apná hukm *sábit* rakhá, aur apní *mahabbat* apne *beṭe* se *záhir* kí. Lekin *Masíh* kí *mahabbat* ham se is bádsháh kí *mahabbat* se *zíyáda* thí: us ne na sirf ádhá bojh *uṭháyá*, belki sab *kuchh*. Us bádsháh ne apne *piváre* *beṭe* ke wáste *ízá* *uṭháí* : *Masih* ne apne *dushmanoñ* ke liye, balki *dushmanoñ* ke liye, jo us ke *khiláf* *larte* *chale* *játe* the, *Rúm. 5 : 8*.

4. Jab kí *Masíh* ne hamáre liye *kámil* badlá *diyá* hai, to *Khudá* ká *insáf* hamáre *gunáhoñ* kí *muáfí* rok nahín saktá. Wuh ádil hai, kí hamáre *gunáhoñ* ko *muáf* kare, 1 *Yúh. 1 : 9*. Is barí *tasallí* kí bát se gamgin o *miskín* *gunahgár* ummed i *qawí* *pátá* hai. Wuh *Khudá* se *kámil* *bharose* ke sáth *faryád* kar saktá hai ; aur jab *Masíh* ke lahu kí *qadr* *yád* kartá, to apne *gunáh* se *kadhí* *maglúb* na hogá.

5. *Cháhiye* kí har ek apne *kám* aur apní *nekí* ká *bharosá* *chhoṛke* *Masih* ke *kámil* *kám* par ásrá rakhe. Ham kabhí *aisá* *iráda* na karen, kí apne *kámoñ* se *Khudá* ko *rází* karen. Ham apne *gunáhoñ* ke badle *kuchh* nahín kar sakte haiñ. Hamára *pachhtáwá*, hamáří *udási* aur *gamgíní*, hamáří *koshish* apne *dil* ko *pák* karne men, hamára sab *kuchh*, ek hí *gunáh* ko *utár* nahín saktá hai. *Másih* ká *kám* *aisá* *kámil* hai, kí *goyá* *Khudá* har ek se, jo use us ká *káfára* *yád* *dilátá* hai, *rází* hai. *Kásh* kí tum sab *khúb* *iṭtibár* karte, kí *Másih* par *ímán* *láná* *Khudá* ko *aisá* *khush* kartá hai, jaisá kí tumháří sárí *mihnat* aur *koshish* kabhí nahín kar saktí haiñ.

PANDRAHWAN BĀB.

MÍ'RA'S MASÍ'H KÍ QURBA'NÍ SE KHARÍDÍ HU'Í.

US KÍ KAHÁ'NAT KÁ DU'SRA' HÁ'SIL.

Par jab waqt ákhir húa, tad Khudá ne apne Beṭe ko bhejá ; wuh qurat ke peṭ se shará ká mahkúm hoke paidá húa, táki wuh ahl i shari'at ko mol le, aur ham lepálak hone ká darja páweñ.—Gal. 4 : 4, 5.

HAMA'RA' qarz adá karná, yañe shará kí lanat se hamáří ázádagí *kharrídná*, pichhle wáq meñ *mazkúr* húa.

Masíh ká hamáre liye ek mírás kharidná is waqt ká mazmún hai. Sanad meñ is ká zikr aisá hai, “ki ham lepálak hone ká darja páwen.” Lepálan kisí ko beṭe kí jagah lená hai. Lepálan i Iláhí wuh kám hai, jis meñ Kḥudá, Masíh kí kḥátir se, hameñ farzand ṭaharáke Masíh ke sáth hayát i abadí ká wáris banátá hai.

Ham ne Ádam ke girne meñ apní mírás kho dí; aur, úpar kí sanad ke mutábíq, Masíh kí maut se use phir páte haiñ. Us kí maut se hamará nayá aur mazbúttar haqq húá hai. Is se yih natíja nikaltá hai, ki—

Masíh kí maut ne na sirf hamáre qarz adá kie, balki Kḥudá ke farzandon ke wáste ek tuhfá mírás kharidí hai.

“Aur wuh usí wáste nae aḥd ká wásita hai, táki maut ke wasíle se un taqsíron ke liye, jo pahle aḥd meñ thín, muáfi howe; aur we, jo buláe gae haiñ, mírás i abadí ke waḍe ko hásil karen,” Ibr. 9 : 15.

Ab is meñ daryáft karná hai, ki Masíh ne kyá diyá; kyá mol liyá; aur kin ke liye.

I. *Masíh ne kyá diyá?* Musannifon ne Masíh kí kahánat ke phal do qismon meñ taqsím kie haiñ, yañe qarz ko adá karná, aur mírás ko mol lená. Is ke mutábíq Masíh kí fábidarí kí do nisbaton haiñ; yañe, ek sharaí sadáqat se, aur ek sawáb se, jo shara ke ḍawe se ziyáda hai.

Is bát meñ musannifon ne, wájibí tarah se, Masíh kí maut kí, aur us ke ahwál o nisbaton kí tafríq kí hai. Jab Masíh kí maut ko aur báton se áláhida karke sochte haiñ, to maḷúm hotá hai, ki wuh shara ke ḍawe se kuchh ziyáda na thí; kyúñki na Báp kí mahabbat, na us ká insáf Masíh ko us tasdíq se, jo insán ke badlá dene ke liye use sahná zurúr thá, ziyáda kabhí nahín dene ká; lekin jab us ke ahwál, aur sahnewále kí zát i pák, wg., sochte haiñ, to maḷúm hotá hai, ki us ká sawáb shara ke ḍawe se niháyat álá o bálá thá; kyúñki agarchi shara ne gunahgáron kí maut cháhí, jo kíre makore haiñ, tau bhí wuh betaqsí kí maut na cháhtí thí; wuh na cháhtí thí, ki Kḥudá apná kḥún baháwe; wuh kabhí nahín cháhtí thí, ki aisá beshqímat laḥú, jaisá Masíh ká, baháyá jáwe. Shara ne yih nahín cháhá; lekin Kḥudá ko achchhá lagá, ki apne insáf aur rahmat ke zuhúr ke liye yihí badlá ṭaharáwe, ki Masíh hamáre liye marne se hamará ázád karne-wálá howe. Aur haqíqatan jab Kḥudá ne shara aisi ḍhili ki, ki hamará badlá ho saktá, tab ham par bará fazl kiyá; kyúñki is se insáf bil-kull rázī húá hai, aur tau bhí ham jíte aur bachte haiñ. Agar yih májara haqíqat meñ na hotá, to insán us ká kḥiyál na kar saktá. Ab ham ne Masíh ke us kámil badle se, jo hamáre kḥatáon ke liye us ke kḥún aur tasdíq se húá, kámil ázádagí pái; balki ek jalwagar mírás, jo us ke kḥún se kharidí gáí hai, hamará haqq hai; kyúñki wuh betaqsí ká, balki Kḥudá ká kḥún hai; aur is wá-te shara ke ḍawe se ziyáda tuhfá aur kámgar. Is se ham par áshkára hai, ki Masíh meñ kaisí daulat ká kḥazána hai, jo us ne hamáre ázádagí kí qímat se ziyáda hamáre wáste diyá. Jitná ki us kí ján aur badan ham se bihtar haiñ, jin ke badle wuh qurbán húá, itná yih kḥazána hai; aur na ádmí, na fríshte us ká shumár kar sakte haiñ. Masíh ne isí behadd kḥazána

ko kharch kiyá, ki imándáron ke wáste sab se achchhi mírás mollewe. Ham is tarah se khazána ká khiyál kar karke, ab mírás kí taraf rujá láweñ.

II. *Yih mírás* aisi láintihí hai, ki khalq us kí baráí samajh nahín saktá; kyúнки us meñ sab chízeñ haiñ. “Sab kuchh tumhárá hai; aur tum Masíh ke ho, aur Masíh Kḥudá ká,” 1 Kár. 3 : 22, 23. “Jo gálib hotá hai, so sab ká wáris hogá,” Mush. 21 : 7. Kḥáse karke

1. *Is dunyá kī sári barakaten* imándáron ke liye Masíh kí maut se kharidí gaiñ. “Us ne hamen sab kuchh kasrat se diyá,” 1 Tim. 6 : 17. Yih nahín, ki sab chízeñ haqíqatan imándáron ke qabze meñ haiñ; lekin sab chízeñ se tasallí o fáida unheñ milte haiñ. Auroñ ko is zamáne ká mál dānk, aur karwáhaṭ, aur jál haiñ; muqaddas logon ko sirf us ká fáida;—chunánchi likhá hai, “Thorá sá, jo sádiq ká hai, bahutere sharíron ke amwál se bihtar hai,” Zab. 37 : 16; aur yih bát goyá kunjí hai, jis se hawári ká yih qaul khultá hai, ki “Nádár kí mánind haiñ, par sári chízeñ ke málík haiñ,” 2 Kar. 6 : 10. Sirf we dunyá ko qabze meñ rakhte haiñ; par dunyá auron ko rakhtí aur un par gálib átí hai. Muqaddas log dunyá ko istíamál karke us meñ Kḥudá se kḥushí hásil karte haiñ; aur log dunyá ke sabab se fareb kháte, aur álúda hoke halák ho játe haiñ.

2. *Rúhání barakaten* Masíh ke kḥún se un ke liye kharidí gaiñ; chunánchi *bariyat*, yañe sádiq giná jáná, jis meñ hamáre gunáhoñ kí muáfí aur hamári maqbúliyat shámil haiñ: “So we us ke fazl ke sabab se Masíh Isá ke fidá hone ke wasíle se sádiq gine játe haiñ,” Rúm. 3 : 24. *Pákízagí* bhí un ke liye kharidí gai hai; chunánchi “wuh hamáre liye Kḥudá se pákízagí hai,” 1 Kar. 1 30. Ye do, yañe hamári bariyat aur pákízagí fazl i kasrat ke khazáne ke sab se achchhe pairáhan haiñ. Jo rúh unheñ pahintí hai, so kaisí jalwagar aur kḥushnumá hai! *Kḥudá ká lepálak honá* us ke kḥún se hamáre liye kharidá gayá: “Kyúнки tum sab ke sab us imán ke sabab se, jo Masíh Isá par hai, Kḥudá ke farzand ho,” Gal. 3 : 26. Masíh ke Beṭe hone se, ham, imán ke wasíle se us meñ hoke, farzand ho játe haiñ; aur agar farzand, to wáris. Wáh! yih kaisí mahabbat hai, ki ham Kḥudá ke farzand kahláweñ! 1 Yúh. 3 : 1;—ki ham garib o láchár wáris howeñ, balki Kḥudá ke wáris Masíh ke sáth! Hāñ, wuhí *imán*, jis se ham Masíh ke sáth paiwasta hote haiñ, us ke kḥún se kharidá gayá. Yih beshqímat fazl Masíh ne hamáre wáste mol liyá; hāñ, wuh sári sulh, aur kḥushnúdí, aur rúhání tasallí, jo imán ke phal haiñ, imán ke sáth isí lahú se kharidí gai haiñ, 2 Pat. 1 : 1; Rúm. 5 : 1—3. Aláwa is ke *Rúh ul-Quds* áp, jo sáre fazl aur tasallí ká bání aur sotá hai, Masíh kí maut aur jí uṭhne se ham ko miltí hai, Gal. 3 : 13, 14. Agar Masíh nahín múá hotá, to Rúh i Pák tumháre dilon ko na pák kartí, na tasallí baḥshliti.

3. *Sári abadí barakaten* us ke lahú se kharidí gai haiñ. Bihiṣht aur us ká jalál isí qímat se imándáron ke liye kharide gae. Is sabab se wuh jalál ek “mírás, jo bezawál, aur namulauwas, aur pazhmurda nahín hotí, aur ásmán meñ tumháre liye rakh chhoṛí gai,” kahlátá hai;

jis kī jīti ummaid ke liye Masīh ke jī uṭhne ke bāis tum phirke paidā hūe, 1 Pat. 1 : 3, 4. Na sirf abhī kī, balki ānewālī rahmaten bhī hamāre liye ḡharidī gai haiṇ, usī ke ḡhūn se, 1 Kar. 3 : 22.

III. Yih sab kuchh *īmāndāron* ke liye ḡharidā gayā hai; is wāste wuh “muqaddas logon kī mirās raushni meṇ” kahlātā hai, Kal. 1 : 12. “Sab kuchh tumhārā hai; kyūnki tum Masīh ke ho;” haqq is tarah se ṭhahartā hai, 1 Kar. 3 : 22, 23. Aur waisā hī Rūm. 8 : 30 meṇ likhā hai, “Aur jin ke liye us ne taqdīr kī, us ne un ko talab ki-yā; aur jinheṇ talab ki-yā, un ko sādiq jānā; aur jinheṇ sādiq jānā, un ko jalāl baḡhshā.” Sirf wuhī farzand o wāris haiṇ, Rūm. 8 : 17. Nārāst us ke wāris nahīṇ ho sakte, 1 Kar. 6 : 9. “Chhoṭe gol” ko “Bāp kī ḡhushī” hai, ki “bādshāhat dewe,” Lūkā, 12 : 32.

HA'SIL I KALA'M.—1. Kyā Masīh ne tumheṇ āzād ki-yā, balki tumhāre wāste aisī abadī mirās mol lī hai? To kaisā zurūr hai, ki *īmāndār* log is zindagī meṇ us hissa se, jo us kī parwardigārī meṇ un ke liye ṭhaharāyā gayā hai, *qināat karen*. Kyā sirf *qināat karen*? Yih to bahut adnī bāt hai. Chāhiye ki we dīlshād, aur ṭarīf, aur shukr-guzārī se maṃmūr howeṇ, un kī hālat kitnī hī past aur muflis kyūṇ na ho. Kurkuranā aur Ḳhudā kī parwardigārī se iṭtirāz karnā is mirās ke muntaziron meṇ kabhī na pāyā jāwe! Agar tum bāzār se kisī muhtāj bhīkh māngnewāle ko leke apnā lepālak aur wāris ṭhaharāte, aur bād us ke wuh thore se dukh ke sabab tum se jhagrā kartā, to tum us kī bardāsht kyūṇkar kar sakte?

2. Chāhiye ki Ḳhudā ke log is dunyā meṇ apnā daur aisā karen, jaisā ki un kī *ḡhwāhishen* sab chīzon se, jo dekhne meṇ ātīṇ, *chhurāī gaī hon*. Chāhiye ki jīne ko aur marne ko bhī rāzī howeṇ; kyūnki agar jīte raheṇ, to hāl kī sab chīzeṇ un kī haiṇ; aur agar mar jāweṇ, to āyanda kī sab chīzeṇ un kī haiṇ. Pūlūs is kā zikr baṛī beparwāī ke sāth kartā hai: “Maiṇ nahīṇ jāntā, maiṇ kyā iḡhtiyār karūṅgā,” Fil. 1 : 22. Bahutere, jo ab jalāl meṇ haiṇ, maut kī *ḡhwāhish* karke zindagī ko sabr ke sāth kātṭe the, jab ki yahāṇ jism meṇ derā kar-te the.

Aur Ḳhudā kī dānāī aur hikmat is meṇ zāhir hotī hai, ki wuh nae maḡhlūq ko aisā mizāj i bejumbish detā hai, jaisā ki 2 This. 3 : 5 meṇ mazkūr hai: “Ḳhudāwand tumhāre dilon ko hidāyat kare, ki tum Ḳhudā ko piyār karo, aur Masīh kī rāh tako.” Mahabbat se *ḡhwāhish* paidā hotī hai; aur sabr se *ḡhwāhish* kī shiddat tham jātī hai. So *ḡhwāhish* i shiddatī adab o bardāsht se, aur mahabbat i garāṇ bare sabr se mel kartī hai. Aur agar Ḳhudā Īsā ke mizāj meṇ aisā mel paidā na kartā, to *īmāndār* apne taīṇ hamesha īzā detā.

3. Is mazmūn se, natīja ke taur par, maḡlūm hotā hai, ki *un kī najāt, jo Masīh ko nahīṇ pahchānte, aur us ke lūhū meṇ kuchh baḡhrā nahīṇ rakhṭe haiṇ, nāmumkin hai*. Tamām dunyā ke liye jalāl meṇ dāḡḡhil hone kī sirf ek hī rāh hai. “Koī bagair mere wasīle ke Bāp ke pās nahīṇ ā saktā,” Yūh. 14 : 6. Abirahām kī barakat *īmān* se gair qaumon par ātī hai, Gal. 3 : 14. Bagair Īsā Masīh ke koī kām Ḳhudā ke nazdīk nek nahīṇ ṭhaharegā; “mujh se judā tum kuchh nahīṇ

kar sakte," Yúh. 15 : 5. Aur bagair ímán ke *Khudá* ko razámánd karná muhál hai, Ibr. 11 : 6. Kitáb i Quds ke mutábíq naját hame-sha dawwat se nisbat rakhtí hai, Róm. 8 : 30 ; aur yih dawwat injil kí *khushkhabarí* se. Róm. 10 : 10. Jo *Isái* taqrír karte hai, ki but-parast aur *kharráb* Masíhí naját pá sakte hai, un se wuhí kah sakte hai, jo ek shaḡhs ne Aflátún ke taríf karnewálon ko kahá, ki Jab tum koshish karte ho, ki Aflátún ko *Isái* *ṭhaharáo*, to *khahardár!* na ho, ki tum áp butparast aur beráh na *ṭhaharo!*

4. Kaisí barí bát hai, ki is abadí mirás men *hamará haqq beshakk o shubha howe!* Bahutere nit koshish karte hai, ki is dunyá men ek fání hissa páwen ; par us abadí mirás se bilkull gáfil rahte hai. Yih hawnák hai. Is se maḡlúm hotá hai, ki insán kí buzurg rúh kahák tak gunáh ke sabab past o badzáṭ ho gaí hai, ki sirf is dunyá aur jism kí parwá kartí hai. Merí suno, ai tum, jo is dunyá ke liye aísí mihnát karte, ki goyá bihisht us men hotí. Jab maut áwegí, aur tum un sab chízon kí, jin ke wáste mihnát o mashaqqat karte ho, baḡhúbí behaḡíqatí pahchánoḡe, tab kyá karoge ? Jab áge nazar karke áqibat ko dekhoge, tab kyá karoge ? Maut kí hálát men tum hayát i abadí kí ummaid i qawí ke wáste kyá na dete !

Pas, agar apní bechárí rúh kí kuchh parwá karte ho, to abhí apne abadí sukh aur dukh se beparwá na raho. "Ziyáda jidd o jihd karo, ki tumhárá talabída aur barguzída honá sábit ho," 1 Pat. 1 : 10. "Darte aur thartharáte apní naját ke kám kie jáo ; kyúnki *Khudá* hai wuh, jo tum men íjád kartá hai, ki tum us kí marzí ke muwáfíq cháho aur kám karo," Fil. 2 : 12, 13. Yád karo, ki tum apní hí naját ke liye kám karte ho ; aur naját chhoṭí aur adní chíz nahí hai. Tum apní hí láchár rúh ke wáste mihnát kash ho-o ; aur is rúh se bihtar tumhárfi kaun chíz hai ?

Yád karo, ki *Khudá* abhí madad o faẓl tumhen dene cháhtá hai ; Rúh-ul-Quds tumhárfi hidáyat karne cháhtí hai ; lekin sháyad wuh tumhen chhor degí ; tab kyá karoge ? Kám kijiyo ! apní naját ke kám kijiyo ! Bihisht beshqímat hai ; us ke liye láíq kám kijiyo !

Aur tum, jo sachchí aur qawí gawáhi páte ho, ki yih mirás tumhárfi hai, háth aur ánkḡ uṭháke us faẓl kí taríf karo, jo tumhen bihishtí mirás ká haqq detá hai ! *Khudá* ke wárison, balki Masíh ke hamwárison ke láíq chál chalo. Jab yahán hájaten maḡlúm hotí, tab bihisht kí taraf rujú láo. Us ko dekhne se *khátirjamaḡ* ho. Yád karo, ki Masíh ne tumháre liye kyá mol liyá ; aur is ko sach karke kahó, Masíh ke liye *Khudá* ká nám mu'áarak howe !

SOLAHWAN BĀB.

MASÍH KA' BA'DSHA'HI' MANSAB.

US KA' RU'HA'NÍ' ASR INSA'N KE DIL PAR.

Ki ham tasauwaron ko, aur har ek bulandí ko, jo K̄hudáshinásí kī muk̄hálifat se ap ko bálá kartí hai, girá dete hain, aur har ek k̄hiyál ko asír karke Masíh ká farmánbardár karte hain.—2 Kar.10: 5.

AB Masíh ke bádsháhi' mansab ká bayán karná hai. Is se hamará jalál wálá Naját-dihinda namēn ázád karne ká iráda púra kartá hai. Agar wuh nabí hoke baní Ádam ko hayát i abadí kī rāh na batlātá, to we kabhí use pahchán na sakte; aur agar wuh káhin hoke un ke kafára karne ke wáste apne taín qurbání na kartá, to un ko muk̄hlasí na milti; aur agar bádsháh na hotá, kī unheg apne lahú kī k̄haridí húi mirás dewe, to un ko us kī maut se koí haqíqí fáida na hotá. Jo kī us ne nabí hoke záhir kiyá, aur káhin hoke mol liyá, so wuh bádsháh hoke kám men lātá hai. Wuh pahle apne logon ke dílon ko apní rúhání hukúmat ke maglúb kar detá hai; aur bad us ke un ká hákim o panáh hoke sári chízon ká intizám unhín ke fáida ke liye kartá hai. So Masíh kī bádsháhat goyá duhrí hai: ek to rúhání, aur bátiní, jis se wuh apne logon ke dílon ko maglúb o mahkúm kar detá hai; aur dúsrí intizámí aur báhari, jis se dunyá ke sáre muamalon ká bandobast un kī naját aur mubárákbádí ke wáste kartá hai. Is waqt us kī rúhání aur bátiní bádsháhat ká zíkr kiyá jáegá. Upar kī sanad men

1. *Gunahgíron ká injil kī muk̄hálifat karní* mazkúr hai. Kis tarah se karte hain? Tasauwaron se; yāne taqirir, uzr, tadbír, wagaira, kī jin se nafsání ádmí koshish karte hain, kī kalám se qáil na ho jáwen. Phir, bulandí, yāne gurúr se, jis ke sabab se nádán insán nahín cháhntá hai, kī naját muft howe; aur jis ke sabab se wuh injil se nafrat kartá hai, is wáste, kī wuh ádmí kī fazílat o k̄hud parastí nest kartí hai. Yih takrár i nafsání aur nádán bulandí wuhí muk̄hálifat hai, jo nafsání díl Masíh ke zidd men karte hain.

2. Phir is men wuh *fath* mazkúr hai, jo injil gunahgáron par pátí hai. Wuh in burjon aur panáhgáhon ko girá detí hai. Is tarah se Masíh Shaitán ke baktar ko, jis par wuh tawakkul kartá thá, lúttá hai; yāne, gunahgár ko chitátá hai, kī us ke sab tasauwar aur bulandí use K̄hudá ke gazab se panáh nahín de sakte hain.

3. Is fath ká *anjám o fúida* mazkúr hain. Masíh apne dushmanon ko na sirf lútte le játá hai, balki unhen apne mahkúm kar detá hai, yabán tak kī we k̄hushí se us kī bádsháhat ke tábi hote, aur us kī k̄hidmat karte hain. Yih to fath se bihtar hai. We na sirf Masíh kī muk̄hálifat karne se báz ate hain, balki us ke liye lagne lagte. Wáh! fath i mubárák! basabab jis ke gálib o maglúb báham shádmání karte hain!

Is se yih natíja nikaltá hai:—

Masíh bádsháhí ikhtiyár o iqtidár un sabhon ke dilon par, jinhen injíl us ke tábidár kar detí hai, rakhtá hai.

Jab ádmí tárikí ke qabze se riháí páte, usí waqt Masíh kí tasallut men dákhil hote haiñ, Kal. 1 : 13. Yih tasallut rúhání aur bátiní hai, Lúká 17 : 20, 21. Masíh apne logon ke dil, tamíz, aur khwá-hishon men takht-nishín hai, Zab. 110 : 3 ; aur us kí bádsháhát sadá-qat, aur árám, aur Rúh-ul-Quds men khurramí hai, Róm. 14 : 17.

Ab daryáft karen, ki Masíh ádmion ke dil meñ apná takht kýúnkar pátá hai ; kis tarah se wuh apná bádsháhí uhda istiamál kartá hai ; aur un ke kyá kyá haqq haiñ, jin par wuh bádsháhí kartá hai.

I. Masíh apná takht ádmí ke dil meñ *kyúnkar pátá hai?* Dil ko fath karne se. Agarchi we, jo bachenge, us ke haiñ, aur Báp ne unhen use diyá, aur wuh un ke liye múá hai, tau bhí Shaitán pahle un par qábiz hai. Khudá ne Kanaán kí zamín Abirahám ko dí thí, lekin Kanaáni, aur Parizzí, aur baní Anák us par qábiz the ; aur Abirahám kí aulád ko us ke liye lagná párá. Isí tarah se ghar us ká hai, jis ne use tamír kiyá ; lekin zoráwar ádmí hathiyár leke us par qábiz hai, aur jab tak ki ek us se mazbút áke use na nikále, wuh rahegá, Lúká 11 : 20—22. Isí tarah se Masíh ko apní ráh gunahgáron ke dil meñ laráí karke kholná hai. Dil us ká haqq hai ; lekin use bajabr lená partá hai. Aur wuh yihí kám kartá hai. Us ke log us kí qúwat ke dín ikhtiyári qurbániñ láte haiñ, Zab. 110 : 3. Us kí qúwat ká dín wuhí hai, jab ki wuh apne kalám se dil par tásír kartá hai ; kýúnki us kí Rúh us ke kalám ko leke, jo har kisé do dhárá talwár se teztar hai, dil ko kholdá hai, Ibr. 4 : 12. Tab tamíz us ke tíron ke sabab ghabrá uñhti hai ; aur we bolte haiñ, kí Ham kyá karen? Am. 2 : 37. Dil chhid játa. Masíh ke tír us meñ tez haiñ, jin se log us ke áge girte haiñ, Zab. 45 : 5, 6. Wuh is tarah se gunahgáron kí sári jhúthí panáhghon ko dhá detá hai. Tab un ke sáre khyal, aur uzr, aur bahána sirf kágaz kí sí díwár thaharte haiñ. Un ke dil tharthar-áte, aur har ek bulandí, jo Khudáwand kí mukhálifat kartí, gir játi hai.

Jab Masíh dil meñ aise paigám bhejtá, to us dil meñ niháyat tasdíq hotá hai ; goyá Shaitán ne us meñ aisi shahrpanáh banáí hai, kí dil pahle hí se maglúb nahín hotá ; balki dartá rahtá, jab tak ki us ká sára jhúthá bharosá játa rahtá, aur wuh apne taín Masíh ká muhtáj malúm kartá. Tab wuh Masíh se rahm mángtá ; aur Khudá, jis ká iráda sirf yihí thá, kí dil hí kí bihtarí ke liye us par gálib áwe, rahmat kí ummaid dikhátá ; aur dil khushí se maglúb hoke apní gardankashí chhor detá, aur us kí tábidári kartá hai.

Kabhí kabhí dil meñ shakk aur dar bashiddat hote haiñ, aur kuchh ummaid nahín. Lekin kaun us Naját dihindá ke pás kabhí gayá hai, jis ne rahm na payá ? Aur ádmion ne us ke maglúb hoke apní ummaid se bartar rahmat páí hai. Lekin sháyad koí kahe, kí Main us ká sakht dushman húa hún. Bhalá ; tau bhí Bádsháh ap kahtá hai, kí Sharir apní ráh chhore, aur main us par rahm karúngá, aur bakasrat muáfí bakhsúngá, Yas. 55 : 7. Phir sháyad kahe, Rahm ká mausim guzar gayá hogá : main ne der tak mukhálifat kí hai. Lekin yih socho,

ki agar aisá huá, to Masíh ne kyúñ intiqám nahín liyá? Kyúñ jahan-nam men nahín bhejá? Wuh abhí tak rahm dikháne ke waqt kí intizárí kartá hai: wuh buland hai, ki rahm kare.

Ákhir ko malúm hotá hai, ki agar main sarkashí men rahúñ, to zurúr halák ho jáúngá; aur agar Masíh ke pás jáúñ, to merá hál kaisá badtar hogá? Tab rahm ke paigámon se tasallí aur himmat pátá hai; chunáñchi is bát se Masíh kí taraf khinchá játá, ki Wuh intihá tak bachá saktá hai, Ibr. 7: 25, aur Jo mere pás átá hai, main use hargiz nikál na dúngá, Yúh. 6: 37; aur Ai sab mihnát kasho, aur bár-bardáro, mere pás áo, aur main tumhen áram dúngá, Matí 11: 28. Tab ádmí kí marzí Masíh kí maglúb ho játi, aur us kí khwáshesh darwáze ko kholke Masíh ko andar áne detí. Jis tarah kí Zabúr men Isráel ká Kanaán zamín men dákhil honá mazkúr hai, yane "Ai daryá, tujhe kyá húá, jo tú bhágá? aur ai Yárdan, kyá húá, ki tú ultí bahí? Aur kyá húá, ai paháro, ki tum menðhon kí mánind chhaláñgeñ márte ho?" Zab. 114: 5, 6; usí tarah ke misál se Masíh ká dil men dákhil honá bayán ho saktá hai. Tujhe kyá húá, ai gardan kash marzí, jo tú Masíh kí maglúb ho gaí? ai sakt dil, tujhe kyá húá, jo tú narm hoke tauba ke páníon ko bahá detá?

Is tarah se dil Masíh ke pás khushí se átá hai, aur kuchh nahín cháhtá hai, magar yih, ki us kí tábidárí aur khidmat men áyanda ko zindagí guzrán kare.

II. Ab daryáft kareñge, ki Masíh un ke dil men, jo us ke maglúb hote haiñ, *kis tarah se hukmrání kartá hai.*

1. Wuh unhen *naí shariát* detá hai; aur kámil tábidárí farmátá hai. Áge dil kisi tarah ke rok ÷ok kí bardásht nahín kar saktá thá: us ká nafs us kí shariát thá. "Ham bhí áge bewaquf, sarkash, fareb kháne-wále, aur gúnágún shahwaton aur ishraton ke bande the," Fil. 3: 3. Lekin abhí nafs bhí us ke hukm men áyá. Dil ke aur Masíh ke bích yihí áhd bándhá gayá hai. Masíh ká hukm hai, ki "Merá júá apne kandhe par le, aur mujh se síkh," Matí 11: 29. Is men kharáí to hai, lekin gulámí nahín; kyúñki Masíh ke qánún sirf kitáb i quds men nahín, balki us ke sachche pairaon ke dilon par likhe gae haiñ; is wáste tábidár honá sahaj aur khushí kí bát hai. Masíh ká júá halká hai. Jo dil Masíh ká tábidár howe, zurúr hai, ki us ká har ek khiyál us ke hukmon se rází howe.

2. Masíh unhen *tambíh* detá hai. Jinhen piyár kartá hai, unhen dhamkátá, aur tambíh detá hai, Ibr. 12: 6, 7. Yih tambíh kabhí badan se, aur kabhí mál se, aur rishtadaron se, aur kabhí dilhí se mutaalliq hai. Kabhí bímárí yá dunyawí nuqsán se unhen chitátá hai; aur kabhí apne chihre kí tajallí un se chhipátá hai. Lekin sab un ke fáida, na un kí halákat, ke wáste hai. Hamen tambíh kí cñharí ke sáth barakat milná is se bihtar hai, ki betambíh hoke gardankashí ke sáth halákat kí ráh men dauren.

3. Wuh apne logon ko us se *phir jáne se bachátá hai*. We isí khatre men haiñ. Un ke dil kí aslí kharábí aisí hai, ki agar wuh unhen na roktá, to we us se píchhe hañ játe. Imtihán ke waqt wuh un ko fazl detá hai. Wuh un ke dilon men gunáh kí khwáhish kamzor

kar detá hai. Har tarah se wuh unheñ Shaitán kí ráh meñ phir jáne, aur us ke jál meñ phir phansne se bachátá hai. Wuh unheñ apní barí qudrat se mahfúz rakhtá hai, kí koí unheñ us ke háth se na chhín lewe, Yúh. 17 : 12. 1 Pat. 1 : 5. Yar. 32 : 40.

4. Wuh *un kí tábidárí ká phal detá hai*. Agarchi we kámil k̄hidmat nahín kar sakte haiñ, tau bhí wuh fazl se k̄hidmat meñ tasallí baḡhshtá hai. Sachche dindár us ko jánte haiñ, kí wuh kasrat se talab detá hai. Us kí k̄hidmat ká phal gunáh kí k̄hushíon se bihtar hai.

5. Masíh *bhítarí kashishon anr jum̄bishon* par hukúmat kartá hai. Jab dil meñ kíná, aur hasad, aur gurúr fazl se larne lagte, tab wuh fazl ko fathmand kar detá hai. Jo koí apná dil us ká mahkúm kar detá hai, so gunáh kí k̄hwáhishon se riháí pátá hai.

Us kí hukúmat *kámgar* hai. Us kí bádsháhat bát meñ nahín, balki qudrat se hai, 1 Kar. 4 : 20.

Wuh bajabr hukúmat nahín kartá hai, lekin *mahabbat kí kashish se*. Kalisiyá Barra kí jorú hai, Mush. 19 : 7. Wuh iḡhtiyárí tábidárí se k̄hush hai, aur na us se, jo bajabr hotí hai. Wuh ham par, jaise lar̄kon par, hukúmat kartá hai; na jaise gulámon par; aur is tarah se us ká bádsháhi iqtidár báp kí sí mahabbat se mil játá hai.

III. Ab un ke *haqq aur fáida*, jo is bádsháhat ke mahkúm haiñ, bayán karenge.

1. Jis jis par Masíh hukúmat kartá hai, *we sab sharaḡ kí lanat se bilkull chhút gae haiñ*. We sharaḡ kí lanat se chhút gae haiñ; lekin sharaḡ unkeliye chál chalan ká qánún hai. Agar sharaḡ se bilkull chhút játe, tau bhí aisí ázádagí se kuchh fáida na hotá. Sachche Ísáí nahín cháhte, kí gunáh karen; is wáste nahín cháhte haiñ, kí sharaḡ se chhút jáweñ. Lekin us kí gulámí o lanat se chhutkára páná barí bát hai; aur us kí k̄habar barí k̄hushk̄habarí hai. We, jo Masíh meñ haiñ, sharaḡ ke hukm meñ nahín; yañe, unheñ naját ke liye sharaḡ ko púrá karná nahín hai, Gal. 5 : 18. Mubáarak haiñ we, jo is k̄hushí kí bát sunte haiñ Zab. 89 : 15.

2. *We gunáh kí qudrat se bach játe haiñ*. Gunáh áge ko un par hukúmat na karegá, Róm. 6 : 14. Ek hí falak meñ do áftáb nahín ho sakte haiñ; jis dil meñ Masíh hukúmat kartá hai, us meñ gunáh kí qudrat tút gaí. Sach to hai, kí gunáh us meñ báqí hai; us kí álúda karnewálí táqat báqí hai; lekin us kí hukúmat shikast ho gaí hai. Wáh ! kaisí k̄hushk̄habarí ! kaisí k̄hushí ká din !

3. Aur ek fáida *panáh* hai. Masíh apne logon ko un ke dushmanon se, aur k̄hatron se, riháí detá hai. Wuh apne sab ímándaron ko naját tak bachátá hai, Yúh. 17 : 12.

4. Masíh apne logon ke *bojh sambháltá hai*. Wuh barron ko apne háth se faráham karegá, aur apní god meñ uṡháke le chalegá, Yas. 40 : 11.

5. *Sulh aur dil-árám* unheñ milte haiñ. Us kí bádsháhat “rástí, aur árám, aur k̄hushwaqtí” hai, Róm. 14 : 17. Aur jab tak us ke áśá kí panáh nahín lete, tab tak árám muhál hai. Lekin is bát meñ saho na karná cháhiye. Yih árám barábar nahín hotá játá hai.

Gunáh se yih áram bárhá bigar játá hai. Tad bhí jab Masíh ke pás tauba karke játe haiñ, tab hamesha use sachche aur púre áram kí bunyád páte haiñ. Imán ke sabab rást gine jáke K̤hudá se sulh páte haiñ, Rum. 5 : 10. Yih har roz barí ziyáfat hai; aur sirf we, jo gunáh se ranjída haiñ, is kí k̤húbí jánte haiñ.

6. *Abadí naját* un ká haqq hai. Bádsháh aur bachánewálá ek hí hai, Am. 5 : 31. Masíh kí bádsháhat is dunyá meñ, aur áqibat meñ, ek hí haiñ. Jo yahán us ke mahkúm haiñ, we wahán us ke sáth bádsháhí kareñge.

HA'SIL I KALA'M.—1. *Un kí kaisí k̤haráb hálát hai, jo Shaitán kí gulámí meñ rahte haiñ, aur Masíh kí hukúmat radd karte haiñ.* Shaitán apne pairaon par, un ke nafson aur hawásson ke wasile se, bará zulm kar karke ákhir ko badle meñ abadí halákat detá hai: Masíh, áram, aur abadí jalál. Tau bhí kitne hí thore Masíh kí taraf rujú láte haiñ! Kitne bahut Shaitán kí abadí gulámí meñ rahne cháhte haiñ! O, kab gunahgár us k̤habís kí k̤hidínat se náráz hoke ázádagí ke liye áh már-enge? Agar koi sunnewálá yihí cháhtá ho, to main apne bádsháh ke nám meñ use kahtá hún, kí Masíh kabhí taubakár ko radd na karegá.

2. *Kaun hamará bádsháh hai?* Yih bát púchhná har ek ko munásib hai. *Merá bádsháh kaun hai?* Yih sab se barí bát hai. Kyá Masíh hamará hai? yá ham abhí talak Shaitán ke tasallut meñ hai? Apní apní rúh kí taftish karo. Adálat ke din Masíh har ek ke dil kí taftish baḡhúbí karegá. Tab wuh kalisiyá meñ se har ek ko, jis ká dil us ká mahkúm na húa, nikál dálegá. Pas, k̤habardár! na ho kí us waqt tumhára dil Shaitán ká mahkúm howe, aur tum Masíh kí bádsháhat meñ kabhí nahín áne páo.

Tum kis kí tábidárí karte ho? Usí ke tábi tum hí ho, Róm. 6 : 16. Jab tak kí Shaitán kí tábidárí karoge, tab tak Masíh ko K̤hudáwánd kahne se kuchh fáida na hogá. Tum use fareb nahín de sakoge.

Kyá tumhári dīndári haqíqí hai, kí sirf záhirí? Kásh kí tum baḡhúbí yád karte, kí K̤hudá har tarah kí dīndári se nafrat kartá hai, magar us se, jo dil se hai.

Kyá tum Masíh ko *aisá* pahchánte ho, kí *us pahchán se naját* howe? Masíh ke sachche mahkúm use is tarah se jánte haiñ; aur Shaitán ke mahkúm andhiyáre meñ rahte haiñ. Kyá tumháre dil meñ Masíh raushní, aur zindagi, aur jalál maḡlúm hotá hai? Kyá wuh tumheñ is sabab se ázíz hai? Kyá tum us se aur miláp karne cháhte ho? Aise nishánon se tum apní hálát kí taftish kar sakte ho.

Tum kaun se logon kí suhbat karne se *k̤hush* hote ho? Kaun se log tumháre barguzide dost haiñ? Tum apne k̤háss doston kí sifateñ jánte ho, aur unheñ beshakk pasand bhí karte ho;—to tum isí se apne tañ jáncho. Masíh ke tábidáron ko Shaitán ke mahkúmon ke bích kyá kám? Pardesí log apne hí mulk ke ádmíon kí suhbat cháhte haiñ; aur waise hí Masíh ke log. We ek k̤háss log haiñ; aur agar tum meñ se kisi ko un kí suhbat se nahín, balki dunyá ke logon se k̤hushí hai, to wuh Masíhi kyúnkar ho saktá? Sach hai, kí donon bádsháhaton ke mahkúm is dunyá meñ mile jule rahte haiñ; lekin

tau bhí ham apne jání dost chun sakte haiñ ; aur jo koí unhen dunya-wí logon se chuntá, so záhír kartá hai, kí Masíh kí mahabbat us men nahín. Agar hotí, to zurúr Masihíon kí suhbat se khush hotá. Muqaddason aur kámilon se khushí hásil karni cháhiye, Zab. 16 : 3.

Kyá tumhári *chál durust aur pák* hai ? Us kí bádsháhat ká *asá rás-tí* ká *asá* hai ; aur agar tumhári *chál durust nahín* hai, to tum kyúnkar us *asá* ke mahkúm malúm hote ?

3. Ham sab ko cháhiye, kí aise Bádsháh ke mahkúm hoke *us ke láiq zindagí guzrán karen*. Us ke namúna par chalo : us kí lík dekhke qadam máro. Har bát men, jahán tak ho saktá hai, usí ke muwáfiq sab kuchh karo. Jo koí yih qasd karegá, aur us se madad mángegá, zurúr, us ká sachchá mahkúm záhír hogá, aur auron ko qáíl karegá, aur ap apne dil men us kí bádsháhat kí tasallí hásil karegá.

SATRAHWÁN BĀB.

MASÍH KA' BĀ'DSHA'HÍ' MANSAB.

US KA' INTIZA'M O PARWARDIGA'RÍ' BARGUZÍ'DON

KE WA'STE.

Aur sab kuchh us ke zerpá kiyá, aur us ko jamáat ke liye sab ká sir banáyá.—Afs. 1 : 22.

Is sanad se pahle thorí áyaton men Púlús shukrguzárí ke sáth Kḥudá ke fazl kí taríf kartá thá, jis se Afsí logon ne Masíh par ímán láne kí niámat páí. Us kí qudrat ká yih hásil ek dúsre jalwagar hásil ke sáth, yāne Masíh ká murdon men se jí uthne ke sáth, mushábih kartá hai ; donon ek hí sabab i muassir se haiñ. Us qudrat ne Masíh ko pastí ke gahráo se, balki maut kí pastí se utháke, use tamám dunyá aur kalisiyá par sarbuland kiyá—"us ko jamáat ke liye sab ká sir banáyá." Yahán chár báten gaur karná cháhiye.

1. Masíh kí buzurgí aur iqtidár : "sab kuchh us ke zerpá kiyá," jis ká matlab yih hai, kí us ká iḡhtiyár o iqtidár, apne sab mahkúmon par, kámil hai. Yih qudrat us ko Báp se dí gai hai ; kyúnki us zátí aur aslí qudrat o iqtidár ke siwáe, jo kí wuh Kḥudá hoke rakhtá hai, dar hále kí wuh Darmiyání hai, ek iqtidár diyá gayá hai, jo us kí tas-díq ká phal yá ajr hai. Fil. 2 : 8.

2. Jis ne yih iqtidár páyá, so sirf Masíh hai : wuh sáre iqtidár aur qudrat par auwal qábiz hai. Maḡhlúq men se jis kisí ne kuchh iqtidár páyá hai, us hí se páyá. Sirf wuhí Kḥudáwand hai, (Yahúdáh, 4), sárí qudrat ká chashma.

3. Sáre maḡhlúqát is iqtidár ke mahkúm haiñ : "sab kuchh" us ke zerpá kiyá gayá hai : us kí hukúmat samundar se samundar tak, balki

‘ālam kī hadd tak hai. “Tú ne use sab bashar par iḵhtiyār diyā hai :” sārī gair zírú chízon, kíron makóron, haiwánon, par, firishton aur insán par : sab ke sab us ke bas men hain.

4. Kháss karke yád karo, kī wuh kis wáste is tarah se kull káinát par hukúmat kartá hai ; yāne, kalísiyá ke wáste ; un ke fáida, aur tasallí, aur naját ke liye, jin ke badle men wuh áp múá. Us ne kalísiyá ko mol liyá ; aur Khudá Báp ne us ke háth sab kuchh supurd kiya, táki us ke lahú ká hásil zurúr howe. Is se yih natíja nikaltá hai :—

Parwardigárá aur intizám kī bádsháhat par Isá Masíh, apne kharíde hūon ke fáida aur abadí bhalái ke liye, kámil iḵhtiyár o iqtidár rakhtá hai.

Chunánchi tú ne use sab bashar par iḵhtiyār diyā hai, táki wuh un sab ko, jinhen tú ne use baḵshhá, hayát i abadí baḵshhe, Yúh. 17 : 2. Aur ham jánte hain, kī sārī chízen un kī bhalái ke liye, jo Khudá ke muhibb hain, milke kám men mashgúl hain.

Pák nawishton ke kahe se, aur dunyá ke muāmalon ko dekhne se sáf zāhir o raushan hai, kī Masíh sab chízon ká intizám kartá hai.

Hizqiel nabí kī kitáb ke pahle báb men Khudá ke intizám ká ek ḵhúb naqsha hai. Us se maḷúm hotá hai, kī sab chakkaron kī rahnú-mái aur intizám, us rúh se, jo un men rahtí hai, kie játe hain ; yāne, is jahán ke sáre muāmale aur sab chízon kī gardish us Rúh i azím ke iḵhtiyár men hain. Aur 26 áyat men, jo goyá sab kī kunjí hai, Masíh ká ek ímá miltá hai ;—sab ke úpar ek *insán sá qálib* baiṭhá hai, aur sab chízon ke intizám ke wáste hukm diyá kartá hai. Agar aisá na hotá, to kis tarah se sab chízen báham milke us ke irádon ko púra kartín, aur anjám tak pahunchátín ; jaisá kī Isráel kī rihái se, aur bahut aur kámoḡ se zāhir húa hai ? Beshakk, agar das ádmí, mutafariq jagahon se, be saláh kie, ek hí waqt, ek hí jagah par, aur ek hí kám kī bábat, jamá hote, to maḷúm hotá, kī kisí poshída tásír ke sabab se yih húa. Kis tarah se aise ajíb májare aise adna wasílát se húa karte hain ? Ámús 5 : 9 ; 1 Kar. 1 : 27 ; balki jab we wasílát, jo maqúl maḷúm hote hain, bilkull ábas nikalte ? Zab. 33 : 16. Agar Masíh ká yih iqtidár na hotá, to us ke log apne lákhon qúwatwar aur saḵht-mizáj dushmanon ke bích, jaise bheren bheríyon ke bích, salámat rahte ? Lúká 10 : 3. Kis tarah se búṭá jal karke ghaṭṭá nahín ? Khur. 3 : 2.

Lekin merá iráda nahín hai, kī sábit karún, kī intizám kiyá játá hai ; par iráda yih hai, kī Masíh ke intizám ke hisse aur taur bayán karún.

I. Wuh intizám kartá hai is tarah se, kī wuh un ko, jo us ke hukm men hain, sambháltá, ijázat detá, roktá, gherṭá, panáh detá, aur sazá o jazá detá hai.

1. Wuh duuyá ko, aur jo kuchh us men hai, apní qudrat se *sambháltá hai*. “Merá Báp ab tak kám kartá hai, aur main bhí kám kartá hún,” Yúh. 5 : 17. “Us se sārī chízen báham milín,” Kal. 1 : 17. Masíh ke jalál ká ek bará hissa yihí hai, kī us par jahán bhar ke maḵhlúqát kī hastí o zindagí har gharí mauqúf hai. Wuh diyá gayá hai, táki zamín ko bahál kare, Yas. 49 : 8.

2. Wuh apní bádsháhat men badon kí bardásht karke *ijázat* detá hai, ki apne fiāl karen. “Farefta aur farebinda us ke iḡhtiyār men hai,” Aiy. 12 : 16. Hān, we, jo Masíh aur us ke logon kí muḡhálifāt karte hai, us se táqat aur ijázat páte hai. Mat kaho, ki Qudús ul Qudsín ko munásib nahín hai, ki badí karne kí ijázat dewe, jis ko agar cháhe wuh rok saktá hai ; kyúнки wuh faqat wuhí hone detá hai, kí jis se wuh apná jalál zāhír karegá ; aur is tarah se us kí bardásht karná aur ijázat dená nek aur rást hai. Masíh ká kám ḡhilqat ke kám se muḡtálá nahín hotá hai. Súraj kí nirálí jot zamín ke nāpāk bhāp se álúda nahín hotí hai. Masíh kí qudsí ádmíon kí badíon se kuchh miláp nahín kartí hai ; aur un ke gunáhon ká uzr us kí ijázat se nahín ho saktí. “Wuh chaṭṭān hai, aur us ká kám kāmíl ; par unhon ne apne taín ḡharāb kiýá,” Ist. 32 : 4, 5. Tau bhí agar wuh badon ko un kí sárí bad ḡhāwishon ke muwáfiq chalne detá, to dunyá men na áráam na intizám báqí rahtá ; is wáste

3. Wuh apne intizám ke lagám se unhen *roktá hai*, taki we apne dil kí púrí ḡhwáhishon par chalne na páwen. “Tú báqí ke qahr ko rok legá,” Zab. 76 : 10. Jab usí ká nek iráda un kí badí ke wasíle se anjám i nek tak pahunchá, tab wuh unhen roktá, aur kuchh ziyáda karne nahín detá hai. Yihí intizám ká jalwagar bhed hai, jis se gaur karnewálá mutaajjib hotá hai. Jab ki ham gunahgár ko badí karne ko mustáid dekhen ; jab maḡlúm hotá hai, ki us ke liye use táqat hai ; jab roknewálá ko nazar nahín áttá ; aur tab bhí wuh apná maqsad púrá nahín kar saktá hai ; yihí ráz i ázím hai. Gunahgár kí ḡharāb marzí kí koshisheḡ ruktín ; jaisá ki Lában men húá, Paid. 31 : 24 ; yá un kí ráh men ájib tarah se inhiráf dālá játá hai, jaisá ki Sanherib ruk gayá, 2 Salátín 19 : 8 ; aur is tarah se we apne maqsad púrá karne se phiráe játe. Júlian sháhansháh ke do bare iráde the : pahlá, Fars ke bádsháh par gálib honá ; aur dúsrá, Jalílíon, ko. jis nám se wuh haqír se Masíhíon ká zikr kartá thá, nest o nábúđ karná. Us ne ṭhaharáyá, kí Fars wále se shurú kare ; aur bađ us ke Masíhíon ko apne buton ke mazbah par qurbán kare ;—par Ḳhudá kí hikmat se us ne apne pahle qasd men maglúb hoke wafát páí. Wáh ! Masíh ká intizám kaisá ázím !

4. Masíh insán ko *ghertá hai*, aur un kí hadden bándhtá hai, ki we un se pare na jáwen. “Un chízon men se, jinhen tú sahegá, kisi ká ḡhauf na rakh. Dekh, Iblís tum men se kaí ek ko qaid men dálegá, ki tum ázmáe jáo, aur tum das din tak tasdíq páoge, Mush. 2 : 10. Dushman qabr men dālne cháhte, par sirf qaid men dāl sakte ; we sabhon par zulm karne cháhte, par sirf bažon ko háth lagá sakte ; we abad tak unhen qaid men rakhne cháhte, par sirf das din tak rakh sakte. Chár sau tis baras Ḳhudá ke logon par Misr men ṭhaharáe gae : aur tab hí, balki us hí rát men, Ḳhudá unhen nikál láyá ; kyúнки tab hí wađa ká waqt púrá húá, Ám. 7 : 17.

5. Dunyá bhar ke ḡhatron aur dushmanon ke bích men Ḳhudáwand Isá apne logon kí panáh kartá hai. Masíh thá, jo búte men Músá ko nazar áyá, jis ke sabab se búṭá jalke mahfúz rahá. Us búte se sháyad Ḳhudá ke log, jo Misr men the, murád the ; aur us ke jalne se un kí niháyat musíbaton ; aur us búte ká mahfúz rahná, ág ke shuālon ke

bích, Khudáwand ke apne logon kī khabargírī aur panáh karne kī mánind hai. Koí apne mahbúb ke liye aisá fikrmand nahín hai, jaisá Masih. “Jaisá parinda phurphuratá hai, waisá hí Rabb ul afwáj Yarúshalam par sáya karegá,” Yas. 31 : 5 ; yāne, jaisá kī chiriyāen kámpitī, aur apne bachchon ko khatre se bachāne ke liye chilláke jald urtī; waisá hí Khudáwand apne logon ko jald panáh degá, aur bacháegá. Masíh men we mahfúz hai.

Hamará apne ghar men, aur apne bistar par árám karná ; hamará kisú tarah se sukh men rahná, sirf usí se hai. Agar sharír ádmī apní sári dilí sharárat kám men lá sakte, to kaun bhalá changá rahtá ; aur kis ká ghar mahfúz rahtá ; aur kis ká khún baháyá na játá ? Sháyad hamári halákat ká mansúba hazéron bār kiyá gayá hai. Ham apní zindagí, aur gharāne, aur mál asbáb, aur ázádagí, aur jo kuchh hameñ azíz hai, us ke liye ham usí kī parwardigáří aur intizám ke qarzdár haiñ. Kyúñkī ham kabhí kabhí Zabúr ke likhnewále ke muwáfiq kah sakte haiñ, kī “Merí ján sheron ke bích hai,” Zab. 57 : 4. Aur Khudá ke logon ke bacháo, aise sharír ádmíon se, kaisí tadbír se hotí hai ? Khudá sheron ke dánt un ke munh men tor dáltí hai, Zab. 58 : 6. Wuh bāzon ko halák kartá hai,—bāzon kī táqat nest kartá hai,—bāzon se un kī sharárat ke wasílát chhín letá hai,—bāzon ko un ke tajwíz kie húe qábú se roktá hai,—bāzon ke gumán ko aur kámon par phir-átá hai,—aur bāzon ko ek dúse ke sáth larátá hai, kī we is tarah se apná zor kharch karen. “Ai Khudáwand, terí sanāten kyá hí bahut haiñ ! Tú ne un sab ko hikmat se banáyá ; zamín tere mál se púr hai, Zab. 104 : 24.

6. Wuh *budon ko sazá detá hai*, aur apne intizám se unhen unhín ke phande men pakarwátá hai. Firáún, Sanherib, Júlian, aur bahut aur bare sharír, us ke badlá lene ke gawáh haiñ. Sach to hai, kī bahut sharír is dunyá men sazá nahín páte ; taubhí kabhí kabhí Khudá sharíron ke sáth is dunyá men aisá sulúk kartá hai, kī auron ko un ke hál se ibrat hotí hai. Khudá ne bárhá apne dushmanon ko aisí már khiláí hai, kī we kabhí us se change na húe. Masíh lohe ke áśá se qaumon men hukúmat kartá hai, Zab. 110 : 2.

7. Wuh unhen, jo us kī k̄hidmat, aur jo us ke logon kī madad, karte haiñ, *jazá detá hai*.—Wuh apne intizám men, apne khazána i latíf se, isí zindagí men, kabhí kabhí apne bandon ko un kī k̄hidmat ke badle sau guné detá hai, Matí 19 : 29. Parwardigár kī áñkh hamesha apne logon kī hájaton, aur tangíon, aur dukhon par nigáh kartí hai. Wáh ! agar us ke kháss logon ke tajriba ká bayán likhá játá, to kaisí jilden hotín ! aur kaisí khushí hotí us ke parhne se ! Us kī Parwardigáří kaisí achambhá, páedár aur ajíb hai ; kháss karke un ke haqq men, jo apne taín use supurd karte haiñ !

II. Ab hí daryáft karná hai, kī *Masíh apní bádsháhat men intizám kis tarah se kartá hai*.

Firishte aur insán donon us ke wasílát haiñ : firishte k̄hidmatguzár rúhen haiñ, jo naját ke wárison kī k̄hidmat ke liye bhejí gaiñ, Ibr. 1 : 14. Lúthar ne kahá, kī un ke do kám haiñ ; yāne, bihisht men gáná, aur zamín men nigahbání karná. We hamáre liye mahabbat ke se bahut

se kám karte haiñ, aur muqaddason se bahut sí mahabbat rakhte haiñ. We is zindagí meñ Khudá ke farzandon kí barí hifázat karke ákhir ko unheñ un ke Báp ke pás le játe haiñ.

Aur jaise firishte, waise hí ádmí Parwardigár ke khádim haiñ; háñ, nek aur bad. Khusrau is sabab se Khudá ká banda kahlátá hai. Bad ádmí apní nápák khwáhishon par chalte húe Khudá kí marzí ke wasílát haiñ. Na ásmán, na zamín, na jahannam meñ koí maḡhlúq hai, jise Masih apne irádon ko púrá karne ká wasila nahíñ kar saktá hai. Lekin wasila khwáh nek ho, khwáh bad, Masih ká kám zurúr nek hai; aur wuh sab kámon meñ dáná, aur khud-muḡhtár, aur be band; aur us ke sáre kám us ke muqaddason kí bhalái ke liye haiñ.

1. Us ke sáre kám nek haiñ. Agarchi wuh badon ke wasíla se bahut kámon ko anjám detá hai, taubhí us ke kám usí kí mánind haiñ—bilkull pák o muqaddas. Súraj kí jot se raushní judí karná is se sahaj hai, ki Masih ke kám aur intizám se qudsí judí-kare.

2. Masih ke intizám ke kám *dánish ke sáth* kie játe haiñ. “Chakkar ánkhoñ se bharí húi haiñ,” Hiz. 1 : 17. We bazor i nábíná nahíñ, balki dánish o khirad se chalte haiñ. Masih kí dánish kháss karke is meñ záhir hotí hai, ki wuh apne logon ke liye aise hál o hisse chuntá hai, ki jin se un kí abadí bhalái howe. Is bát meñ us kí dánish hamárí samajh se báhar hai. Nuqsán se hamára fáida nikáltá hai; aur hamári khwáhish ke dabáne se hamári naját.

3. Masih apne intizám karne meñ khud-muḡhtár hai. Yih bát kí-táb ul quds ke bahut maqámon se záhir hotí hai. Dekho, Zab. 135 : 6; Mush. 19 : 16; Ams. 8 : 15, 16.

4. Koí us ká sámhná nahíñ kar saktá hai, Yas. 43 : 13. Wuh apne matlab ke mutábiq sab kuchh kartá hai, Afs. 1 : 11. Is sabab se us ke wasílát ká yih zikr hai, ki Gárián pítal ke paháron ke b'ch meñ se áíñ, Zak. 6 : 1; yāne, paháron se us ke iráde murád haiñ. Jab kí Yahúd ne Masih ko marwá dālá, tab sirf wuhí kiyá, jo Khudá ke pesh-iráda ke mutábiq thá, Am. 4 : 28.

5. Us ke sáre kám us ke muqaddason kí bhalái ke liye haiñ. Us ke kám ek dúse se nisbat rakhte haiñ; aur sab ke sab us ke logon ke liye kie játe haiñ.

HA'SIL I KALA'M.—Pas, maḡlúm hotá hai, ki ham apní zindagí, aur ázádagí, aur sárí tasallíon ke liye Masih ke qarzdár haiñ. Masih hamáre liye sab chízon kí bandobast kartá hai. Sach to hai, ki wuh hamári nazar se gaib hai; tau bhí wuh hamen dekhtá, aur sab báton meñ hamári khabargíri kartá hai. Wuh ásmán se sabhoñ par, jo us se ḡarte haiñ, nigáh kartá hai; wuh jántá hai, ki ham kab imtihán ke sabab se khatre meñ haiñ, aur kisú tarah se us khatre ko roatá hai, jab ham us se wáqif nahíñ haiñ. Wuh hamen udás dekhke koí khushí názil kartá hai. Wuh apne logon meñ badí kí kasrat dekhke ranj aur taklif bhejtá hai, táki unheñ chitáwe aur pák kare. Jo kuchh ham ne umr bhar páyá, so usí se páyá; aur munásib hai, ki ham us ke wádon ko, aur us kí parwardigárí ko dekhke tajwíz karen, ki un meñ kaisi muwáfíqat hai.

2. Jab Masih tamám dunyá ká intizám kartá hai, to munásib hai,

ki ham apná hál o hissa us par chhoreñ, aur kuchh fikr na karen. Us par bharosá rakhá cháhiye; kyúñki wuh har bát meñ ham se dánishmand aur qúwatwar hai; aur zurúr hamáre liye aisí tadbír karegá, ki jaisí ham kabhí nahín kar sakte.


3. Maḡhlúqát meñ se kisi se na ḡarná cháhiye. Masíh hamará aur un ká Ḳhudáwand hai; aur beshakk hamári aisí kumak kar saktá hai, ki we hamará sámhná kabhí nahín kar sakeñ; yá unheñ aisá rok saktá, ki we hamen zarrar pahunchá na sakeñ; yá un kí badí se hamári bihtarí nikál saktá.

4. Masíh ko ták raho. Us ke kám aur intizám ájúba haiñ. Us ká iḡhtiyár aur qudrat, us kí dánái aur mihrbání, aisí haiñ, ki wuh har tarah se is láiq hai, ki ham apná sab kuchh, is dunyá aur áqíbat ke liye, us par chhoreñ.

Masíh ke liye Ḳhudá ke nám kí ṭaríf kí jáwe.







ॐ नमो भगवते वासुदेवाय
ॐ नमो भगवते वासुदेवाय
ॐ नमो भगवते वासुदेवाय
ॐ नमो भगवते वासुदेवाय